

رواية

معتز شرباش

عمر الشقي

لا تنظر حيث يُريدك الساحر

لوغاريتيم للنشر والتوزيع



عمر الشقبي



لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

عمر الشفي

رواية

الكاتب

معتز شر باش

أضاء البرق لثانية هذا المكتب العتيق، ليكشف، لثانية واحدة، عن مكتب تفوح منه رائحة القَدَم، الأسود والأبيض يطغيان على المشهد، حتى يظن من يلمح المشهد، للوهلة الأولى، أنه ينظر إلى مشهد من فيلم سينمائي أنتج قبل اختراع التصوير الملَوّن، لولا ضوء أصفر باهت، لأباجورة مكتب مائلة، يزيح الظلام، وينتزع سيطرة اللونين الأبيض والأسود من على بقعة صغيرة، تظهر بها أصابع مُدْرَبَة، تكتب بسرعة مُحترِفٍ على آلة كاتبة مُزعجة، تلك التي فشل الرعد الغاضب في أن يغطي على صوت أزرارها، سوى لثانية واحدة.

إنتهى الرجل الغارق في الظلام، والذي يبدو من يده خمسينياً صاحب صحة لا بأس بها، من كتابة آخر كلماته، وضغط بارتياح على زر النقطة، ليسدل الستار على أحد أفضل مشاريعه، من وجهة نظره هو. ثم انتزع الورقة الأخيرة، ليضعها إلى جوار الآلة، مقلوبة فوق كومة ليست بالكبيرة، من الأوراق التي سبقتها.

ثم قام ليخرج تمامًا من دائرة الضوء، ليبدو كظِلٍّ قاتم، وهو يُعيد الآلة الكاتبة، إلى خزانة، تبدو من الصوت التي أصدرته، عند استخدامها، حديثة نوعاً ما، ويتأكد من إغلاقها، ويعود ليلتقط كومة الأوراق التي أنتهى من

عُمر الشقي

كتابها لتوّه، ويقلبها ليضعها في مغلف أبيض يناسب مقاس الورق، لتظهر
الصفحة الأولى البيضاء جدًّا، سوى من كلمتين مكتوبتين بالأسود في
منتصف الصفحة تمامًا؛ "عملية الميزان".

ثم أطفأ النور، وغادر المكتب دون صوت، كأنه شبح.

* * *

معتز شرباش

لا يصح أن يصبح الحلم وسيلة.

رفع هيثم غطاء الكوب الزجاجي الذي امتلأ عن آخره بدخان أبيض كسول، ووضع أنفه داخل الكوب واستنشق دخان الحشيش كله دفعة واحدة، حتى لا يفلت الدخان الثمين، ويتبخّر كأحلام اليقظة. ثم أرجع رأسه إلى الخلف، وأسند ظهره على كُرسيه، وأغمض عينيه، كست ملامحه لذة طاغية لثوانٍ احتفظ خلالها بالدخان داخل رئتيه، وكأنه كثر يأبى أن يُفرط فيه.

نفخ الدخان في سماء الغرفة عديمة الترتيب، والإضاءة، إلا من النور البسيط الذي تصدره شاشة حاسوبه. فتح عينيه ومد يده داخل الكوب الزجاجي، وأخرج السيجارة التي كان قد ثبتّها في وسط الكوب بحرفية، وكان قد علّق فيها قطعة الحشيش التي تحوّلت لدخان كان قد استنشقه كله، ونفخه في سماء الغرفة، لتكتمل الصورة الكلاسيكية لغرفة شاب مُدخن مُهمَل من الدرجة الأولى. أشعل السيجارة بعدما سدّ الثقب الذي علّق فيه "الخابور"، بقطعة صغيرة من ورقة بفرة، فبدت كقميص مسكين فقير مُرتّق، ونفث دُخانها باستمتاع ملحوظ.

كان هذا الـ"خابور" هو مكافأته لنفسه بعد إتمامه المهمة التي كُلف بها. والتي سيحصل بعد إتمامها بنجاح - كما حدث بالفعل- على مبلغ محترم من

معتز شرباش

المال، الذي قد يعتبره البعض مألًا حرامًا، ولكنه لم يهتم، لعدة أسباب، منها أنه يعشق التحدي الخاص باختراق أجهزة الكمبيوتر، وأيضًا لأنه يعتبر تسريب امتحان وضعه دكتور جامعي ظالم - حسب وصف طلابه- قلمًا يعطي أحدهم الدرجة النهائية، عملاً بطوليًا وفيه الكثير من الخير. وأخيرًا لأنه بالطبع، كسائر البشر، يُحب المال. فكان يجوب مواقع الإنترنت، العادي منها، والخفي؛ المُسمّاه بال Dark أو Deep Web، ل يبحث عن مُهمات تحتاج إلى "هاكر" محترف، فيتواصل، عبر وسائل لا يمكن تتبّعها، مع طالبي الخدمات، ويقوم باللازم.

لم يحاول أن يقترب من الأعمال، التي بها نسبة مخاطرة عالية، حتى يتجنب الوقوع في المُشكلات، مع نوع يُخيفه من البشر، فكان يكتفي، بالمُهمات السهلة، قليلة العائد، شبه مُنعدمة الخطورة. برغم أن إمكانياته الإخترافية، تفوق ما يقوم به من مُهمات إلكترونية؛ التي انحصرت في أعمال اختراق حسابات مواقع التواصل، أو بريد إلكتروني، أو صُنع فيروس، أو برنامج يسمح بتسلل صاحبه إلى الجهاز الذي يُثبّت عليه، ولكنه كان، حتى تلك الليلة، راضيًا وسعيّدًا.

فالقناعة كنز، طالما بقيت. ولكن القناعة نفسها تفنى أحيانًا، وهو ما كان يحاول هيثم تفاديته.

عُمر الشقي

كان يتمنى أن يأتي اليوم الذي يعمل فيه في إحدى الشركات الكبرى، أو في إحدى الجهات الأمنية، حتى يقوم بما يحبه، ويجيده، في صالح الخير، وبمقابل مادي يُريحه.

وصلت النار لمنتصف السجارة، حيث كانت بقايا قطعة الحشيش مُعلقة في السجارة، فوصلت اللذة لمنتهاها، ولكن قطع كل هذا رنين جرس الباب، الذي انتزع هيثم من لذته بقسوة. انتفض هيثم كمن ضُبط متلبسًا، وهو ما يبدو أنه قد حدث بالفعل.

"مخدرات واختراق كمبيوتر وسرقة امتحان"

تردد صوت في خلفية عقل هيثم مع تكرار رنين جرس الباب، وكأنه صوت أحدهم يسرد قائمة الاتهامات في قاعة المحكمة، وكادت عيناه، بفعل المخدرات، أن ترى قضبانًا حديدية حوله من كل الاتجاهات.

هَزَّ هيثم رأسه ليطرد تلك المشاهد المرعبة التي هاجمته دون هوادة، والتي جاءت مع من جاء، والذي تمنى أن يختفي هو الآخر، أو أن يكون وهمًا هيئًا له "الخابور". وأيضًا ليطرد بقايا أثر الحشيش من رأسه على أمل أن يكون في كامل وعيه لمواجهة هذا الزائر، غير المرغوب فيه بالتأكيد. فوقت الزيارة لا يبشر بالخير أبدًا.

فمن يزور أحدهم بعد منتصف ليل شتوي قارص البرد كهذا؟

معتز شرباش

توجه هيثم إلى باب غرفته، مترنحًا بعد تعثره بشيء ما، في غير مكانه الطبيعي، كالعادة، على أرض غرفته، وفتحه وتوقف لثانية واحدة تعجب خلالها لعدم وجود الطارق، ولثانية توقع أن أحدًا لم يأت وأن الحشيش قد تلاعب به. ثم أدرك عند انطلاق جرس الباب للمرة الثالثة أنه فتح باب غرفته فقط، وليس باب الشقة كما هيأ له "الخابور" أنه فعل. فأكمل طريقه وهو يتخيل فزع نصف وعيه الحاضر نسبيًا في حالة وجد الطارق عند باب الغرفة، وليس خارج باب الشقة، كما توقع نصف وعيه الغائب.

"أي كلام بيتقال" رد عقله تعليقًا على عبث المخدر بوعيه. كانت الحالة التي وصل إليها هيثم من التخدير، تُشير إلى جودة الصنف الذي تعاطاه.

"والله خسارة الدماغ دي تتفصل" فكّر بخيبة أمل.

فتح هيثم الباب ليجد هيكل شاب، منعت إضاءة السلم الضعيفة، ومعها وعيه غير مكتمل التركيز، وتوقيت الزيارة، عقله من ملاحظة ملامحه بشكل كامل. وقبل أن يسأل هيثم عن أي شيء، دفعه الزائر للخلف بهدوء وثقة، ودخل الشقة وأغلق بابها خلفه، لتغرق الشقة مجددًا - بعد منع الضوء القادم من السلم- في ظلام دامس. بدد جزءًا بسيطًا منه ضوءًا قادمًا من باب غرفته، حيث شاشة كمبيوتر هيثم الحديث جدًّا، وسلاحه الوحيد في العالم، والذي لن يساعده في تلك المواجهة، غير المتوقعة.

وضع نادر فنجان قهوته بجوار جهاز اللابتوب الخاص به، وهو يستمتع بمذاق الرشفة الأولى التي ملأت فمه بالبُن المُر. جلس على كُرسیه، ونظر لشاشة جهازه ليقرأ النص الذي كان قد بدأ في كتابته قبل ساعات، واستمر يعمل عليه كتابةً وحذفًا وتعديلًا لساعات دون كلل. مما أنتج نصًا يتكون من سبع صفحات كاملة، تصف أحداث قصة جديدة كان واثقًا من أنها ستكون سببًا في تغيير حياته.

كان نادر مجرد كاتبٍ هاوٍ يعشق قراءة الروايات، وكتابتها، قرر منذ فترة أن يبدأ في نشر قصصه القصيرة في مدونة خاصة له على شبكة الإنترنت، على موقع من المواقع التي تتيح تلك الخدمة مجانًا. ونشر بالفعل أول قصصه القصيرة، والتي انتشرت سريعًا بين هواة القراءة على مواقع التواصل الاجتماعي، مما شجّعه على تكرار التجربة. خاصة وأن الكثير من قُرّائه نصحوه بالبدء في التفكير في نشر كتاباته في كتاب من خلال دار نشر، لأن - حسب قول بعض القراء- ما يكتبه يستحق النشر، والطرح للبيع.

انتهى من قراءة مسودة موضوعه الجديد، المعنون بـ "تغيير اضطراري". كان يشعر منذ جاءته الفكرة بالإثارة، فهو كان يبحث عن فكرة جديدة، تثبت له

معتز شرباش

أولاً ثم لقرائه ثانياً أن نجاح مشروعه الأول لم يكن ضربة حظ، ويمكن أن يكون بداية لمسيرة طويلة، يتمناها ناجحة.

وبدأ عقله في تصوّر ردود أفعال قرائه على هذه القصة بعد نشرها، ونجاحه الساحق، ورأى نفسه في خياله ضيفاً مُتأنقاً في برنامج حوارى يُجيب على أسئلة إحدى المذيعات الجميلات، والابتسامة تملأ ملامحه، والمذيعه تتغزل في موهبته على الهواء.

كانت الساعة لم تتجاوز السابعة صباحاً بعد، وبرودة آخر شهور الشتاء اللذيذة تملأ الغرفة. تعجّب بشدة عندما سمع طرقات على باب شقته، فهو لا يستقبل ضيوفاً أبداً، ولا صديق له قريب لدرجة تسمح له بمعرفة محل سكنه، ولا يتذكر متى كانت آخر مرة طرق فيها أحدهم بابه.

نظر صوب فراغ الغرفة إلى جواره، عاقداً حاجبيه وقال:

- سمعت حد بيخبّط؟

وبالطبع لم يُجِبْهُ الفراغ سوى بالصمت.

قام عندما سمع نفس الطرقات تتكرر وكأنها إعادة لسابقتها، وكأن الطارق لم يفترض عدم سماعه للطرقات ليطيّلها أو يزيد قوتها، ولكنه فقط أراد أن يرسل له رسالة مفادها أنه لن يرحل قبل لقائه، ونجح في ذلك.

عُمر الشقي

في اللحظة التي فتح فيها نادر باب شقته، تحركت الصفحات على شاشة حاسوبه من تلقاء نفسها وكأن هناك شبحاً غير مرئي يتفحص النص. توقفت الصفحات عند الصفحة الأخيرة، ثم تم تسويد النص كاملاً، ثم مسح كل مرة واحدة، لتعود الصفحات كلها كما كانت، ببيضاء وكأن النص لم يكن.

ثم ظهرت شاشة سوداء في منتصف الصفحة، وظهرت عليها بعض الكلمات تُكتب بسرعة كبيرة، ثم انطفأ الجهاز بعدها بثوانٍ، وبدأ كجثة هامدة لا روح فيها، ولا نبض، على عكس نادر، الذي كان قلبه يدق بقوة في تلك اللحظة في مواجهة ضيفه غير المتوقع.

* * *

معتز شرباش

لا تنتظر حيث يريدك الساحر.

٤

حالة من الاسترخاء تُخيم على أحد أقسام الشرطة في أحد أحياء القاهرة الراقية، الضباط على مكاتهم يتبادلون النكات والتعليقات على كل شيء. كل منهم يمسك بهاتفه المحمول ليرسل رسالة، أو ليكتب تعليقًا ما على facebook، ولم يمنعهم هذا من الضحك أو التعليق على كلام بعضهم البعض، على الحائط خلف مكاتهم لوحة كبيرة تحمل عبارة "الشرطة والشعب في خدمة الوطن"، كان الجو العام يوحى بمرور تلك الوردية على خير ما يرام، ولكن الجو العام كالسياسي الناجح في العالم كله؛ قلّمًا يقول الحقيقة.

خارج القسم كان الشارع هادئًا هدوء أفلام الرعب قبل مقتل أحد أبطاله، لا شيء يتحرك في الشارع سوى نسمة صيف نادرة، يقف أمين شرطة بجوار باب القسم الخارجي يتحدث عبر أحد الهواتف التي تقع سماعتها في الجهة الخلفية، مما يُعطي انطباعًا زائفًا لمن لم يستخدمها من قبل أن صاحب الهاتف مُخطئ، أو أن الهاتف به عيب تصنيع سخيف.

يقرب من باب القسم شاب متناسق الجسد حليق الذقن، وسيم الملامح، يرتدي "جينز" أزرق اللون، "وتي شيرت" أبيضًا، بلا أي علامات تميّزه، يداه في جيوبه في مشهد لا يناسب حر مايو الذي ينذر بصيف شديد الحرارة، وعلى ظهره حقيبة رياضية سوداء. اقترب من الأمين وكأنه ينوي سؤاله عن

معتز شرباش

شيء مُحدد، ولكن الأمين أدار وجهة للناحية الأخرى في إشارة كانت تقول بوضوح "هقطعك لو فكّرت تفصلي" وكانت أوضح من أن يُخطئ أي أحد ترجمتها إلا لو كان أغبى من "هبنّقة" شخصياً.

ابتسم الشاب وتركه حيث هو تجنباً "للتقطيع" وعبر باب القسم. مشى خطوات بطيئة في الممر الضيق المؤدي لساحة القسم، ولكن الأمين استوقفه قائلاً بنفاد صبر:

- رايح فين يا أستاذ؟

وقف الشاب ونظر جانبه دون أن يعتدل بجسده كاملاً ليواجه الأمين ورد بأدب:

- محضر لشركة التأمين.. العربية اتخبطت ولازم محضر.

- في وشك على طول، قالها وأكمل مكالمته التي لم يكن يريد لها أن "تفصل"، وأكمل الشاب طريقه إلى الداخل.

كان الشاب يتحرك ببطء يبدو مُتعمّداً، ينظر يميناً ويساراً وكأنه ربّ العمل جاء ليتأكد من سيره على الوجه الأمثل، أو ليتصيّد خطأ ارتكبه أحد موظفيه قبل أن يتمكن الموظف من إخفاءه.

خرج الشاب من الممر الضيق، ليجد نفسه في ساحة واسعة، تضيؤها مصابيح "النيون" البيضاء، بصوتها الذي يذكر بالذباب، وتوزعت على سقفها، وبين المصابيح الزنّانة مراوح سقف تعمل على إزاحة حرّ الصيف

عُمر الشقي

دون نتيجة تُذكر، جعلته يتساءل عما سيكون عليه الوضع هنا أثناء نهار أغسطس، إذا كان هذا هو الوضع في منتصف ليل مايو.

كان في مواجهة الشاب مكاتب ضباط وردية الليل بملابسهم البيضاء ونجومهم اللامعة. وحولهم بعض المدنيين المُستسلمين كُل لمصيره؛ منهم من ينتظر أن ينتهي الأمين من مكالمته التي لا يبدو أنها ستنتهي الليلة لتحرير محضراً، ومنهم من نسي من كثرة مشاكله، أو همومه، أو طول انتظاره، سبب انتظاره، ومنهم من ينتظر إطلاق سراح أحد معارفه من الحجز، إلى يمينه كان هناك سلم تكسرت بعض درجاته وظهر منها حديد التسليح، تبدو وكأنها فخ لمن يصعد دون حذر، وإلى يساره كان هناك مكتب عليه دفتر كبير مُغلق لا يجلس خلفه أحد، غالباً هو مكتب الأمين صاحب المكالمة المُهمة، خلف مكاتب الضباط ممران، إلى اليمين الممر المؤدي لغرفة الحجز والحمامات، والآخر المؤدي لغرفة المأمور ورئيس المباحث ومعاونيه والبوفيه والأرشيف.

ابتسم الشاب عند سماعه جلبة قادمة من خلفه، من ناحية باب القسم، حيث الأمين صاحب المكالمة المُهمة، نظر إلى ساعته ليجدها تخطت منتصف الليل بدقائق، ميّز صوت الأمين صاحب المكالمة المُهمة يقول ولكن بصوت تعمّد زيادة خشونته بهدف إرهاب السامعين:

- رايح فين ياد انت وهو بالورد دا؟؟

معتز شرباش

ثم يلين صوته فجأة، ولكنه دون قصد خرج عاليًا كما كان في جملته الأولى،
قائلًا:

- ثواني يا عسلية. افترض الشاب أن تلك الجملة الأخيرة كانت لمن كان
يتحدث معه عبر الهاتف، وها قد جاء من يقاطعها.

ثم يعيد الأمين ضبط حنجرتة بدقة تفوق دقة عبد الحلیم حافظ نفسه في
أغنية "قل لي حاجة"، قائلًا بصوت يليق بالمجرمين:

- دا قسم يا ابني مش فرح.

رد عليه شاب مُعدم يحمل لفة ورد كبيرة ذات قوائم خشبية، من النوع
الذي لا تراه سوى في الأفراح:

- الطلبية دي جاية للمأمور.. الهانم بعثاهاله مفاجأة عيد جوازهم أو عيد
ميلاده مش عارف.. احنا محل "روز" اللي في الشارع اللي وراكم.

- روز؟! أراجوز لما يركبك.. الصناديق دي لازم تفتش.. انت داخل بيتكم؟
وبعدين المأمور مش هنا.

- يا باشا باقول لك تورتة وجاتوه للمأمور.. عايز تلعب فيها براحتك.. بس
انت المسؤول لو حاجة اتعاصت.

صرخ الأمين وكأنه أهين في شرفه:

- اتعاصت عيشتك بجلة يا بغل.. ما تتكلم عدل ياد وبلاش لماضة.

تحولت أنظار كل من في القسم صوب الباب بالطبع، ما عدا الشاب الذي
أخرج يديه من جيوبه. كان يرتدي قفازين رقيقين من النوع المُستخدم في

عُمر الشقي

عيادات أطباء "ولاد الناس" فقط، وضبط منبه ساعته، ثم رفع نظره ليتأكد من أن أحدًا لا يراه، على الرغم من وقوفه أمام الجميع دون اختباء، ولما تأكد، خلع حقيبته من على ظهره، وارتماها عكس اتجاهها الصحيح على صدره، ليجد نفسه مُقلدًا من صنع الهاتف ذا السماعة في عكس اتجاهها المعتاد، فابتسم.

فتح الحقيبة بهدوء وهو ينظر للضباط، ليجد بعضهم تحرك ناحية الباب لفك اشتباك على وشك الحدوث. فنجاح حيلة الساحر تعتمد في الأساس على تحويل انتباه الجمهور بعيدًا عن مكان وقوع الحيلة.

أخفض رأسه عند مرور بعض الضباط بجانبه، وأخرج من الحقيبة أربع اسطوانات صغيرة الحجم، في أعلى كل منهن حلقة، ثم نزع الحلقات كلها بهدوء خبير، وألقى كل واحدة منهن في اتجاه حتى يُغطي الساحة كلها بهدوء شديد وكأنه عجوز يسقي نباتات حديقته الخلفية في إجازة صيف طويلة بعد التقاعد.

تصاعد الدخان الأبيض المُسيّل للدموع من كل الاسطوانات مُطلقًا صوتًا عاليًا يشبه صوت تسرب الغاز من أنبوب يتم تجربته في المستودع، وانتشر بسرعة في الساحة التي بدأت تفقد معالمها.

انتزع الشاب قناعًا من حقيبته واتجه للستار الأبيض واختفى خلفه، ليتوه وسط فوضى عارمة ضربت المكان فجأة.

معتز شرباش

سادت القسم حالة من عدم التصديق ممزوجة بالدموع والمخاظ وصيحات متفاوتة في كل شيء، منها العال الواضح، ومنها الممزوج بحشرة مختنقة، ومنها الذي لا تميزه بسبب النحيب الذي يصاحبها، كلمات تطايرت على أمل أن تجد مكاناً لها في أذن تنصت، أو وعي يدرك:

- أقنعة الغاز...

- السلاح...

- حاسب يا حمار...

- اااااااااااااا...

- اقفل الباب.. اقفل الباب يا زفت ما حدثش... كح كح كح.. يخرج.

في تلك الأثناء كان الأمين مجدي المسؤول عن غرفة الحجز مُتجهًا إليها لتأمينها ضد ما يمكن أن يكون محاولة لتهرب الخطرين، ولكنه شعر بيد تقبض عليه من الخلف، وأخرى تنتزع حلقة مفاتيحه، عندما أراد أن يقاوم برغم هجوم الغاز الذي لا يرحم على رثتيه ووجهه، شعر بتيار كهربائي قوي يسري في جسده، ارتج له كل كيانه، وسقط على الأرض غير قادرٍ على الحركة، ولكنه لمح قبل أن يسقط في غيبوبة، قناعاً واقياً من الغاز يغطي ملامح من اعتدى عليه.

اتجه الشاب تحت غطاء الغاز ناحية الممر المؤدي لغرفة الحجز، أخرج من حقيبته قنبلة غاز أخرى، فتح باب الحجز وألقى القنبلة إلى الداخل بعد أن سحب حلقة أمانها، لتطلق القنبلة الغاز داخل الغرفة الضيقة. بعد ثوانٍ

عُمر الشقي

فتح الشاب باب الحجز ودخل بسرعة وكأنه يعرف طريقه، بحث لثوانٍ وسط المذعورين عمن جاء من أجله حتى وجده؛ شاب تبدو عليه ملامح الثراء، ولا ينتمي لهذا المكان بأي حال.

اتجه إليه وانتزعه من مكانه انتزاعًا، وأخرج قناعًا مماثلًا لذلك الذي يغطي ملامحه من حقيبته ووضعها على وجه الشاب المذعور، ليتنفس الهواء النقي بقوة وكأنه أنقذ لتوه من الغرق.

خرج الشابان في اتجاه الساحة مُجددًا، أحدهما هادئ ومسيطر والآخر لا يدرك أي شيء سوى أنه يجب أن يطيع صاحب اليد التي تمسكه من الخلف.

كانت الفوضى لا تزال مسيطرة على الموقف، ولكن المعتدي لاحظ بداية ظهور أقنعة الغاز، فنظر لساعته، حيث أدرك أنها - أقنعة الغاز - كانت كفيلة بمعادلة ميزان القوى، فمن السهل أن تقتحم قسمًا يملأه هواءه الغاز وأنت صاحب قناع الأوكسجين الوحيد، ولكن عندما يحصل الطرف الآخر عليه فإن الوضع يختلف تمامًا.

تحرك الشاب ساحبًا خلفه الهارب بسرعة عكس اتجاه باب القسم، دخل الممر الآخر المؤدي لغرف ضباط المباحث والمأمور، وهو يخرج من حقيبته آلة صغيرة لتكسير القفل، إذا وجده مغلقًا.

فتح غرفة مأمور القسم، التي لم تكن مغلقة بأي قفل، فأعاد الآلة الصغيرة إلى حقيبته، ونظر حوله في العُرفة، التي كانت مظلمة وهادئة وكأنها لا تنتمي

معتز شرباش

لهذا القسم الذي يخوض حربًا ضد عدو خفي حتى اللحظة. دفع الشاب أمامه وأغلق الباب خلفه، وقال للشاب:

- لؤي بيه.. ما تخافش.. بابا باعتني عشان اجيبك.

في تلك اللحظة انطلق صوت المنبه الذي ضبطه قبل بداية هجومه مُعلنًا انتهاء الوقت الذي حدده الشاب للعملية قبل بدايتها، وهو الوقت الذي قدّر الشاب أن تحتاجه القوات لإعادة السيطرة على الموقف، ولهذا كان عليه أن ينتهي من مهمته الآن و"الآن تعني الآن".

* * *

مُذكرات

١

هي؟

هي حياة..

بل هي الحياة.

أنا أحياء بها، دون أن تعلم هي..

وكيف يستطيع من هو مثلي، مُصارحة من هي مثلها، بما أشعر به

تجاهها؟

انتمائي للفرع الفقير من العائلة، وصمني بلعنة أبدية..

كُتِبَ عليّ أن أرى حلمي يتحقق لغيري.. وكأن الفقر وحده لا يكفي.

فلا أنا بعيد كفاية، لأحاوله، ولو عبثاً، زرع بذرة النسيان، في أرض

ترفضها.

ولا أنا أهل للاقتراب.

* * *

5

يفتح رجل كبير السن صغير الجسد باب فيلا الملياردير رامز غالي التي تُعتبر واحدة من أجمل فيلات التجمع الخامس.

تبدو عليه بقايا علامات نُعاس فارقه لتوّه. رامز غالي؛ رجل الأعمال الذي لم يترك مجالاً إلا واقتحمه برأس ماله، مُستعيناً بشبكة واسعة من العلاقات التي كوّنّها على مدار سنوات عمله منذ أن كان شاباً في بداية حياته، يتمتع بعلاقات طيبة مع رجال الأعمال، والسياسة، والإعلام.

كان الطارق شاباً ذا جسد رياضي، يبتسم ابتسامة مصطنعة لم يبذل أي جهد في محاولة إخفاء اصطناعها، وخلفه شاب في مثل عمره تقريباً ولكن يصغره حجماً بقليل، ولكنه لم يحاول حتى اصطناع الابتسامة، فكان متجهماً وهو يلقي بسيجارة لم يتمكن من الانتهاء منها، وهو ينظر خلفه وكأنه يتأكد من أن أحداً لم يتبعه، وكأن الوقت والمكان فرضا جواً من الغموض، فأكمّله هو دون وعي بالتفاته لا سبب لها، سوى - ربما- صوت نباح كلب غير ظاهر.

قال "زائر الفجر" بصوت يحمل في طياته غضب مكتوم، حاول أن يكون عالياً كفاية ليُغطي على صوت نباح الكلب القريب:
- رامز بيه موجود؟ أنا الرائد وائل تحسين.. مباحث.

عُمر الشقي

أفسح لهم الرجل طريق الدخول، ولم تظهر عليه ملامح الدهشة المتوقعة أو القلق، التي عادة ما يستقبل بها أصحاب البيوت هذا النوع من الزيارات المتأخرة، وكأن الرجل كان يتوقع الزيارة.

حيث قال:

- اتفضل يابيه.. دقائق ورامز بيه هيكون مع سعادتك.

قادهما الرجل عبر فيلا ظلّمها مظهرها الخارجي الرائع، حيث أن داخلها كان أروع بكثير من مظهرها الخارجي عصري الطراز.

كانت الفيلا على غير المتوقع عصرية بجدارة. الرخام الأسود على الأرضية يمكن للساير فوقه أن يرى فيه أدق تفاصيل ملامحه بسبب لمعانه الذي جعل منه مرآة غامقة اللون.

لا وجود لحوائط سوى تلك التي تفصل داخل الفيلا عن خارجها، حتى أعمدة الخرسانة التي لا يمكن الاستغناء عنها كانت من كثرة اللوحات المعلقة عليها، والزخارف التي تغطيها، تبدو وكأن وجودها كان لهدف جمالي وليس هندسي.

جلس الرائد وائل على كرسي يكسوه جلد بني اللون غامقه، وهكذا فعل رفيقه، الذي كان لا يزال متجهماً وإن كانت ملامحه قد حملت الكثير من الانهيار بالإضافة إلى الغضب المكتوم في نفسه الذي جاء به. وبعد دقائق ظهر إلى جوارهم رجل تخطى الخمسين من عمره، أسمر البشرة، ذو جسد

معتز شرباش

متوسط، وكأنه ظهر من العدم، حيث لم يصدر عنه أي صوت وهو في طريقه إليهم، سلّم على الرائد وائل ورفيقه بفتور، وقال مُقدّمًا نفسه:

- مساء الخير يا افندم.. رامز غالي.

قدّم الرائد وائل نفسه مُجددًا، وقال:

- الرائد وائل تحسّين.. مباحث قسم الشرطة اللي ابن سعادتك محتجز فيه.

ثم أشار لرفيقه وأكمل:

- النقيب شريف معاون المباحث في القسم نفسه.

نقل رامز نظره بينهما، وساد صمت، ثقيل كالظلام المشهد لثوانٍ، ثم قال متسائلًا:

- تشرفت يا افندم.. أقدر أساعدكم ازاى؟؟

رد وائل وهو ينظر لرامز بقوة تليق بضابط مباحث، وكأنه - هو نفسه - جهاز لكشف الكذب، وستكفيه نظرة ليعرف صدق الملياردير، أو يكشف كذبه:

- رامز بيه.. واضح إنك كنت متوقع الزيارة.. ما فيش أي ملامح انزعاج عليك من زيارة غالبًا بتكون بسبب مصيبة لما بتيجي من ناس زيّنا وفي وقت زي دا.. ودا معناه إنك غالبًا عندك معلومة بخصوص سبب الزيارة.. دا لو مكانش حضرتك ليك يد في اللي حصل النهاردا.

تسرب بعض القلق لنفس الملياردير من اتهام وائل الصريح والمباشر له، وهجومه المُبكر، على عكس توقعه، التقطت عين الضابط الذكي، التي

عُمر الشقي

أثقلت موهبتها سنوات من التحقيقات، القلق الذي تسرب لنفس رامز، فأكمل ليطرق على الحديد وهو ساخن:

- حضرتك يا رامز بيه علاقتك كويسة جدًا بالحزب.. ويمكن بالوزير شخصيًا.. واللي حصل النهاردا ممكن يؤثر على صورة الوزير نفسه.. ودا أعتقد إنه مش هيكون له تأثير إيجابي على علاقات سعادتك.. يا ريت تساعدنا نفهم اللي حصل علشان توضح الصورة اللي من مكاني دا دالوقت شايفها مش لذيذة بالمره.

نجح وائل في نزع الكثير من الثقة عن ملامح رامز بعد تهديده المُستتر، وظهر هذا النجاح جليًا في نبرة صوت رامز غالي التي خرجت ضعيفة عما كانت عليه منذ ثواني:

- طب حيث إن الموضوع كدا.. يبقى نشرب قهوة لأن الكلام هيطول شوية. أومأ وائل رأسه موافقًا، ولم يتحرك رفيقه الصامت شريف، ولم يتوقف عن النظر لرامز أيضًا، فاعتبره رامز موافقًا، فأشار للرجل الذي فتح لهما الباب منذ قليل وقال:

- قهوة يا عم حمدي من فضلك.

اقترب عم حمدي وسأل الضيوف عن قهوة كل منهم كيف يشربها وغادرهم بهدوء. "هل تلك الأرضية كاتمة للصوت؟ أم أن نباح الكلب غطى على أصوات خطوات الرجل؟" فكّر وائل وهو يتابع خطوات حمدي الصامتة.

معتز شرباش

- وائل بيه.. أنا بكل بساطة ممكن أنكر أي معرفة ليّ باللي حصل.. وكمان أخرج الداخلية وأطالب بعودة لؤي ابني.. لكن زي ما حضرتك قلت أنا علاقتي كويسة بالحزب وبالحكومة ومش عاوز أبدًا حد ياخذ عني فكرة إني باستغل علاقتي لمصالح شخصية والدليل إني سايب ابني مرمي في الحجز بقاله ٤ أيام وأصرّيت إنه يتعامل زيّه زي أي مواطن مصري في مكانه.. وكمان مش عايز حد ياخذ عني صورة مش حقيقية إني مسح مجرمين يعملوا لي شغلي.

صمت لثوانٍ حتى وضع عم حمدي القهوة أمام كل منهم وغادر، تبادل خلالها الضابطان نظرات الحيرة، ثم أكمل:

- الموضوع إني من ساعة جالي تليفون على موبايلي من رقم غريب ودا شيء غريب وفي وقت أغرب.. لقيته حد بيقول إنه هربّ ابني من الحجز وفي خلال نص ساعة هيرجّعه تاني لو ما دفعتهش ٢٥٠ ألف جنيه كاش غير قابلة للرصد.. وقفل السكة.

اتصلت بمدير مكنتي وعمل اتصالاته وأكد لي إن القسم دا فعلاً حصلت فيه عملية اقتحام.. ساعتها حسبتها ببساطة.. ابني مع واحد بيطلب فلوس.. ونجح بالفعل إنه يهرب بيه من قسم شرطة وطالب مبلغ تافه.. يبقى لازم ادفع.. خاصة إنه لو حولها لحالة خطف ودا سهل جدًّا وفي متناوله بالفعل ممكن يطلب ملايين وهادفع طبعًا بس هتبقى فضيحة للداخلية أولًا ثم ليّ.

عُمر الشقي

عاد صوت نباح الكلب في الخارج ليملاً الصمت الذي خيم على القفلا لثوانٍ، وكأنه أراد أن يستغل فترة الصمت ليشارك في الحديث، بعد صمت رامز ليرتشف بعض من قهوته.

- كلمته على نفس النمرة وطلبت منه وقت أحضر الفلوس.. قالي فات ٢٢ دقيقة من المهلة.. وقال إن خزنة مكنتي فيها بالفعل أكثر من الـ ٢٥٠ ألف جنية.. ودا صحيح.. مش عارف عرف منين ولا كان بيخمن.. بس ثقته كانت باينة من صوته.. وبيتكلم بهدوء حد في إجازة استجمام مش في وسط عملية كبيرة من النوع الخطير دا..

وافقت.. الغريب إنه لما سألته نتقابل ازاي كانت المفاجأة الكبيرة.. لأنه قالي إنه واقف على باب القفلا في عربية لانسر.

صمت رامز لثوانٍ ليري وقع التفاصيل على ملامح ضيفيه، وكانت ملامحهما كما توقع، تحمل الكثير من الغضب الممزوج بالدهشة أو التعجب ثم أكمل بعدما تأكد من أن حالة الانهيار الذي استحوذت عليه من جرأة السارق لم تكن مقصورة عليه فقط:

- لما بصيت من شباك أوضة مكنتي لقيته فعلاً واقف قصاد باب القفلا بكل جراءة.. فكّرت ثواني أبلغ الشرطة بس طبعاً افكرت إنه لسّا جاي من عندكم.. سامحوني بس دي الحقيقة.

فكّرت أصعّي الأمن يضربوه بالنار.. أنا عندي الأمن مرخص لهم سلاحين.. لكن لاقيتها فكرة ساذجة.. عربيته دايرة ووشه للشارع.. دوسة بنزين وهيبقى

معتز شرباش

بعيد.. وواحد قدر يدخل قسم ويخرج بابني من غير ما يتقبض عليه، رجالة
الأمن عندي مش هيكونوا مشكلة بالنسبة له.. دا غير إن لؤي كان ممكن
يكون في العربية ويتصاب.

المهم؛ طلب مني أنزل بشنطة الفلوس بنفسي.. نزلت.. لقيته قافل قزاز
العربية.. فتح شنطة العربية من جوّا حطّيت فيها الفلوس.. ومشى.

صمت ليرتشف رشفة أخيرة من قهوته، فقال وائل ساخرًا:

- مشي؟ طب وبعدين؟ وابن سعادتك؟ قال لك هتستلمه مع التحليل بعد
يومين؟

ابتسم رامز وقال:

- تصوّرت كدا لدقايق.. تصوّرت إنه نصب عليّ.. بس بعدها بعث لي رسالة
فيها مكان لؤي.

تملّك الدهول من ملامح الضيفين، ضحك رامز لثانية واحدة، ثم أكمل:

- أنا بعث حد يجيبه وهو في الطريق دالوقت.. وأول ما يوصل لهُ هيكلمني..

لكن اسمحووا لي طبعًا إني انكر كل اللي قلته دالوقت في أي تحقيق رسمي..

أنا قلت لحضراتكم اللي حصل عشان اثبت حُسن نيّتي.

ابتسم وائل ابتسامة ساخرة ونظر لشريف الذي ظهرت على ملامحه

ابتسامة مماثلة لأول مرة منذ نزل من بيته منذ ساعات، واستمر الصمت

لثوانٍ، حتى قال وائل وهو يحاول جاهدًا أن يخرج صوته جامدًا ولكنه فشل

وخرج صوته ساخرًا رغمًا عنه:

عُمر الشقي

- طب وابن سعادتك.. بعد ما تلاقيه.. مش هترجّعه الحجز؟
- عقد رامز حاجبيه حيث لم تعجبه نبرة السخرية التي خرج بها سؤال وائل ورد بثقة بها بعض الغضب المكتوم:
- ابني كان في القسم.. المفروض في حماية حضراتكم.. وواحد دخل القسم وخرج بيه.. المفروض مني أضمن سلامته تاني ازاى؟ والله أعلم لو كان لؤي بخير ولا حصلت له حاجة.
- صمت لثوانٍ ليرى رد فعل موقفه على ملامحهما، ولكن لم يصله منهما سوى استهزاء خفي، فأكمل ضاغطاً على كلماته، وهو يُعيد فنجانه على الطاولة السوداء أمامه، بصوت جامد وبثقة جاهد حتى يجعلها كاملة:
- شوفوا يا جهوات.. أنا ابني في خلال دقائق هيكون في الحفظ والصون.. لأنني
- وما تستغربوش- مصدّق الواد اللي خطفه.. ومش هيرجع الحجز تاني..
- بس في نفس الوقت ما حدش عايز يحرج الداخلية.. تمام؟؟
- انتظر منهم موافقة متوقعة، ولكن كل منهما لم تفارق ملامحه تلك الابتسامة الساخرة المُستهزئة، فأكمل ولكن بثقة بدأ لسبب لا يعلمه، يفقدها هو شخصياً، كان هناك شيء في ملامح الضباط يدفع ثقته للتلاشي، وكأنها - ثقته- قلعة من الرمال على الشاطئ في مواجهة بحر هائج:
- أنا فكّرت إن النيابة تطلق سراح لؤي بكفالة تحددها هي براحتها.. ونقنن الوضع.. وما حدش يعرف حاجة عن اللي حصل الليلة دي عشان ما

معتز شرباش

نحرجش حد.. وزى ما حضراتكم عارفين إن لؤي ممسوك في حادثة عربية..
والموضوع هيخلص في خلال أيام والبلاغ هيتسحب وهيخرج قانوني.. ولاد
الست اللي اتعورت بيضغطوا بس عشان يزودوا التعويض لما عرفوا إنه
ابني.

بس وجوده في الحجز مُقلق جدًّا.. خصوصًا بعد النهاردا.. ووجوده فيه مش
بيفيد حد.. وكمان خروجه منه مش هيضر حد.

وعندما لم يجبه أحد من الضيوف، ولم تفارق ملامحهم تلك الابتسامة
الساخرة، قال بغضب مكتوم:

- أحب اسمع رأي حضراتكم في كلامي.. ولا اكلم حد كبير من الوزارة اتفاهم
معاه؟؟

في إشارة منه إلى نفوذه الذي لاحظ أن ضيفيه قد نسياه أو تناسياه، فقال
وائل والابتسامة الساخرة لا تزال تملأ وجهه:

- طب مش لما نتأكد الأول إن ابن سعادتك بخير؟؟ ولّا إيه؟؟

- اعتبره ف...

قطع جملته رنين هاتفه المحمول، فظهرت تلقائيًا ابتسامة المنتصر على
ملامحه مُعلنة لضيفيه أن من ذهب ليحضر ابنه يتصل به في الوقت
المناسب، ولكن لم تدُم ابتسامة المنتصر على ملامحه سوى ثوانٍ بعد رده،
حيث علّت ملامحه خيبة أمل يكاد لا يميّزها من يراه من كثرة الغضب
الممزوج بها.

عُمر الشقي

تسارعت أنفاسه، وضافت عيناه، ودون كلمة واحدة أغلق الهاتف وألقى به على الطاولة ونظر بغضب وشر لضيفيه اللذين كانا ولا يزالان يبتسمان باستمتاع ملحوظ، ولم يقطع الصمت سوى نباح الكلب، الذي ترجمه عقل رامز وكأنه ضحكة طويلة متقطعة تسخر منه، وبعد ثوانٍ من انتظاره لأي رد فعل من ضيفيه لم يحدث، قال أخيراً:

- واضح إنكم عندكم معلومة مش عندي.. حد منكم ناوي يتكلم؟؟ كفاية تضييع وقت لحد كدا.. ابني فين؟؟

رد وائل بثقة وكأنه يُقرّ أمرًا مفروغًا منه لا يحتاج لإقرار:

- في الحجز طبعًا يا رامز بيه.. هيكون فين يعني؟؟

- نعم!!!!!! قالها بصوت عالٍ وبغضب واضح، وشعر بعدها بعدم لياقة الطريقة التي تحدث بها، فعاد وقال مُغمغماً بصوت مرتجف:

- بتقول في الحجز؟؟

- بالظبط.

- طب ليه قلت ان حد هرّبه من القسم؟؟

هنا تكلم شريف لأول مرة منذ حضوره، وقال بهدوء مُستفز يبدو متعمداً:

- لا مش احنا اللي قُلنا كدا.. دا الواد اللي نصب عليك هو اللي قال كدا.

- بس.. بس أنا باقول من شوية إن ابني هرب والنيابة تفرج عنه وماحدث

صحح لي المعلومة.

معتز شرباش

ابتسم شريف ونظر لوائل الذي كان مبتسمًا بدوره، وكأن كل منهما يعرض على الآخر الرد، ليستمتع بشرح الموقف للرجل، حتى حسم شريف الحوار الصامت ونظر لرامز قائلاً:

- حضرتك كنت بتتكلم.. واحنا عندنا قاعدة في المباحث بتقول طول ما اللي قصادك بيتكلم سيبه.. لأن طول ما الظابط ساكت اللي قصاده هيتكلم طالما عنده اللي يقوله ولما يخلص اللي عنده هيسكت.
إحنا بقى كُنا مستنيين سعادتك تخلص كلام وتقول كل اللي عندك، وصمت لثانيتين بهدف استفزاز رامز ثم أكمل باسمًا:
- وتسكُت.

صمت رامز لدقيقة كاملة نقل أثناءها بصره بين ضيفيه، ثم ابتسم وهز رأسه يمينًا ويسارًا، وقال أخيرًا:

- حلوة منكم يا بهوات.. سايبيني اتكلم واقول كل اللي عندي برغم إن كل اللي باقوله عكس الحقيقة.. حلوة.

بس انا لَسَّا مش فاهم.. طالما ابني في الحجز.. اسمحوا لي اسأل؛ إيه اللي جابكم هنا غير إن ابني هرب؟!!!

اعتدل وائل وأجاب كأنه كان ينتظر السؤال:

- هو دا السؤال الصبح.. اللي حصل الليلة دي في القسم كان له علاقة بلؤي فعلاً.. بس ما كُنَّاش قادرين نعرف ازاى.

قطب رامز حاجبيه في عدم فهم، فأوضح وائل:

عُمر الشقي

- مش هتفهم إلا لما تعرف اللي حصل.. اللي اقتحم القسم دخل الحجز فعلاً وأخذ ابنك منه وخرج منه ودخل مكتب المأمور.. وكان بينه وبين تهريبه خطوة واحدة إنه يُنط من شباك الدور الأرضي.. الغريبة إنه سابه في المكتب متكلبش إيد ورجل ومشي.. واحنا جينا لسعادتك على أمل إننا نفهم اللي حصل.

وهنا تدخل شريف قائلاً بحزم:

- اللي حصل واضح طبعاً.. إن سعادتك بعثت حد فعلاً يهرب ابنك بس لما اكتشف إنه ممكن يتمسك هرب وسابه عشان ما يتمسكش ويربطك بجريمة زي دي.

نظر له رامز بغضب وقال بضيق:

- انت بتتهمني إني حاولت أهرب ابني من الحجز؟؟ دي إها...

تدخل وائل مقاطعاً رامز بهدوء:

- اهدى بس يا رامز بيه.. ما حدش بيتهمك بحاجة.. احنا بنحاول نرسم كل السيناريوهات المنطقية للي حصل.. يا ريت تساعدنا.

قالها ونظر لزميله بلوم واضح، كانت حركة مدروسة، و"مهروسة" إن صح التعبير، حيث يهاجم أحد الضباط الشخص، ويدفع عنه الآخر الهجوم، فيثق الشخص في الضابط الطيب، ويتحدث بما يخفيه، إن كان هناك ما يخفيه. ونجحت الحركة؛ حيث قال رامز بعدما لاحظ نظرة اللوم تلك:

معتز شرباش

- صيغة جملة زميلك فيها اتهام وتقرير واضح.. بس أنا هاعتبر نفسي ما سمعتهاش.. بس لو حسيت بأي اتهام تاني ولو بالتلميح هاعتبر المقابلة دي انتهت.

ثم نظر لشريف وقال:

- وياريت سعادتك تراعي إني لسّا منصوب عليّ في ربع مليون جنية.. وإني مخنوق زيّك وأكثر من ابن الصايعة دا وعائزه يتمسك أكثر منكم.. وبخصوص نظرة الشماتة اللي كانت مسيطرة عليكم بقالها فترة.. ما تنسوش إن الواد دا دخل القسم عندكم لعب فيه عسكر وحرامية وخرج وانتم قاعدين.. يعني على رأي المثل لا تعايرني ولا اعايرك.

لم يرد أيّ منهما على كلامه، سوى الكلب الذي بدا وكأنه يؤمن على كلامه، ويعلم موافقته على منطقه، فأضاف رامز:

- مش منطقي أبداً إن حد يدخل القسم من طرفي ويكلبش ابني ويسيبه ويمهرب.. وانت قُلت إن الواد هرب طب ما أخذش معاه لؤي ليه طالما كل اللي كان بينه وبين الهروب خطوة؟؟

- طب ليه أخذ ابن سعادتك من الحجز من الأساس؟؟ في حاجة ليه علاقة بيك أكيد.. اشمعني لؤي؟؟ ساعدني افهم.

صمت رامز لثوانٍ وظهرت عليه علامات التفكير، ثم ابتسم وزفر ساخرًا، وقال وهو يهز رأسه يمينًا ويسارًا:

- يا ابن الصايعة!!!

عُمر الشقي

تعلقت به عيون ضيفيه فأضاف:

- أنا عرفت هو أخذ لؤي ليه من الحجز.. أنا نسيت اقولكم إنه لما اتصل بيّ في المرة الأولى سمّعي صوت لؤي يقول "أيوة يا بابا.. سامعني؟؟" وأخذ منه التليفون.. كدا يبقى سمّعي صوته وسابه في القسم ومشى.

فكّر وائل لثوانٍ، ثم قال:

- لا مش منطقي.. ازاي قعد يتكلم في المكتب والدنيا مقلوبة برّا. صمتوا لثوانٍ لم يملأها الكلب في الخارج نباحًا، وكأنه كان يُفكر معهم في تفسير ما حدث، ثم تدخل شريف:

- يبقى مش دا اللي حصل.. الواد أخذ لؤي من الحجز.. واداله التليفون بعد ما أقنعه إن رامز بيه هيكلمه.. بس في الحقيقة كان بيسجل.. وبعد ما لؤي قال الكلمتين.. أخذ منه التليفون وكلبشه وسابه ومشى.

قال وائل مُتسائلًا:

- يعني دخل القسم عمل الغاغة دي كلها عشان يسجّل كلمتين من لؤي يسمّهم لرامز بيه ويقنعه إن ابنه فعلاً معاه عشان ينصب عليه؟؟ يا ابن الفاجرة.

أضاف رامز:

- وعشان عارف إني هاسأل من مصادرني عن اللي حصل في القسم.. وساعتها هاعرف إن القسم حصل فيه مشاكل زي ما قال.. وهاتأكد إنه خطفه.. وخاصة إنه ما سابش وقت كفاية للأمور تكون وضحت.

معتز شرباش

خيّم صمت ثقيل على الكُل بعد اتضاح موقف النصبّ ودوافعه وخطته العبقريّة الجريئة، ونبج الكلب فيما بدا وكأنه تحية للنصبّ على عبقرية، ثم نجاح مُخطّطه.

لم يمنع رامز نفسه من الابتسام إعجابًا بهذا الجريء الذي خدعه، وهو الذي لا يتذكر متى كانت آخر مرة تم خداعه فيها، أو إذا كان حدث هذا أبدًا. لمح شريف ضحكة رامز فعلق بنبرة كساها الغيظ:

- أنا شايف سعادتك مبسوط منه قوي.

نظر له رامز وحافظ على الابتسامة وقال:

- مُعجب بيه.. مش مبسوط.. بتحترمه كخصم ذكي.. مش شايف إنه ذكي يا شريف بيه؟

- أنا شايفه نصّاب.. يستاهل يترمي في السجن بقية عمره.

- علشان كدا عمرك ما هتقبض عليه يا شريف بيه.. أول حاجة اتعلمتها في حياتي عن المنافسة أو الخصوم هي إنك تحترم قدرة خصمك وتقدر ذكاؤه.. دي "أ، ب" يا شريف بيه.. مش عيب إنك تعترف إنه أذكى من تقديرك له علشان يمكن المرة الجاية تتفوق عليه.

ظهر الضجر على ملامح شريف جليًا، فتدخل وائل للحيلولة دون وقوع جدل توقعه، وقال مبتسمًا:

- بما إن سعادتك الوحيد اللي اتكلم مع الواد دا النهاردا ممكن تقول لنا كل حاجة عنه؟؟

عُمر الشقي

- زي إيه؟؟

- سنه.. شكله.. حجمه.. أي حاجة.

في تلك اللحظات أخرج وائل مفكرة صغيرة من جيبه الخلفي وقلم من جيب قميصه وانتهى لما سيقوله رامز، الذي رفع عينه للسقف في علامة على التفكير ثم قال بعد ثوانٍ:

- أنا ما سُفتش منه حاجة خالص للأسف.. لما نزلت كان قافل قزاز العربية.. وكان قزازها أسود.. بس من صوته وطريقة كلامه أقدر أقول لك إنه من ٢٨ لـ ٣٥ سنة بالكثير.. ومعيا طبعًا رقم التليفون اللي كلمني منه.. ورقم العربية ومواصفاتها.. بش غالبًا مش...

قال وائل مُقاطِعًا بابتسامة سريعة:

- ما تقاطعش يا رامز بيه.. ما فيش مجرم مش بيغلط.. وإلا ما كانش السجن اتبنى من الأساس.. هيغلط وهيتمسك إن شاء الله.. قول يا رب انت بس واكتب لنا البيانات.

قالها وهو يكتب أعلى ورقة خالية في مُفكرته؛ كلمة "الاقتحام".

بعد دقائق كان الضابطان يستقلان سيارة وائل في طريقهما للقسم الذي تعرض للهجوم قبل ساعات وبعد فترة قصيرة من الصمت، قال شريف وهو ينظر خارج السيارة:

معتز شرباش

- أنا مصدق رامز.. مع إني مش باطيق الشخصيات دي.. اللي فاكرة البلد بتاعتها.

ضحك وائل بسخرية وهو يفتح شباك سيارته لينفخ دخان سيجارته وقال:
- فاكرة؟؟ البلد فعلاً بتاعة الناس دي يا شريف.. أمال سامحني يعني..
بتاعتي أنا وانت؟؟ بس هو فعلاً ما فيش عنده أي دافع يخلّيه يكذب.. لو
هو اللي باعت الواد دا ما كانش أصلاً قابلنا.. دا غير إنه فعلاً ابنه هيخرج
في ظرف يومين بالكثير.. مش منطقي يعمل كدا أبدًا.

- مضبوط. قالها وهزّ رأسه موافقًا وهو يتابع الكلب الذي يجري بجوار
السيارة بإصرار واضح ويملاً الصمت بصوت نباحه الخشن.

* * *

وصل الصحفي عماد المنسي مُبكرًا لمقر الجريدة المعارضة التي يعمل بها منذ ثلاث سنوات، جريدة "الضمير". أبيض البشرة، جميل الملامح، بشعر بني، يبدو للوهلة الأولى ابن مصري وأجنبية، أو العكس، قصير القامة، يرتدي "جينز" أزرقًا واضحًا أنه - عماد - قد فقد بعض الوزن بعد شرائه، "وتي شيرت" أخضرًا عليه بعض الخطوط باللون الأبيض، وحذاء رياضيًا، على وجهه نظارة سميكة. شكله العام يوحي بأنه لم يحصل على أي قدر من الراحة منذ الليلة السابقة.

لم يكن عماد سوى شاب، خفيف الظل، ومكافح، جاء من ميت غمر المنصورة للقاهرة ليبدأ مشواره الصحفي، الذي كان يراه في مخيلته، وأحلام يقظته، ناجحًا.

كان دائم الرفض للظلم، والقهر، ورافضًا لقبول الوضع الذي شبَّ عليه، فقرر تغييره، أو على الأقل، قرر المحاولة.

كان ثوري الهوى، يكره النظام، ويؤمن أنه سبب كل بلاء أصاب دولته، التي يعلم يقينًا أنها تستحق مكانة أفضل مما هي عليها، كان يؤمن أن مصر تستحق أن تكون دولة عظمى، وتملك من الإمكانيات ما يكفي، ولكنها تحت أسر نظام قاعم، وفاسد، يخنقها ويستنزفها، من أجل راحتها، وثرائه.

معتز شرباش

مُستخدماً في سبيل تحقيق ذلك، الداخلية، وضباطها، كأداة للبطش، والقمع، والقتل أحياناً كثيرة.

كان نشيطاً كالنمل، يبحث عن الخبر في كل شق، وتحت كل صخرة دون كلل، كان في معظم الأحيان عندما يحاول التحقيق في قصة ما، أو كتابة مقال عن تحقيق أجراه، كان رئيس التحرير يمنعه بسبب خوفه عليه وعلى جريدته من بطش مُحتمل.

كان رئيس التحرير يحترمه ويحترم رغبته في التغيير، ولكن يراه لا يعلم عند أي حد يتوقف، فجعل من نفسه وصياً عليه، ليرسم له الخط الأحمر الذي لا يجب عليه تخطيه، فهو لا يزال طفلاً في عالم الصحافة يتلمس خطواته الأولى.

قطع عماد الخطوات القليلة بين باب الشقة التي هي مقر الجريدة ومكتبه سريعاً برغم الإرهاق الواضح جداً على ملامحه، لم يُسلم على أحد، وكأنه لا يرى غير هدفه، ترك حقيبته وتوجه لمكتب كبير يحمل لوحة مكتوباً عليها "رئيس التحرير".

ابتسم لسيكرتيرة رئيس التحرير وأشار للباب، فأومأت برأسها دون أن تتوقف عن الكلام عبر الهاتف.

دق على الباب دقتين هادئتين لا تعكسان انفعاله الظاهر على ملامحه، وتوتره الذي تسبب في عدم وقوفه ثابتاً في انتظار الإذن بالدخول، ليُعطي انطباعاً خاطئاً لمن يراه من الخلف وكأنه في انتظار دخول الحمام.

عُمر الشقي

- ادخل. جاءه الفرج.

اندفع عماد إلى داخل مكتب رئيسه "كمال حجاب" الذي ما إن رآه حتى ترك ما كان يفعله ونظر له نظرة طويلة، نظرة مسحته من رأسه حتى أسفل ما استطاع أن يرى منه من خلف مكتبه. وكانت النظرة بالقوة الكافية لتجعل

عماد ينسى، برغم أهميّة ما جاء من أجله لثواني، حتى قال كمال صارخًا:

- من امبارح ما فيش عنك خبر.. تليفونك مقفول.. ولا متنيل قايل انت فين.. عندي موضوع عايزك تغطّيه وانت مختفي.. وانت مختفي.. أنا عندي موضوع مهم.. وانت مختفي.

كانت من صفات كمال حجاب أن يُكرر كلامه، ولا يعلم أحد تحديدًا هل يفعل هذا واعيًا، أم أنها تحدث تلقائيًا. وعند سؤاله، يؤكد أنه لا يكرر

كلامه، إلا نادرًا !!

قال عماد متمتمًا:

- أنا كنت باغطي قصة مهمة.. وتليفوني فَصَل.. وماعرف..

قاطعه كمال قائلاً بضيق:

- قصة إيه اللي مُهمّة يا عم الخطير؟؟ ولو قصة مُهمّة مش مبلّغني بيها

ليه؟؟ وما طلبتش مصوّر ليه؟؟ ها؟؟ قصة إيه؟؟

- يا أستاذ كمال أنا ما كنتش متأكد من الحكاية.. قلت اتأكد الأول قبل ما

أجي لك.

معتز شرباش

- وبقالك كام ساعة بتتأكد؟؟ على كدا بقى المفروض يكون معاك حكاية
ثقيلة.. المفروض تكون اتأكدت ومعاك قصة ثقيلة.. قصة الموسم.. قول يا
سيدي.. ربنا يستر.

تردد عماد لثوانٍ، ثم قال بخفوت:

- ما هو أنا

- أنا؟؟ قاطعه كمال:

- انت لَسَّا هتقول لي أنا؟؟ لَسَّا هتقول أنا يا عماد؟؟ مش كنت من امبارح
بتتأكد من قصة حسب كلامك؟؟ ومن منظرك شكلك ما رَوحتش من
امبارح.. إيه القصة الي اتأكدت منها؟؟ إيه الموضوع الي مطبّق لهُ من
امبارح؟؟

- ماهو.. أنا لَسَّا ما تأكدت بصرحة.

- لَسَّا ما تأكدتش؟؟ كل دا غطسان وطالع تقول لي لَسَّا ما تأكدتش؟؟ ليه يا
عماد؟؟ ليه يا عماد؟؟ انت بتحاول تتأكد من إيه؟؟ مقبرة الإسكندر؟؟
يا كمال بيه اديلي فرصة أفهمك.

- أمال انت بتعمل إيه في مكتبي؟؟ ما تفهمني!! ما تفهمني!!

جلس عماد أمام مكتب كمال بسبب تعبته، ولثانية ترك جسده يرتاح ثم تنهد
بإرهاق واضح وقال:

- امبارح كلمني حد من مصادري قال...

علا الاستنكار ملامح كمال وصوته مقاطعًا:

عُمر الشقي

- مصا... إيه؟؟ إيه؟؟ مصادرك؟؟ الكلام دا تقوله للقارئ.. أنا تقولي المصدر.. تقولي المصدر يا عماد.

- أيوة يا أستاذ كمال.. أنا صحف...

- عماد.. ما تصيعش عليّ وغلاوة مصادرك.. مين اللي كلمك؟؟ مين يا عماد؟؟ قالها والتقط كوبًا زجاجيًا ليرتشف منه بتلذذ واضح مشروبًا بني اللون، كان قد أجاب عماد عندما سأله منذ شهر عن محتواه أنه تركيبة من عند العطار، تحوي الكثير من المكونات، يذكر منها عماد الزنجبيل، والقرفة، والمرمية. وقال له كمال يومها أنها تساعد على فقدان الوزن الزائد، كما تزيد من فحولته الجنسية.

وتساءل عماد في باله هل زادت فحولته بالفعل، لأنه لم يبدُ عليه أي فقدان في الوزن، فما السبب الذي يجعله متمسكًا بالمشروب لاذع الطعم إن كان فشل في كل مهامه، إلا إذا كان قد تعود عليه ونسي لماذا بدأ في تناوله من الأساس.

فالبشر أحيانًا يتمسكون بعادات تعودوا عليها حتى بعد زوال الغرض من وجودها.

ترك كمال الكوب ونظر لعماد في انتظار رده فقال بعد أن نحى تساؤلاته جانبًا:

- بصراحة أنا كنت سهران عند جماعة صحابي.. وانا نازل بالصدفة اتكعبلت في قصة.

معتز شرباش

ظهر الغضب على ملامح كمال ونفاد الصبر، فأكمل عماد مُسرِعًا قبل أن يحكم رئيسه على محاولته بالفشل كالعادة:

- والله الموضوع خطير يا أستاذ كمال.. حاجة هتضرب مبيعات الجرنال في السما.. وماتقلقش مش هتهاجم حد من الحكومة ولا رجال الأعمال الكبار اللي إيديهم طايلة وسعادتك بتخاف منهم.

أدرك عماد خطأ ما قال في لحظة سماعه جملته التي نطقها، فحاول أن يتدارك ليبرر ولكن صراخ كمال سبقه وأفزعته:

- باخاف؟؟ أنا ما باخافش غير من ربنا.. ما باخافش غير من ربنا يا عماد...
- أنا ما قص...

قاطعه كمال بصياح لم يسمعه منه قبل اليوم، مصحوبًا بخبطة على سطح مكتبه أدت إلى انتفاض جسد عماد، على غرار بعض الأدوات على مكتب رئيسه إثر الخبطة القوية:

- اسمعني كويس يا عماد.. اسمعني كويس.. كون إني باحاول أوجهك للصح.. وارسم لك خطوط ممكن شبابك يخليك ما تشوفهاش لوحدهك.. دا لأنني عارف إن الوقت دا له اعتبارات.. واعتبارات مهممة.. مهممة.. ولأن الكلام عن الفساد والظلم بدون تفكير وأدلة ممكن يوديك في ستين داهية.. في ستين داهية.. لكن واضح إنك ما فيش فايده فيك.. ما فيش فايده.. هتفضل حمار لحد ما ينتهي بيك الحال بحكم محكمة في السجن.. ابقى افتكرني ساعتها يا عماد بيه.. ابقى افتكرني.

عُمر الشقي

صمت عماد لثوانٍ، نظر خلالها إلى سجادة الأرضية التي تغيّر لونها ومهت،
ثم قال بصوت مرتجف وخافت:

- صدّقني يا أستاذ كمال ما قصدتُش اللي حضرتك فهمته.. يمكن خاني
التعبير.. بس كنت اقصد اقول الناس اللي دايمًا باجيلك بخصوصهم..
وصدقني عارف إنك كتر خيرك بتحميني.. من فضلك اقبل اعتذاري.. أنا
فعلًا ما قصدتُش أوجه لك أي إهانة.

لم يردّ كمال وإن لانت ملامحه كثيرًا وهدأت أنفاسه، وساعده المشروب،
ففكر عماد أن المشروب قد يكون له ميزة في النهاية، ثم قال مستفسرًا:

- ممكن بقي من فضلك أعرض عليك قصّتي وتقول رأيك؟؟

لم يردّ كمال، ولكنه لم يعترض، ونظر لعماد نظرة من لا يمانع، ولكن لن
يعطي الإذن، وهذا كان كافيًا لعماد ليبدأ في سرد ما حدث معه في ليلته
الماضية بالتفصيل على أمل أن يسمح له رئيسه بأن ينشر مقاله الذي يرى
فيه بداية انطلاقته لمستقبل طالما حلم به.

- امبارح على الساعة ١٢ بالليل كدا سمعنا أنا وصحابي اللي كنت سهران
عندهم قلق قريب مننا.. ولقينا ناس ملمومة حوالين القسم القريب من
بيت صاحبي.. نزلت اشوف في إيه.

ظهرت ملامح الانتباه والفضول على كمال، فهو في الحقيقة صحفي، ويملك
حدس صحفي قلّمًا يُخطئ، وشعر بالتأكد أن ما يسمعه من عماد - برغم
هزله- قد يخفي خلفه قصة تستحق التحقيق. كانت ملامح التفكير العميق

معتز شرباش

تظهر على ملامح كمال، مما شجّع عماد على مواصلة الحديث، لأنه في المرات السابقة كان النقاش ينتهي أسرع من هذه المرة بكثير، فأكمل وقد تملكته الحماسة قليلاً:

- نزلت جري ولما وصلت القسم من النظرة الأولى اتأكدت إن في حاجة غلط.. كل حاجة هناك كانت بتقول إن في مصيبة حصلت.. كانوا قافلين حوالين القسم كوردون ييجي ٣٠ متر.. قرّبت وحاولت اطلب إنني ادخل اتمنعت بدون تفسير وبردود أقرب للهلوسة.. ريحة الغاز المسيل كانت طالعة من جوا القسم.. ما حدش عنده رد منطقي على سبب الغلق.. وفي الآخر لما حبيت اتأكد قلت لأمين على الباب إنني صحفي وجاي اعمل تحقيق كان هيقبض عليّ.. وبالعافية أقنعتة إنني معدّي بالصدفة.. وكان عايز يشوف بطاقتي ولو شافها كان عرف إنني من المنصورة وكان هيعرف إنني مأجر بعيد ولا يمكن اكون هناك بالصدفة وما كنتش هاروح.. بس الحمد لله احتاجوه فجأة وعرفت افلت منه وهو مشغول.

اعتدل كمال وأسند مرفقيه على المكتب وسأل باهتمام:

- طب وبعدين؟؟

- بصراحة ما فيش بعدين.. ما قدرتش أوصل لحاجة متينة تأكد أو تنفي..

بس في حاجة حصلت في القسم دا امبارح.. دا أكيد..

عُمر الشقي

بعدها مشيت غبت شوية كدا ورجعت وكان الوضع زي ما هوّ.. عربيات داخله خارجه.. ناس شكلهم رُتب كبيرة وقايمة من السيرير على القسم عدل.. أنا متأكد من اللي شُفته.. بس ما فيش دليل واحد قدرت امسكه للأسف. قالها وهزّ رأسه بأسف وتنهّد مُعلنًا عن نهاية ما في جعبته من تفاصيل، وملامحه تنتظر بصبر نافد ردّ فعل رئيسه، الذي كان غارقًا في تفكير عميق، وملامحه جامدة لا تبيّن ما وراءها من أفكار أو نوايا.

وبعد دقيقتين من الصمت التام، والتفكير، قال كمال ولكن بلهجة من لا يقتنع بنسبة كبيرة بقراره:

- ماشي يا عماد.. اكتب المقال واعرضه عليّ ونشوف.. لو قدرت تكتب موضوع متماسك بالعدد صفر من المعلومات والأدلة اللي معاك دي، هاته اشوفه وممكن ينزل.. ما اوعدكش.. بس ممكن.

ثم أضاف بصوت خافت وكأنه يحاول إقناع نفسه مُفسرًا:

- واضح إن في حاجة حصلت فعلاً.. وممكن تكون تم تداركها وكل حاجة طبيعية دالوقت.. بس دا ما يمنعش إنها قصة جديدة بالاهتمام. ثم نظر لعماد وقال بحزم:

- حابب اشوف هتكتبها ازاي.. وبعدها هاقدر.. اكتبه وبعدين نقرر.

لم يرغب عماد لحظة دخوله المكتب منذ دقائق في أي شيء سوى ما حصل عليه لتوّه، شعر بنشوة اقتراب الحلم تغمره لثوانٍ، وخفق قلبه بشدّة، وكأنه عاشق، لأول مرة، يلمس يد حبيبته، وهذا بالتحديد ما كان يحدث في

معتز شرباش

تلك اللحظة، فالصحافة هي معشوقة هذا الشاب منذ أن كان طفلاً، وها هي تسمح له، بخجل، أخيراً أن يقترب.

الحلم كالبحر، يمكنك أن تشعُر باقتراب تحقيقه قبل أن تراه يتحقق. وها هو عماد يشعر ببحره الخاص يقترب.

تذكر عند الباب أنه لم يشكُر رئيسه، فالتفت له وقال:

- شكراً يا أستاذ.. أوعدك مش هتندم.

ثم غادر المكتب بنشاط جدّده، برغم تعبهِ، اقتراب تحقيق حلم طال انتظاره.

فغمغم كمال بصوت لم يصل لعماد:

- الخوف انت اللي تندم يا عماد.. الخوف انت اللي تندم.

* * *

٧

وصل الرائد وائل تحسين، قبل مواعده المعتاد، لأسباب واضحة بالطبع، بسيارته عند المكان الذي يتركها فيه أمام القسم الذي تعرض لعملية اقتحام الليلة الماضية، لم يتمكن من النوم، فقط ذهب للمنزل بعد زيارة رامز، اغتسل وعاد للقسم.

جاء عسكري مهرولاً عندما لمح سيارة الرائد ليزيح الحاجز الذي يمنع سيارات المدنيين من ترك سياراتهم - التي تشعر أنها أصبحت أكثر عددًا من الشعب نفسه - أمام القسم في المكان المخصص لسيارات الضباط.

ترك وائل سيارته وغادرها، وفي خطوات سريعة، دخل القسم، وكأنه يُرسل رسالة لمن يراه أنه ينوي، اليوم قبل الغد، القبض على هذا اللعين الذي سوّلت له نفسه أن يقتحم مكان عمله.

كان مرتدياً قميصاً أزرقاً ضيقاً يكشف عن جسد رياضي متناسق، وبنطالاً من الكتان عسلي اللون، وحذاءً بنيّاً من القטיפيّة.

كان الرائد وائل أحد الضباط الذين التحقوا بالوزارة بهدف الخدمة العامة. لم يطمع في جاه أو سلطة تُمكنه من ظلم البشر، حيث كان يرى البشر لديهم ما يكفيهم من ظلم. كان رقيق القلب، يرفض الظلم، ويحترم الإنسان قدر إمكانه. كانت أفكاره كثيراً ما تُسبب له المُشكلات مع رؤسائه، وزملائه في العمل، حيث أنه كان يرفض علناً الكثير من الممارسات التي يرتكها بعض

معتز شرباش

الضباط، وتُسيء للوزارة كلها. ولطالما احتدمت مناقشات بينه وبين معظم رجال عائلة خطيبته، حيث أن معظمهم من رجال الوزارة ذوي الرتب العالية، مما ساعد سيرته الثورية أن تنتشر داخل الوزارة، بسرعة انتشار الفضائح على مواقع التواصل، ولأنه ضابط كُفء، وذكي، ومثابر، كان الجميع يحترمه، ولكن كان دائماً ما يطاله اللوم، بسبب استثماره الكثير من الجهد والوقت في بعض القضايا، وصل في بعض القضايا إلى حد الهوس، التي كانت، من وجهة نظر بعض الضباط زملائه وقتها، تبدو وكأنها لا تحتاج لكل هذا القدر من التعب، مما يجعلهم - زملاءه- يظهرون بمظهر المُقصرين في عملهم، ولكنه لم يهتم، فعندما كان يحدثه حدسه بشيء، لا يستمع لسواه، ويتبع حدسه حد الهوس أحياناً، مما أخرج كثيراً، والذي تسبب مرة في إيقافه عن العمل، ولكنه - من وجهة نظره- لم يُحرج كفاية ليتغير.

كان يؤمن بأن جُهداً كثيراً ضائعاً، أفضل من تكاسل يؤدي لحق ضائع. وبرغم احترام - تقريباً- الجميع له، كان الجميع يعلمون أنه لن يصل يوماً لمنصب مسؤول داخل الوزارة، بسبب قناعاته وكثرة مشاكله. ففي عالم يحكمه البشر، الكفاءة وحدها لا تكفي للنجاح.

دخل وائل مكتبه، والتقط "ريموت" التكييف، لينطلق صوت أشبه بموتور الجرار الزراعي لثوانٍ بعد أن ضغط زر العمل في الـ"ريموت". دخل خلفه العسكري المُجنّد الذي يقوم على خدمته ووقف عند الباب ويدها خلف

عُمر الشقي

ظهره، فالتفت إليه وائل وهو يدور حول مكتبه ليجلس على كُرسيه، الذي أصدر صريراً عند استقبال وزن صاحبه، وقال وائل وهو يخرج سيجارة من علبته:

- قول لمحمود على القهوة بتاعتي.. وابتعت لي الأمين مجدي حالاً.. وجرايد النهاردا.. والفس.. قطع كلامه لثوانٍ، حتى قرر أنه لا يملك وقتاً ولا شهية ليفطر، فأشار للشاب أن يُغادر.

ترك وائل هاتفه على المكتب لثواني، ليُشعل سيجارته، ثم التفتة مُجدداً، وكتب رسالة لخطيبته مَي:

"صباح الخير.. ادعي لي عشان اليومين دول يعدّوا على خير.. وادعي لي امسك الواد اللي اقتحم القسم امبارح"

وترك هاتفه على المكتب، ولكنه التقطه بعد دقيقة واحدة عندما جاءه الرد من خطيبته التي تعمل في بنك، ولا تستطيع التحدث عبر الهاتف في معظم الأوقات بحُرية.

"ربنا معاك يا حبيبي ويقدرِك على اللي بتتمناه.. مستنياك بعد الشغل النهاردا.. لو ما جيتش هاقتم القسم بنفسي وأخلّص عليك"

ابتسم تلقائياً، وهو ينفخ دُخاناً مرّ عبر رئتيه وقتل من خلياتهما ما قتل، عندما رأى ابتسامتها عبر الرسالة وكأنه يراها مبتسمة أمامه؛ جميلة وساحرة و....

- أوامر سعادتك يا وائل بيه.

معتز شرباش

أفاق على صوت مجدي ليجده أمامه، فأدرك أنه لم يسمع دقاته على الباب الذي لا يمكن أن يدخل المكتب قبلها، ولم يلحظ وصوله، حتى اضطر مجدي أن ينتزعه من حلم يقظته انتزاعًا بملامح تقول بوضوح:

"احنا في إيه وانت في إيه يا عم روميو؟"

نحيل الجسد، ومتوسط الطول، يحمل وجهه شاربًا رفيعًا، كان هو - الشارب- العلامة المميزة الوحيدة التي يحملها وجهه، كان يحمل أحد تلك الوجوه السمراء التي لا تتميز بأي شيء، وفوقه شعر مجعد قصير. نظر له وائل بغضب وكأنه تعمّد التسلّل لمفاجئته، وقال:

- اقعد يا مجدي. فجلس دون كلام، فأكمل وائل:

- إيه اللي شُفته امبارح بالظبط؟؟

قال مجدي بضجر مستتر:

- مانا قُلت لسعادتك يا وا...!

قاطعه وائل صارخًا وهو يضرب سطح مكتبه بقوة:

- مش عايز قُلت وما قُلتش.. قول تاني يا عم المهم.. ولا وراك الديوان.. انت مش واخذ بالك من المصيبة اللي احنا فيها؟؟ ولا من خطورة الكلام اللي بتقوله؟؟ ركز معايا على الصبح وفتح مُخك.

انتفض مجدي مع غضب وائل، واعتدل تلقائيًا في مكانه كطفل يقوم بارتكاب شيء خاطئ وسمع صوت دقات والده على باب غرفته، وقال بصوت غاضب نسبيًا:

عُمر الشقي

- ما اقصدش يا وائل بيه.. أنا قصدت إني متأكد من اللي سُفته.. الواد دا كان لابس قناع غاز من بتوع الوزارة.. يا باشا دا انا شعري شاب في الشُغلانة دي.. مش هاعرف حاجة الوزارة؟؟ دانا اقعد في بيتنا احسن. انتظر وائل، محمود الساعي حتى يخرج من مكتبه بعد وضع قهوته أمامه، وأطفأ سيجارته في منفضة خزفية، ثم قال باستهزاء:

- ما تقلقش.. المرة دي شكلها فيها ناس هتقعد في البيت فعلاً. ولما انت مصحصح قوي.. خد منك مفاتيح الحجز ازاي يا فالح؟ قالها وهو يلتقط فنجان، وقرّبهُ من أنفه، وكعادته، استنشق رائحة البُن، حتى يتأكد أن الساعي قد استخدم البُن الخاص به، وليس "بُن الزباين"، قبل أن يرتشف أول رشفة.

ردّ مجدي بخجل:

- الواد دا خدنا على خوانة يا وائل بيه.. واقطع دراعي إن ما كان تدريب مخبرات.. يا باشا الواد كان عامل زي الشبح.. ما حدش شافه.. الواد دا مخبرات أجنبية يا باشا أقسم بالله.. طب تصدّق بالله؛ الواد دا أنا لو كنت سُف...

قاطع وائل وصلة التهويل التي كان مجدي على وشك إطلاقها:

- ماشي.. خلاص يا عم المفتّح. روح وابعت لي الأمين ياسر. تنهد وائل وهو غارق في تفكير عميق، وأصابعه تنقُر على سطح مكتبه دون وعي منه. بالفعل كان جزء منه يصدق سيناريو أن يكون هذا المُقترح قد تم

معتز شرباش

تدريبه على أعلى مستوى، ويمثل جهة مُنظمة، وإلا فكيف حصل على قنابل وأقنعة غاز مثل تلك التي تُستخدم في وزارة الداخلية؟ وأيضا بسبب طريقة تنفيذ الاقتحام، فعملية مثل التي نفذها هذا الشبح في دقائق تتطلب أياما من التخطيط والدراسة، وقدرا كبيرا من الشجاعة. ولكنه كان يرفض الإفصاح عن هذا السيناريو، أولا لعدم وجود أدلة عليه، ثانيا لخطورته، وثالثا لأنه يخشى أن يكون تفسيره هذا سببه أنه يحاول إقناع نفسه بعدم التقصير، وأن ما حدث سببه هو حصول الخصم على تدريبات أفضل. لذلك كان يرفض طرح هذا السيناريو رفضا قاطعا.

فالبشر نوعان، الأول وهو الكسول، الذي يستسلم لأول سيناريو يبدو منطقيا، ويُرّيح ضميره، والثاني الذي يدرس كل سيناريو دراسة كافية حتى يجد حجة قوية على استبعاده، لتبقى الحقيقة بدون حجج لاستبعادها. ووائل كان من النوع الأخير.

للمرة الثانية يُفاجأ وائل بياسر أمامه في وسط غرفة مكتبه، ولكنه أفاق هذه المرة قبل أن يقاطع ياسر أفكاره.

كان ياسر على عكس مجدي؛ ضخّم الجُثة، غليظ الملامح، يبدو وكأنه خُلق خصيصا ليكون سوطا في يد السُلطة للبطش بالمجرمين، وكان له شارب كث وطويل بشكل مُلفت. أشار له وائل بالجلوس وقال:

عُمر الشقي

- انت مش فاكر قبل الهيصبة بتاعة الورد والجاتوه دي حد دخل القسم يا ياسر؟؟ ركز معايا وحياة الغالي. قالها وأشار لشارب ياسر، حيث كان يعتني به الأمين عناية خاصة وكأنه أحد أبنائه.

قال ياسر بصوت غليظ، مثل كل شيء فيه:

- اللي دخل امبارح القسم قبل الخناقة هما ٣ يا وائل بيه.. الست اللي بتيجي كل يوم تجيب سجائر للواد "جنزير" اللي في الحجز.. وواحد تاني كان شكله سوابق ودماغه مفتوحة قالي إنه جاي يبلغ عن واحد ثبتته.. وعيل ابن ناس كان داخل وانا معايا تليفون مهم يعمل محضر حادثة.

- ومين منهم كان شايل شنطة؟؟

- الست والواد ابن الناس.. الواد السوابق دا كانت إيده فاضية.

فكّر وائل لثوانٍ، ثم سأل مُعتدلاً على كرسيه الذي أصدر صريراً مع حركته، وأمسك مُفكرته الصغيرة التي لا تفارقه وفتحها على صفحة مكتوب على رأسها كلمة "الاقترحام":

- وفاكر شكل الواد "ابن الناس" دا يا ياسر؟؟

- الكذب خيبة يا بيه.. أنا لما سألته رايح فين.. رد عليا بظهره من غير ما يبُص لي عدل.

جزّ وائل على أسنانه وتنهد في غضب وصمت لثوانٍ، وقبل أن يتحدث أضاف ياسر في محاولة لتبرئة نفسه من تهمة الإهمال:

معتز شرباش

- يا وائل بيه الواد ابن الناس دا شكله ما يعرفش يعدّي الشارع بطوله..
والشنطة اللي كان ماسكها كانت صغيرة.. ما تشيلش عدة.. اللي عمل كدا في
القسم أكيد كبير وجتته تستحمل الهبد.. مش عيل طري.

أقطع دراعي إن ما كان مخابرات يا بيه.. وجاي من الدور اللي فوق، صمت
لثوانٍ ثم أكمل قائلاً باندفاع كمن "جاب الديب من ديله":

- ممكن يكون نط على السطح من عمارة تانية أو هليكوپتر.. ونزل ع السل...
- شششششش. استوقفه وائل بضيق حيث لم يعد وائل قادراً على الاستماع
للمزيد، فأشاره له أن يصمت، فصمت. ثم أشار له، دون كلام، ناحية الباب
وهو يرتشف قهوته، فغادر ولكن ملامح ياسر كانت تنطق بإصرار أن
المُتحم "مخابرات أقسم بالله".

يميل البشر دائماً لإلقاء اللوم على الآخرين، فالافتحام لا يمكن للأمناء
استيعاب أن يقوم به شخص عادي، فكان التفسير "المُخابراتي" مُريحاً لكل
منهما.

أمسك وائل قلمًا أزرقًا وكتب على الورقة المُغطّاة "بالشخبطة" التي أمامه
على المكتب في المساحة الصغيرة الوحيدة الفارغة فيها كلمة "عيل ابن ناس"
وأحاطها بدائرة، ولكنه شرد واستمر القلم كأنه يتصرف من تلقاء نفسه في
رسم ذات الدائرة حول الكلمة مرارًا وتكرارًا، وكأن هناك من يحاول أن يؤكد
للضابط أنه على حق.

فالعقل الباطن له أساليبه في عرض ما يظنه.

عُمر الشقي

بعد ثوانٍ ضغط وائل زر استدعاء راضي فدخل مكتبه:

- ابعث هات لؤي من الحجز.. وقول لمحمود يعمل لي قهوة تاني. ثم كتب في المفكرة على الورقة تحت كلمة "الاقتحام" وتحت السن التقريبي الذي قدره الملياردير، ورقم الهاتف الذي تحدث منه المُقْتَحِم، وبيانات السيارة التي استقلها لقيلاً رامز:

"عيّل ابن ناس"

خرج راضي لينفذ تعليمات رئيسه، الذي سرح لثوانٍ مُجددًا فيما هو بصددده.

"تلك القضية لا تبدو كأى عملية نصب عادية"

دخل شاب تبدو عليه مظاهر الثراء وقلة النوم والانكسار مكتب وائل. شاب متناسق الجسد، يبدو كأنه قد استثمر الكثير من الوقت في بناء عضلاته، شعر كثيف مبعثر على جبهته، يرتدي "تي شيرت" برتقاليًا ماركة "لاكوست"، وبنطالًا من "الجيّنز" أزرقًا ماركة "ديزل"، وحذاء "لاكوست" أبيض اللون. برغم عدم نظافة ملابسه، ولكن الثراء يبدو ظاهرًا عليها بوضوح.

ابتسم له وائل ببرود، وأشار له أن يجلس، وقال:

- تشرب حاجة؟؟

تملّكت الלהفة من ملامح لؤي، وكأنه غريق لمح طوق نجاته قبل استسلامه للغرق بثواني، وقال بلهفة كالطفل:

معتز شرباش

- سيجارة وفنجان قهوة.. آسف يا باشا لو هتقل عليك.. بس انت اللي سألت.

ابتسم وائل لثوانٍ، فعادة لا يكونون أبناء الأثرياء بهذا الأدب، ولكن يبدو أن رامز قد تمكن من تعليم ابنه الأدب على الأقل، ولكنه، كما يبدو، قد نسي أن يعلمه قيادة السيارات، وإلا لما كان هنا من الأساس.
ضغط وائل زر استدعاء راضي، وقال له عند دخوله:

- هات علبة سجائر مارلبورو ابيض من برّا يا راضي.. وخلي محمود يعمل قهوة للوي بيه من البن بتاعي.. قهوتك إيه؟؟ سأل لوي، فأجاب:

- مانو يا باشا. فهزّ رأسه لراضي، الذي خرج لتنفيذ التعليمات.

أراح وائل ظهره على كُرسيه الكبير واستمع لصريه المعتاد، وسأل لوي:

- فيك حيل تتكلم ولا نستنى السجائر والقهوة؟؟

- لا يا باشا اتفضل.. لسّا الشحن ما خلصش.

ابتسم وائل وسأل:

- ممكن توصف لي الواد اللي خدك من الحجز؟؟

فكر لوي لثوانٍ ثم قال:

- هو ملامحه كانت طول الوقت متغطية بال Mask بتاع الغاز.. بس من كلامه وطريقته ولبسه.. شكله Professional.

عُمر الشقي

عقد وائل حاجبيه وقال وهو يتفحص ملامح لؤي جيدًا ليرصد أي دلالة على كذب يحاول لؤي مداراته:

- انت أول مرة تشوف الواد دا؟؟

تعجّب لؤي من السؤال، وقال:

- أنا أصلًا ما شُفتوش كويس عشان اعرف إن كنت شُفته قبل كدا ولا لأ.

- يعني الواد دا ما كانش جاي بتعليمات من رامز بيه؟؟ قالها واعتدل للأمام متفحصًا لؤي بنظره، ليرصد أي علامات كذب توقعه، وتسببت حركته في صرير قصير من الكرسي، وكأن الكرسي كان يحذر لؤي من الكذب.

أدرك لؤي لحظتها مُراد وائل من سؤاله السابق، فقال بصدق:

- بصراحة يا وائل بيه هو قال كدا.. بس أنا متأكد إنه كداب.. مع إني مش عارف هو جه ليه ولا فاهم Logic تصرفاته الغريبة.. بس أنا متأكد إن مش بابا اللي باعته.. No way.

كان وائل يستمع إليه بتركيز، وسأله عندما أنهى كلامه:

- بتقول هو قال لك كدا؟؟ قال لك إيه؟؟

دخل محمود ووضع القهوة أمام كل منهما، ثم ترك علبة السجائر المطلوبة أمام وائل على مكتبه وأدار ظهره ليغادر، فاستوقفه وائل قائلاً:

- استنى يا محمود، وقام ودس يده في جيبه وأخرج بعضًا من النقود وناولها لمحمود وأكمل:

معتز شرباش

- شوف مين حاسب على السجاير دي.. حاسبه وخلي الباقي معاك لحد ما
أخلص هنا.. شكرًا.

جلس وائل وناول علبة السجائر للوي الذي فتحها في ثانية وأخرج منها
سيجارة ووضعها في فمه، ونظر لوائل بخجل وهو يعرض عليه سيجارة
وقال:

- معاك ولاعة يا باشا؟؟

مدّ وائل يده في درج مكتبه وأخرج ولاعة ناولها للوي، وقال:

- ولّع انت.. أنا ما باغيرش سجائري. وأخرج سيجارة من علبته، وانتظر لوي
ينتهي من إشعال سيجارته.

أشعل لوي السيجارة، ثم قام وأشعل سيجارة وائل، ثم جلس وسحب من
سيجارته نفسًا طويلًا ونفثه وهو مغمض العينان كمدمن وحصل لتوه على
جرعة غابت.

صمت وائل لثوانٍ ليترك لوي يستمتع بالنفس الأول حتى فتح الأخير عينيه
وقال:

- عرفت منين يا باشا إني بشرب مارلبورو أبيض؟؟

- من حاجاتك اللي اتحرزت لما جيت.. فيها سجائرك.. ممكن تشرب قهوتك
وتكمل كلام بقي؟؟ كنت قلت إن الواد قال لك حاجة.. قال لك إيه؟؟

- هو قال لي إنه جاي من طرف بابا عشان يخرّجني.. بس كان بيكدب.

عُمر الشقي

- ليه بتقول كان بيكذب؟؟

ترك لؤي فنجاناه بعد شرفة طويلة من قهوته، وقال وهو يومئ برأسه:

- حلو البُن. ثم عاد لموضوع الحديث وقال:

- أولًا لأن بابا لا يمكن يعمل كدا.. دا سايبني بالعند في الحجز وعرفت من

الأمناء إنه محرّج عليهم حد ينقلني "حجز الهوات" عشان اترّبّي. ورفع يديه

بعلامة التنصيص ليؤكد اقتباسه اللفظ من الأمناء، وابتسم. ثم أكمل:

- ثانيًا الحد اللي أنا خبطه حالته اتحسننت الحمد لله ومش ناوي يقاضيني..

بابا يعمل كدا ليه؟ وانا كدا كدا خارج في خلال أيام.. ثالثًا الواد نفسه ما

خرّجنيش.. هو كان عايز حاجة تانية وعمل حركة بابا دي عشان يحوّل نظر

حضراتكم عن حقيقة غرضه.

اعتدل وائل وضيق عينيه في انتباه واضح، وصرّ كرسيه وكأن المعلومة

لفتت انتباهه هو أيضًا، وقال وائل:

- عايز حاجة تانية؟؟ إيه اللي خلاك تقول كدا؟؟ وحاجة زي إيه؟؟

- مش عارف والله يا باشا.. بس هو أكيد ما كانش جاي يهرّبني.. I'm sure.

صمت وائل لثوانٍ، فكّر خلالها في كلام لؤي، ثم قال وهو يريّح ظهره مرة

أخرى على مقعده الذي صرّ بصوت اعتاده وائل:

- طب احكي لي كدا بالتفصيل اللي حصل معاك من لحظة ما دخل الحجز..

لحد ما سابك.. بالتفصيل.. مهما كانت التفاصيل صغيرة ما تسيبهاش.

معتز شرباش

تمهّد لؤي ثم بدأ في سرد تفاصيل ليلته الغريبة:

- احنا في الحجز سمعنا صوت زعيق جاي من برّا فجأة.. الشباب في الحجز قاموا يبصّوا من الفتحة.. طبعًا ما حدش شاف حاجة.. بس كان واضح إن في قلق برّا.. وبعدين سمعنا صوت المفتاح.. كله بعد عن الباب افكرنا حد جديد جاي أو حاجة.. فجأة لقيت دخان ملا الحجز.. ما حدش كان فاهم إيه اللي بيحصل.. أنا وشي باظ.. ما بقيتش عارف آخذ نفسي ولا شايف.. ما حسيتش بنفسي إلا وحد بيشدني وبيركب Mask غاز على وشي.. اتنفست الحمد لله.. بس برضه ما كنتش شايف كويس.. وكنت فاكر وقتها إن غاز اتسرب من المواسير ودي عملية إنقاذ لكل المساجين.

توقف لثوانٍ ليأخذ نفسًا طويلًا من سيجارته قبل أن يطفئها، ويشعل واحدة جديدة. ثم أكمل:

- الولد شدني قُمت معاه بس ما كنتش شايف كويس من الدموع ووشي كان لسًا بيحرقني.. فضلت ماشي معاه لحد ما فتح باب أوضة ودخلني جواها.. وقال لي "بابا اللي باعتني" وادالي تليفون أكلمه.. بس الخط ما كانش شغال.. وبعدين فجأة لفّ ورايا ولقيته يربط إيدي في بعض.. وبعدين رجلي.. ما بقيتش فاهم حاجة.. وبعدين خرج.. وفضلت كدا لحد ما العساكر لقوني.

انتبه وائل وعقد حاجبيه وسأل باهتمام:

- خرج فين؟؟ تقصد نطّ من الشباك.

عُمر الشقي

- آه.. آه.. نطّ من الشباك...

صمت لثوانٍ وكأنه يتذكر، ثم أكدّ:

- آه هو ذا اللي حصل.. بس هو الأول خرج من باب المكتب ثواني ورجع نط من الشباك.. تقريبًا حاول يخرج من الباب بس الطريق كان صعب.

صمت وائل لثوانٍ مُفكرًا، ثم قال بصوت جاد:

- لؤي.. ركز كويس.. انت متأكد إنه خرج من الباب؟؟ وخرج من المكتب وقفل الباب وراه؟؟ ولا كان يببص برّا؟؟ وغاب وقت قد إيه تقريبًا؟؟ ثواني ولا دقيقة ولا اتنين؟؟ ركّز من فضلك.. التفاصيل دي مهمة جدًّا.

تنهد لؤي بعُمق، وظهرت علامات التذكّر على ملامحه، ثم قال بلهجة من تذكر شيئًا لتوّه:

- افكرت.. بعد ما أخذ مني التليفون.. فتح الشباك.. وبعدين خرج وقفل الباب وراه بالراحة.. وغاب تقريبًا دقيقة.. دقيقة ونُص.. لأنني حاولت اتعدل على الكرسي وافك الرباط.. بس بعد محاولتين وقعت على الأرض.. رجع هو لقاني على الأرض.. عدّى من جنبي ونط من الشباك.

قال وائل وكأنه يحدث نفسه:

- يعني فتح شباك المكتب.. وسابك فيه. وأشار إلى لؤي، وأكمل:

- ورجع بعد دقيقة نط من الشباك المفتوح.

معتز شرباش

دارت عينا وائل في الغرفة في علامة على التفكير، ثم أدرك بعد ثوانٍ أن لؤي ما يزال جالسًا أمامه، فابتسم بؤد وهو يضغط زر استدعاء راضي، وقال:
- شكرًا يا لؤي.. خَلِّي السجاير معاك. وأشار لراضي الذي دخل المكتب ليُعيد لؤي للحجز كما كان، وقال لراضي وهو يغلق الباب:
- وابتعت لي شريف بيه.

وأمسك القلم وكتب في مُفكرته في نفس صفحة "الاقتحام":

"Professional"

"فتح الشباك وخرج من المكتب ورجع نط من الشباك"

"عايز حاجة تانية"

وغرق مُجددًا في تفكير صامت، لم يقطعه سوى صوت التكييف الصاخب، الذي بدا وكأنه يحاول تذكير صاحبه بوجوده وفضله في اعتدال درجة حرارة مكتبه، بصوته الذي اعتاد عليه وعي الضابط، فتوقف - تقريبًا - عن سماعه.

* * *

٨

خرج الصحفي عماد المنسي مُسرِعًا من حمامه الدافئ ليلحق بهاتفه قبل أن يتوقف عن الرنين، كانت مقالته التي انتهى منها في وقت قياسي، ووافق على نشرها رئيس تحريره على موقع الجريدة، قد حققت انتشارًا سريعًا لم يتوقعه هو نفسه، ولم يتوقف هاتفه عن الرنين، حيث استقبل العديد من المكالمات من زملاء المهنة، لتهنئته على أول مقال له، وعلى اختياره للعنوان، الذي، بدون شك، كان اختيارًا عبقريًا.

كان يتوقع أن يكون أحد زملائه في إحدى الجرائد الأخرى، أو أحد أصدقائه الذين قلّمًا يتابعون عمله، ولكنه لم يجد رقم هاتف على شاشة هاتفه، فقط رنين وكلمة "مستخدم غير معروف".

- ألو. قالها وهو يبتسم عندما انتفضت كلبته الصغيرة صوفي، كاكية اللون، بعد أن سقطت قطرة ماء من شعره على وجهها، لما اقتربت لتلحق وجهه كعادتها.

- مساء الخير يا أستاذ عماد. بصوت هادئ.

- مساء النور. متوجسًا.

- معاك العقيد مجدي نور من مكتب وزير الداخلية. بصوت ودود، يحمل من السُخرية ما يستحيل ملاحظته عبر الهاتف.

معتز شرباش

لم ينتبه عماد إلى أن الاسم هو نفسه اسم شخصية الفنان عادل إمام في فيلم النوم في العسل، فبمجرد سماعه "مكتب وزير الداخلية" فقد كل قدرة على التركيز، فقال بصوت مرتعش، دون أن تبدو عليه أي ملامح ملاحظة الدعابة:

- أهلاً وسهلاً سعادتك.. أنا... اتفضل.. أوامر سعاد.. دتك.

توقفت صوفي عن اللعب ومحاولة لعق وجهه، وكأنها شعرت بخوفه، فتجمّدت متوجسةً.

ابتسم صاحب الصوت الهاديء وخرجت ابتسامته على شكل زفرة خفيفة، ارتج لها قلب عماد، وهو يتخيل مُحدثه كشيطان له قرنان، وينفث النار من فمه، وعيناه حمراء كالدم.

- من فضلك يا عماد بيه.. أنا كنت محتاج أشرب معاك فنجان قهوة.. لو وقتك يسمح.

- ت تحت أمرك يا فندم.

ابتعدت صوفي عنه بخطوات سريعة، ثم دارت ونظرت له، وكأنها تريد المساعدة، وتعجز عن تقديمها.

- الله يعزك.. أنا ما حبتش أكلم كمال بيه.. وحببت يكون الاتصال بيننا مباشرة.

- يا سيادة اللواء دا يشرفني.

- لسًا عقيد يا عماد.. بس فأل حلو أهه.

عُمر الشقي

زفر عماد مبتسمًا، ولم يرد، لم تخدع الابتسامة كلبته الصغيرة، فسَمَّها الذي لم يتعدَّ الخمسة والأربعين يومًا كان كافيًا لتُدرك، أن ابتسامته تحمل من التوتر، ما لا تحمله من المرح، فاستقرت منكمشة، كما تفعل عندما تُخطئ، وكأنها سبب ضيقه وتوتره.

أكمل العقيد:

- خلاص يبقى بكرة الصبح بدري في الجُرنال.. يناسبك؟

- أيوة يا افندم.. أنا باكون هناك من ٨ الصبح.

- كويس جدًّا.. وبالمناسبة؛ مقالة النهاردا كانت رائعة.

أغلق العقيد الخط، دون كلمات السلام المعتادة، ولكن عماد لم يلحظ فظاظة طريقة إنهاء الاتصال، حيث وصل صوت قطع الاتصال لعقل عماد وكأنه صوت إغلاق باب زنزانة حديدي؛ فانتفض جسده، وارتجف.

لم تستطع أصوات الشارع الصاخبة، في هذا الحيّ الشعبي بجدارة، كصوت تدحرج زهر، ولا خبط قطع الطاولة المزعج الذي يشير إلى "مَسك" صاحبه لـ"قُشاط" الخصم في خانة "اليك"، ولا صوت بائع ينادي على زبائنه بصوت يكفي لإيقاظ الموتى، ولا صوفي التي لم تُتحرك ساكنًا، من منع عقل الشاب

من محاولة توقع نتائج تلك المقابلة، مما زاده خوفًا.

فالخوف من المجهول، وانتظاره، هو أقسى أنواع الخوف.

مذكرات

٢

أعرف أين يقع الخط الأحمر..

وأعرف أن تخليبه، خليشة.. ستحرمني من رؤيتها..

لا يمكنني المجازفة بكل ما أملك.. في سبيل أن أملك ما لا يمكنني

امتلاكه.

* * *

أعاد النقيب شريف كوب القهوة "الدُّبِل" لمكانه على الطاولة الصغيرة أمامه، واعتدل ليريح ظهره مرة أخرى أمام مكتب الرائد وائل تحسين وقال متسائلاً:

- طب ليه مش مُقتنع إنها جات كدا؟؟ أو كان بيجرّب؟؟

عَمز وائل لزميله وهزّ رأسه نافيًا، وقال بتصميم:

- لا يمكن تدخل دماغي حكاية الصُدفة أو الارتجال دي.. مش مع واحد زي دا.. لا يمكن.

صمت لثوانٍ دارت عيناه خلالها في أرجاء مكتبه علامة على التفكير، ثم هزّ رأسه وكأنه ينفُض عنها فكرة ما، كادت تسيطر عليه وقال:

- لا لا يا شريف.. الواد دا عارف كويس قوي هو بيعمل إيه.. من لحظة دخوله من الباب للحظة خروجه.. خط سيره كان متحدد.. ركز معايا كدا في خطواته وطريقته.. أولًا هو كان عارف إن الأمين مجدي اللي معاه مفاتيح الحجز.. لأن هو دا الوحيد اللي هاجمه.. وكمان كان عارف الحجز فين.. ولؤي قال إنه بعد ما خرج من الحجز جه على مكتب المأمور على طول.. ودا مأكّد لي إنه عارف تقسيم القسم.. يبقى إيه اللي يخليه يخرج من المكتب دقيقة ويرجع.. ولو كان بيشفوف الوضع في القسم قبل ما يهرب.. كان ثواني

معتز شرباش

ورجع.. لكنه اتأخر.. لدرجة إن لؤي كان وقع على الأرض.. لا يا شريف الواد دا وراه سر تاني.. بس إيه هو بقى؟؟ دا غير إن واحد في شجاعة وبإمكانيات الواد دا.. ممكن يكسب على الأقل ضعف المبلغ اللي أخده من رامز بمجهود أقل بكثير من اللي بذله هنا.. الواد دا جه هنا لسبب تاني.. دماغي مقتنعة بكدا.. وانت عارف أنا دايمًا بيطلع تخميني في محله.

- صحيح.. بس ربع مليون جنيه مش مبلغ قليل.. دول يجوزوني الصُبح يا وائل بيه.. وبعدين ما هو مش كل الناس بتفكر زيك.. هو جات له فكرة وخطط لها ونفذها.. مش كل حاجة وراها حاجة.

- هو مش مبلغ قليل.. بس صدقني أسلوبه هو اللي وراه حاجة.. المبلغ قليل على إمكانياته.

- يعني مصدق قصة إنه مخابرات أجنبية والجو الفاشل دا؟

- لا طبعًا.. أنا مستبعد دا بالمرّة.. بس بالعقل يا شريف دا لو راح مكتب صرافة بمسدس صوت هيطلع بنص مليون جنية في دقائق، الواد دا لو في دماغه الفلوس بس.. ما يجيش هنا. ونقر على سطح مكتبه.

ثم قال وائل بجديّة وغضب مكبوت:

- الواد دا لُغز وبدأت اتضايق إني مش فاهمه.

- عارف يا وائل بيه.. كلامك دا منطقي وما لوش غير تفسير منطقي واحد.. إن اللي عمل كدا حد من الوزارة.. أو من القسم نفسه.. عارف خريطة القسم.. ومواعيدنا.. ومعاه معداتنا.

عُمر الشقي

- صمت وائل لدقيقة كاملة غرقت ملامحه في تفكير عميق، ثم تنهد وقال:
- مش عارف.. عمومًا احنا نشتغل بالترتيب.. عملت إيه مع بتوع محل الورد؟؟ طبعًا واحد دفع الفلوس كاملة وما لوش بيانات عندهم.. صح؟؟
 - التقط النقيب شريف ملفًا من أمامه، وفتحه وقال دون أن ينظر لوائل:
 - هي واحدة ست قالت اسمها سميرة اتصلت حجزت بالتليفون.. وطلبوا منها الفلوس.. بعنت واحد دفع.. وطبعًا مش مدام المأمور.. وما يعرفوش لها رقم تليفون.
 - وحتى لو يعرفوا تليفونها.. أكيد اتصلت من رقم موبايل وزمانه في الزبالة زي ال...
 - قاطعه رنين هاتف مكتبه، فأجاب عاقدًا حاجبيه:
 - ألو. فجاءه صوت رخيم يقول بعصبية واضحة:
 - الرائد وائل تحسين؟
 - معاك.. مين مع...
 - معاك مكتب رئيس مباحث المديرية.. ثواني.
 - ظهر التوجُّس والقلق على ملامح الضابط.

النوم في العسل؛ أقدم حيلة في كتاب الداخلية

بقلم: عماد المنسي

نجح فيلم النوم في العسل، من تأليف العبقري وحيد حامد، وإخراج شريف عرفة الموهوب، ومن خلال القدير عادل إمام، في تصوير أقدم حيلة في كتاب الحكومة المصرية عامة، ووزارة داخليتها خاصة، للتعامل مع المشكلات التي تواجهها، وهي حيلة "الإنكار".

طوال مدة الفيلم تحاول الحكومة المصرية إقناع المواطن، من خلال إعلامها وبرلمانها ومسؤوليها، "إنه بيعرف" ولكنه لا يعلم. وأن الملايين من الحالات التي تم رصدها بالفعل وتؤكد أن كل رجال البلد، أصبحوا وبدون سبب واضح، رجالاً مع إيقاف "التنفيذ"، ماهي إلا حالات فردية، بسبب ضغوط العمل، والمعيشة.

أما سبب استرجاع هذه الذكريات اليوم، فهو ما حدث فجر اليوم في منطقة مصر الجديدة، حيث استيقظ سكان ذلك الحي الراقى، في منتصف الليل على صوت معركة تدور داخل قسم الشرطة المجاور لهم، اندفع بعض المواطنين في اتجاه القسم، لتبين أسباب تلك الأصوات التي أقلقتهم، ولكنهم وجدوا محيط القسم مغلقاً على غير العادة، حيث فرضت قوات القسم كوردوناً يبعد عدة أمتار عن الباب، مما يمنع أي أحد من رؤية ما يدور خلف حوائط القسم. وبسؤال بعض الأمناء والعساكر المسؤولين عن التأمين عما حدث، توقع ماذا كان الرد؟؟ أجل.. تماماً كما توقعت عزيزي القارئ... "لا شيء" !!

عُمر الشقي

وبسؤال بعض الأهالي الذين رفضوا ذكر أسمائهم تجنباً لزيارات متوقعة من الداخلية في حالة ذكرها، ففضلوا أن يتركوا كاتب المقال يحظى بهذا الشرف وحده، أقر الجميع أن رائحة الغاز المُسيل للدموع ملأت المنطقة حول القسم، ولكن الغريب أن تلك القنابل تم إطلاقها داخل القسم وليس خارجه.

هناك بعض الأسئلة التي لن تحصل على إجابات لها مطلقاً:

- هل كانت محاولة لاقتحام للقسم؟

- هل كانت محاولة هروب من المُحتجزين؟

- هل كانت محاولة تمرد من بعض العاملين داخل القسم على قياداته؟

- هل تم احتواء أيّاً كان ذلك الذي حدث أم أنه وقع بالفعل؟

- هل تم القبض على أشخاص؟ وهل ستم محاكمتهم؟ وإذا كانت الداخلية تنوي محاكمة المُذنب أيّاً كان؛ فما هي التُّهم الذي ستتهمه بها، وهي تنكر الحدث من الأساس؟

هل سنجد ضمن طاقم عمل وزارة الداخلية اليوم من يقوم بدور العقيد مجدي نور في فيلم نوم في العسل، ليخرج لنا بشجاعة ويقول لنا أن هناك حادثة؟؟ وأنه جاري التحقيق في ملابساتها؟؟ هذا سؤال قد تجيب عنه الأيام القادمة.. وقد لا تُجيب.

انتهى وائل من قراءة المقالة ليُلقي بالصحيفة أمام شريف، وهو يصرخ غاضباً:

معتز شرباش

- اتفضل يا عم شوف الفضيحة.. مين ابن الكلب دا؟؟
- تناول شريف الجريدة وقرأ المقالة ثم تركها أمامه على الطاولة، ونظر لوائل
بملامح أنهكها الشعور بالفشل:
- هو سيادة اللواء قال لك إيه؟؟
- قال لي على المصيبة دي.. وقال ما نردش على أي اتصالات من أي جهات
إعلامية.. ومكتب الوزير شخصياً هيلم الموضوع.. وابن الكلب دا هيعتذر..
بس احنا كدا في القسم متعلم علينا رسمي ولا بسين طُرح قصاد الوزارة
كلها.
- زفر غاضباً وأكمل:
- اللي حارق دمي إنه ادالي أمر مباشر ما اتدخلش في الحكاية دي.. كنت
هاجيب زفت دا أنفخه هنا.. بس وحياة أمك يا عماد... قطع كلامه وسأل
شريف غاضباً:
- اسمه عماد إيه؟
- المنسي.
- يا عماد يا منسي ما هانسي لك الموقف دا وهتيجي تحت إيدي وهفرمك.
قالها وهو يدون اسم الصحفي أمامه.
- قال شريف في محاولة فاشلة لتهدئة وائل:
- ما تشغلش بالك بالصحفي دا.. مكتب سيادة الوزير ما يتوصاش.. خرينا
احنا نركز على النصاب دا.. لو مسكناه هتفرق معانا جامد.

عُمر الشقي

- عندك حق.. هي دي مهمتنا الأساسية دالوقت.. لازم نجيب الواد دا، وهما في الوزارة هيعرفوا منه هو جاب الخبر منين.. وهيبعلغونا.. لو حد من الأمناء وديني لانفُخه، صمت لثوانٍ زفر خلالها بعضاً من غضبه وتوتره وأكمل بصوت هادئ نسبياً:

- عايزين نعرف بيانات رقم التليفون اللي كلم منه الواد دا رامز غالي.. والعربية، نظر لساعته وأكمل دون توقف:

- في أقل من ساعة عايز التفاصيل دي قصادي يا شريف.. عايز صاحب الخَط لو متسجل.. وصاحب العربية.

هزّ شريف رأسه مُتفهماً وقال وهو يُخرج هاتفه الذي من جيبه:

- أكيد صفحة "الشرطة والشعب في خدمة النظام" هتقلب الدنيا النهاردا. قال وائل، وقد لانت ملامحه قليلاً:

- أكيد.. دول ما يتوصوش.. شوف كدا كتبوا حاجة؟

فتح شريف برنامج ال facebook على هاتفه، وبحث عن الصفحة التي تحدث عنها، وفتحها، ليجد أنهم بالفعل قد شاركوا مقالة عماد المنسي على صفحتهم، وكتبوا عليها جملة، قرأها على مسامع وائل:

"العقيد مجدي نور في الأفلام بس يا عماد، بس والله هتوحشنا بعد المقالة الجامدة دي" وكان هذا الخبر قد تمت مشاركته آلاف المرات، بالرغم من أنه لم يُنشر على الصفحة سوى منذ ساعة تقريباً.

معتز شرباش

أشاح وائل بيده في الهواء، وهو يعيد ظهره على كُرسية الذي أصدر صريراً وكأنه يشارك صاحبه ضيقه، وزفر بغضب، ليقول شريف وهو يترك هاتفه أمامه:

- مش انت كنت بتدافع عن الصفحة دي يا وائل بيه؟؟ وكنت بتقول إن عندهم حق في اللي بينشروه ساعات؟؟ وانا كنت باقول لك الناس دي مش موضوعيين.. ولا هدفهم الخير.. وكنت بتدافع عنهم وتقول الوزارة فيها وفيها.. آدي جالنا يوم بيخبطوا فينا احنا اهه.. واحنا ربنا اللي عالم بينا.
- والنبي يا عم شريف مش ناقصك.. يلا نشوف شغلنا.

* *

صفحة "الشرطة والشعب في خدمة النظام" كان قد تم إطلاقها على موقع الـ facebook منذ شهر، وكانت صورة الخلفية عبارة عن لوحة قد تم تصويرها من داخل أحد أقسام الشرطة تحمل جملة "الشرطة والشعب في خدمة الوطن" ولكن تم رسم خط أحمر مائل على كلمة الوطن باستخدام الفوتوشوب، وكُتِبَ أعلاها بنفس اللون وكأنها تصحيح، كلمة "النظام". وكانت كلمة الوطن تبدو وكأنها تنزف دمًا.

تخصصت تلك الصفحة منذ انطلاقتها في كشف فضائح وانتهاكات وتجاوزات الداخلية، وأخطاء الوزارة كلها، وكانت الصفحة موضوع نقاشات كثيرة دارت داخل الوزارة وأقسامها الشرطة، فمن الضباط من كان يراها مُحقة فيما تطرح، وكان منهم من يرى القائمين عليها مجرمين لهم أغراض تخريبية.

وحتى هذه اللحظة لم تهتم الداخلية بالكشف عن مؤسس الصفحة، أو حتى إغلاقها، وخاصة أنها اكتسبت شعبية كبيرة في فترة وجيزة، وأصبح المتابعون للصفحة بالملايين، مما اضطر الداخلية للتعامل مع الملف بحكمة، لأنه أصبح محل اهتمام إعلامي وشعبي كبير.

تخطت بقليل الشمس منتصف السماء، لتملأ الشوارع بالحرارة القاسية، لتكمل مع زحام الشوارع وضيق مُعظمها، والرطوبة المرتفعة، وسلوك معظم سائقي السيارات، لوحة تجسّد ملامح صيف القاهرة الخانق.

- يعني هي كانت ناقصة؟! قالها الرائد وائل وهو يقود سيارته بعصبية واضحة، لزميله النقيب شريف. ثم نظر لشريف وسأله وهو يتفادى الاصطدام بالسيارة التي أمامه، لتصدر عجلات سيارته صوت احتكاك عالٍ بالأسفلت:

- فهمني يا شريف.. هي جريمة قتل ولا انتحار؟

زفر شريف بضيق، وألقى سيجارته من شباك السيارة، ليمسك بيده الباب إلى جواره، وكأن الباب سيحميه في حالة اصطدام سيارتهم بأخرى، وهز رأسه وقال:

- بالراحة يا عم وائل.. الجثة مش هتطير.

نظر له وائل بغضب، وهو ينفخ دخان سيجارته بضيق، فأكمل كلامه مُجيبًا حتى ينظر وائل إلى الطريق أمامه، فهو كان يخشى الاصطدام أثناء نظر وائل للطريق، والآن أصبحت تلك رفاهية يتمناها:

عُمر الشقي

- ماااا.. ما فهمتش غير إنهم سمعوا صوت شبه ضرب النار جاي من الشقة.. وبعدها ما حدش دخل ولا خرج من الشقة لحد ما جوزها جه ولقاها ميّة في أوضتها.

- ومين اللي كَلّم الشرطة دا؟ قالها وائل دون أن ينظر لشريف.
"على الأقل عينه عادت إلى الطريق" قال شريف في باله، ثم قال وهو لا يزال ممسكاً بالباب:

- ما اعرفش!

تنهد وائل وهو يقود السيارة، برغم زحام الطريق في هذا الوقت من النهار، بسرعة عالية، وقال وكأنه يحدث نفسه:

- هي المصايب كدا؛ ما تجيش فرداني.

سحب نفساً أخيراً من السيارة وألقاها من شباكها، ثم اتصل بخطيبته، فلم تُجب، فأرسل لها رسالة، كاد شريف أن يقفز من السيارة أثناء كتابة وائل لها وقيادته السيارة بيد واحدة وبنصف تركيزه، كتب فيها:

"والله جريمة قتل أو انتحار.. بجد آسف.. مش هاعرف آجيلك بعد الشغل..

هاكلمك لما أخلص"

وبعد دقائق وصله ردها، فقرأه دون أن يلاحظ أن شريف يكاد يموت خوفاً إلى جواره:

"اكتب وصيتك يا وائل.. هاقتلك"

معتز شرباش

ترك الرائد وائل سيارته أمام العمارة التي شهدت مقتل أحد سُكَّانها، وقال بتوتر واضح لزميله - الذي استعاد لونه الطبيعي بعد وصولهما سالمين- بمجرد أن أغلق باب المصعد وضغط على رقم الدور السادس:

- ادخل انت الأول وماحدث يلمس حاجة.

- حاضر.

كان النقيب شريف يعلم أن الرائد وائل يخاف من رؤية الدماء، وكان هذا غالبًا سبب توتر وائل منذ علم بالحادثة، وسبب قيادته بتهوّر، وكأنه دون وعي منه كان يتمنى أن يتعرضا لحادث يمنعهما من الوصول لمسرح الجريمة أو الحادثة.

كان وائل يرفض أن يتناول الدواء المضاد للقلق، لأنه يتسبب له في حالة من الخمول والكسل مع عدم وضوح الرؤية وعدم القدرة على التفكير السليم. ولما كان عقله الذكي هو السبب الرئيسي في بقائه في وظيفة، تتطلب منه أن يقوم بحل القضايا، الصعبة أحيانًا، فكان يرفض التخلّي عن ذكائه، مقابل أن يبدو سليمًا معافي أمام الدماء كلّما اضطر إلى رؤيتها، فذكاؤه كان سلاحه الرئيسي، فهو يعشق الألفاظ، ويهوى شعور الانتصار عليها، ولكن تلك الوظيفة تُعرّضه أحيانًا لرؤية الدماء، فتعوّد أن يقوم بإعداد نفسه نفسيًا لرؤية الدماء، ويقوم بالتنفس ببطء حتى يمنع نفسه من التقيوء، ويحاول قدر الإمكان عدم الالتفات إلى مكان الدماء كثيرًا، ولكن التوتر يفرض نفسه

عُمر الشقي

بمجرد ذِكر الدماء أمامه، وبرغم كل محاولات التماسك، يتملّك منه التوتر رغماً عنه.

وكان شريف يعلم كل ذلك، ويحترمه، فَمَن مَنَّا خُلِق بلا نقاط ضعف.

خرج الضابطان من مصعد البناية، فأصدر المصعد، كإشارة للتوقف، صوتاً عاليًا، وكأنه قطار يُعلن وصوله لوجهته، وكأنهما بدون الصوت ما كانا ليُدركا انتهاء رحلة الصعود القصيرة، كان الصوت قصير ومُزعج، كأصوات أجراس الشُّقق، التي تشعر عندما تسمعها، وكأنها جهاز إنذار ضد الحريق، وليس مجرد جرس شقة، مما زاد توتُّر وائل توتُّرًا. خرجا إلى ردهة ضيقة بين شقتين فقط في الدور، ولاحظ وائل وجود كاميرا مُراقبة مثبتة فوق باب الشقة التي تقع على يمينه.

كان هناك رجلان أمام باب المصعد، يبدو على أحدهما أنه البواب، حيث كان يرتدي جلابية رخيصة الثمن، وإن كانت نظيفة تمامًا، وكانت له لحية خفيفة، وكان الآخر رجلًا يبدو أنه قد تجاوز الخامسة والأربعين، كان يرتدي بنطالًا رياضيًّا "وتي شيرت"، وكانا يتصببان عرقًا بسبب حرارة الجوِّ على سلم العمارة، مثلهما مثل وائل الذي كان يتصبب عرقًا هو الآخر، ولكن بسبب اقترابه من الدماء، وكان يظُن أنه يستطيع بقليل من التركيز أن يسمع دقات قلبه بسبب تسارعها وقوتها، ولكنه حاول جاهدًا أن يبدو طبيعيًّا.

سأل شريف الرجل ذا الجلابية:

- فين الشقة اللي فيها الـ. أنا نقيب المباحث.

معتز شرباش

رفع البواب يده وأعطى النقيب التحية العسكرية، وقال وهو يتقدم في اتجاه الشقة التي تقع يمين المصعد:

- اتفضل يا بيه.. الباشمهندس...

وقطع كلامه عندما أمسكه وائل من مرفقه ومنعه من دخول الشقة، فوقف البواب دون اعتراض ولكن دهشته كانت واضحة، ونظر لوائل، الذي أشار لشريف برأسه أن يتقدم داخل الشقة، ثم وجّه نظره صوب البواب وسأله وهو يُلقي نظرة على الرجل الآخر:

- مين اللي اتصل بالشرطة؟

فنظر البواب صوب الرجل الآخر، وكأنه يُمرر له السؤال، فأجاب الرجل:

- أنا يا افندم.. ماهر مجدي، ومدّ يده ليُسلم على وائل، الذي سلّم عليه وهو يتفحصه بعينه، ليُكمل ماهر باسمًا:

- محامٍ.

- انت ساكن هنا؟ وأشار إلى الشقة المقابلة، لتلك التي بها الجُثة.

- أيوة.

سأل وائل وهو ينقل بصره بين الرجلين:

- حد دخل الشقة من ساعة ما... وصمت.

فقال ماهر المحام:

- الباشمهندس عادل بس.

فنظر له وائل مستفسرًا بصمت، فأشار ماهر للشقة وقال:

عُمر الشقي

- صاحب الشقة.. وجوز المرحومة.

- هي ماتت؟

قال ماهر بأسى:

- آه الله يرحمها.

- عرفت منين؟

- نعم؟!!!

- عرفت منين إنها ماتت وانت ما دخلت الشقة زي ما بتقول؟

تراجع ماهر، دون وعي منه، خطوة إلى الوراء، وكأن وائل على وشك إلقاء القبض عليه، وقال بتوتر:

- الباشمهندس قال لنا بعد ما فتح الشقة لما جه من برّا.. احنا سمعنا صوت بس.. ولما الجماعة خبّطت على الباب وما حدش فتح.. اتصلت بالباشمهندس ابّلغه.. ولما جه فتح الشقة وبعدين قال لنا إنها مضروبة بالنار.. وطلب مني اتصل بالشرطة والإسعاف عشان هو كان مُنهار ومش مركز.

- ولما جه من بر... قطع كلامه عندما ظهر شريف على باب الشقة وطلب منه الحضور، فنظر له نظرة ذات مغزى، فأوماً شريف برأسه مطمئناً زميله أنه تكفل بأمر الدماء، وألا يقلق، فتوجه وائل إلى الشقة، وقال وهو في طريقه لماهر المحام والبواب:

- ما حدش يمشي.. هنحتاج لكم كمان شوية.

معتز شرباش

وفي نفس اللحظات خرج رجلاً الإسعاف من المصعد الذي أعلن وصولهما
بجرسه المزعج، فأشار إليهم البواب أن يتبعوا وائل.

عبر وائل باب الشقة التي ما إن خطا إلى داخلها حتى وجد نفسه أمام سفرة
طعام، وإلى يمينها غرفة معيشة مُطلّة على الشارع حيث ترك سيارته، وعلى
أحد كراسي غرفة المعيشة يقبع شاب في منتصف الثلاثينات، كان ممسكاً
رأسه بكفيه ومسنداً مرفقيه على ركبتيه. نظر وائل لشريف وسأله:

- فين الجثة؟

أشار شريف لطريقة طويلة إلى يسار وائل، وقال بصوت خافت:

- في أوضة النوم.. في آخر الطرقة.. طلقة رصاص.. والمسدس على الأرض.

شكلها انتحرت. قالها بخفوت حتى لا يسمعها سوى الرائد.

الذي هز رأسه متفهماً، وأشار في اتجاه رجال الإسعاف، وقال لزميله:

- طب روح معاهم.. ما حدش يلمس حاجة.. يتأكدوا من الوفاة بس

ويطلعوا، ثم أشار للزوج وسأل شريف هامساً الذي كان بدأ يتحرك في

اتجاه الغرفة:

- اتكلمت معاه؟

هز شريف رأسه نافياً وأكمل طريقه إلى الداخل، وتحرك وائل دون أن

يلاحظه الزوج، ووضع يده على كتفه بهدوء، وما كاد يلمس كتف الزوج حتى

انتفض كأنما مسّته صاعقة، فاعتذر وائل وقال:

- أنا الرائد وائل تحسين.. مباحث.. قادر تتكلم؟

عُمر الشقي

اعتدل الرجل الذي كانت ملامحه خالية من أي تعبير، وكأنه داخل حلم لا يملك فيه تأثير كالدُّمية، وقال بصوت هاديء دون أن ينظر إلى وائل مباشرة:

- اتفضل يا افندم.

- إيه اللي حصل؟

بلع الزوج ريقه وقال وهو ينظر إلى الأرض أمامه:

- أنا كنت برًا باشتري حاجات.. اتصل بيّ جاري وقال لي سمع صوت غريب من شقتي.. زي ضرب نار.. ولما مراته خبّطت ما حدش فتح.. جيت على طول.. ودخلت لقيتها زي ما حضرتك شُفت. وأخضى وجهه بيديه، في محاولة منه أن يتماسك، واحترم وائل صدمته وصمت لثوانٍ، حتى أزاح الرجل يديه، فسأله:

- حرّكت أي حاجة من مكانها من لحظة دخولك الشقة؟

قالها وأخرج وائل مُفكرته الصغيرة من جيبه، وفتح صفحة جديدة خالية كتب أعلاها كلمة واحدة "الانتحار".

نظر إليه الزوج لأول مرة لجزء من الثانية ثم نظر إلى المُفكرة، ثم نظر إلى وائل مُجددًا، وكأنه يبحث عن شيء ما، ثم عاد ونظر أمامه إلى الأرض، وقال:

- لا.

معتز شرباش

دار وائل بعينه في المكان ليلحظ وجود كاميرتين مثبتتين في مدخل الشقة، إحداهما كانت موجهة نحو الصلاة حيث يجلس هو والزوج، والأخرى موجهة ناحية الردهة المؤدية إلى عُرف النوم.

أعاد وائل نظره إلى الزوج الذي كان لا يزال ينظرُ إلى الأرض، كان يعلم وائل أن الزوج في حالة لا تسمح له بالحديث، ولا التفكير بمنطق، وهو ما أراده. حيث أنه يريد أن يتفوه الزوج بأول الإجابات التي تخطرُ على باله، لأنها في معظم الأوقات تكون الأقرب للحقيقة، وأيضًا لن يتمكن الزوج من الكذب بمهارة، إذا أراد أن يخفي شيئًا. فقرر أن يتمادى في أسئلته المهمة، دون حرج، فحل القضية أهم عنده من أن يستلطفه الزوج، فلن يستلطف الرجل، غريب يتدخل في شؤون حياته مهما فعل، فليستفيد إذن.

فسأله وائل دون تمهيد بصوت لا تعاطف فيه:

- تفتكر مين ممكن يعمل كدا؟

جفل الزوج لثانية، ثم رفع رأسه ونظر إلى وائل دون أن يجيب. لم يلتقط وائل أي دلالة على أن سؤاله قد يجد أي إجابة عند الزوج، فقال وكأن السؤال السابق قد أُجيب:

- في إمكانية إن المدام تكون انتحرت؟

لم يُبلغه وائل بأن الفحص المبدئي لمسرح الجريمة يشير إلى الانتحار، فكان يريد أن يسمع ما لديه ليقول دون تأثير منه أو من المؤشرات، فضيق الزوج

عُمر الشقي

نظرته وكأنه يتعجب، وقال بغضب بدا غير حقيقي بسبب حالة صاحبة الذي أنهكه الموقف:

- ناهد لا يمكن تعمل كدا.

- تفتكر حد قتلها؟ قال وائل وهو يدون اسم الزوجة في مُفكرته.

شوّح الزوج بيديه اليسرى واعتدل ليُريح ظهره، ورفع رأسه ونظر إلى السقف، وقال وهو يتنهد بإنهاك:

- ما اعرفش حاجة يا افندم.. أنا ما اعرفش.. حضرتك مش قادر تفهم ليه؟
قرر وائل أن يغيّر الموضوع قبل أن ينهار الزوج، فقال وهو ينظر خلف كتفه:

- الكاميرات دي شغالة؟ بتسجل؟

رفع الزوج رأسه بعد ما كان قد أراحها على ظهر الكنبه، وأوماً إيجاباً أن نعم، فقال وائل:

- ما علش آخر سؤال.. ليه الكاميرات؟ جديدة عليّ دي.. ولا عندك في البيت

هنا حاجات خايف عليها من السرقة لدرجة تركيب نظام مراقبة؟

تنهد الزوج في علامة على رغبته في أن يتركه الضابط وشأنه وقال:

- لا أبدأ.. أنا بس عملت شغل في مكتب راجل أعمال متخصص في النوع

دا.. وحب يهاديني بنظام مراقبة هدية.. فقلت بدل ما اركنه.. ركبته.

- شغل إيه؟ سأل وائل وهو يدون ملاحظة جديدة.

معتز شرباش

- بيشتغل في الأمن وحراسة، أجب الزوج دون أن يرفع رأسه، وكأنه قبل بوجود الضابط.

- هو مين؟ تعجب وائل.

رفع الزوج رأسه بضيق، ونظر لوائل وقال بغضب واضح:

- راجل الأعمال اللي بتسأل عنه.

ابتسم وائل بهدوء، وقال:

- لا أقصد شغلك انت.. انت قلت عملت شغل في مكتب راجل أعمال.. إيه نوع شغلك؟

أعاد الزوج رأسه ليريحها، وقال وبقايا الغضب واضح على صوته:

- أنا خريج هندسة ميكانيكا.. باشتغل في الستاير.

دون وائل ملاحظة جديدة في مفكرته، وقام بهدوء بعد أن لاحظ أن الزوج

قد اقترب من لحظة الانتهاء، فقرر أن يؤجل باقي أسئلته.

ثم قام وتوجه ناحية الغرفة، وهنا بدأت دقات قلبه في الإسراع، وكأنها جهاز

إنذار يحذره من اقتراب خطر ما.

* * *

وضع "العقيد مجدي نور" فنجان قهوته أمامه على الطاولة الصغيرة، ونظر لكمال حجاب رئيس تحرير جريدة "الضمير"، وابتسم بتكُلف، وقال:

- متشكر يا كمال بيه.. بقالي كثير ما تقابلتش معاك.. ليك وَحشة فعلاً.

قال كمال بودِ جاهد ليبدو صادقاً:

- يا باشا سعادتك من بعد الترقية الأخيرة ما بقيتش فاضي حتى ترد على التليفون.

- بلاش مبالغة يا كمال.. أنا دائماً بابي مفتوح ليك.. انت عارف دا كويس.. ومش ناسي موضوع الولد اللي كلمت مكتبي عنه.. ما تقلقش.. اعتبر الحكاية خَليصة.

ارتبك كمال لثوانٍ، ونظر صوب عماد بطرف عينه، ثم عاد لينظُر إلى العقيد بودِ مُفتعل، فهو لم يشأ أن يعلم موظفيه أنه يتواصل مع الداخلية، ويطلب أحياناً من مسؤوليها بعض الخدمات، تلك التي تعمّد مسؤول الداخلية ذكرها أمام عماد لكشف حقيقة قد تكون غابت عن الموظف

معتز شرباش

الصغير، وهي أن معارضة النظام على صفحات الجرائد، لا تتعارض مع طلب الخدمات الخاصة من مسؤوليه كلما دعت الحاجة.

"ماذا يقدم كمال حجاب في مقابل خدمات سيادة العقيد" فكَرَّ عماد صامتًا.

نظر عماد نظرة ذات مغزى إلى رئيس تحريره، ولم يُعقب، فهو لم يقل كلمة واحدة منذ غادر منزله قبل قليل، حتى الآن، فالكثير قيل أمامه بالفعل؛ أكثر من قدرته على الاستيعاب، فأثر الصمت حتى لا يتسبب في ضرر لنفسه أو للجريدة، خاصة وأن زيارة العقيد تبدو حتى هذه اللحظة ودية برغم جدية الموضوع، فأراد ألا يعكر صفوها الزائف.

نظر العقيد إلى عماد بعدما تأكد من وصول رسالته بخصوص رئيس تحريره، والذي افترض أنه مثل عماد الأعلى، وسأل بنفس هدوئه الودّي، ولكن بلهجة من يأمر، وليس من يسأل وينتظر إجابة:

- ها يا بطل؟ عرفت بقى إنك ظالمنا؟ طبعًا الإجراء الطبيعي في الحالة دي إننا نلجأ للقضاء.. وطبعًا بعد تقديمنا الدليل إن اللي حصل في القسم كان إجراء تدريبي جديد بتتبعه الداخلية لتلافي أي أخطاء أو ثغرات أمنية.. مقالك هيبقى فيه إدانة كبيرة ليك أولًا ثم للجرنال ثانيًا.. وكان الموضوع ممكن يبقى فيه حُكم.. ولو حظك حلو كان ممكن يكون مع إيقاف التنفيذ.

عُمر الشقي

كانت تلك فكرة فريق العمل الذي شكَّله وزير الداخلية، حيث أنهم اقترحوا أن يتم احتواء الأمر بدون الكثير من الصخب الإعلامي، وبدون مواجهة مع الصحافة، وخاصة مع ارتفاع الأصوات المعارضة لسياسة الوزارة عامة، والوزير خاصة، في حفظ الأمن، فجاء القرار بعد التأكد من مصادر عدة من عدم وجود أي دليل مادي حقيقي على ما حدث بالفعل داخل أسوار القسم، وهو - القرار - أن يتم الإعلان عن أن ما حدث هو نوع من الاختبار لقدرات القسم الدفاعية في مواجهة أي هجوم مُحتمل، وكان سرِّيًّا لضمان فاعليته، وبهذا ستحتوي الوزارة الموقف على كل الأصعدة، وتقطع طريق التشهير على المعارضين، وخاصة بعد ظهور صفحات كثيرة على مواقع التواصل، والتي تحظى بشعبية كبيرة بين مراحل سنوية خطيرة ومؤثرة، تلتقط أي خبر يخص الوزارة، وتستغله لمهاجمة الوزارة والوزير، وبالطبع النظام بأسره.

صمت العقيد لثوانٍ بعد جملته الأخيرة، حتى تأكد من وصول تهديده المُستتر كاملاً لوعي وإدارك عماد، الذي لم يُعقب، ثم أكمل مبتسمًا، بعد تأكده من حسم الجولة لصالح وزارته، وهو يعتدل على كُرسیه ويريح ظهره:

- بس سيادة الوزير عجبه مقالك.. ومش حابب يتقال علينا في الوزارة بنلاحق صحفي شاب موهوب زيك.. فقررنا في الوزارة نبعت لك العقيد مجدي نور اللي طلبته شخصيًّا يا سيدي.. يوضح لك اللبس.. وهنسيب ليك

معتز شرباش

ولسعادتك يا كمال بيه طبعًا اختيار وسيلة التراجع عن محتوى المقال.. في
الأول والآخر دا شُغلكم.

وقبل أن يرُد كمال أو يستوعب عماد كل ما قيل، قام العقيد، وأعطى
الكارت الخاص به إلى عماد، وطلب منه أن يهاتفه شخصيًا في حالة إن أراد
الاستفسار عن أي شيء يخص الداخلية، ليتجنب أن يقع في مثل هذا
الخطأ مُجددًا، وغادر وترك خلفه صمتًا كصمت القبور، الذي لائم شحوب
وجه عماد، الذي بدا كجُثة بالفعل.

* * *

جَلَس وائل على كُرسية الذي استقبله بصريه المعتاد، ووضع هاتفه إلى جواره وأوصله بالشاحن الذي يتركه دائماً موصولاً بجهاز الكمبيوتر العتيق الذي يقع تحت مكتبه، إلى جوار وائل مباشرة، عن طريق الـ USB، وليس بالكهرباء مباشرة، لأن مصدر الكهرباء الأقرب موجود في الحائط خلف مكتبه مما يحرمه من إمكانية استخدام الهاتف أثناء إعادة شحنه، على عكس جهاز الكمبيوتر القريب منه نسبياً.

مدّ شريف يده والتقط جهاز الريموت الخاص بالتكيف وضغط زر التشغيل، لينطلق صوت التكيف المزعج، الذي ستعتاده أذناهما بعد دقيقة، ثم سيحجبه وعييهما، فلن يلاحظاه إلا حين إطفائه، فيسود الهدوء فجأة.

أخرج وائل مُفكرته وفتحها أمامه على صفحة "الانتحار" وراجع كل ملاحظاته عن تلك الحادثة، وكانت:

"الانتحار"

ناهد

٣ كاميرات.. هدية من رجل أعمال أمن وحراسة

هندسة ميكانيكا ويعمل في تركيب الستائر؟؟!!!!!!

مخرج واحد للشقة.. تأكيد!!

معتز شرباش

رفع وائل عينه عن مُفكرته عندما قال مساعده شريف، وهو يجلس أمامه:
- العربية كانت في مكانها لما صاحبها نزل الصبح.. ولا لاحظ أي تغيير..
عصرته.. بس شكله فعلاً ما يعرفش حاجة.

ضيّق وائل عينيه وكأنه يحاول أن يستوضح أو يتذكر شيئاً ما، وقال وهو
يضغط زر استدعاء راضي:

- عربية إيه؟ ثم استدرك بعدما عاد له وعيه الذي غاب لثوانٍ في تفاصيل
حادثة الانتحار، فقال:

- آه العربية اللي الواد راح بيها لرامز؟ تمام.. أنا كنت متوقع كدا.. وطبعاً
التليفون مقفول ومالوش لازمة.

قالها وهو يقلّب صفحات مُفكرته، وفتحها على صفحة "الاقتحام"، وكتب
علامة X أمام تفاصيل السيارة التي حصل عليها من الملياردير، ومثلها أمام
رقم الهاتف عندما أوماً مساعده أن نعم، لتصبح العلامة الثالثة، فالأولى
كانت مكتوبة أمام جملة "محل الورد".

دخل راضي بعد أن طرق الباب، وحيّا الضابطين بتحية عسكرية سريعة،
فقال وائل:

- قول لمحمود على القهوة يا راضي.

- اتنين يا راضي، قال شريف ثم نظر إلى وائل وسأله:

- قرئت اعتذار الصحفي؟

عُمر الشقي

رفع وائل رأسه عن مُفكرته، وبدا لثوانٍ وكأنه يفيق من غفوة سريعة مُجددًا، وقال:

- اعتذ... يا راجل؟! اعتذر؟ فين؟

أخرج شريف هاتفه المحمول من جيبه وناولته إلى وائل بعد أن فتح الصفحة التي تعرض المقالة، ليقرأها.

اعتذار واجب

بقلم: عماد المنسي

بعد مقالة أمس والتي يمكن أن تصل إليها عزيزي القارئ بالضغط على هذا الرابط "النوم في العسل؛ أقدم حيلة في كتاب الداخلية" تلقيت اتصالاً هاتفياً من "العقيد مجدي نور" شخصياً.

قد تظن أيها القارئ أن الأمر مجرد مزحة سخيفة، ولكنها الحقيقة، فبغض النظر عن طرافة استخدام العقيد لإسم الشخصية التي أدى دورها القدير عادل إمام في فيلم النوم في العسل، والتي طالبت بظهور مثلها في وزارتنا، فلقد قام أحد رجال وزارة الداخلية، برتبة عقيد، بالتواصل معي شخصياً، وطلب اللقاء، وقام بما طلبته تحديداً في مقالي، وهو الرد على استفسارات طرحتها من خلاله، وبكل أمانة، لم أتوقع أبداً أن تكون وزارة الداخلية على هذا القدر من الاحترام، والاحترافية.

معتز شرباش

وبرجاء العلم أنه بعد اطلاعي من قبل العقيد على ما دار داخل جدران قسم الشرطة، تأكدت لديّ القناعة بوجود عدم الإفصاح عن ملابسات وتفصيل الموقف كاملة، ولكن يمكن القول أن ما حدث داخل القسم له علاقة بالتدريب، بهدف الاختبار، ومن ثم رفع الكفاءة.

حيث أن من شأن الإفصاح أن يُعطّل عملاً أظنه - عن اقتناع حقيقي - سوف يعود بالنفع على وزارة الداخلية، وبالتالي على أمن وسلامة الوطن.

توضيح هام : هذا المقال لا يُعتبر بأي حال اعتذار عما سبق وكتبت أو طرحت من تساؤلات، فتلك التساؤلات هي من صميم عملي الصحفي، ولكنه يحمل بعض من الإجابات التي طالبت بها، والتي أظن أن القارئ كان في انتظارها، وتوضيح مهم، هو أيضاً من صميم عملي.

كانت صفحات facebook قد تناقلت المقال، وتمّت إعادة مشاركته على مئات الآلاف من الصفحات العامة والخاصة على الإنترنت.

فتح وائل التعليقات على المقالة من المُشتركين في صفحة "الشرطة والشعب في خدمة النظام" ليرى كيف تقبل جمهور الإنترنت الخبر، ليجد الكل تقريباً يُشكك في كل ما جاء في المقال، وكانت من أطرف التعليقات، تلك التي كتبها أحدهم يقول:

عُمر الشقي

"ممکن يكون صادق يا جماعة والوزير ما هيدّوش، ممکن يكون هدد أمه
مثلاً، وساعتها يبقى الواد مش كداب."

أعاد وائل الهاتف إلى شريف وهو يقول مُستنكراً:

- ما حدش مصدق القصة دي.. الشعب يا ابني بيتلكك يصدق إننا ولاد
كلب.

- اللي عايز يصدق حاجة بيصدقها.. المهم إن الموضوع اتقفل.. إعلامياً على
الأقل.. بس مكتب الوزير لعيها صح.

تناول وائل فنجانته، بعد أن تركه أمامه محمود وغادر المكتب، ورشف منه
رشفة سريعة، ثم قال وهو يُعيده على مكتبه:

- فعلاً.. بس الموضوع دا مش هيتقفل إلا لما امسك الواد دا.

- الواد دا ذكي جدّاً.. وما اعتقدش هيكون غلط غلطة تسمح لنا نجيبه
بسببها.

أراح الرائد ظهره على كُرسیه الذي أصرّ وكأنه يلفت نظر شريف لأهمية ما
سيقوله صاحبه:

- هو دا اللي لازم نشتغل عليه.. إننا نديله حقه.. الولد دا يا شريف مش
مجرد نصاب.. وانا متأكد إنه حاجة تانية كمان.. عشان كذا فكرت نشتغل
على ثلاث محاور.. الأول نحاول نعرف هو جاب منين أقنعة الغاز والقنابل..

معتز شرباش

التاني إننا نعرف هو خرج من مكتب المأمور ليه.. والتالت والأهم نعرف هو عمل وهيعمل إيه تاني.

أعاد شريف فنجان قهوته بعدما انتهى منه وهو ينظرُ إلى وائل باستغراب واضح، حتى أنه كاد أن يقلب الفنجان عندما وضعه على حافة الطبق، ولكنه تدارك الخطأ وقال وهو يضعه في مكانه الصحيح:

- عمل إيه تاني ازاي يعني؟

- فكر معايا كدا.. واد في إمكانيات الواد دا مش ممكن دي تكون أول عملية نصب له.. ولا الأخيرة.

لم يُجب شريف وإن بدت عليه علامات الاقتناع، فأكمل وائل:

- عايزك انت تمسك الحكاية دي.. اتواصل مع الأقسام.. ابدأ بالقرب.. والمديرية.. وبعدها ابعده.. عايزك تجيب لي كل قضايا النصب اللي ما اتحلتش.. وطريقته هتبان.. يمكن من عملياته نعرف هو بي فكر ازاي.

- تمام. قالها شريف وهو يقوم ليُنفذ ما طلبه منه الرائد، الذي استوقفه قائلاً وهو يقلب صفحات مُفكرته ويفتحها على صفحة "الانتحار":

- موضوع ااااا.. ناهد دا أعتقد خلصان.. عايزين بس نقل الورق وناخذ أقوال الناس.. و...

صمت لثوانٍ، همّ خلالها بشطب الكلام الذي يملأ منتصف الصفحة تقريباً، ولكنه تراجع، حيث قرر أن ينتظر تقرير الطب الشرعي بعد تشريح

عُمر الشقي

الجثة، الذي في الغالب سيؤكد انتحار السيدة، فهو لم يَعْتَد أن يشطب تفاصيل وملاحظات قضية قبل حلّها، حتى وإن بدت محلولة.

- و... إيه يا وائل بيه؟

رفع وائل رأسه إلى شريف وقال:

- استنى على موضوع القتيلة دا لحد ما ييجي تقرير الطب الشرعي.
أوما شريف رأسه موافقًا وغادر المكتب.

أعاد وائل فتح صفحة "الاقتحام" ونظر إليها مطوّلًا، وكأن حروف كلماته ستدب بها الحياة، وستعيد ترتيب نفسها لتكتب حل اللغز، الذي بدأ يتحوّل عند وائل لنوع من التحدي الممتع.

فالعقل الكسول هو الذي يستمتع بحل الألغاز السهلة، على عكس العقل النشيط، الذي يستمتع أكثر كلما صعب التحدي.

رَن جرس هاتف وائل المحمول، لينتزع من حالة التفكير التي غرق بها لبعض الوقت الذي شعر به وائل وكأنه لحظات، كالحلم. فأجاب بصوت خرج كسولًا، بسبب صمته لفترة ليس بالقصيرة:

- ألو.. أنا هاتحرك حالًا أهه، وأقرن قوله بالفعل، وكأن خطيبته تراه، فأحب أن يثبت لها صدقه.

- لسّا هتتحرك؟ يا ابني انت عاوز تشلّني؟ أنا قصادي نص ساعة وابقى مخلصّة.

معتز شرباش

- هاكون وصلت إن شاء الله، وانتزع شاحن محموله من الهاتف وتركه يسقط على الأرض، وتحرك صوب الباب.

- لما تقرب رنّ لي يا وائل، سلام. قالتها بضيق وأنهت الاتصال.

فتح وائل باب مكتبه، وهو ينظر إلى هاتفه، ليجده لم يتلقَ أي شحن زائد عمّا كان عليه عندما وصل إلى مكتبه، فصرخ في وجه راضي، الذي انتفض كمّن مسّه تيار كهربائي، وهو يرفع يده بالتحية العسكرية:

- انت يا ابني ما بتفهمش؟ مش مليون مرة أقول لك ما تحركش الزفت الشاحن بتاع الزفت دا وانت بتنصف عشان الوصلة لما بتتهز بتفصل وانا ملصّمها؟ يا ابني انت بتقصد تقرفني؟

- يا وائل بيه والله العظيم ما لمستها.. سعادتك موصيني وانا باخد بال..

- بس بس.. جتكم القرف مش عارف بيحبوكم منين.

نظر راضي إلى الأرضية التي تشققت بفعل الزمن والاستخدام، ولم يُجب.

عاد وائل إلى مكتبه، حيث أراد أن يتأكد من تثبيت الوصلة، حتى لا يتعرض لنفس الموقف في مرته المقبلة، لأنه بالتأكيد سينسى، وسيكتشف عند رحيله أن هاتفه يحتاج للشحن، ثبتت الوصلة جيّدًا، ثم تأكد من تثبيتها بوضعها في هاتفه، لتُضيء علامة الشحن، ثم نزعها ووضعها برفق على مكتبه، وتوجه صوب الباب المفتوح، وقال لراضي الواقف هناك بكرامة مجروحة، وإصرار على براءته يكسو ملامحه، كنوع من الصلح غير المباشر:

عُمر الشقي

- الله يرضى عليك يا راضي بلاش الحركة دي عشان بتنرفزني.. وانا مش ناقص.

- يا وائل بيه أنا ما دخلتش مكتب سعادتك أنضِّفه من وقت المشكلة عشان المعاينة.. يعني مش ممكن أكون حرّك..

- ماشي يا راضي.. خلاص ما تشغلش بالك.

ولم يُدرك وقتها أن ثمة بذرة أَلْقِيَت في عقله الباطن، وستُنبت فكرة، ستقلب حياته.

* * *

مذكرات

٣

أتهم أحياناً، بأننى لا أبالى بكل شىء يحدث فى عالمى، ولعالمى..
ولكن لا أحد يعلم أنك أنتِ عالمى..
ولا أحد يعلم أننى أبالى.

* * *

عُمر الشقي

**كاذب من ادَّعى أن الحُب يطرق الأبواب، أو ينتظر
الإذن.**

تركت مريم سيارتها حمراء اللون أمام أحد "كافيهات" مصر الجديدة، ومدّت يدها بمفاتيحها لشاب أسمر البشرة، يعمل في "الكافيه"، كراعٍ لسيارات رواده، حتى يحركها عند الحاجة، لأنها ركنتها إلى جوار صف سيارات مصفوفة بالفعل، لاستحالة وجود مكانٍ خالٍ في الصف الأول، كحال معظم شوارع العاصمة، ولكن الشاب رد باسمًا، بإشارة مهذبة من يده، أنه لا حاجة لترك المفتاح، وقال:

- لو احتجت أحركها يا فندم هابقى آجي أخذ من حضرتك المفتاح.

فابتسمت وشكرته وهي تتحرك بخطوات واثقة، ورشيقة إلى باب "الكافيه" دون أن تنظر حولها، كانت ترتدي "جينز" أزرقًا ضيقًا، وقميصًا أبيضًا متوسط الطول، مناسبًا لها لدرجة تظن أنه قد صُنِع خصيصًا من أجلها. بدت ساحرة بدون تكلف، خلعت نظارتها السوداء، بمُجرد دخولها إلى ظل "الكافيه" الساحر المكيف، الذي يُشعر من دخله لتوه، بموسيقاه التي تملأ المكان دون إزعاج، وجوّه المكيف، والمُعطر، أنه عبْر بوابة لعالم آخر. استقرت على مائدتها المعتادة، ورفضت بابتسامة رشيقة Menu من النادل، الذي لم يعرضها بالجدية الكافية، وكأنه كان يعلم برفضها مُسبقًا، ولكنه قدمها على أية حال، لأن تقديمها جزء أصيل من وظيفته. وقالت

عُمر الشقي

مريم إلى النادل وابتسامتها لم تُفارقها، وإن بدت سريعة التحضير، كتلك التي تظهر في الصور التي تُلْتَقَط لأصحابها رغماً عنهم:
- العادي يا محمد.. شكراً.

أخرجت مريم من حقيبتها كتاباً، ووضعتة أمامها، ثم أخرجت منها أيضاً هاتفها المحمول، نظرت إلى شاشته لدقيقة، بدت وكأنها تفكر خلالها في شيء ما، أو تنتظره، لكنها بعد دقيقة تركت الهاتف والتقطت الكتاب، وشرعت تقرأ بهدوء وصمت، وكأنها وحيدة في هذا العالم.

انغمست مريم بكل كيائها في قراءة الرواية التي تحمل اسم الطاعون، كانت مريم عندما تقرأ، أو تعزف على البيانو، تغيب عن العالم حولها، كانت تهرب من الواقع إلى عالم الرواية التي تقرأها، أو إلى عالم تخلقه من الأنغام عندما تعزف.

مدّت يدها والتقطت الكوب الذي وضعه النادل أمامها منذ دقائق، ولكنها لم تلحظه وقتها بسبب تركيزها الشديد فيما تقرأ، ورشفت منه رشفة سريعة وأعادته إلى مكانه.

كانت تجلس مريم في مواجهة واجهة "الكافيه"، في المنتصف تقريباً، وأقرب لخلفية "الكافيه". كانت تلك هي المائدة الأحب إلى قلبها، كلما جاءت إلى هذا المكان، حيث كانت تبعد عن الأركان التي يُفضلها العشاق، ولذلك فهي قليلة الإضاءة، فلا تُساعد على القراءة، وكانت تبعد عن زجاج الواجهة، فتبقى بعيدة قدر الإمكان عن صخب العاصمة المُزعج.

معتز شرباش

لم تلاحظ مريم بحكم انغماسها فيما تقرأ دخول شاب أسمر متوسط الطول وجلوسه إلى جوارها على بُعد طاولتين إلى يسارها، ولم تلاحظ مُراقبته لها بصبر، بعد دقائق رَن هاتفها، فالتقطت، في نفس الوقت، الشاب الأسمر هاتفه هو الآخر ووضعه على أذنه. تركت مريم الكتاب على الطاولة أمامها، بعد ترك الـ Bookmark التي تحمل تاريخ ميلادها داخله عند الصفحة التي تقرأها، والتقطت هاتفها وردّت على المُتصل.

"يعني دا آخر كلام عندك؟ أنا ابن ستين كلب عشان عملت لك قيمة" صرخ الشاب الأسمر فجأة بغضب شديد، وقام منتفضاً، مما دفع كُرسيه للوقوع على ظهره خلف الشاب، ثم ضرب كوب الماء الذي أمامه بظهر يده اليسرى فاندفع في اتجاه الحائط وتكسّر بدويّ عالٍ عكّر هدوء "الكافيه" الذي تسمّر كل من فيه.

توقفت مريم عن الكلام ونظرت إلى يسارها صوب الشاب الذي فقد السيطرة على أعصابه تماماً، كما فعل كل من في المكان، ما عدا شاب واحد غادر المكان، تقريباً، دون أن يلحظه أحد، ذهب النادل إلى الشاب الذي بدت عليه علامات الخجل من تصرفه، أغلق الشاب هاتفه، ووضعه في جيبه، واعتذر للنادل وهو يتجنب النظر إلى أي شخص مباشرة، ثم أخرج من جيبه ورقة من فئة المئة جنيه وتركها على الطاولة تعويضاً منه على تصرفه، وثنماً لما هشّم من صمت وزجاج، وغادر بهدوء.

عُمر الشقي

أكملت مريم مكالمتها القصيرة، التي علمت فيها بعدم استطاعة صديقة عمرها جينا الحضور، وأغلقت الخط، وأعدت الهاتف إلى الطاولة، ثم ارتشفت رشفة من مشروبها، وأعادته. ثم تنهدت لتتخلص من توتر الموقف السخيف الذي حدث إلى جوارها، ثم التقطت الكتاب وهي تدور بعينها في المكان لتتأكد من أن الأمور عادت لطبيعتها، وتوقفت عيناها للحظة على عامل النظافة الذي كان يعيد ترتيب المكان بعد إزالة بقايا الزجاج من على الأرض.

فتحت الكتاب بحثًا عن الصفحة التي توقفت عندها، ولكنها لم تجد Bookmark التي تركتها، تعجبت وقلّبت صفحات الكتاب بسرعة بحثًا عن Bookmark، ثم بدأت تنظر حولها، لعلها سقطت دون قصد منها أثناء انشغالها بمتابعة نوبة الغضب التي أصابت الشاب منذ ثوانٍ، ولكنها لاحظت شيئًا غريبًا؛ كانت الرواية التي بين يديها هي رواية "قمر على سمرقند" للكاتب محمد المنسي قنديل.

تسمّرت مريم لدقيقة كاملة في محاولة منها لفهم ما حدث، وكيف حدث، ولكنها لم تتوصل لشيء. فكّرت بهدوء؛ بكل بساطة، هي تركت رواية الطاعون على المائدة وأجابت هاتفها، و... توقفت عن التفكير لثوانٍ ونظرت إلى يسارها، إلى حيث توجّهت أنظار كل من في الكافيه منذ دقيقة، نعم، حدث مشهد الشاب الأسمر، فنظرت هي صوبه، كما فعل كل من في المكان،

معتز شرباش

وفي تلك اللحظة تحوّلت رواية الطاعون التي تحمل الـ Bookmark خاصتها،
لرواية أخرى، تبدو جديدة تمامًا.

ولكن كيف؟ ولماذا؟ تملك الخوف منها لثوانٍ، ثم استجمعت شجاعتها
وفتحت أول صفحات رواية "قمر على سمرقند" لتجد مكتوبًا بخط رقعة
جميل وهاديء:

"أتمنى ما تكونيش قريتِ الرواية دي.. فيها رحلة تستحق السفر معاها..
رواية الطاعون كئيبه جدًا.. هتُشكريني بعدين:)"

* * *

"عماد"!!!

سَمِعها كمال حجاب، بصوت سكرتيرته، وهو جالس خلف مكتب رئاسة تحرير جريدة "الضمير". وبعدها بثانية واحدة اندفع، دون استئذان، صاحب الاسم إلى داخل مكتبه، في سابقة لم تحدث من قبل، بملامح يكسوها الغضب، وخلفه هرولت دينا السكرتيرة، في محاولة منها لإثبات عدم تقصيرها في عملها، ولكن اندفاع عماد كان غير قابل للإيقاف أو المنع، كما أوصاها أن تفعل رئيسها منذ ساعة.

وضع كمال حجاب كوبه الزجاجي فوق CD مقلوبة على سطح مكتبه، تبدو موجودة على مكتبه لهذا الغرض تحديداً، حتى تمنع أكواب المشروبات من ترك علامة على زجاج مكتبه النظيف، بهدوء لا يتناسب مع حدة الموقف، وتوتره، ويليق برجل كان يتوقع ما يحدث واستعد له جيداً.

أشار كمال مبتسماً لسكرتيرته بيده إشارة تعني "لا عليك".

أغلقت دينا الباب بعد مغادرتها، ولكن، بعد أن وجّهت نظرة نارية إلى عماد، لم يلاحظها الأخير بسبب توجيهه هو نظرة أشدّ نارية، وحقداً إلى رئيسهما، الذي نقل بصره من الباب إلى عماد، الواقف هناك كذئب جريح.

لم يَحْتَجْ عماد ليتفوّه بحرف واحد، حتى يفهم رئيسه سبب ثورته، وهذا ما كان يعلمه عماد جيداً، فصمت، واكتفى باقتحامه الفظ لمكتب رئيسه،

معتز شرباش

كرسالة اعتراض على تصرف كمال، وانتظر الجواب بصبر نافذ، وغضب لا تُخطئه عين.

قطع كمال الصمت بهدوء لم يَعْتَدُه منه عماد، حيث جرت العادة أن يخطئ عماد، ويغضب كمال، وليس العكس، ولكن دائماً هناك أول مرة لكل شيء، وها هو عماد يواجه هذا الموقف لأول مرة، بغضب وثورة يليقان بانعدام خبرته، على عكس كمال، الذي تسلح بخبرة سنوات، يقترب عددها من عدد سنوات عمر عماد، في هذا المجال. قال كمال:
- اقعد يا عماد.. اقعد.

لم يتحرك عماد، وكأنه لم يسمع كلام رئيسه، أو لم يَعِهْ، فتمهّد كمال وهو يغمض عينه بضيق يشوبه بعض الخجل، كان يعلم أنه أخطأ في حق الشاب، ولكنه كان يقوم بالصواب، وبما كان يتوجب عليه القيام به. فالخطأ والصواب يمكن أن يصبحا وجهين لنفس العملة أحياناً. فكرر كمال طلبه، وإن حملت نبرته من الترجي ما لا يمكن لتوتر الموقف أن يخفيه، وقال:

- ممكن تقعد عشان اعرف أعلمك حاجة؟ ممكن تقعد؟
فتح عماد فمه ليُجيب، أو ليعترض، ولكن كمال أشار له بحزم أن يصمت، وقال:

- مالوش داعي الهجوم.. اسمع الأول.. وبعدين هاسيبك تقول اللي انت عاوزه.. بس اسمع الأول.. أنا عارف كويس انت عاوز تقول إيه.. عارف

عُمر الشقي

كويس.. وهاجاوب على كلامك من غير جعجعة وصوت عالي. ثم صمت لثوانٍ، نظر خلالها إلى عماد الذي بقى على حاله، وإن خفت توتره قليلاً، وتوقفت قدمه اليسرى عن الارتعاش البسيط، ولكن الملحوظ، ثم أكمل:

- اهدا.. واقعد.. واسمع.. وحاول تتعلم.

حطّ صمت ثقيل على الغرفة، لدقيقة كاملة، وكل منهما ينظر إلى الآخر، بنفس التركيز، وإن اختلفت المشاعر التي تملو وجه كل منهما، حتى تحرر عماد من سكونه، ولكنه بقي أسيراً للغضب، الذي ظلّ يكسو ملامحه. فجلس دون أن يرفع عينه عن رئيسه، الذي زفر زفرة ارتياح خافتة، بعد انتصاره المحدود في الجولة الأولى من مباراة تبدو صعبة، وإن كانت غير متكافئة.

قال كمال بصوت يكسوه الهدوء، وكأنه طبيب نفسيّ، يخشى من نوبة جديدة قد تهاجم مريضه، فقرر أن يخطو قدماً في الحوار بحذر:

- على فكرة يا عماد.. انت لما جيت لي بالقصة.. أنا كنت ناوي أقول لك تنسى وتكبر دماغك.. بس لقيتك متحمس جداً.. وحسيت إنك تعبت ومش حمل إحباط مباشر.. فقلت هاسيبك تحاول تكتب المقال.

ثم اعتدل، وخلع نظارته وتركها على المكتب أمامه وهو يكمل:

- ومش هاكذب عليك.. أنا كنت شبه متأكد إنك هتكتب مقال فاضي.. مش هاكذب عليك.. وبصراحة كنت ناوي ارفضه.

بدأت الحيرة تنافس الغضب على مساحة في وجه عماد، فهو لم يتوقع أن

معتز شرباش

يبدأ رئيسه الكلام من حيث فعل، ولكنه لم يحاول التدخل لقطع كلام كمال، لأن فضولاً قاسياً تملكه لمعرفة ما في جعبة رئيس فيما يخص مقالته الأولى، فلقد توقع أن يتلقى ثناءً لم يلقه في هذا المكتب من قبل. ولا أحد يرفض الثناء، حتى وإن جاء في وقت غير مناسب.

- بس بصراحة برضه.. لما قرّيت المقال غيرت رأيي.. لسببين، وصمت بشكل مدروس، حتى يشاهد مستمتعاً ملامح الفضول وهي تزيج غضب عماد عن وجهه، ولما حدث ما أراد، أكمل:

- السبب الأول.. المقال يا عماد.. الإفيه.. النوم في العسل.. وطريقة عرضك لموضوع ما عندكش عنه فكرة.. حقيقي براقو.. قُلت خُسارة مقال زي دا ما ينزلش للناس تقراه.. براقو حقيقي، وصمت لثوانٍ، لم يُعقب خلالها عماد كما تمنى كمال، فأكمل الأخير:

- السبب الثاني.. إن احنا بنحتاج حاجة زي كدا كل فترة.. واحنا هنا اقصد بيها الجُرنال.. كلنا.. الجُرنال كله.. فاهم حاجة؟

هزّ عماد رأسه دون أن يرفع عينه عن كمال الذي قام ودار حول مكتبه وجلس في مواجهة عماد وهو يقول:

- بُص يا عماد.. احنا جريدة مُعارضة أه.. بس احنا جزء من دولة.. جزء منها.. وبنخضع لقانونها.. وبنلعب وفق قواعد القائمين عليها.

لازم نعرف نعارض ازاى.. لازم نعرف نهاجم مين.. وإمتي، لازم نفرّق بين اللي يتكتب على صفحاتنا.. وبين اللي بيتقال على سلّم النقابة.

عُمر الشقي

بس دا مش معناه إننا نسكت خالص.. لا ما نسكتش خالص.. لازم كل فترة
كدا نزعق.. ونعمل ضغط مدروس.. عشان نكتسب مصداقية عن القراء..
وبرضه عشان النظام يلاحظنا.. ويعرف إننا موجودين ولينا وزن.. فيتعمل
لنا حساب.. ووزن..

بس أهم حاجة الضغط يكون مدروس.. وتعرف توقف ضغط إمتي.

- أنا مش قادر أفهم إيه علاقة كلام حضرتك.. بإنك تنشر مقال مش أنا اللي
كاتبه عليه اسمي.

- وهو انت كنت هتكتب المقال يا عماد؟ كنت هتكتبه؟ كنت هتنشر
الاعتذار؟ ولا كنت هتعمل لي فيها چیقارا وتعتصم على السلم وشوية الهبل
يتلموا حواليك لحد ما تتمسك وما حدش منهم ينفعك؟ ما حدش كان
هينفعك.. انت هتصيح عليّ انا يا عماد؟

- ودا معناه إن حضرتك تنشر مقال اعتذار باسمي؟

قام كمال، ودار حول مكتبه وهو يجيب مُحتدًا، بعد أن امتص غضب
عماد، وأصبح النقاش ممكنًا، ولو بجدة:

- ما فيش اعتذار ولا حاجة.. لو قرئت المقال هتلاقي إن ما فيش في صيغته
أي اعتذار.. ما حدش اعتذر.. بلاش خلط.

نظر عماد يتفحص رئيسه الذي بادله النظرات صامتًا، ثم قال بمرارة:

- يعني حضرتك نشرت المقال وانت عارف إننا هنتراجع عنه؟ نشرته بس
عشان "النظام يلاحظنا" على حد قولك؟ يعني باختصار حضرتك نشرت

معتز شرباش

المقال عشان تضغط على الوزارة عشان يمشوا لك مصلحة الولد اللي كلمت عليه العقيد اللي ما اعرفش اسمه؟
لم تظهر ملامح كمال، وهو يجلس خلف مكتبه، كم الغضب الذي اجتاحه عقب سماعه جُملة عماد، وإن تسارعت أنفاسه رغمًا عنه، وبقي صامتًا لثوانٍ حتى لا ينفجر غاضبًا، فالموقف لا يحتمل، وهو يتفهم أسباب غضب وإحباط مرؤوسه، ثم قال بصوت حاد لم ينجح في إخفاء غضبه بالكامل، وإن أخفى مُعظمه:

- آخر مرة هاسمح لك تتكلم في حاجة ما تعرفهاش.. آخر مرة.. وهاعتبر اللي قُلته ما حصلش.. واللي سبته يحصل يا عماد.. وأيوه كنت عارف إنه هيحصل.. كان لخدمة الجُرنال.. مش لخدمة شخصي.. ولا كنت تفضّل إني أمنع النشر من أساسه؟

ثم رفع سبابته وضغط على كلماته جيدًا وهو يقول:

- ودي آخر مرة اسمح لك توجه فيها كلام من النوع دا لشخصي.. وإلا هيبقى آخر يوم ليك معايا في الجُرنال.

تجاهل عماد تهديده، وكأنه لم يوجه إليه من الأساس، وقال:

- لا ما كنتش أفضل تمنع النشر.. بس كنت أفضل أفهم من الأول.

- ما كنتش هتقتنع.. ما كنتش هتصدق.

رفع عماد عينيه للسقف وأشاح بوجهه بعيدًا كإشارة إلى عدم اقتناعه بكلام كمال، الذي سأل بحدة:

عُمر الشقي

- يعني كنت هتقتنع لو قُلت لك إن الوزارة مش هتسيبك إلا لما تعتذر؟
كنت هتقتنع؟ كنت هتقتنع لو قُلت لك إن مقالك وتحقيقتك لا يملك أي
معلومة حقيقية ولا مصدر ولا دليل؟ ولا كنت هتقول إني كالعادة باخاف؟
خليك صريح معايا ومع نفسك.. ما كنتش هتقتنع.. وما كنتش هتصدق اللي
حصل إلا لو حصل قصادك.. يبقى إيه الضرر في إني أسيبك تتعلم؟ وبالمرّة
اكسب بونط.. نكسب بونط كجُرنال. وضغط على حروف كلمة "جُرنال"، ثم
أكمل:

- بس طبعا تتعلم وتفهم من غير ما اسيبك تتنذي.. ولا تنذي الجُرنال.. ودا
اللي خلاني انشر مقال النهاردا باسمك.. بدل ما انشره باسم الجُرنال..
وساعتها كنت هاصغرك انت.. كنت هاصغرك.. وكأن الجُرنال بيخلي
مسؤوليته منك، فهمت؟

ابتسم عماد بخيبة أمل وقال وهو يمسح على جبهته بإرهاق واضح، وكان
المجهود العصبي أنهكه جسدياً:

- فهمت يا أستاذ كمال.. يعني تقصد إن تحقيقي ما كانش فيه ما يستحق
النشر.. وحضرتك مشكوراً نشرته عشان الجُرنال يستفيد.

- تقدر تجادل في إن تحقيقتك ما كانش فيه حاجة أصلاً؟ تستحق النشر أو
حتى ما تستحقش؟ تقدر؟

"وكأن مُشكلتك هي عدم وجود ما يدعم القصة، وليس خوفك من النظام"
فكّر عماد، كان عندما يشاهد أحدهم ينافقه بهذه الطريقة، يتذكر جاره في

معتز شرباش

البلدة التي جاء منها، الذي كان شيخًا للجامع في كل صلوات الإِسبوع، ما عدا صلاة الجمعة، وكان دائم التشاؤم مع كل من يسمعه يسب دين الله في الشارع، حتى ولو لم يكن يوجه له الكلام، وفي نفس الوقت كان يسمعه عماد، من خلال شباك غرفته، ليل نهار يسب هو دين أولاده الصغار.

فسأل عماد بخُبت:

- يعني أتابع التحقيق واجيب لك دليل وتسيبني انشره؟

زفر كمال بضيق:

- القصة دي اتقفلت.. وبعدين مش هتعرف تجيب حاجة خلاص.. مش هتعرف.

النوع دا من القصص بيبقى عامل زي ما ترمي طوبة في بحيرة راكدة.. لو ما قدرتش ترصد لحظة الاصطدام ومكانها بدقة وشكل تحرك صفحة المية في لحظتها؛ دقايق وبترجع كل حاجة زي ما كانت ولا يمكن تقدر تلاقي الطوبة بعدها خلاص.

وبرضه مش هاقول لك بلاش.. لو عرفت تجيب حاجة كبيرة.. وريني. بس مش هتعرف. لكن هاسيبك تجرب.

- هه.. عشان تكسب بونط برضه؟ وبعدين ازاي هتُنشر قصة أنا نفسي اعتذرت عنها بالفعل؟ سأل عماد مُشكِكًا في وعد رئيسيه.

تجاهل كمال كلام عماد عن "البونط" لأنه يعلم أن مرؤوسه يحاول استفزازه، ويعلم أنه غاضب، وأجاب:

عُمر الشقي

- انت لَسَّا اصطدت السمك اللي عاوزني اشتره؟ وريني باقول، وريني، لما اشوف جبت إيه هاقول لك ينفع يتعمل بيه إيه، فهمت؟
- نظر عماد إلى كمال نظرة من لا يصدق كلمة واحدة منه، ولكنه لا يقوى على الجدل، وأوماً برأسه أن "نعم فهمت". فقال كمال:
- مش باين إنك فهمت.. بس دا طبيعي.. سنين الخبرة دي ما ينفعش تتعلمها في قعدة واحدة.
- عندك حق طبعًا يا أستاذ كمال.. بس برضه كنت أفضل...
- قاطعته كمال وهو يميل رأسه ورافعًا حاجبيه بتساؤل:
- تفضّل إيه؟ أمتع النشر؟ إيه؟ أمتع؟ حاضر يا عم...
- لا يا أستاذ كمال.. بس تفهمني.. مش تعاملني كأني طفل ما بيعرفش يغير هدومه وينضّف وراه.
- ما انت طفل يا عماد.. في الصحافة انت طفل.. طفل.. انت لو مختار تشتغل فن ولا رياضة كنت هاسيبك تتعلم.. وأي مصيبة في المجالين دول بتزود مبيعات ومشاهدة الجُرنال.. لكن في السياسة فيه حسابات.. حسابات.. وحاجات كثير على المحك.
- صمتا لثوانٍ لم يقطع صمتهما سوى صوت جرس هاتف مكتب السكرتيرة، تسلل خافتًا إلى مكتب كمال، الذي قطع الصمت وقال بنبرة والد يُلقن ابنه درسًا
- ثمينا:
- يا عماد إنك تسمع عن الحاجة مليون مرة مش زي ما تجربها مرة واحدة..

معتز شرباش

عمرك سمعت عن حد اتعلم العوم نظري؟ عمرك؟ لازم تجرب.. أنا سبتك تجرب.. عشان تتعلم.

كان أريح إني أرفض القصة.. بس مقالك عجبي.. ما تبقاش غبي وتبص للنص الفاضي بس.. انت قلمك مميز يا عماد.. مميز وشاطر.. شاطر.. بتعرف تقول كلام قريب من الناس.. قليلين اللي شيهك.. خسارة موهبتك دي تضيع على سلم النقابة.

- ولازمتها إيه الموهبة لو مش هنقول الحقيقة يا أستاذ كمال؟ لو هندستخدمها بس عشان "نكسب بونط"؟ ورفع يديه بعلامة التنصيص ليشير إلى اقتباسه كلمات رئيسه.

- احنا بنقول الحقيقة.. الحقيقة يا عماد.. بس مش كلها.. عشان ما ينفعش.

الكلام بتاع بنقول الحقيقة الكاملة دا بنقوله للجمهور.. بس ما ينفعش احنا نصدق.

- ودا مش كذب؟

- لا طبعًا.. لا مش كذب..

الكذب إنك تزور الحقيقة، بس احنا بنكذب لما بنقول للناس إننا بنقولهم الحقيقة كاملة، عشان هما عاوزين كدا.. عاوزين كدا يا عماد. الناس بتحب تصدق إنها عارفة كل حاجة.. بس لو قلت لهم إن اللي يعرفوه

عُمر الشقي

مش كل حاجة.. هيزعلوا.. ولو حد قال لهم الحقيقة كاملة.. هيكروهوه..
هيكروهوا اللي قال لهم وكأنه هو السبب في قُبْح الحقيقة.

اعتدل كمال وأسند مرفقيه على سطح مكتبه وقال:

- اتعلّم يا عماد.. عشان بُكرة تُقعد مكاني هنا.. صدقني من مكاني انت
ممکن تعمل فرق.. هتعمل فرق.. يمكن مش الفرق اللي في شبابك دا نفسك
فيه كله مرة واحدة.. بس كل فرق بسيط بتعمله بيزيد على رصيدك.. لحد ما
هتلاقي نفسك عملت تغيير كبير على المدى البعيد.. لكن تقول يا إما كل
حاجة حالاً يا بلاش.. هيبقى بلاش.. هيبقى بلاش يا عماد.. وانت الخسران..
ودا بالظبط اللي خصمك عاوزه منك.. إنك تبقى غبي لدرجة إنك تفرط في
مكاسب صغيرة.. على أمل مكسب كبير.. هو في الحقيقة؛ مجموع مكاسب
صغيرة كتير انت فرط فيها بغبائك.

لَمْ يجد عماد ضمن مخزونه من الشعارات ما يردّ به منطق رئيسه،
فصمت، وإن ظهر صراع على ملامحه بين اقتناع وشيك، وبين رفض عنيد.
وكان هذا كفيلاً برسم علامات الرضا على ملامح كمال، الذي كان يعلم
جيداً استحالة اعتراف شاب، في مثل سنّ عماد، بصواب تصرف رئيسه،
بعد جلسة واحدة، ولكنه يعلم جيداً أيضاً أن صمت عماد الذي حاول أن
يخفي وراءه عجزه عن الدفاع عن منطقته، هو انتصار ساحق لمنطقته هو
وخبيرته على سذاجة الشاب.

* * *

فتحت ميّ باب سيارة وائل المتواضعة نسبياً، ودلفت إلى جواره، ولكنها لم تنظر إليه، ووجهت وجهها صوب الاتجاه الآخر. ولم يحتج وائل لرؤية ملامحها، ليعرف مدى غضبها. فتح تكييف سيارته، وقال وهو يبتسم، في محاولة منه لتخليص الجوّ من التوتر، الذي لا يطيقه:

- تحبي نتغدى ع النيل؟

- من إمتي؟! قالتها دون أن تنظر إليه، بل دون أن تتحرك، وكأن تأخره حرّمه من ميزة رؤية ملامحها، حتى وإن كانت غاضبة.

- أنا آسف يا ميّ.. حقيقي آسف، عشان خاطري بقى بلاش عكننة.

هنا فقط اعتدلت، ونظرت صوبه بغضب هائل، ثم نظرت إلى الشارع مُجدداً، وقال مُحتدة:

- والنبي يا وائل اسكت أحسن.

ثم تمتمت بخفوت:

- ماهو العكننة بتيجي من عندي بس !!

عُمر الشقي

- ما انتِ عارفة يا ميّ.. لما بتكون قصادي قضية كبيرة.. مش باخد بالي من الوقت.. وبعدين يعني اسكت واسيبك كدا؟

- ما انت سايبني بقالك ساعة إلا ربع كدا مستنياك، وبعدين هي دي أول مرة؟ أقول لك.. روّحي.. أنا ما ليش نفس أكل أصلاً، وارجع انت الشغل.. ما انت متجوّز الشغل.. امال لما نتجوز هتعمل فيّ إيه؟

- اهدي بس يا ميّ.. أنا اتأسفت.. هاعمل إيه تاني يعني؟

- هتعمل إيه؟ أقول لك أنا تعمل إيه.. لما يكون فيه بينننا ميعاد.. ابقى تعالى فيه، سهلة؟

- حاضر.. وأسف تاني إني سبتك بعد الشغل مستنياني. ما حدش من البنات قعد معاك على ما آجي؟ سأل مُحاولاً خلق حوار يأخذهم بعيداً عن الجدل الغاضب.

"وكأن تغييرك للموضوع سيُنسني إياه"

فكّرت وهي تتابع بائع نعناع سخيف، يجري خلف إحدى السيارات، وهو يتمتم بعبارات، لم تسمعها، ولكنها كانت واضحة الفحوى، حيث كان يحاول إجبار السيدة التي تقود السيارة على مساعدته، سواء عن طريق استمالة قلبها، وكسب تعاطفها، أو لمجرد أن تتخلص منه.

معتز شرباش

قال وائل:

- ميّ.

فنظرت إليه دون رد، فأوماً برأسه ليحثها على التجاوب معه، فنظرت صوب البائع مُجددًا، لتجده قد نجح في مسعاه، ولكنها لم تتمكن من معرفة هل تعاطفت معه السيدة، أم الخوف هو ما دفعها للتخلص منه، ثم عادت ونظرت إلى خطيبها، وقررت أن تجاربه، فقالت:

- نادر قعد معايا شوية.. وعرض عليّ يوصلني.. ولسّا ماشي من ربع ساعة. كتر خير.

نظر إليها وائل بطرف عينه وهو يضغط على أسنانه، وقال مُحاولًا أن يبدو صوته هادئًا قدر إمكانه:

- والهانم ما قالتلوش إن خطيبها جاي ياخذها ليه؟ بدل ما يعمل شهيم!!

فقالت وهي تنظر إلى الجهة المقابلة حتى لا يلحظ ابتسامته الاستمتاع التي كسّت وجهها:

- لا ما هوّ عارف.. كل زمايلي عارفين إنك جاي تاخذني النهاردا، ثم نظرت إليه بعد أن أزال ابتسامتها، وسألت:

- تحب تعرف عرفوا ازاى؟ عشان اليوم اللي عربية شغل بابا بتاخذني.. بتكون واقفة ع الباب من قبل ما أخلص شغل بييجي ساعة، بس الي...

عُمر الشقي

فقاطعها وائل قائلاً:

- يعني دا يدِّي الحق للملزق دا إنه يقول لك أوصلك؟

- والله هي غالبًا بتكون عزومة مراكبية.. بس يُشكر، بيعرض بأدب وبمُنتهى الذوق، وكتر خيرُه قعد معايا شوي..

- خلاص خلاص يا مي.. اقفلي السيرة دي، قالها وزفر بضيق.

كان يعلم أنها، بذكر زميلها، وعرضه توصيلها، الذي غالبًا لم يحدث، تتعمد استفزازه، ولكنه لم يستطع منع نفسه من السقوط في فخ الغيرة والغضب، ولكنه اعتبر هذا نهاية جيّدة للحديث، وانتصار لكل الأطراف، حيث أن خطيبته تشعر، بعد استفزازها له، وكأنها انتصرت، فلتهنأ بانتصارها الزائف، وتُنهي حالة التوتر تلك التي يكرهها، وأيضًا لأنه كان في قرارة نفسه، يعلم أنه يستحق التأنيب، فتقبّل انتقامها راضيًا.

فالجidal مع امرأة غاضبة، كالسباحة ضد التيار، ستبذل فيه كل ما في جسدك من طاقة، ولن تصل سوى إلى حيث يتجه التيار.

جلس وائل وخطيبته على المائدة التي اختارتها إلى جوار زجاج ذلك المطعم الطافِ على سطح نهر النيل، كانت مَي سعيدة، حيث نجحت خطة وائل في إزالة توترها، وساعد المكان المكيف، والمنظر الرائع للنيل، كثيرًا.

معتز شرباش

أخرج وائل هاتفه المحمول من جيبه، ووضعه أمامه على الطاولة، وشعر بالضيق عندما لاحظ اقتراب انتهاء شحن هاتفه، الذي كان يعتقد أنه موصل بالشاحن طوال فترة تواجده في مكتبه، ولكن ضيقه لم يمنعه من هزّ رأسه تجاوبًا - وكأنه يستمع - مع خطيبته، التي كانت تحكي له عن تفاصيل يومها المتكررة، والتي سمعها، من قبل، منها مرات كثيرة، ولكنها كانت تحب أن تحكي له كيف واجهت مديرها، وكم تغار تلك الزميلة منها، وإلى أي مدى وجودها في مكانها في العمل مهم، لدرجة يستحيل معها إتمام أي شيء في البنك بدونها، وكيف أنها أحق بالترقية من تلك المنافقة المتملقة التي حصلت عليها، فقط لأنها تعرف كيف تبتسم بدلال لمدير الفرع.

قطع رنين هاتفها المحمول فيض الكلام الذي ظنّه وائل لن ينتهي، فأخرجت هاتفها وهي ما زالت تحكي له قائلة:

- والله لو تشوفها وهي بتدلع علي.. نمره غريبة!! قالتها وأجابت الاتصال:

- ألو! صمت لثوانٍ وهي تنظرُ إلى يمينها إلى مركب صغير يشقُ صفحة النيل الهادئة، بحثًا عن رزق عائم، ثم توجهت نظراتها صوب وائل، وقالت متعجبة، وهي توجه نظرتها إلى هاتفه المحمول:

- انت تليفونك فصل؟ قالتها وهي تناوله هاتفها بضيق.

وضع وائل هاتفها على أذنه، وقال وهو يتأكد من عمل هاتفه، ليجده مُغلقًا:

عُمر الشقي

- ألو.. إيه يا شريف؟

لا لا ولا يهمك.. في إيه؟

تمام.. لا سيبه على مكتبي.. وروّح انت يا معلم.

لو في حاجة كلمني هنا لحد ما افتح تليفوني، ماشي.. سلام.

أعاد لها هاتفها، وقال بضيق:

- ماعلش يا مي.. راضي الزفت فصل الشاحن زي كل مرة. ثم ضحك ساخرًا

وهو يسمح للنادل بأن يضع أمامهما أطباق الطعام، وأكمل:

- تخيلّي برغم إن المكتب أساسًا كان مقفول مش بيتنضف بسبب الـ...

وانتظر حتى ابتعد النادل، ليُكمل:

- الاقتحام.. يعني من الأصل ما دخلش المكتب تقريبًا.. بس تحسّيه بيعان...

ثم قطع كلامه فجأة وهو ينظر إليها بعيون متسعة كأنه تلفزيون قُطع عنه

التيار الكهربائي فجأة.

كانت البذرة تنمو في عقله الباطن، وتتشكّل، لتنتقل إلى وعيه، في شكل

شجرة وارفة.

فقالت وهي تلتقط معلقتهما:

معتز شرباش

- مالك يا وائ.. وقطعت حديثها عندما مَدَّ يده والتقط هاتفها الذي وضعته إلى جوارها، حيث كان يبدو وكأنه لا يراها من الأساس، ثم مَدَّ يده إلى هاتفه، ثم تركه عندما تذكّر أنه جثة لن تفيده.

كان يتحرك بتوتر واضح، ودون منطق، وكأن هناك روحًا أخرى محبوسة بداخل جسده تحاول الفرار، حتى بدا على ملامحه أنه توصل لحل لمشكلته، التي لا تعرف ماهيتها مَي، فبقيت صامتة، تتابعه بفضول حذر.

كان وائل يشعر بالفكرة تنبّت داخل عقله. فحجبتة عن واقعه.

اتصل وائل برقم ما، وكان يبدو عليه الاستعجال الشديد، حيث اندفع منه الكلام كشلال هادر كسر لتوّه سدًا يمنعه:

- شريف.. ماعلش.. ابعث لي حاليًا نمرة كريم فاضل.. فاكره؟ بتاع مباحث الإنترنت.. ابعتهولي عد.. لا لا مش هاعرف اكتبه.. ابعتهولي في رسالة حاليًا على الرقم دا.. حاليًا يا شريف.. في ثانية يبقى عندي، وأغلق الخط، وترك الهاتف أمامه، ومسح جبهته بتوتر.

كانت تعلم أن خطيها عندما تخطّر في باله فكرة ما قد تساعده على حل إحدى قضاياها، يتحوّل خطيها إلى وضع "الطيّار الآلي"، هكذا كانت تُسمي الحالة التي يكون عليها خطيها في تلك الأثناء، ولا يرى سواها - الفكرة وليست مَي بالطبع- فلم تحاول أن تتحدث، حتى تتجنب أن تتشاجر معه في هذه الحالة، ولأنها تعلم أن ما من سبيل آخر لعودته إلى المطعم بوعيه

عُمر الشقي

كاملاً، وإغلاق حالة "الطيار الآلي"، إلا بعد أن يقوم بأي كان الذي يريد القيام به.

كانت في أحد الأيام، أثناء تحليق وعيِّ وائل في حالة "الطيار الآلي" سألته؛ "هل تُحبني؟! فأجابها بـ "نعم" فعادت وسألته؛ "هل تكرهني؟! فأجاب بـ "نعم" فعلمت أنه غير موجود، وأن ما تحصلُ عليه هي إجابة مُسجلة، مثل التي نسمعها على أجهزة ال Answering machines عندما نتصل بمنزل صاحبه غير موجود.

أصدر هاتفها، الذي أصبح تحت أسر وائل بشكل كامل صوتاً، يشير إلى وصول رسالة، فالتقط وائل الهاتف كمدمن على وشك الحصول على جُرعة غابت، واتصل بالرقم، وقال بعد أن انتظر لثوانٍ، مرّت على وائل كشهور:

- كريبييم.. حبيبي. وائل تحسين معاك.. باقول لك إيه؟

"لا وقت لمجاملات" فكّرت مَيّ، وحاولت أن تتقبل طبع خطيبتها المُستفز، وأن تواسي نفسها، وأن تجد عزاءً في أنه يتصرّف بهكذا صَلف مع كل الناس.

- ركّز معايا.. إيه ممكن حد يستفيده من إنه يستخدم جهاز كشف البحث الجنائي بتاعي اللي في مكتبي؟ وإيه ممكن يخليه يحتاج يحط فيه USB؟

"ساحر"

فكرت مريم.

"أتمنى ما تكونيش قريت الرواية دي.. فيها رحلة تستحق السفر معاها..

رواية الطاعون كئيبة جدًا.. هتشكريني بعدين:)"

قرأت جملته مرارًا، وهي تُفكر؛ "من هذا؟ ولماذا؟"

لم تستطع منع ابتسامتها، ولم تحاول، كلما وصلت لتلك الابتسامة المرسومة

ببساطة في آخر جملته القصيرة. وكأنه يبتسم لها، فتأبى ألا ترد له

الابتسامة، فهو الذي وضع الابتسامة على وجهها في الأساس.

كانت تقف في شُرْفَة غُرْفَة نومها، التي تطل على حديقة كبيرة مستطيلة

الشكل، تتوسط العديد من العمارات، التي تطل كلها على الحديقة، من كل

الاتجاهات، وتمُر عند زوايا الحديقة الأربعة، أربعة شوارع، تربط هذا

المستطيل السكني بالطرق المحيطة، كانت الحديقة تحوي العديد من شجر

الأكاسيا، ولكن الموقف الذي تعرضت له مريم، يمنعها من الاستمتاع بمنظر

الحديقة، وبأصوات مئات العصافير التي كانت تُغني مودعة يومًا أو شك

غروبه.

كانت مبتسمة، ولكنها كانت تتمنى لو أنه ترك لها الBookmark التي تحمل

عُمر الشقي

تاريخ يوم ميلادها، والتي أهدتها إليها صديقتها الوحيدة جينا، التي تحاول مريم الاتصال بها، للمرة الثانية دون رد، وأخيراً سَمعت صوتها يجيب قائلاً:

- أيوة يا زفتة.. عاوزة إيه؟

فقالت مريم بحماسة وكأنها لم تسمع نبذة الغضب الزائف التي تعمّدت جينا إضافتها إلى صوتها: انزلي حالاً تعالي هنا فوراً.

- إيه؟! ما لك يا بنتي؟! خير في إيه؟!!

- لا خير، صمتت لثانية ثم قالت:

- مش عارفة.. بس هو في حاجة غريبة حصلت.

- يخرب بيت دماغك خضيتيني، في إيه؟!!

- لا لا ما تخافيش.. ما فيش حاجة. بس في حاجة غريبة. بُصي؛ تعالي وانتِ تفهمي.

- مش هاعرف اتحرك قبل ما احضّر الغدا مع ماما.. بس ماتقولي لي ما لك، أنا قلققت.

قالت مريم بصوت حاولت جعله هادئاً، ولكن الحيرة منعتهما:

- يا بنتي ما فيش حاجة والله.. حصل موقف غريب كدا مش عارفة اشرحه ازاي.

تهدّدت جينا وسألت بقلق حقيقي:

- انتِ وماما كويّسين يا مريم؟

- آه والله يا جِي.. ما تخافيش. أنا بس عاوزة احكي لك حاجة، بس مش

معتز شرباش

هينفع في التليفون.. لازم تشوفها. هاستناك، وأغلقت الخط بعد وعد جينا لها بالحضور بعد قليل.

ثم ابتسمت ورَفَعَت الرواية أمامها، وكأنها - مريم - عالمة آثار تُمسك بلُغز أثري مُشَفَّر، عصيَّ على الفهم، من عصر مضى.

لَمْ تعلم أن في الجهة المقابلة من الحديقة التي أمامها، في العمارة المواجهة لها، في دور واحد أعلى، كان هناك شاب يقف خلف زجاج غامق اللون، يبدو من الخارج كمرآة في ضوء النهار، يتابعها من خلال نظارة مكبرة حديثة، وكان يبادلها الابتسام، لأن هذه هي أول مرة يرى فيها تلك الغريبة تبتسم.

دخلت مريم وغابت عن نظره، فترك النظارة المكبرة من يده، ووضعها إلى جوار جهاز كمبيوتر شخصي، ثم التقط من جانبا رواية "الطاعون"، وفتح صفحاتها ليلتقط Bookmark بيضاء اللون، عليها كتابة باللون الأحمر، عبارة عن تهنئة بعيد ميلاد، فابتسم، فتلك هي أول معلومة مؤكدة يعرفها عن تلك الغريبة.

ترك الشاب الرواية، وظلَّ ممسكًا الـ Bookmark، وبدأ يُغني مع صوت محمد منير، الذي كان يملأ فراغ الشقة الواسعة..

عينيك حلوين .. هاديين صافيين .. مليانة حنين .. حنين بيخطفني ..

وعينيك طعمين .. رايقين دافيين .. هتاخدني لفين .. لفين وتسرقني ..

من كل حاجة .. من أي حاجة .. يا كل حاجة في دُنيتي إنت ..

* * *

مذكرات

٤

عَلِمْتُ اليَوْمَ يَقِينًا أَنَّنِي قَدْ مِتُّ..

عندما سمعت خبر خُطبتها، على رجلٍ يملك كل ما لا أملك.. ولم أتألم.

ألا يكفيهِ امتلاك كل شيء، حتى يأتي ليأخذ مني أنا كل شيء؟ حياتي.

شعور غريب بالراحة..

لا أعلم سببه..

قد يكون لأنها أصبحت رسميًا حلمًا مستحيلًا.. فلن تعالبنى حتى أحلام

يقظتنى بتحقيقه.

وكان الحلم كان ممكنًا قبل اليوم.

أو قد يكون سببه هو أن الإحساس بالألم غادرنى ولن يعود..

فبعد غياب شمسي، أي ظلام سيخيفنى؟

* * *

دخل وائل إلى مكتبه مندفعًا، ومن خلفه راضي المُجند، الذي علم يقينًا، أن عودة الضابط بعد أقل من ساعتين على مغادرته، لن تحمل من الخير شيئًا.

"هات العواقب سليمة يا رب"

كان وائل طيب القلب، في أغلب الأوقات، يكره الأذى، ولا يهين أحدًا، ولكنه كان، كعادة هذا النوع من البشر، سريع الغضب، ولا يتحكم في غضبه عندما يتمكن منه. وكان وائل، بلا شك، لا يبدو غاضبًا الآن، ولكن تلك الحماسة، وهذا الانفعال، الباديان بوضوح على ملامحه وحركاته، هما عاملان سهلان الاشتعال والتحول إلى الغضب في ثوانٍ، فتوجس راضي، وقرر أن يتجنب الضابط، وأن يتجنب الخطأ، والنقاش مع وائل، القابل للاشتعال، قدر إمكانه.

فمن الذكاء أن تعلم متى تصمت، ومتى تكون، إن أمكن، غير مرئي.

- اقل الباب واقعد يا ابني.

"ذهبت محاولات التجنب أدراج الرياح"

فكر راضي وهو يجلس، وعيناه لا تفارقان وائل، وكأنه يخشى أن يرفع عينيه عنه، فيفاجئه بأي تصرّف.

عُمر الشقي

- بالراحة كدا وواحدة واحدة.. انت كنت فين بالظبط لما الواد دا ضرب القسم بالغاز؟

اعتدل راضي وكأنه في اختبار داخل كُتاب مُحفّظ قرآن قريته البعيدة، وعلى وشك أن يعيد على مسامعه ما حفظه من آيات، وقال:

- سعادتك زي ما قُلت لسعادتك.. أنا كنت ع الباب هنا.. ولما سمعت دوشة طلعت اشوف في إيه.. وبصراحة يا وائل بيه أنا لما شُفت الغاز افتكرت القسم بيولع.. فطلعت اجري على برّا.

صهرّ كرسي وائل وهو يعتدل بعد وضع هاتفه في الشاحن، وكأن الكرسي غاضب من رد المجند. وانتقل غضبه إلى الضابط، الذي نظر لراضي وقال بحدة:

- يا ابني انت مش قُلت إنك كنت في الساحة برّا بس ما شُفتش حاجة؟ يا ابني انت في تحقيق رسمي يا ابني ما تطلعش ميتيني. انطق بالحرف بالي حصل.. وما تخافش مش هأذيك. وعد يا راضي.. بس قول بصراحة.

- ز... زي ما قُلت لسعادتك. طلعت جري ع الشارع. كانت شفة المُجند السُفلى ترتعش بشدة، ولاحظها الضابط، فقال مُطمئنًا، حتى يصل إلى المعلومة الأهم، والتي كان يعلم مدى صعوبة تذكُر المُجند لها، خاصة في تلك الحالة، التي هو عليها من الفرع:

معتز شرباش

- بُص يا راضي. كل الضباط النباطشي جريوا ع الشارع وقت الغاز، كذب وائل، ثم أكمل:

- ما حدش كان فاهم إيه اللي بيحصل.. مش انت بس، وبعدين زي ما قلت.. اللي بتقوله دا عشاني أنا.. ما تقلقش من حاجة.

ها.. قل لي بقي.. انت بعد ما رجعت من برّا.. باب مكتبي كان مفتوح ولا مقفول؟ ولا من الخوف والخضة عملت زي الضباط والأمناء ونسيت؟ ما انت مش هتبقى مفتّح عن الأمين مجدي يعني.. اللي سلّمه مفاتيح الحجز، وضحك بود حتى يطمئن راضي، ونجح.

- بصراحة يا بيه كدا أنا مش فاكر لم..

رفع وائل يده وضرب سطح المكتب فقفز راضي ككرة "بنج بونج"، ووقف دون وعي صحيح منه.

- ما فيش مش فاكر.. افتكر.

ولو كدبت عليّ تاني يا راضي هتتحاكم عسكري.. ورحمة أبويا لو اتكررت ما هارحمك.. أنا هالاقمها منك ولا م...

دلف شريف معاون المباحث إلى المكتب، حيث جاء بُناءً على طلب وائل منه ذلك عبر هاتف خطيبته، قبل أن يتركها عند منزل والديها بوعي غائب عنها.
قال وائل بحماس:

- أنا عرفت الواد دا خرج من مكتب المأمور دقايق ورجع ليه يا شريف.

* * *

- بتهزري!!

قالت جينا صديقة مريم في صيغة إقرار، وكأنها لا تُصدق ما قالت صديقتها أنه حدث.

كانتا في غرفة مريم، التي كانت مُرتبة لدرجة تظن معها، أن لا أحد يستخدمها، مكتب أبيض اللون، تقف على جانبه صورة رجل خمسيني، في إطار أسود، وعلى منتصفه حاسوبًا محمولًا طويت شاشته، لونه فضي، وتعلوه مكتبة تحتضن عددًا لا بأس به من الكتب، معظمها روايات، وبعضها دواوين شعر، وبعض من كتب الدكتور مصطفى محمود الكثيرة.

في الركن المواجه للمكتب، يقبع بيانو أسود فخم، يبدو وكأنه خرج لتوه من مشهد من أحد أفلام عبد الحلیم حافظ، بلونيه الأبيض والأسود المميزين. وسرير يعلوه شباك مغلق صغير، يطل على شرفة، بابها مُغلق هو الآخر إلى يمين السرير.

صوت هامس لتكييف الغرفة يكاد يكون مسموعًا، وكأنه يسترق السمع على هاتين الفاتنتين، ويخشى كشف أمره.

- والله زي ما حكيت لك. قالت مريم وهي تجلس على كُرسی البيانو مؤلّية ظهرها ناحيته، لتواجه صديقتها.

معتز شرباش

رفعت جينا قدميها وشبكتهما تحتها على السرير، وهي تفتح صفحات الرواية التي تركها المجهول لمريم، وقالت بخيبة أمل:

- على فكرة هيطلع حد من اللي شغالين في "الكافيه"، هيطلع محمد.. مش هوّ اللي كان هناك؟

- آه هوّ.. بس مش هوّ.

- دا زي "أنا ما اعرفش بس أنا متأكد كدا؟" وضحكت جينا.

تبسّمت مريم وقالت موضحة:

- يا بنتي كان قُصادي وقتها، بينزل طلبات لناس، وكمان ما كانش في حد قريب مني خالص منهم.

وما حدش أصلاً ممكن يتجرأ يعمل كدا، دا يتقطع عيشه لو عملت مُشكلة.

- بس أصل ازاي؟

- أنا بعد ما اكتشفت اللي حصل؛ ركزت كدا، ما كانش في غير محمد في الصالة.. والثاني كان ورا ال Coffe Machine طول الوقت، مش ممكن

يكون حد منهم، أنا متأكدة.

- أتمنى ما تكونيش قريت الرواية دي.. فيها رحلة تستحق السفر معاها..

رواية الطاعون كئيبه جدًّا.. هتُشكريني بعدين (:).

أعادت جينا قراءة جُملة "الساحر" بصوت عالٍ، وابتسمت تلقائياً لدي وصول عينيها إلى تلك الالبتسامة التي تقبع، غير متوقعة، في آخر الجملة

عُمر الشقي

كالفخ، وكأنها - الابتسامة- تعويذة سحرية، تفرض على من يقرأها الابتسام.

ثم أضافت:

- يخرب بيت الرومانسية.. أنا عاوزه من دا يا إمّ، واحتضنت الرواية.

فقامت مريم وانتزعتها منها وهي تبتسم وقالت:

- احنا هنقُرّ؟

وجلست إلى جوارها وقالت وهي تُقلّب صفحات الرواية سريعًا كمن يبحث

عن شيء ما:

- مش فاهمة ازاي كدا، ومين؟ دماغي مش جايبة أي تفسير منطقي.

- منطقي مين يا بنتي؟ دا شغل أفلام عربي.. لا عربي إيه؟! دا تُركي بامتياز.

ووكزت مريم بمرفقها وقالت بخُبت:

- طب إيه؟ مش هننزل نروح الكافيه تعزميني على المُز؟ قصدي على لمون

بالنعناع؟

اتسعت عينا مريم وهي تضحك، وقالت وهي تشيح بوجهها بعيدًا عن حيننا:

- خلاص عملتية مُز؟ وبعدين إيه أعزمك عليه دي؟ دا انتِ مصيبة.

- لا باقول لك إيه.. ما هو اللي يعمل الحركة دي لازم يبقى مُز، لو مش حلو

وقمّور كدا هيفصلني.

- يا دي النيلة.. يا بنتي وانتِ تتفصلي بتاع إيه؟ هو جه جنبك؟

معتز شرباش

طوّقت جينا رقبة صديقتها بذراعها واحتضنتها بود وقالت بخُبث لتستفز
صديقة عمرها:

- يا إمّ يا حبيبتي كلنا عارفين إنك معقدة ومالكيش في الطيب نصيب..
وهتطيري المُر.

ولّا هتفتّحي مُخك معايا؟ ونفّرح بيك؟

فرتّ مريم من بين ذراعي صديقتها، وكأنها تستعيز بالله من وسواس أوشك
على أن يقنعها بارتكاب خطيئة، وقالت:

- نفّرح إيه؟ ومُز مين؟ دا انتِ شيطانة.. هو احنا عارفين عنه حاجة؟ اهدي
كدا، وبعدين مانّت عارفة.. أنا ما ليش في كدا ومش ناوية.

- طب نزل نروح الكافيه.. وانا هاخذ معايا رواية... وصممت لثوانٍ تُفكر، ثم
قالت:

- أنا ما ليش في القراية انتِ عارفة.. شوفي لي حاجة كدا أنيل من الطاعون..
عندك حاجة اسمها كوليرا؟ ولا إيبولا؟ أقول لك؟ لا بلاش الإيدز.. ليفهمني
غلط، وضحكت بصوت عالٍ.

- يخرب بيتك.. اهمدي.

ضحكا بمرح واضح، ثم قالت جينا كمن "جابت التامية":

- آه.. عندك في المكتبة حاجة اسمها الجمرة الخبيثة؟

عُمر الشقي

ثم نظرت إلى السقف وقالت بهيام مبالغ فيه، بصوت وأداء الفنانة ماجدة في أحد مشاهدها الرومانسية:

- يمكن اصعب على المُر وييجي يخطبني على طول، ومدّت كلمة طول، وتهدّت في آخرها، بأداء مصطنع وفجّ.

- امشي يا بت من هنا.. أنا غلطانة إني كلّمك.

- معقول بدأتي تغيري عليه بسرعة كدا؟

تركت مريم الرواية إلى جوارها، والتقطت وسادة، وضربت بها وجه صديقتها، التي ضحكت بصوت عالٍ، وهي تحاول تفادي الضربات، بعد نجاح استفزازها في جعل مريم تعلن بشكل غير مباشر عن اهتمامها بهذا المجهول.

* * *

انطلق صوت أم كلثوم الواصل، من سماعات رديئة، موصلة بجهاز كمبيوتر عتيق، في ركن صالة شقة عماد. تلك الشقة التي استقر بها الصحفي منذ وصوله إلى العاصمة، ليطارد حلمه، أن يصبح، يوماً ما، أحد علامات الصحافة المصرية.

هَجَرْتِك .. يَمْكُنْ اَنْسَى هَوَاكَ .. وَاوَدَّعَ قَلْبِكَ الْقَاسِي ..

كانت الشقة صغيرة، تقبع فوق سطح أحد العمارات القديمة، في هذا الحيّ، الذي يبدو وكأنه هرب لتوه من إحدى روايات نجيب محفوظ، بكل أصالته وجماله العتيق، ولكنه - الحيّ - تلقى لطمة الحداثة، لتترك على وجهه، ندبة عميقة، لن ينجح، أمهر خبراء التجميل، في إزالتها.

كانت تلك الندبة تظهر، على سبيل المثال، جليّةً في الأغاني المزعجة، التي تنطلق من كل توكتوك، وكأنها الوقود الذي يُسِيرُ تلك الآلة القبيحة، وبدونها لن تسير، وتظهر على ملابس الشباب، التي تفرض عليك أحياناً كثيرة، أن تتمعّن في صاحبها، حتى تتأكد من نوعه، ولن تتأكد في بعض الحالات.

وَقُلْتُ اقْدِرْ فِي يَوْمِ اسْلَاكَ .. وَاَفْضَى مِنْ الْهَوَى كَاسِي ..

عُمر الشقي

كانت الصالة قليلة وبسيطة الأثاث، كنبه واحدة، وكرسي إلى يسارها، في مواجهة جهاز تليفزيون عتيق، إلى جوار ركن الكمبيوتر، وردهة صغيرة في الركن المقابل، عبارة عن مطبخ، وعبره تمرُّ إلى حمام صغير، وفي مواجهة باب الشقة - إن صح تسميتها بشقة- باب غرفة النوم، التي كانت بالكاد تتسع للسرير، "وكومدينو"، ودولاب صغير.

لَقِيت رُوحِي فِي عَرِّ جِفاك .. بِأفْكرِ فِيكَ وَأنا ناسِي ..

قطع عماد جزءًا في حجم عُقلة إصبع، من قطعة حشيش، في حجم سبّابته، ولقّها في سلوفان انتزعه من داخل علبة سجائره، وأمسكها من طرفها. وأشعل قداحته، وضبطها لترتفع الشعلة قليلًا، وبدأ في تسخين السلوفانة، وهو مُنكبٌّ على الطاولة الخشبية الصغيرة التي أمامه، والتي كانت بها جروحًا سوداءً كثيرة، من جراء نيران طالتها كثيرًا عن خطأ أو سهو. كان دُخان السجائر الكثيرة، التي تقبع بقاياها داخل منفضة سجائر وتملأها عن آخرها، يملأ فراغ الصالة، وكأنه ينافس صوت كوكب الشرق، على من منهما يملأ فراغًا أكثر.

غَصبت رُوحِي على الهجران .. وانت هواك يجري في دمِّي ..

بدأ الدخان يتصاعد من السلوفانة، حاملاً معه رائحة الحشيش المميزة، والسلوفان المُحترق. استمر في التسخين، وهو يُدير السلوفانة بحرفية، وكأنه طبّاح ماهر يقوم بشواء قطعة من اللحم، ويتأكد من أنه يشوي كل جوانبها.

معتز شرباش

وفضلت افكر في النسيان.. لما بقي النسيان همي..

أطفأ عماد القداحة، ومد يده إلى الفتاة التي كانت مُسترخية إلى جواره، تُدخن سيجارتها وتستمع إلى صوت كوكب الشرق، وتتابع الأشكال التي يرسمها الدُخان أثناء رحلته البطيئة إلى سقف الصالة، وكأنها وحدها في الشقة، فانتبهت، وناولته علبة سجائره، فأبعد يده، وشاور لها على علبة سجائرها هي، الـ Merit الصفراء، وقال بضيق ونفاد صبر:

- يا بنتي قلنا الحشيش يتلف في النضيف.. حتى المزاج هنشربه بخشبة؟
في إشارة إلى أن أنواع السجائر الأخرى، تحوي داخلها خشبًا مطحونًا،
بكميات متفاوتة حسب جودة المنتج.

فناولته منها سيجارتين، فأخذ واحدة فقط، فقالت وهي تنفخ دُخان سيجارتها بصوت ناعس:

- هتبقى ثقيلة قوي.. خُد واحدة كمان.. عشان اعرف اروّح.

لو خطر حُبك في بالي.. ولّا زار طيفك خيالي..

بدأ عماد يفرك السيجارة على صفحة بلاستيكية صغيرة أمامه، ويفرغ أمعاءها كلها، وأسقط وسط الأوراق البنية اللون قطعة الحشيش الساخنة، التي لانّت بفعل التسخين، وأخذ يفرك الخليط كله، ويخلطه
بترؤ:

- ما ترؤحيش، قال وهو منهّمك في عمله.

- مش هينفع.. عندي شغل الصبح.

عُمر الشقي

قال وهو لا يزال يفرك كل شيء أمامه بأصابعه المُدربة:

- خلاص ما تشربيش، بضيق، ثم نظر إليها بطرف عينه وقال:

- وبعدين هو الصبح هيطلع في بيتكم وهنا لأ؟ ما تروحي من هنا.

قالت وهي تُطفئ سيجارتها:

- أقرب من هناك.. وما لك يا عم القافش؟ ما كانش يعني مقال كتبه بدالك

رئيس التحرير، ثم سألت وهي تنظر حولها:

- هي فين صوفي؟ غريبة يعني مش بتكسر ولا بتعضض في الحاجة.

- نايمة مسقطة عشان فركت لها حطة حشيش ع البطاطس المهروسة.

قالت وهي تضحك:

- أكلت الكلبة حشيش يا ابن المجنونة؟

- وما له؟ هي يعني ما لهاش نفس تتكيف؟

ضحكت أسماء بصوت عالٍ، وهي تتخيل الكلبة الصغيرة فاقدة الوعي.

حاولت اهرب من الأفكار.. اللي تشعل نار حُبي..

فتح عماد علبة صغيرة والتقط منها ورقة بفرة متوسطة الطول، ووضع في

أولها، قطعة صغيرة من الكارتون، انتزعها من جانب علبة سجائره، التي

بدأت تبدو وكأنها سيّارة تم تركها في حي فقير، فتم نهبها من كل ما يمكن

نهبه، كانت تلك القطعة، تقوم بعمل فلتر السيجارة العادية، قام بثنيها حتى

أصبحت تشبه الماسورة الصغيرة، ثم أمسك برفق ورقة "البفرة" بأصابع

معتز شرباش

يُسراه، فاردًا إيَّاهَا على سبَّابته ووسطاه وخنصره، ومُثبَّتًا الورقة بإمهامه، ثم رفع الصفحة البلاستيكية التي فَرَكَ عليها كل شيء، وأسقط الخليط كله على الورقة، وأنزل وسطاه قليلاً، ورفع سبَّابته وخنصره باحتراف، حتى يجعل من الورقة مهبطًا للخليط، الذي استقر في منتصفها، في انتظار لف ورقة "البفرة" حوله، كما يُلف الرضيع اتقاءً له من البرد.

وفضلت وانا بالي محتار.. في الخب بين عقلي وقلبي..

هَزَّ عماد يده، وأسماء إلى جواره تتابعه بلهفة، وفرد الخليط بيمناه، وبدأ في لف ورقة "البفرة" برفق يليق برقة الورقة، اكتمل غلق الورقة، فلحس بلسانه طرفها، لتلتصق جوانبها، وتتحول إلى سيجارة كاملة التكوين. ثم رفع السيجارة إلى الأعلى بفخر، بعدما تأكد من سلامة صنْعها. ثم أغلق أعلاها بضم أطرافه، ثم نقر بطرفها الأدنى على الصفحة البلاستيكية، ليسقط الخليط إلى القاع، ويُدَك جيِّدًا.

وكان هجري عشان انساك.. واودع قلبك القاسي..

لقيت روعي في عز جفاك.. بافكر فيك وانا ناسي..

أشعل عماد طرف السيجارة، ومال إلى الخلف، وهو يناول أسماء إيَّاهَا، بعد سحبه لِنَفْسٍ طویل منها، وأسند ظهره إلى الخلف، ورفع رأسه للسقف، ونفخ دُخان النفس الأول بعد الاحتفاظ به قليلاً داخل صدره، حتى يكتمل التأثير المُخدر، وقال وهو يتابع دُخان الحشيش المهاجر إلى السقف،

عُمر الشقي

ويتساءل عن قدرته على التمييز بين دُخان السيجارة العادية، وبين دُخان الحشيش، بصوت مكتوم:

- اللي حارقني زي النار دي.. مش مقالة الاعتذار.. اللي حارقني إنه خدني كوبري يكسب بيه بونط ع العقيد عشان يمثي له مصلحة، بس هو فيه ميزة الصراحة.. هو ابن كلب مع الناس كلها، مش ناس وناس زي المديرين اللي بيبقى لهم عسافير وسط الموظفين، لا هو عبد مصلحته وبس.

صعبان علي جفاك.. بعد اللي شفته في حُبك..

مش قادر انسى رضاك.. أيام ودادك وقُربك..

نفثت أسماء دخان نفس قصير امتصته من السيجارة، وكحّت مرتين، وقالت بصوت متقطع:

- ثقيلة قوي، ثم ألق ما تبقى من دخان في رثاها إلى الهواء، وكأنها تتخلص منه، وأكملت بصوت مختنق:

- بس يا عماد هو عنده حق في اللي قاله.. انت ما كانش عندك قصة أصلاً.. وبرغم كدا كتبت مقال ثقيل قوي، بغض النظر عن اللي حصل.. انت استفدت.. يا ابني انت اسمك اتعرف.. ما تبقاش غبي وتفضل واقف في النص المليان.. بُص ع النص الفاضي.

- أبص ع النص الفاضي؟ لا هاتي السيجارة يا أسماء وادخلي نامي.. انت كدا وصلت، ومدّ يده وسحب منها السيجارة، فلمّ تعترض، فهي تشعر أنها قد "وصلت" بالفعل.

معتز شرباش

- اللي غايظني فعلاً إني صدّقت إني عدّيت وباكتب قصة وهاتابعها وهاعمل تحقيق وكدا.

لكن اعمل ايه؟؟ وانا قلبي لسأ صعبان عليه..

صعبان عليه انه اتمنى.. جنة قُربك..

ونال مُرادَه واتهنى.. بنعيم قُربك..

سحب نفسًا آخرًا من السيجارة، ثم ناول السيجارة لأسماء، التي رفضتها، لأنها شعرت أن عقلها قد غاب بالفعل، فاعتدلت لتجلب سيجارة عادية من علبتها، وتُشعلها.

- وبعدين يطلع البيه كان فاهم إن القصة نازلة على فُشوش.. لو كان قال لي كنت تابعت القصة.. وجبت قرارها قبل النشر.. وعلى الأقل كنت بقيت عملت حاجة، مش اعتذر تاني يوم زي العيل اللي عملها على روحه، ونفخ دُخانًا كثيفًا كتنين ينفُخ غضبه نارًا تحرق من استفزه.

ورجعت تسقيه من صدك.. كاس الهجران..

وتفوت عليه أيام بُعدك.. سُهد وحرمان..

- طب ما تتابع القصة.. حد ماسكك؟ قالت وهي تُلقي بظهرها إلى الخلف في كسل.

قال بصوت مكتوم تائه وسط سحابة من الدخان الكثيف:

- ما خلاص.. يعني لو جبت قصة هينشرها بعد ما نشرنا تفسير واعتذار؟ خلاص ما بقاش ينفع.

- ومين قال لك تنشرها في الجُرنال؟ انشرها وخلص، على صفحتك ع
الfacebook. انت اتعرفت وبقيت متشاف.

يا ما حاولت انساك.. وانسى ليالي هواك..

وانسى الجمال اللي شفته في الوجود وياك..

- ماهو عشان متشاف دي بقى ما ينفعش.. كدا هاتجاب وهالبس اسود.
وبعدين الناس هتقول انت اعتذرت ولا جاي تقول الحقيقة، فين
المصداقية؟ لأ.. ما ينفعش. وسحب نفسًا جديدًا، ليغيب وعيه أكثر.

- طب بسيطة.. انشرها.. بس مش على صفحتك.

- يعني اعمل أكونت ما حدش يعرفه واكتب فيه كلام ما حدش يقراه؟

- انتِ لحقتش تتسطي بالسُرعة دي؟

وكزته في كتفه، وقالت مُدافعة عن نفسها:

- فَشَر.. أنا مسطولة من ريحة النفس الأولاني بتاعك أصلًا، وضحكت.

فابتسم، برغم أنه كان يريد أن يضحك، ولكن بؤسه، وغضبه، والمُخدر
منعوه.

- أقصد يا ذكي تنشره في صفحة من الصفحات اللي مُهتمة بالقِصص دي..

بس لو عرفت تجيب قصة.

حَرمت رُوحِي من كل نِسمَة.. كانت بتسري بينك وبينِي..

وحرمت رُوحِي من كل نِعمَة.. كانت بتيجي وياك في عيني..

معتز شرباش

رفع رأسه، الذي بدأ في الدوران بالفعل، بفعل السيارة المحشوة، وسأل،
ملهوفاً ببطء لم يقصده، وعيناه نصف مفتوحة دون قصد:

- تعرف يا سمس حد أدمن في صفحة من الكُبار؟ بالذات صفحة "الشرطة
والشعب في خدمة النظام"؟ دي فيها فوق المليون واحد، ما حدش من
معارفك في حركة "عشاننا عليك يا رب" دي يعرف يظبطني؟

وقلت اعيش من غير ذكرى.. تخلي قلبي يحن إليك..

مافضلش عندي ولا فكرة.. غير إني أنسى أفكر فيك..

رفعت أسماء حاجبًا واحدًا وهي تنظرُ إلى عماد باستنكار، الذي لم يلحظه
بسبب سحابة الدُخان التي تغطي المساحة بينه وبينها، وقالت وهي ترفع
ذقنها إلى الأعلى قليلاً تعاليًا:

- يا ابني أنا عضو مؤسس في الحركة.. مش عضو بس.. وبعدين اسمها "كدا
كثير".. مش "عشاننا عليك يا رب". وليّ اصحاب في حركة "٩ مايو" كثير.
وطبعًا اعرف اظبّطك أخلي الصفحة دي تنشر.. بس لازم يكون عندك
معلومة مُفيدة، حاجة تستحق النشر يعني.

وبكدا.. تبقى عملت اللي في دماغك.. وممكن كمان نسرب إشاعة إنك
صاحب القصة.

- انتِ تعرفي اصحاب الصفحة دي؟! وبعدين أنا ابقى استفدت إيه بقى من
"الإشاعة"؟ ورفع علامات التنصيص.

فقالت وهي تمط شفرتها استياءً من بُطء فهمه:

عُمر الشقي

- ما حدش يعرف اصحابها.. بس اعرف ناس بيبيعوا لهم ع الصفحة ويتواصلوا معاهم.

وهتبقى استفدت إن الناس هتصدق.. وهتبقى بطل.. وفي نفس الوقت.. دي مُجرد إشاعة تقدر تنكرها، وإنكارك ليها هياكدها في عقول الناس، يا ابني دي كلها حركات إعلام واخدين فيها كورسات.

بس كل دا يعتمد على انت تقدر تجيب قصة ولا ما تقدرش.

وصبحت بين عقلي وقلبي.. تايه حيران..

واقول لروحي من غلبي.. انسي النسيان..

سرح عماد لثوانٍ في الحائط المقابل له، خلف جهاز التليفزيون، والذي يحمل صورة العذراء مريم، وقال وكأنه يهمس لنفسه:

- لأ لو كدا.. هاجيب أبوها.

- هي مين دي؟ سألت أسماء وهي تنظر صوب الحائط حيث توجه نظره. فنظر لها بتعجب وقال:

- هي مين إيه؟ مش عارفة العذرا يا بنت الهيلة؟

ضربته بكل ما تبقى فيها من قوّة على صدره، وقالت بحدة:

- اتلم.. هيلة لما تركيبك.

- ما عنديش أي مانع الهيلة تركيبني، وشرع يحمي وجهه بيديه، وهو يضحك، عندما بدأت مهاجمته بقبضتها.

معتز شرباش

- أهي لماضتك دي اللي موقفة حالك.

- لسًا ما فيش حال وقف، وضحكا، ثم قال وهو يتفادى ضرباتها:

- طب خلاص خلاص.. ما تركبيش لو مش عاوزة، وضحكا مُجددًا.

كان مزاجه قد تحسّن بشكل ملحوظ، بعد أن أدرك أنه لا يزال هناك طريقة، ينتقم بها من الداخلية، ومن رئيسه في العمل، وبالطبع ساعدت السيجارة كثيرًا.

سألت أسماء بجديّة، وهي تحاول أن تنفّض بقايا الغضب المُصطنع عن ملامحها:

- بس هي إيه اللي قُلت هتجيب أبوها؟ وانا افتكرتك بتتكلم عن الصورة؟

- يخرب بيت الحشيش.. أنا اللي افتكرتك بتتكلمي عن الصورة.. مش انتِ.

فضحكا بصوت عالٍ ثم قال عماد بصوت متقطع بسبب الضحك:

- كنت باقول هاجيب أبوها ع القصة يا مسطولة.

ضحكا مُجددًا بصوت أعلى عندما أدركا أن الحشيش يستحق ما دفعاه فيه.

ما دام باهجرُ عشان انساك.. واودّع قلبك القاسي..

واشوف روعي في عز جفاك.. بافكر فيك وانا ناسي..

أخذ ضحكهما في الخفوت تدريجيًا، حتى قالت أسماء، بصوت أنهكه الضحك:

- ما تغير السيت دي ياعم.. أنا حاسة إني زبيدة في فيلم بين القصرين.

عُمر الشقي

فضحك عماد، ثم غمز وقال بخُبت:

- حلو دا.. وانا السيد أحمد عبد الجواد.. قومي ارقصي بقى.

ضحكت بغنجٍ وقالت بخيبة أمل مُصطنعة:

- توتؤ.. من غير طربوش ما تنفعش.

صمت لثوانٍ، لم يقصدها، ولكن سببها المُخدر، ثم قال:

- طب ولو طلّعت لك الطربوش؟ تبقي زبيدة وتُرقصي؟

ردّت وهي لا تستطيع منع نفسها من الضحك:

- انت ما دخلتش "مايكروويف" التريبة ٣ ثواني على بعضهم.

* * *

- لا يا وائل بيه.. أنا مش فاهم.. ما علش تاني بالراحة كدا. ما له جهاز الكشف بالحكاية؟! سأل النقيب شريف وأشار صوب جهاز الكمبيوتر العتيق، الذي يقبع على طرف مكتب الرائد، وهو يخرج سيجارة.

أشار وائل إلى النقيب، إشارة مفادها، انتظر وشاهد لتفهم:

- راضي.. مش مهم حكاية الباب.. بس متأكد إن انت ما دخلتش المكتب تنضفه.. ولا لمست فيه حاجة بعد الغاغة دي؟ ولا مش متأكد، ولو كدبت مش هارحمك.

- وعِزَّة جلال الله يا وائل بيه ما دخلت هنا من ساعتها.. سعادتك أول واحد دخل المكتب بعد ما جيت.

بعد ما رجعت القسم والدخان مشي.. إيهاب بيه النبطشي نبّه على كل الأمناء والعساكر ما حدش يلمس حاجة.

- متأكد؟ وصرّ كُرسی وائل بعد سؤاله، مؤكِّدًا على أهمية السؤال.

- آه يا وائل بيه.. عليّ الحرام م...

قاطعه وائل قائلاً بضيق:

- خلاص.. مصدّقك.

- بُص يا شريف، فاعتدل الأخير انتباهًا.

عُمر الشقي

- أنا متأكد إن الواد دا دخل القسم عمل الغاغة دي عشان حاجة تانية غير إنه ينصُب على رامز جلال.

- غالي، صحح شريف.

- نعم؟!

- رامز غالي.. جلال دا ممثل. ونفخ دُخان سيجارته.

- غالي، قال وائل بضيق ثم أكمل:

- المهم.. اللي أكد كلامي.. خروجه من مكتب المأمور دقيقة ورجوعه. ما

كنتش قادر افهم السبب، وزى مانت عارف احنا راجعنا سوا على كل

الملفات هنا، ما فيش درج مكسور قِفله، حتى دُرَج مكتبي هنا ما اتفتحش.

ونقر على سطح مكتبه، ثم أكمل:

- ونفس الموضوع في مكتب ممدوح بيه، يعني دخل مكتبه وساب لؤي فيه

وما فكرش يلمس مكتبه ولا يفتح درجه اللي بيبقى مقفول بالمفتاح.

يبقى فاضل إيه؟

أطفاً شريف سيجارته، وأجاب:

- ما اعرفش.

أكمل الرائد بابتسامة متحمسة:

- الجهاز بتاع الكشف الجنائي دا.. الوصلة اللي فيه بتاعة الـ USB لما بتمهز

بتفصل ما بتشحنش. والبيه.. وأشار إلى راضي وأكمل:

معتز شرباش

- لما كان بينضف المكتب كان بيهزها وبتقرفني على ما تشبّط تاني وتشحن، وكمان كنت باحط التليفون وباسيبه واكتشف وانا خارج إن الزفت ما اتشحنش.. فنمّيت عليه يبطل ينضف الجهاز، ومن ساعتها والمشكلة اتحلّت. لحد اليوم اللي جه فيها الواد دا.

- إيه اللي حصل؟

- زي ما سمعت دالوقت.. راضي ما دخلش المكتب من وقت الاقتحام.. وقبلها بساعة وانا خارج كانت الوصلة شغالة، دا معناه إيه؟ واعتدل ليصبر كُرسيه، فلم يُجب شريف، وإن بقي مُنتبهاً. فأكمل الرائد:

- يعني الواد دا لما خرج من مكتب المأمور جه هنا، وأشار إلى جهاز الكشف الجنائي.

- واستخدم الـ USB ولما رجّع الوصلة وهو طبعا ما يعرفش إنها بتلمّس وتفصل.. فما اشتغلتهش لما انا استخدمتها.

أنا طبعا شكّيت في راضي.. بس فعلاً افكرت إن ما حدش دخل المكاتب. يعني الواد دا جه القسم عمل حاجة في الجهاز هنا.. وفيلم لؤي دا كان شغل سخرة.. توجيه نظر الناس في ناحية.. عكس اللي بتحصل فيها الخدعة الحقيقية.

واعتدل ليسند ظهره على كُرسيه، الذي احترم الصمت الذي هبط على المكتب ولم يصدر أي صرير على غير عادته، حتى قطع الصمت رنين هاتف شريف، فمدّ الأخير يده ليُخرسه، ويسأل:

عُمر الشقي

- يعني انت عاوز تقول إن الواد دا جه عمل الفيلم دا كله عشان يعمل
كشف على حد؟

- أكيد لأ يا شريف، أجااب وائل بضيق.

- طب وهو جهاز الكشف دا بيعمل إيه غير كدا؟

أسند وائل مرفقيه على المكتب، وقال:

- بالضبط.. عشان كدا كلّمت كريم فاضل اسأله.

- وقالك إيه؟!!

- قالّي الجهاز دا... وأخرج مُفكرته، وفتحها على صفحة "الاقتحام" وقرأ:

- الجهاز دا اسمه "نهاية طرفية" متوصل بشبكة داخلية.. الشبكة اللي

متوصل بيها دي شبكة مقفولة.. مالهاش مدخل غير عبر أجهزة الكشف في

الأقسام والمطارات وبس.

باختصار.. ما حدش يقدر يدخل على الشبكة دي.. غير الأجهزة المتوصلة

عليها وبس، يعني اللي عاوز يدخل الشبكة دي لازم يدخل من خلال واحد

من أجهزة الكشف.

أخرج شريف سيجارة من علبته وأشعلها، ثم نظر إلى راضي لثانية واحدة،

ثم نظر إلى وائل، وقال:

- ماتطلب لنا قهوة يا وائل بيه عشان نصحصح.

نظر وائل صوب راضي، وكأنه يراه لأول مرة، حيث كان قد نسي وجوده، في

معتز شرباش

وسط موجة الحماس التي اجتاحتها عندما بدأ يسرد تفاصيل الخيوط الجديدة التي فكّر بها. ثم قال:

- إيه يا ابني اللي موقّفك هنا كل دا؟

فتح راضي فمه ليُجيب، ولكن وائل أكمل، لأنه في الحقيقة لم يكن يسأل راضي، وإنما كان يسأل نفسه:

- خلاص روح انت.. وقول لمحمود يعمل لنا اتنين قهوة.

فحيّا راضي ضابطه، وغادر، فلاحقه وائل قائلاً بصوت عالٍ حتى يصله:

- من البُن بتاعي. ثم نظر إلى شريف، وأكمل:

- فهمت بقى؟ الواد دا جه عشان يدخل على الشبكة، واستغل وجود لؤي هنا عشان يوجّه نظرنا بعيد عنه.. وما حدش يتوقع السبب الأساسي من اقتحامه.

نفخ شريف دُخانًا كثيفًا من سيجارته، ومسح جبهته، وكأنه يُخلي مكانًا في عقله، لهذا السيناريو الغريب جدًّا، وقال:

- الحكاية دي لفتت دماغي يا وائل بيه.. دا شغل أفلام چيمس بوند، مين اللي ممكن يعمل كدا؟ وليه؟ دخول الشبكة دا مهم في إيه؟ معقول هيعمل كل دا عشان يكشف على مُتهم؟ ولا الجهاز دا بيعمل غير كدا واحنا ما نعرفش؟

سحب نفس من سيجارته، وكان الرائد يشعل سيجارته، فأكمل النقيب:

- ولو التفسير دا صح.. طب راح أخذ فلوس ليه من رامز جلال طالما عمل اللي هوّ عاوزه.

عُمر الشقي

- غالي، جلال دا ممثل.
- ابتسم شريف، فأجاب وائل:
- راح لرامز عشان يكمل الفيلم ويتحيك. أما بخصوص باقي الأسئلة.. دي اللي لَسَّا ما فيش عليها إجابة.
- طب وكريم قال لك إيه؟
- كريم قالي الجهاز دا ما بيعملش غير الكشف الجنائي.. والنهية الطرفية دي ماينفعش تعمل أي تغيير ولا تعديل في قاعدة بيانات المعلومات الأساسية، يعني تدخل تشوف بس.. لكن ما تعدّش ولا تضيف ولا تحذف.
- يعني انت تقصد إنه جه هنا وعمل كدا دا عشان يكشف على متهم بس؟
- معقول؟!؟
- قال وائل بضيق:
- لأ طبعًا يا شريف.. ما كان عمل فيش أسهل، هوّ عمل حاجة.. بس لَسَّا ما اعرفش هي إيه، وسرح قليلاً، دخل خلالها محمود بالقهوة، وخرج، وتقريبًا لم يلحظه الرائد.
- مش شايف يا وائل بيه إن الحكاية دي واسعة شوية؟
- هي واسعة.. ولسًا ما عنديش حاجة صلبة اقدر ابني عليها استنتاج قاطع..
- بس انا واثق من اللي باقوله.
- استنشق رائحة القهوة في يده، ورشف منها رشفة، ملأت فمه بالبُن، وأكمل:

معتز شرباش

- في قضايا يا شريف.. بيكون عقلك الباطن.. أو لاوعيك عارف إن وراها أكثر من اللي ظاهر.. بس بتكون مش قادر تمسكه. أنا من يوم الاقتحام وانا متأكد إن القصة دي وراها أكثر من نصباية برُبع مليون جنية.

أعاد شريف فنجانه وأجاب بلُطف زائد حتى لا يُهين رائده:

- بس يا وائل بيه ساعات لاوعيك بيكون غلط، وتجنّب النظر إلى الرائد.

تغيّرت ملامح وائل وتعكّرت، وقال في حدة حاول كبجها:

- تقصد قضية القتل بتاعة الأقصر؟ انت بتحك..

رفع شريف يده مُعتذراً، وقال موضحاً:

- والله يا وائل بيه ماقصدت حاجة بعينها.. أنا بس بق..

- بُص يا شريف.. قضية القتل اللي بتتكلم عنها دي ساح فيها دم راجل بريء

وراح هدر عشان اللي اتحبس فيها بريء.. عشان الوزارة فيها ناس درجة

خيالها نفس درجة خيال الكرسي اللي انت قاعد عليه.

كنت محتاج شوية وقت.. بس جات التعليمات "لو ما فيش دليل قاطع

ضده ما لكش دعوة بيه" عشان البيه كان أبوه تاجر آثار قد الدنيا وكان

مدورها.

فمن فضلك ماتجيش تعمل فيها فاهم.. وتسمع من بعيد.. وتحكم على قصة

انت ماتعرفش الحد الأدنى من تفاصيلها.

كان الرائد وائل قد حَقق في قضية قتل، عندما كان يخدم في الصعيد، في

الأقصر تحديداً، كانت القضية، من النظرة الأولى، تبدو سهلة وواضحة،

عُمر الشقي

كأنك في امتحان، نسي واضعه، وأرفق ورقة الإجابة النموذجية مع ورقة الأسئلة.

اشتبه وائل في القضية، على عكس رئيسه المباشر، وكل من عمل على القضية، أو علم بها، فاستثمر الكثير من وقت فراغه، ومجهوده، مُخالفًا تعليمات رؤسائه، واستجوب كثيرين، حتى انتهت به تحقيقاته إلى الاشتباه في أحدهم، سالم النجيدي، وعندما بدأ محاولة استجوابه، بخصوص مكان تواجده وقت وقوع الجريمة، وعن تفاصيل علاقته بالمجني عليه، بدأ هجوم كل من علم بالأمر عليه، وكأنه ساحرة قبض عليها متلبسة تمارس السحر أو الشعوذة من قبل الكنيسة في أوروبا أثناء عصور الظلام، وكان ينقص حرقه حيًّا حتى تكتمل الصورة الكلاسيكية، حيث اتُّهم بالتوهم، ثم التهور، ووصلت قائمة الاتهامات إلى الحقد على الشاب الرائع، الذي يشتبه فيه، لما يملكه من مال ونفوذ في المدينة، ويمثّل كل ما لن يكونه النقيب - رتبته وقتها. فانصاع النقيب مُضطرًا، وترك القضية، وإن لم يتركه إيمانه بأن العدل لم يتحقق، بل العكس تمامًا.

وبعدها بأسابيع، في إحدى الليالي كان يخدم في أحد النقاط الأمنية على الطريق، مرّ من خلاله هذا الشاب، الذي كان الضابط واثقًا من أنه قاتل، أو مُحَرِّض على أقل تقدير، أفلت من عقوبة يستحقها، فحدث بينهما شجار تطور إلى تعدي الضابط على الشاب بالضرب، مما تسبب في إيقافه عن العمل، وتحويله للتحقيق، ومن ثم نقله من المدينة بأسرها.

معتز شرباش

وكانت القصة المتداولة داخل أروقة الوزارة، أن الحقد هو سبب كره الشاب الأرعن ممثل القانون، للشباب الصعيدي، الذي كان متسامحًا ولم يُقاضي الوزارة بعد أن تعدّى عليه الضابط بالضرب، وكانت تلك الحكاية تثير وائل عند الإشارة إليها، ولو بشكل غير مباشر.

استمع شريف لتعنيف رائده صامتًا، وانتظر حتى أفرغ شحنة غضبه، ثم أجاب بهدوء:

- تمام يا وائل بيه.. بس انا فعلاً ما كنتش اقصد حاجة بعينها لما قُلت إنك ممكن تكون غلطان، انت اللي فهمت غلط.

بس طالما فتحت السيرة دي.. تعالي نقفلها، انت أذكي من إني أجاملك واضحك عليك، بصراحة كدا أنا مش مقتنع بالقصة اللي انت كنت مقتنع بيها وقتها.. ومقتنع إن القضية اتقفلت صح.. بس قناعتي دي مش هي الصح.. دي قناعتي أنا.. مش بافرضها عليك.. وانت ما تفرضش قناعتك عليّ.

بس دا كله مالوش دعوة بقضية الاقتحام.. مش معنى إنك كنت مقتنع بحاجة وطلعت من وجهة نظري غلط.. يبقى انت هتبقى غلط في كل القضايا، أنا عارف وانت عارف إنك ظابط شاطر وكُفء.. وبرضه عارف وانت عارف إن طالع عليك سمعة في الوزارة إنك لما بتسيطر عليك فكرة مش بتشوف غيرها، بس أنا مش مصدق السُمعة دي، لأنني اشتغلت معاك

عُمر الشقي

وعارف طريقة شُغلك، فسامحني لو كلامي اتفهم غلط.. بس صدقني أنا
مش باحكم عليك من كلام حد.

بقي وائل جامدًا لثوانٍ ينظر إلى النقيب، ثم قال بصوت جامد:

- تمام يا شريف بيه.. بس لمعلوماتك.. الواد اللي اتحبس دا ما قتلش.. الواد
دا بريء.. أنا استجوبته.. ما كانش بيكذب.

- يا وائل بيه يا وائل بيه.. بريء ازاي بس؟ دا هجّام وسوابق.. واتمسك
بالحاجة اللي مسروقة من شقة القتيل.

- ماهو انت مش هتفهم.. القضية كانت فيها حاجة غريبة.. زي ما تكون
سهلة وخلصانة زيادة عن اللزوم، صمت لثوانٍ وتمهّد بضيق، ثم أكمل:

- ما لوش لازمة الكلام عمومًا.. ولا انت هتقتنع.. ولا أنا عندي دليل على
نظريتي، بس هتفضل القضية دي نُقطة سودا في تاريخي، مش عشان
اتعاقبت واتنقلت.. لكن عشان سبت واحد بريء يتحبس ظلم، ومش
هاسامح نفسي.. ومش هاسمح لنفسي أكرر الغلطة دي تاني.. عشان كنت
ضعيف.

- عمومًا ربنا ما بيسيبش.. وانت ما تقدرش تمسك كل المجرمين.. كلنا
عارفين القاعدة دي.

- صح.

بقيا صامتين لدقيقة كاملة، ثم قال وائل في محاولة مكشوفة لتغيير
الموضوع:

معتز شرباش

- فين تقرير الطب الشرعي بتاع الست اللي انتحرت؟
- لَسَّا ما خلصش.
- أَمال انت قُلْت لي إيه خلص لما اتصلت بيّ على موبايل مَيّ؟
- صور مسرح الجريمة.. وفي كمان تسجيل الكاميرات اللي في بيته.. على CD.
- التقط الرائد الملف، وقال:
- طيب سيب قصة الواد بتاع الاقتحام دا لحد ما يرُد عليّ كريم.. قال لي هيشوف حاجة كدا ويرجع لي.. يمكن اكون غلطان فعلاً، وعاوزين نقفل القصة دي، مش جوزها هيبجي بُكرة؟ ونقر على الملف الذي فتحه وبدأ يتصفّحه، ثم أكمل:
- النيابة هتعاين الشقة إمتي؟
- بكرة.
- تعرف مين وكيل النيابة اللي مسكها.
- أحمد سامح.
- أمسك الرائد هاتفه، واتصل بخطيبته، وقال:
- طب كويس، ثم زَفر بضيق، عندما أجابته، السيّدة التي تحطّمت على جدار صوتها الآليّ، الفاقد للرحمة، ملايين محاولات الاتصال، راجية إيّاه أن يحاول "الاتصال في وقت لاحق" لأن هاتف مَيّ "رُبما يكون مُغلَقًا".
- كان وائل يعلم أنه، من وجهة نظر خطيبته، قد أخطأ خطأً فادحًا، وكان يعلم أن عقابه سيكون عسيرًا، وتأكّد أن أولى مراحل العقاب قد بدأت،

عُمر الشقي

عندما وجد هاتفها مُغلَقًا، فمراحل العقاب تبدأ بالاختفاء، وتنتهي بالـ "خناق". وتمُر بين تلك المرحلتين، بالصمت، ثم التجاهل، ثم الاستفزاز، ثم الهجوم، وكان يعلم الرائد أيضًا، إنه لم يُخطئ، فالقيام بعمله على أكمل وجه، يقتضي أحيانًا التقصير في باقي مهامه العادية، وكان يرى هذا التصرف طبيعيًا، ويجب أن يكون مقبولًا لدى خطيبته، فهو لم يخدعها بأنه يعمل كموديل مثلًا، هي تعلم وظيفته، ومسؤولياتها، لأن تقريبًا كل رجال عائلتها من ضباط الداخلية، ولكنه أيضًا كان يعلم أنه لا مكان لوجهات النظر في النقاش بين الرجل والمرأة الغاضبة.

فالمرأة الغاضبة كالبحر الهائج. والمركب لا يمكنه إقناع العاصفة أن رحلته على قدر كبير من الأهمية، لتتركه يمرّ بسلام. ضغط الرائد زر استدعاء راضي، وهو ينتزع هاتفه من الشاحن بضيق، وقال لمعاونته:

- طب أنا مضطر امشي.. عشان عندي عاصفة في الأفق.. هاخذ الملف دا أراجعه في البيت. حيث أراد أن يتجنب مشاهدة الدماء خارج عُرفته، فهو يُفضل ألا يُصاب بالتوتر والقلق إلا وهو بمفرده، فأومأ شريف.

- ولو فيه حاجة هاكلمك. أضاف الرائد.

لاحظ الضيق على ملامح النقيب، خاصة وأنه استدعاه بالفعل ليعود إلى القسم منذ قليل، فقال:

معتز شرباش

- نتكلم بكرة.. نتكلم بكرة، ليلتك جميلة يا شريف بيه، وابتسم، ثم نظر لراضي الذي انتصب في منتصف المكتب:

- ما تجيبش سيرة عن حكاية الكمبيوتر دي لحد.. لحد بس ما نشوف إيه الحكاية، وابق.. وقطع كلامه عندما لاحظ سحابة ارتباك غطت ملامح مُجنّده، فسأل بضيق:

- قُلت لمين يا راضي؟

- سعادتك ما قُلتلش إن الحك..

- يا ابني قُلت لمين؟ بنفاد صبر.

- الأُمناء ياسر ومجدي يا وائل بيه.. ومحم..

- خلاص خلاص.. مش ناقص غير تامر أمين في البيت بيتك عشان مصر كلها تعرف.. ربنا يتوب علينا من الشغلانة دي، نبّه ع المصايب دول ما حدش ينطق، ولكنه كان يعلم أن محاولة منع تسرب المعلومة بعد معرفة الأُمناء، هي بالظبط كمحاولة إيقاف موجة بحر عاتية بذراعيه.

وغادر مكتبه حاملاً الملف الذي يحوي صور وتسجيلات مسرح الجريمة، في اتجاه بيت خطيبته، ليختصر الزمن، ويمر بمراحل العقاب صاغراً راضياً. ولم يعلم وقتها، أن هذا الملف سيتسبب في عاصفة، ستجتاح حياته، وتقلبها كلها رأساً على عقب، لا تُشبهه، بأي حال، تلك التي يعلم أنه مُقبل عليها في منزل خطيبته.

* * *

مذكرات

٥

سألت نفسي كثيراً؛ هل هناك من تستحق كل هذا العشق؟ حتى
جاءني الجواب في رؤيائي؛ أن اطمئن، لن تُعشق بهذا القدر من لا
تستحق.

لعلها رؤية مُزيّفة، اختلقها عقلي الباطن، ليبقيني على قيد أمل
معدوم، ولكنني لا أمانع، فأنا أعلم أنه لا توجد انتصارات في العشق،
فقط هزيمة، عن طيب خاطر، تلو الأخرى، وأنا المهزوم دوماً.
كنت دائم القول: "لَكُمْ واقعكم.. ولي أحلام"
لم يلفت نظري في الواقع الكثير. ثم جاءت هي، وأعادت تعريف كل
شيء..

كانت هي الواقع الذي تُترك من أجله الأحلام..
لم أنتظر منها يوماً، سوى أن تبقى في مجال رؤيتي.. رؤيتها تكفي.

معتز شرباش

كانت مُجرد مشاهدتها، ولو من بعيد، تفعل أي شيء، أو لا شيء،
جَنَّة.

الحياة لمن عَشِق.. لم يولد، ولم يحيَ، من لم يعشِق حد الجنون، ولم
يَمُت.. فقط جاء وبقي ورحل.
وأنا عَشِقت، ولكنني لم أحيَ.. أنا متُّ لحظة ميلادي..
وباقٍ إلى حين.

* * *

ضغطت مريم، وهي داخل شرفتها، زر العمل في ريموت المروحة، ذات القائمة الواحدة الطويلة، المُسمّاة "ستاند"، والتي قررت أن تستعين بها على الحرارة، والبعوض.

فكّرت في أن كل شيء أصبح له جهاز تحكم عن بُعد، كل شيء، فحتى البشر، منهم من هو يعمل وفق إشارات من جهاز تحكم عن بُعد، في يد أحدهم، دون تمييز، ولا أعمال للعقل، ويظنون أنهم جماعة، وهم قطع، ويظنون أن اتحادهم قوة، ولكن الاتحاد يعني إضافة قيمة الفرد للجماعة، لتعلو، وتشتد.

ولكن ما يحدث هو إلغاء الفرد لنفسه، ليتحوّل إلى نسخة متكررة من ملايين غيره، هذا ما يحدث في كل الجماعات التي تلغي الفرد، لمصلحة مشروع، يخدم في الحقيقة بعض الانتهازين.

كانت مريم قد قررت أن تبدأ في قراءة الرواية، التي تركها لها الساحر المجهول، ولكن روحها، لسبب ما، كانت ترفض الجلوس على سريرها، في برودة التكييف، وظلام الغرفة الكئيب المعتاد، كانت تشعر أنها تريد أن تخرج وتنطلق، فرأت أن الشرفة قد تكون حلاً مقبولاً.

معتز شرباش

لم تعلن لنفسها، بأن رغبتهما في الخروج، واعتدال مزاجهما، لهما أي علاقة،
بالمساحر المجهول، فتلك الحركة كانت لها على روحها، نفس تأثير الشروق
على أرواح العصافير النائمة الآن في أنحاء الحديقة أمامها.

تجاهلت الأمر، وكأن تجاهل الأمر ينفيه، فهي كانت تخشى التعلق، كما
تخشى الأطفال من غرفة الفئران، فمُنذ فقدت والدها، أحب مخلوق إليها
إلى جانب أمها، أقسمت ألا تتعلق بأحد مُجددًا، فألم الفراق أشد من أن
تتعرض له مرة أخرى، فأثرت السلامة وقررت تجنب مخاطرة التعرض له،
فلن تحتل روحها فقدان عزيز آخر.

دخلت أمها إلى الشرفة وسألت متعجبة بسُخرية واضحة:

- من إمتى يا مشمش بتشغلي المروحة؟ وقاعدة في الحر؟ ما لك يا بنتي؟
فيك إيه؟ انتِ سُخنة؟

ضحكت مريم بمرح، وقالت:

- يووه يا ماما.. يعني اقعد اقرا في الأوضة تقولي هيجيلك اكتاب من الضلمة
والحبسة.. أخرج البلكونة مش عاجبك.. أعمل لك في نفسي إيه؟ ووقفت إلى
جوار أمها وأسندت مرفقيها على سور الشرفة مثلها، فقالت الأم وهي تميل
ناحية وحيدتها بكتفها:

- طيري يا بت.. عاوزاك تطيري من هنا زي العصفورة على بيتك.. هاموت
قبل ما اشوف عيالك.

عُمر الشقي

- ربنا يدريك الصحة يا ست الكُل.. بس ما فيش طيران.. أنا عاجبني القفص دا، ولقّت يديها حول كتف أمها، ونظرت، دون وعي منها، صوب الرواية التي تركتها على الكرسي، عندما فتحت والدتها سيرة ارتباطها.

- كلمهم بيقولوا كدا في الأول.

- ماشي لما نشوف يا عمرو دياب انت يا صغين، غازلت أمها.

ضحكا بمرح، لم يقطعه سوى مرور سيارة نقل مزعجة تحت الشرفة، ثم عادت المنطقة لهدوئها الساحر، فقالت مريم:

- مش عارفة ليه حاسة إن نفسي أنزل أروح اتمشى ع البحر في اسكندرية. وتهدت دون قصد.

اعتدلت الأم، ونظرت إلى مريم، لثوانٍ متفحصة إيّاها، ثم قالت بخفوت:

- مريم.. في إيه؟

- في إيه في إيه يا ماما؟ حاولت مريم أن تتجنب الارتباك، فتملّكها.

- انت فيك إيه؟ قالت الأم والابتسامة تتسلل إلى ملامحها.

قاومت مريم الابتسامة التي جاهدت لتعلو وجهها، ولكن الدماء اندفعت إليه، لتشعر هي بسخونة تفوق حرارة الجوّ تنطلق من وجهها، وقالت وهي

تراوغ عين أمها التي شعرت وكأنها تنظر إلى روحها ذاتها:

معتز شرباش

- والله العظيم ما في حاجة.. الدنيا صيف.. وعاززة اروح البحر.. فيها حاجة دي؟ ثم حاولت أن تبدو وكأنها أمسكت بزمام الأمور، فقالت:
- بلاش حركات المفتش كرومبو دي.. انت بتلكك؟
- ماشي.. براحتك. بس بكرة تيجي تتحايلي عليّ عشان تحكي لي.
- يوووه.. خليك انت مصدقة كدا. والله...
- قاطعتها أمها وابتسمت بخُبث، وقالت:
- من غير حلفان.. خلاص.. مصدقك. كذبت الأم.
- ثم دارت واتجهت إلى الداخل وهي تقول:
- أنا جوًا باتفرج ع المسلسل... وصمتت لثوانٍ، ثم قالت:
- لو عاززة يعني تحكي لي حاجة كدا ولا كدا.
- دارت عينا مريم في محجرهما، وقالت:
- يوووووه بقى.

فضحكت الأم وغادرت، وهي على يقين أن هناك جديد في حياة ابنتها، وأنها سوف تشارك أمها إياه عندما تكون على استعداد.

أخذت مريم الرواية، وضحكت وهي تجلس، وهزّت رأسها بخجل، وكأن أمها أمسكتها متلبسة بجريمة ما، ثم فتحت أول صفحاتها، وقرأت، كالعادة، الجملة التي كتبها الساحر، وابتسمت كما تفعل كل مرة. وغابت في تخيل

عُمر الشقي

هذا الشخص وهو يكتب لها هذه الجُملة. هل هو شخص تعرفه؟ هل أعدّ تلك الرواية لإهدائها إيّاها؟ أم كان قرارًا لحظيًا من شخص لا يعرفها؟ ولكنه كتب عن كآبة "الطاعون". من يعلم أنها تقرأ "الطاعون"؟ وهي بدأت في قراءتها في نفس اليوم الذي أبدلها فيه. فهي لم تخرج بها قبل تلك المرة. هل كان يراقبها؟

رفعت رأسها، تلقائيًا، عندما تخيلت مراقبته لها، ونظرت حولها، إلى العمارات التي تقع في مُحيط الحديقة التي تطل عليها شُرفتها. "هل يمكن أن يكون هناك، خلف أحد تلك النوافذ يراقبني؟" وكأنها شعرت به، فقد كانت على حق تمامًا.

* * *

- ألو. أجابت أسماء اتصال عماد.
- أيوة يا سمس. جبت شوية تفاصيل عنب عن موضوع القسم، ها؟
- هتعر في تظبطيني ونشرها على ال facebook زي ما وعدتيني وانتِ مسطولة؟
- يا راجل؟ طب باقول لك إيه.. أنا لسا راجعة من برا.. كنت في مقر الحركة طول النهار وهاموت من الفرهدة. هاخذ دُش سريع واكلمك.
- بدأنا الحركات القرعة.
- القرعة دي تبقى أمك، باقول لك دقائق.. مش باقلبك. أنا خلاص قلعت مش هاعرف اتكلم دالوقت بس.
- فابتسم وقال بخُبت:
- طب آجي؟
- لا لا.. لما اخلص هاكلمك في التليفون مش هاقدر انزل تاني، لَم تُلاحظ نبرته الخبيثة من شدة تعيها، فوضّح:
- لا أقصد آجي آجي.. أصل اللي يقلع لوحده يبرد.. وانا ما يخلصنيش.
- تصدق أنا غلطانة إني باخذ وادّي معاك في الكلام. وضحكت.
- خلاص خلاص.. بس ما تتأخريش.
- أقول لك؟ ابعت لي القصة ع الميل على ما اخلص. وانا هاشوف هاقدر اعمل إيه. يارب بس يبقى فيها حاجة تستاهل.

عُمر الشقي

- عيب عليك.. دي هتبقى قنبلة.

- لو قنبلة فعلاً.. يبقى اتطمئن، سلام بقى، وأغلقت الخط.

أغلق عماد الخط ونظر إلى الشارع من خلال نافذة سيارة الأجرة التي استقلها من عند القسم منذ دقائق، وأخذ يتابع الناس في سعيهم المحموم، كلُّ نحو هدفه.

تذكر عماد عندما كان يجلس على سطح عمارة كان يسكنها صديق له، في بلدته الصغيرة، ويتابع الناس، كانت تلك العمارة تطل على محطة القطار، فكان يجلس هناك صامتاً، يتابع الناس، وقت وصول القطار، ويتخيل قصة كل منهم، كانت تفتنه حقيقة، أن لكل واحد من هؤلاء قصة لا علاقة لها بقصص المئات من البشر الذين هم حوله الآن، ولكن جمعهم لساعات قليلة رحلة قطار واحدة.

انتقلت ذاكرته لحاضره دون استئذان، فلهظات التأمل هي التي تختارنا، وليس العكس.

تذكر كيف بدأت تلك القصة التي يحقق فيها حالياً. كان يؤمن بأن الأقدار لها يد فيها، وكان يعلم أن تواجهه في مكان وقوع الحدث، وقت وقوعه، هو من تدير القدر، فأبى أن يردّه، أو يرفض هديته، وبعد فشله في القيام بعمله بالطريقة الطبيعية، لاعتبارات ومواءمات لم يتلعبها، قرر أنه لن

معتز شرباش

تمنعه تلك العقبات من توصيل الحقيقة إلى الناس، هؤلاء الناس الذي يراهم كأطياف يمرّون إلى جوار السيارة التي يستقلّها.

شعر بغصّة في حلقه، لأن قصّته لن تخرج تحت اسمه، ولكنه فضّل خروجها إلى النور يتيمة، عن السماح لهم بقتلها في مهدها.

أحيانًا يختارنا القدر لأداء مهمة مُعيّنة لأسباب لا نعلمها، وقتها وحده الإيمان يدفعنا إلى القيام بها، فقط علينا أن نؤمن أن هناك من يُدبّر، ويُسخّر، ويُسيّر.

فربما لن يعلم الناس أنه صاحب القصة، ولكن على الأقل ستخرج القصة. "ومن يعلم؟ فهل كانت تعلم السيّدة يوكابد أم النبي موسى عندما أُلقت برضيعها إلى البحر أنه سينجو؟ هل كانت تعلم أن الله قدّر لهما أن يجتمعا مُجددًا بعد أيام لتصبح مُرضعته؟" ففكر.

كان عماد يرى نفسه كصحفي، وليس مجرد ناقل للخبر، وكان يعتبر الصحافة رسالة، وليست مجرد مهنة. والصحفي الذي يحترم نفسه، يهّمه في المقام الأول، وصول الحقيقة للناس. حتى وإن لعنوه على قُبْحها، كما قال له رئيسه.

وكان هناك سبب آخر يدفعه للقيام بنشره القصة بأي طريقة، فتلك القصة هي التي اعتبرها انتقامه الخاص من رئيسه في العمل، ومن العقيد "مجدي نور"، وعقابًا لهما على الظلم والخيانة الذي كان يشعر بأنه تعرّض لهما.

عُمر الشقي

حتى ولو الوقت لم يحن بعد، لنشره التحقيق باسمه كما يتمنى، فلا مانع من التخفي مؤقتًا، وعدم حصوله على الثناء كاملاً، ولكن انتقامه، كان لابد له أن يحدث.

فالتلاعب بحلم وطموح شاب، نظير مصلحة شخصية، هو في نظره جريمة لا تُغتفر. وهي للأسف تحدث يومياً آلاف المرات في دولته، بسبب سوء حالة معظم شبابه المادية، وانحطاط الكثير من شعبيها أخلاقياً.

انتقل وعيه مُجدداً، وتذكر الشاب المُجند، الذي أقنعه عماد منذ دقائق، أنه اسمه أحمد، ويعمل كسائق في شركة دعاية وإعلان، وشركته لها عملاء في شركات الاتصالات، والسجائر، وخلافه. وكيف أقنعه أنه يحصل على كروت الشحن، وعلب السجائر، مجاناً. وأهداه كروت شحن هدية، لأنها ليست خاصة بالشركة التي يتبعها رقم هاتفه، و "حرام هترمي" حسب رواية عماد، وأقنعه أنه لا يدخن المارلبورو الأبيض، التي يتحصّل عليها دائماً كهدايا مجانية، و "حرام بترمي برضه"، ثم سأله عن موعد تواجد ضابط المباحث، لأنه أراد أن يسأله بشكل ودي عن كيفية تعامله مع حالة بها شبهة سرقة في عمله. وبذكاء انتقل من قصّته، إلى تلك القصة التي نُشرت عن القسم.

- يا نهار أبيض.. مش دا القسم اللي حصل فيه ضرب الغاز والدنيا كانت مقلوبة عليه من كام يوم؟ ياه يا ابن عمي!! وانت كنت هناك؟ جراك حاجة؟

معتز شرباش

هكذا نقل الحديث إلى حيث أراد، بعدما اكتسب ثقة المُجند، ودون أن يلاحظ العسكري أن هذا هو غرضه الرئيسي، وعلم منه تفاصيلًا مهمة وخطيرة عن حالة "الاقتحام".

كان واثقًا أن قصة التدريب، التي ألقاها العقيد في وجهه، ما هي إلا تغطية على قصة حقيقية، تنتظر من يكشف عنها الحجاب، وها هو قد فعل. وحصل أيضًا بالصدفة على خبر يصلح لصفحة الحوادث، سيفيده، حتى يُشعر السيد كمال حجاب أنه تخطى مشكلته معه، وعاد لممارسة عمله بشكل طبيعي.

كان يتمنى أن تستطيع أسماء مساعدته في نشر قصته التي كان يعلم أنها ستكون مُزلزلة إعلاميًا، وتتمنى أن تتمكن من نشر إشاعة أنه هو صاحب القصة، فهو بشر في النهاية، وتفتنه الشهرة والاهتمام اللذان سيحصل عليهما بعد نشر القصة.

"هل قُمت باستغلال الشاب راضي كما فعلت معي كمال حجاب؟" سأله ضميره.

"وهل من سبيل للقيام بالعمل بنظافة في هذا الوسط القذر؟" أجاب.

"وهل هذا المُبرر كافيًا للقذارة؟"

"وهل في أثناء محاولتي الانتقام من كمال.. تحوّلت إلى كمال آخر أستغل حاجة شاب إلى مكاملة إضافية.. أو إلى سجناء مجانية تعينه على خدمته المملة؟"

عُمر الشقي

"ألم يمتلك كمال من المبررات ما يشبه تلك التي تجيب بها على أسئلة
ضميرك لتُسكته؟"

قطع سائق التاكسي حوار عماد مع ضميره عندما ناوله سيجارة من علبته،
فرفض عماد بهمة غير واضحة ولكنها كانت واضحة بما يكفي للسائق
ليسحب يده، ويسأل:

- هاضايك لو عفرت؟

- لا لا براحتك. أنا بادخن أصلاً بس ما ليش مزاج.

- ما لكش مزاج؟ ولا السوبر مش كيفك؟ ماهي أصلها أمزجة يا حضرت.

نظر عماد إلى السائق الخمسيني، وجسده الضخم، ولم يُعلق، فاكتفى
السائق بما قيل، وصمت. لبدأ عماد كتابة القصة على هاتفه، بعد أن
قطع السائق، مشكوراً، حوارهِ مع نفسه.

* * *

معتز شرباش

**يكفي أن تبذل كل ما في وسعك، حتى وإن لم
يكفِ.**

عاد الرائد إلى منزله، بعد أن مرَّ على منزل خطيبته، التي رفضت مقابلته، فأدرك أن مرحلة الاختفاء ما زالت قيد التنفيذ، وفشلت محاولة تسريع الأمور التي قام بها. ودفع ثمن محاولته الفاشلة، عبر اضطراره لمُجالسة والد خطيبته، لمدة ساعة، وسماعه عن خبراته التي اكتسبها بعد سنوات فاقت الأربعين من الزواج، وبعد اعتذار الأم له لأن "البنت رجعت من برًا تعبانة ونامت" حسب قولها.

ثم اضطر إلى أن يجيب على أسئلة سيادة اللواء، بخصوص قضية الاقتحام، وسماع ترخُّمه على أيام هيبة الوزارة، والذي يُفهم منه ضمناً، أنه هو - الرائد - ومن على شاكلته، من الضباط فاقد الكفاءة، والقوة الكافية، سبب ضياعها.

- على أيامنا كان لما واحد بيحبيب سيرة الوزارة وهو في بيتهم ومستخبي تحت السرير.. كان بيُبص حواليه، دالوقت العيال بتبقى ناقصها تلبس طُرح.. وبيطلعوا في القنوات العميلة يشتمونا.. طبيعي تتجرأ المُجرمين علينا، وأدي بدايتها أهي، وتهد بضيق هازًا رأسه تحسُّرًا.

- بس يا افندم الولد دا مش مُجرد مُجرم ولا نصَّاب عادي.

ندم وائل على نُطقه لهذه الجُملة بمُجرد خروجها من فمه. ولكن استفزاز

معتز شرباش

"حماه المستقبلي" له كان يفوق قدرته على ادعاء التحمل.

كان يعلم جيداً كيف سيستقبل اللواء نظريته، وكيف سيسخر منها، وبأي ملامح وجه سيستعين ليستخف به، ووصولاً إلى تذكيره بشطوحه المعتاد في القضايا التي تضعه تحت الضغط، وحدث تحديداً ما توقع، حتى استغل وائل مكالمته من صديق له، ليغادر على عجل، تقريباً، دون سلام.

أغلق باب الشقة، وحيًا والدته، التي كانت قد فرغت للتو من صلاتها، وأوماً موافقاً على سؤالها:

- أسخن الأكل؟

دخل غرفة نومه، التي كانت مرتبة بشكل مقبول، ويعود الفضل في ذلك إلى والدته بالطبع، ترك الملف، الذي يحوي صور وتسجيلات القضية التي يعمل عليها، على مكتب صغير خشبي بني اللون، إلى يمينه، وأغلق باب الغرفة خلفه، كانت الغرفة ضيقة نسبياً، وطويلة، تبدأ ببابها، وتنتهي بباب شرفة تطل على زقاق بين ثلاث عمارات متلاصقة، كالعشاق على شاطئ الإسكندرية في ليالي الصيف.

مكتب صغير فوقه جهاز كمبيوتر عجوز، وتعلوه مساحة عارية من الحائط المطلي باللون الأبيض، الذي اصفر قليلاً بفعل الزمن، عُززت فيه دبابيس عديدة بدون تنظيم، تبدو كالنمّش الذي يعلو الوجه، ولكنه اختار بقعة واحدة وانتشر بها، وسرير يكفي لشخص واحد، تسدّ زاويته ضلفة باب

عُمر الشقي

الشرفة اليُسرى، وتُستخدم اليُمنى فقط على ما يبدو، تعلوه - السرير- مكتبة حوت من الروايات البوليسية عددًا لا بأس به، وبعض كتب القانون، والكثير من مغامرات رجل المستحيل وما وراء الطبيعة، ودولابًا بنيّ اللون كلون المكتب، التهم الحائط خلف كرسي المكتب الملاصق إلى المكتب. فتح أزرار قميصه، ثم نظر إلى المَلَف وكأنه ناداه، فلم يُقاوم، وفتحه وأخرج الصور ببطء، على عكس وتيرة أنفاسه التي تسارعت، رَغْمًا عنه، كما اعتاد عند رؤية الدماء.

تحكّم في سرعة أنفاسه، وحاول أن يتنفس ببطء، وساعده تجنّب النظر مباشرة إلى الدماء. التقط الصور، واحدة تلو الأخرى، وثبّتها على الحائط أعلى المكتب مستخدمًا الدبايس التي كانت تنتظر دون عمل، حتى جاءها. بدأ يتذكر جوّلتة في تلك الشقة، مُستعينًا بالصور التي أمامه. هدأت أنفاسه حتى عادت، تقريبًا، إلى مُعدلها الطبيعي، عندما غاب وعيه، وغادره في رحلة إلى الشقة.

رتّب الصور في صفوف فوق بعضها، بدأ بصور الشقة؛ طُرقة المنزل ضيقة، إلى اليسار حمام الضيوف، وإلى اليمين مطبخ مُرتّب، وفي نهاية الممر، هناك أربعة أبواب، اثنان إلى اليسار، وواحد إلى اليمين، وواحد في المواجهة في نهاية الممر، ثلاث عُرف نوم، وحمام.

معتز شرباش

ثم في الصف الثاني صور الجُثة؛ جثة السيِّدة مُلقاة على أرض غُرفة النوم الرئيسية، عند باب الغرفة تقريبًا، يمكن رؤيتها من أول الممر. بُقعة دماء حمراء متجلطة تحت رأسها على الأرض الخشبية فاتحة اللون.

يبدو من وضع الجُثة، ومكان دخول الرصاصة، أنها كانت تقف مواجهة للممر عندما انتحرت. وأنها أطلقت الرصاص على رأسها مُستخدمة يدها اليسرى، ولا رذاذ دماء على الحوائط يشير إلى خروج الطلقة، التي أنهت حياتها.

ثم صور مداخل ومخارج الشقة؛ لا يوجد للشقة مدخل سوى بابها، وبها شُرفتان، واحدة تطل على الشارع الذي به مدخل العمارة، ولا يجاورها أي شيء، فهي بعيدة وعالية بما يكفي لاستحالة الوصول إليها قفزًا، أو تسلُّقًا. والشرفة الأخرى في غرفة النوم الرئيسية حيث انتهت حياة ربة المنزل، قريبة نسبيًا من سطح عمارة بجانبها، ولكن المسافة لا تسمح بالقفز منها أو إليها. وكانت الشُرفة مُؤمّنة بقفص حديدي كامل التأمين، ومُغلق من الداخل بقفل صدئ، نظر إلى صور الشُرفة، وتذكر معاينته لها؛ الحديد كله يعلوه الصداً نتيجة بقائه في الهواء منذ سنوات.

لا توجد أي إشارة، تدل على حتى محاولة فتح تلك الشرفة منذ شهر على الأقل، والنتيجة؛ أن تلك الشقة لا يمكن الدخول أو الخروج منها أو إليها سوى عن طريق بابها فقط.

عُمر الشقي

الباب الذي تعلوه من الخارج والداخل ثلاث كاميرات مراقبة، كانت تعمل بكفاءة وقت الوفاة.

أمسك الاسطوانة المدمجة، وضغط زر التشغيل في جهاز الكمبيوتر إلى يساره، وسمع صوت قرصه الصلب وهو يتمطأ وينفض عنه كسل راحة طالت، فهو قلماً يستخدمه، وانتظر أن يفتح الجهاز ليستخدمه.

قطع انتظاره طرقات هادئة على باب عُرفته، فنظر إلى الباب الذي انزاح، وظهرت أمه خلفه، وعندما رآته جالساً بملابسه، كما جاء، ولكنه حلّ فقط أزرار قميصه، دخلت ونظرت إلى الحائط أمامه، لثانية واحدة، ثم أشاحت بوجهها بعيداً عن الحائط كمن رأت شبحاً، وقالت:

- أعوذ بالله من الشيطان الرجيم.. ليه يا ابني كدا؟ جريمة زفت تاني؟
- ما علش يا حاجة.. القضية دي هتخلص بسرعة.. ما تقلقش. بس دي مش جريمة زفت لا.. شكلها انتحرت.

- ليه كدا يا بنتي؟ ربنا يسامحها، قالت بحسرة، وهي تهتمّ بمغادرة الغرفة.

- الأكل جهز؟ هناك سوا.. ها؟

- وانا من إمتي باكل من غيرك يا حضرة الظابط؟ يلا قوم.. الأكل هيبرد. وأغلقت الباب خلفها.

- حالاً، وقالها وهو يخلع عنه قميصه، ويلقي نظرة أخيرة على الصور أمامه. كان هناك شعور خفي يتسلل بداخله، لم يعه بالكامل وعي الرائد، أو يفهم له سبباً، ولكنه شعر بوجوده، كمن يقرأ قصة عن الأشباح، في ليلة شتاء

معتز شرباش

مظلمة، ويشعُر بوجود الأشباح حوله، فلا تعلم مدى صدق الشعور، ولكنه حاضر، وبقوّة.

شعور ذكّره بالمرّة الوحيدة التي شعر به قبل تلك القضية التي أمامه.

"القضية دي هتفضل نقطة سودا في تاريخي"

هاجمته الذكرى.

- سهلة أوي يا سليمان. قالها النقيب وائل وهو يشعل سيجارته، ثم أكمل:

- القضية دي من اللي بيتقال عليها خلصانة، وضغط على كل حرف من

حروف كلمة "خلصانة"، ليؤكد على معناها.

- هجّام معروف.. الأقصر كلها عارفة انه هجّام.. دخل شقة المجني عليه

بالليل.. كل دا طبيعي جدًّا.. رقّاصة وبترقص.

المجني عليه على عكس ترتيب الهجّام كان صاحي.. فاجأك.. دبحته. سُفت؟

خلصانة. كررها بنفس الطريقة.

بصوت خشن، يحمل غضب مكتوم دافع عن سُمعته:

- يا بيه الغلطة دي يغلطها عيّل شمام جتته بتاكله على شَمّة.

أنا هجّام آه يا بيه.. بس بقالي ١٢ سنة في الشغلانة.. ما اطلعش بيت أهله

موجودين فيه.

- يا واد يا محترف. سَخَر النقيب وهو ينفخ دُخان سيجارته في وجه سليمان

الهجّام.

تنهّد سليمان بضيق كاتمًا غضبه. فسأل وائل:

عُمر الشقي

- طب والحاجة الي سرقتهما من بيت القتيل؟ يعني انت نطيت في الشقة لقيته مقتول؟ ساعدني افهم يا سليمان.

ونظّر إلى عيني الهجّام بحثًا عن أي إشارة لأي شيء ولم يجد، كانت عينا سليمان كعيون الموتى.

"هذا الرجل يملك خبرة في الاستجابات تفوق خبرة قسم الأقصر كله" فكّر النقيب.

اكتسب سليمان الهجّام سُمعة استحقّها، فكونه هجّامًا معروفًا لمدة تزيد عن عقد من الزمان، في مدينة صغيرة كالأقصر، دون إدانة واحدة، هو إنجاز يصعب تحقيقه، اكتسب خبرة التعامل مع ضباط الشرطة والمباحث ووكلاء النيابة، أصقلتها سنوات وسنوات من تواجده في الطرف الخاطئ من تلك الطاولة، التي تشهد على استجوابٍ قد يكون الأخير في مسيرته الحافلة. فتلك المرة تختلف عن سابقتها.

فهو يعلم أن هذه القضية تبدو "خلصانة" كما أكّد النقيب.

لم يُجب سليمان، فقرر النقيب تغيير التكتيك الذي يتّبعه.

فقام من مكانه، وفكّ الأصفاد التي تركت علامتها على يد الهجّام النحيفة السمراء، ثم عاد إلى مكانه، وأخرج سيجارة من علبته، ومدّ بها يده صوب سليمان، وأشعل قداحته باليد الأخرى.

تأخر رد فعل سليمان لثانيتين، لاحت أثناءهما بوادر حياة في عينيه، عندما ركّزها على عيني النقيب، في محاولة لفهم تكتيكة الجديد.

معتز شرباش

"أخيراً؟!!!" بدأ النقيب يشعر بالأمل، فأكمل بصوت متعاطف:

- بُص يا سليمان.. الراجل اللي انت بعت له البضاعة لما عرف إن صاحبها اتقتل اعترف إنك اللي بعتها له.. والرا...

- كدّاب يا بيه.. دي مش حاج.. قاطعه الهجّام، فقاطعه النقيب بخبطة قوية على الطاولة، فانتفضت وأصدرت صوت احتكاك قوي بالأرض كأنها تعترض على ضربها، وصرخ النقيب وهو يمسك بالأصفاة مُجدداً:

- أنا غلطان إني باحاول اساعدك.. طول ما انت بتكذب هتعلق في المشنقة.. انت مش غبي وعارف إن القضية دي خالصانة.. لو هتفضل تكذب هتلبس البدلة الحمراء.

ظَهَرَت ملامح الخوف، عند ذكر بدلة الإعدام، على ملامح الهجّام لأول مرة. عادت الحياة لعينيه، فظهر خوفه من الموت جلياً.

قال سليمان بخفوت، وكأنه يقول ما يقول بخلاف إرادته:

- ما عنديش غير الكذب بيه.. أنا لو قُلت الحقيقة ما حدش هيصدقني.

- يعني هو دالوقت حد مصدّقك؟

- يعني لو قُلتك الحقيقة يا بيه هتساعدني اثبتها؟ توعدني؟

أخفى النقيب لهفة جاهدت لتظهر على ملامحه وصوته، وقال:

- مش محتاج أوعدك.. لأن دا شغلي أصلاً.

- يعني هتصدقني؟ سأل بتحدّي.

عُمر الشقي

أراح النقيب ظهره وهو يطفئ سيجارته في رجل الطاولة لعدم وجود منفضة، وقال بثقة:

- تعرف يا سليمان؟ في ميزة مهمة جدًا في الحقيقة، وألقى بعقب سيجارته إلى ركن الغرفة، وأكمل:

- الحقيقة ممكن تكون أغرب من الخيال.. بس دايماً أسهل إنها تتصدق.. عارف ليه؟ ببساطة عشان هي الحقيقة، الحقيقة لها قوة بتفرض بيها نفسها.

لاح الاقتناع على ملامح الهجّام، فقال النقيب ليُجهز على أية شكوك قد تمنعه من المُصارحة:

- ساعدني أساعدك.. انت عارف إني الوحيد هنا اللي لسا بياخذ ويدي معاك.

وأوعدك يا سليمان لو بريء من دم القتيل.. وياقول لو.. لو بريء من القتل.. مش هاسيبك تلبسه.

وخز ضمير الرائد صاحبه لينتزعه من ذكرياته بقسوة.

فهو وَعَدَ وَلَمْ يَوْفِ، وَلَمْ يَسَامِحْ نَفْسَهُ أَبَدًا.

وَلَنْ يَفْعَلَ.

"هتفضل القضية دي نقطة سودا في حياتي"

جلست مريم على نفس الطاولة التي تعرّضت عليها لعملية الخداع، والتي لا تزال تؤرقها، فهي لا تعلم أي شيء عما حدث سوى أن هناك من اهتم بها لدرجة أنه أراد أن يُجنّبها "نكدًا" متوقعًا بين صفحات رواية، حسب قوله، فاختر لها أخرى. وهذا بخلاف الوسيلة الساحرة التي اختارها، فكأنها عاشت مشهدًا من أحد الأفلام الرومانسية، التي تجبر دموعها على الخروج عندما تشاهدها.

كانت دائمًا ما تتساءل، هل تحدث مثل تلك المواقف في الحقيقة؟ كانت تعلم أن نعم، تحدث، لكنها تحدث بعيدًا، تحدث مع أشخاص آخرين، ولكنها كانت تؤمن أن هناك من لا يزال قادرًا على الإبداع، والجنون، كانت ترفض في لاوعياها، أو عقلها الباطن، أن تتقبل فكرة أن هذا العالم تقليدي، وكئيب، وباهت، كما تراه.

ولكنها لم تتصور أبدًا أن تكون طرفًا في حلم، أو عرض سحري كما تسمّيه. فالعالم لم يمهد لها وجود مثل تلك الشخصيات في مُحيطها، كي تستعد. ولكنها كانت تعلم أن مثل تلك الشخصيات المختلفة، المجنونة، لا تنتظر تمهيدًا، ولا تقترب بخطوات حريصة من الناس، بل تقتحم، وتُذهل، وتُهمر، كما فعل معها هذا الساحر.

عُمر الشقي

كانت تحاول أن تمنع نفسها من البحث عنه، وفشلت، فهي منذ غادرت منزلها منذ دقائق تبحث عنه، وتتساءل، هل سيظهر اليوم؟ بل هل سيظهر مُجددًا؟ أم أنه كان عرض المرة الواحدة وانتهى؟ وكانت ترفض التسليم بأن ما حدث هو مُجرد حادث، كالحلم الجميل، ستنساه بعد مرور بعض الوقت، كانت تريد أن تصدق أن ما حدث كان بداية لشيء لن ينتهي. وكانت على حق، ولكنها لم تكن تعلم ذلك يقينًا بعد.

نظرت إلى يسارها صوب الطاولة التي استقر عليها لدقائق "مساعد الساحر" في عرضه العبقري، كانت فارغة وبدت حزينة، كأنها، مثل مريم، تنتظر أن يعود صاحبها، لتشارك في عرض جميل لأول مرة، وتنسى، للحظات، إنها مُجرد طاولة مثل أية طاولة أُخرى.

وضعت مريم سبابتها اليمنى داخل رواية "قمر على سمرقند" التي بدأت في قراءتها بالفعل، نظرًا لعدم وجود Bookmark معها، مؤقتًا؛ حيث أنها طلبت بالفعل من صديقتها حيناً أن تشتري لها أُخرى، ومدّت يدها اليسرى لتلتقط مشروبها الذي يقبع أمامها، ينفخ دُخان، وكأنه يذكّرها بوجوده، ولكن يدها تسمّرت عندما ظهرت الـ Bookmark التي اعتادت استخدامها في مجال رؤيتها، مصحوبة بصوت متردد، يقول:

- واضح إنك محتاجة الـ Bookmark.

معتز شرباش

رفعت عيناها صوبه، لترى الساحر، هذا الشاب الذي يقف أمامها بثقة، لا تخلو من خجل. ثم نظرت إلى الـ Bookmark مُجددًا، وعجزت عن الإتيان بأيّة ردة فعل، فهي حقًا لم تستعد لهذه المواجهة، تمنّتها، ولكنها لم تستعد لها.

فنحن نتمنى الكثير، ولكن لا نستعد له. فكيف نستعد لما لا علم لنا به؟

كيف تستعد لمقابلة شخص لم تعلم يقينًا بحضوره؟ وكيف تستعد لمقابلة شخص كانت تظنّه حتى قبل أيام قليلة شخصية خيالية؟

تحرك الشاب في محاولة لحثّها على الرد، أو على القيام بأي رد فعل، فمدّ يده في اتجاه الرواية، فرفعت عينها إليه، واستسلمت، فوضع الـ Bookmark في مكانها بين صفحات الرواية، وانتظر، ولكنها لم تتحرك. فقال في محاولة لكسر الثلج، الذي بدا عصيًا على الكسر، برغم حرارة الصيف في الخارج:

- دالوقت تقدري تشيلي صوباعك.

لا رد، فقال مُعقبًا:

- لو تحبي يعني.. إلا بقى لو هتتني الصفحة اللي وقفت عندها.. ودا أنا باعتبره جريمة في حق الكتاب.

تحركت ببطء كالخارج من غيبوبة طالت، وتركت الرواية أمامها على الطاولة، ثم قالت:

عُمر الشقي

- لا مش باحب اتني الصُفح، وصممت.

فابتسم، وانتظر حتى تدعوه إلى الجلوس، ولكنها لم تفعل، فهمّ ليواصل حديثه، ولكنها قالت مُندفعة، مفاجأة إيّاه، ومفاجأة حتى نفسها:

- انت ازاي تدي لنفسك الحق تعمل اللي انت عملته دا؟!!!

نعم لقد أبهرها عرضه السحري، ولكنها امرأة قبل كل شيء، لا يمكنها الإفصاح عما تشعر به بعد أول محاولة منه، خاصة لغريب لا تعرفه، حتى وإن كان في وسامة، وإبداع، وجنون، هذا المائل أمامها.

"أخيراً تحدثت؟!!!" فكَر الشاب وهو يقوم بالجلوس دون إذن، وتذكر يوم قام بتغيير الرواية، وكأنه يراه يحدث أمامه.

كان يهيم بارتداء خوذته السوداء، التي لا يقود دراجته البخارية بدونها، حين لمح الفتاة التي تسكن في العمارة المقابلة للعمارة التي يسكنها، والتي لاحظها أكثر من مرة عبر منظاره من خلف زجاج شقته القاتم، تستعد لركوب سيارتها، لفتت انتباهه منذ رآها أول مرة، لأن جمالها، لا يمكن عدم ملاحظته.

تحركت بسيارتها في نفس الوقت الذي تحرك هو فيه، سارت في نفس طريقه، فابتسم من خلف زجاج خوذته القاتم. سارا في نفس الطريق لدقائق، حتى توقفت هي، فأبطأ من سرعته، لسبب لا يعلمه، أراد فقط أن يعلم ماذا جاءت هنا لتفعل، تركت سيارتها، ودخلت إلى "كافيه" هادئ،

معتز شرباش

فتوقع أن تقابل أحدهم. ولكنها بعد دقائق، لم تقابل أحدًا، فقط جاءت لتقرأ، كما يبدو عليها، فهي لم تنظر إلى ساعتها، ولا إلى هاتفها منذ جلست، هي لا تنتظر أحدًا.

نظر إلى الكتاب الذي تقرأه، عبر منظاره الذي التقطه من حقيبة ظهره، ليجد أنها رواية "الطاعون"، لألبير كامو.

توقف الشاب لثوانٍ عن الحركة، فقبل أيام فقط، من اليوم، كان قد انتهى من قراءة هذه الرواية.

"هذه صدفه غريبة.. بل هي علامة" ففكر.

كان هذا الشاب يحترم العلامات جدًا، وينتبه لها.

عاد إلى النظر صوب الفتاة. كان قد قرأ تلك الرواية وكره كل لحظة فيها، فبرغم عبقرية العمل، إلا أنه كان شديد الكآبة والقسوة، تدور أحداثها في وهران الجزائرية، حيث أن أصل ألبير كامو جزائري، فاختار وهران لتكون مسرحًا لعمله، تحكي الرواية عن طبيب يلاحظ أعراض المرض القاتل على كل من حوله، بداية من الفئران التي انتشرت جثثها في كل وأي مكان، وحتى أقرب أصدقائه وجيرانه، حوصرت وهران ولم يسمح لأحد بالدخول أو الخروج منها حتى لا ينتشر الوباء، صارت أحلام العشاق الذين سافروا منها أو إليها في إجازات قصيرة تتحول إلى كوابيس مرعبة، ويحاول السكان الذين لم يصيبهم المرض بعد الهروب فتصميمهم رصاصات الجنود.

عُمر الشقي

هربوا من الموت البشع بالداخل ليُقتلوا على الحدود، الموت هنا وهناك في كل مكان.

كان الموت هو البطل الذي خيم بظله الأسود الكئيب على كل أحداث رواية كان يكرر الشاب أنها من أكثر الروايات كآبة وقسوة قرأها في حياته.

أراد الشاب أن يمنع هذه الفتاة الساحرة من مواصلة قراءة تلك الرواية، وخاصة أنه لاحظ أنها تقرأ في صفحاتها الأولى، ليست فكرة الموت أو المرض التي خشي على الفتاة من قراءتها إياها، فهو لا يظنّها هشة إلى هذه الدرجة، ولكنها التفاصيل الحية التي يحيط بها ألبير كامو من يقرأ عمله القوي، فيشم رائحة أنفاس المرضى ويرى نزيهم الذي لا يتوقف، ويشعر بحرارة أجسادهم المحمومة، وتحاصره أناتهم وآهاتهم المكتومة.

فتنتقل الأعراض لحظياً لمن يقرأ، ويشعر وكأنه سيمرض معهم بالإحباء. فأشفق على الجميلة من تلك التجربة القاسية. فقرر أن يمنعها من مواصلة قراءة العمل، ونجح.

انتزعته مريم من رحلة الذكريات التي اختطفته منها لثوان، قائلة:

- انت جاي تسرح هنا؟

فضحك الشاب بصدق على تعليقها، وأجاب وهو يتجنب النظر إليها مباشرة:

معتز شرباش

- لا أكيد مش جاي اسرح هنا.. بس الأكيد برضه إني مش جاي اتخانق، أنا ببساطة جاي اعتذر لك لو تصرّفني ضايقك.. بس صدقيني زي ما كتبت لك في الرواية دي.. هتشكريني بعدين.

- دا ما يديكش الحق تعمل كدا.. وبعدين ازاي أصلاً؟ قالت بحدة، ولكن لانك كثيرًا عن جملتها السابقة.

فقال الشاب، وقد لاحظ لين حدة صوتها:

- الحكاية بسيطة جدًّا.. علامة.. قدر.. أنا شُفتك بتقري رواية لسَّا قارمها قبلك بأيام.. وعارف إنها هتنكّد عليك.. وحسيت إن ربنا بعني ليك عشان أنقذك. وضحك، ثم أكمل:

- قمت جبت غيرها.. ودخلت غيّرتها في الوقت اللي كل الناس كانت باصة فيه الناحية الثانية، زي الساحر كدا، وأشار صوب الطاولة الأخرى.

فابتسمت لأنها أطلقت عليه نفس اللقب، وقالت:

- بس انت كنت تعرف مني... آآه دا صاحبك.. صح؟

ابتسم وأجاب:

- مش صاحبي قوي.. يعني تقدري تقولي صاحبتة ٤ دقائق شرحت له فيهم دوره واتفقنا ع المقابل وكدا.

صممت لثوانٍ حتى تستوعب ما قاله، ثم سألت:

- ليه؟! اشمعني أنا؟

- دا سؤال بدمتك؟! هو في غيرك هنا كان بيقرأ الطاعون؟ وابتسم.

عُمر الشقي

فعقدت حاجبها وقالت:

- أنا مش باهزر.. انت ما تعرفنيش عشان تهزر معايا.. أو تعمل كدا.
- وانا مش جاي اهزر برضه.. أنا زي ما قُلت لك جاي اعتذر لك وارجع لك
الBookmark عشان واضح إنها هدية.

أنا آسف مرة كمان.. ويومك جميل.. واتمنى تعجبك الرواية، وأقرن قوله
بقيامه، وابتسم وهو يدور ليغادر المكان، كما ظهر، كالحلم. ولكنها قالت
دون وعي حقيقي منها، ودون ترتيب، حيث فوجئت بجُمَلتها بعد أن نطقها:
- إيه دا؟! استنى.. رايح فين؟!!

فالتفت ليواجهها، وقال وقد رسم متعمداً ملامح الاستغراب الشديد على
وجهه:

- رايح فين؟!

- ا.. ا.. اقص.. اقصد هتمشي يعني؟

فضحك ولم يجِب، فتلعثمت أكثر في محاولة منها لشرح ما لا تفهمه هي من
الأساس، وحتى تتجنب الحرج الذي حاصرها:

- آه.. لا.. مش قصدي.. أنا بس.. وصممت لثوانٍ، حتى جاءها الفرج على
شكل فكرة، فقالت:

- أنا عاوزه اعرف بس فين رواية الطاعون بتاعتي؟

وكست الجدية ملامحها بعدما استعادت سيطرتها عليها.

* * *

مذكرات

٦

كنت أظن أن الألم هجرني بلا عودة..
حتى علمت أنها تكره زوجها.. وأنه يرفض تطليقها..
وأنه يملك من النفوذ ما يكفي، لجعل فكرة تحديده، مُرعبة كالموت.
وكان ألم عشقها بلا أمل لا يكفي.. حتى تصيبنى لعنة مشاهدة حياتي
تموت ببطء.

كنت أظن أن أسوأ لعنة يمكن أن تصيبنى، هي رؤيتها تتزوج من غيري..
حتى جاءت لعنة عجزى عن إنقاذها منه.
أفكر في الانتحار.. ولكنه جُبن وهروب..
ليس هروباً من مساعدتها.. وكأننى أملك فعل أى شىء..
لكنه هروبٌ من تحمّل الألم معاً..
يا ليتنى أستطيع تحمّله عنها.

* * *

تعبث نسمة صيفية خجولة بستارة غرفة مكتب أنيق، لترقص الستارة بدلال رقصة تكاد لا تُلاحظ، وتسمح بتسلُّ ضوء النهار البكر، الذي لم يكتمل ميلاده بعد.

صوت العصافير النشيطة، وهواء صيف العاصمة المنعش، يضيفان على المشهد جمالاً ساحراً لن يدوم، فبعد ساعات من الآن، ستزيج أبواق السيارات، ونداءات الباعة، وفِصال زبائنهم، أصوات العصافير التي ستصمت حنقاً على قُبْح سلوك بني آدم، وستملأ الأتربة والغبار والعوادم سماء القاهرة، لتُغطِّها بسحابة كثيية، لن تهدأ إلا بعد انتصاف الليل بساعات، لتتعم المدينة بسحر أخاذ، ولكنه كعادته، هَشّ، لن يصمد.

يقراً خمسيني الجريدة بصمت وجمود، وكأنه يُصلي. الجريدة أمامه على المكتب، لا يلمسها إلا ليقلب صفحة انتهى من قراءتها، أو لم يجد فيها ما يستحق القراءة.

يرتشف من فنجان قهوة إلى يمينه دون صوت، حتى عندما يُعيد الفنجان مكانه، يعيده بخفة وصمت، ويضعه في مكانه بالضبط في وسط الطبق، في نظام ودقة أقرب لدقة مَوْسوس منه لمنظم عادي.

المكتب كله يبدو أقرب لديكور بلاستيكي لمشهد سينمائي، منه لمكتب يستخدمه صاحبه بشكل يومي، فكل شيء في مكانه، بترتيب مَرَضِي، يشعرك

معتز شرباش

وكأن وجودك ذاته فوضى يجب التخلص منها، ليبقى المشهد بترتيبه الهوسي.

يقلب الرجل صفحة أخرى، ليُعكر، لثوانٍ، نقاء صمت الغرفة صوت الورق الخشن، ثم يرتب بيده الصفحة ويفردها جيِّداً، وكأنه يقوم بكَيِّ قميص فرحه.

ثم يعود الصمت ليملاً المكان، ويعود الرجل لارتشاف قهوته، كعادته، دون صوت، ويقراً في هدوء وثبات يليقان بممارسي اليوجا.

"العثور على جثة سيدة في شقتها"

بقلم: عماد المنسي

الشقة مغلقة من الداخل مما يُشير في الغالب إلى انتحار القتيلة

تصفح الرجل، بسرعة، تفاصيل الخبر الصغير، ولم يجد بينها ما يضيف على عنوان المقال ورأسه، فأغلق الجريدة، ثم أعادها بصبر إلى هيئتها التي ابتاعها عليها، وقام حاملاً إيّاها وفنجانه، وتحرك صوب باب المكتب، وما إن فتحه حتى تحركت ستارة المكتب خلف كُرسیه فجأة، وكأنها فزعت من تغيير ضغط الهواء داخل المكتب، ثم عادت لرقصتها الخجولة، وكأنها سعيدة برحيله، بعد مغادرته المكتب دون صوت كالشبح.

* * *

- قهوتك إيه يا باشمهندس؟ سأل وائل، وهو يُطفئ سيجارته، المهندس عادل، زوج السيدة التي، كما يبدو، انتحرت.
- مضبوط. ونظر حوله وكأنه يعاين مكتب الرائد، بوجه مُجهد، يُشير إلى عدم حصول صاحبه على قدر كافٍ من النوم مؤخرًا.
- البقاء لله يا باشمهندس.. أنا عارف المواقف دي الكلام فيها مالوش لازمة. أتمنى تكون نفسيًا أحسن عشان نخلص من الحكاية الغلسة دي بسرعة وترجع لحياتك الطبي.. ثم قطع كلمة "الطبيعية". فكيف سيعود لحياته الطبيعية بعد انتحار زوجته داخل غرفة نومه؟
- ابتسم الزوج بعد ملاحظة ارتباك الضابط، وقال وهو يفتح علبة سجائره:
- بعد إذنك سؤال.. هو أنا هاقدر استخدم الشقة عادي تاني إمتى؟
- أجاب وائل وهو يفتح مُفكرته على صفحة "الانتحار" ليتأكد من اسم الزوج:
- معلىش يااا عادل بيه.. محتاجينك تستحملنا شوية، النيابة حسب معلوماتي هتعاين الشقة النهاردا.. وهنستنى تقرير الطب الشرعي.. اللي المفروض يخلص النهاردا برضه.. وغالبًا القصة هتخلص في يومين ولا حاجة.. إلا لو في حاجة ظهرت.
- حاجة زي إيه؟ وعقد حاجبيه، وتوقف عن إشعال السيجارة.

معتز شرباش

- صمت وائل لثوانٍ، تابع خلالها ملامح الزوج بحثًا عن أي شيء غير طبيعي:
- ما اعرفش يا عادل بيه.. قل لي انت.. تفتكر ممكن يظهر إيه؟
- خيّم الصمت لثوانٍ على المكتب، كان الرائد خلالها في قمة الانتباه، ولاحظ ضيق صوت الزوج، الذي أزال السيجارة من بين شفتيه، وهو يقول:
- يا افندم أنا ما اعرفش حضرتك تقصد إيه أصلًا بحاجة ظهرت.. أنا اللي باسأل.
- ولا أنا اعرف يا باشمهندس.. هنستنى معاينة النيابة.. والطب الشرعي ونشوف.
- تمام.
- ترك محمود القهوة أمام الرائد وضيّفه، إن صح التعبير، وخرج، فقال وائل بودّ حتى يكسر الحدة التي ظهرت في أفق الحوار مُبكرًا:
- اتفضل. وأشار إلى القهوة.
- مدّ الزوج يده صوب فنجانَه، ودفعه قليلًا بعيدًا عن حافة الطاولة، ليؤكد للضابط ملاحظته وجود القهوة، ولكنه لن يبدأ في شربها بعد، ثم أشعل سيجارته وقال:
- سعادتك تُؤمّر بإيه؟ أنا تحت أمرك. ونظر إلى ساعته في إشارة واضحة.
- وضع الضابط فنجانَه، بعد أول رشفة، وقال بجديّة مُكتفياً بما سبق من ود وإضاعة وقت:

عُمر الشقي

- وانا في البيت بعد الحادثة على طول قُلت لي إنك مُهندس وبِتشتغل في الستاير. قال وهو ينظرُ إلى مُفكرته، ومَطَّ شفّتيه تساؤلاً.
رفع الزوج قهوته، وارتشف منها القليل، وعلت ملامحه لذة من أعجبه البُن، ولم يُجب.

فأدرك وائل أنه ينتظر سؤالاً مباشراً، فأعطاه ما أراد:

- ليه مهندس بيشتغل في الستاير؟ وتخصُّصك إيه في الهندسة؟ وبِتعمل إيه في الستاير؟ إيه طبيعة عملك بالتفصيل عشان ما فهمتش. والتقط فنجانه، وعيناه تتابع الزوج، كعيون صقر يتابع فريسة اختارها لتكون وجبة لصغاره، وينتظر منها خطأً واحداً لينقض عليها.

- أنا مهندس ميكانيكا.. شغل الهندسة له علاقة بكل حاجة.. أنا عملت مشروعِي الخاص.. تركيب أجهزة ستاير بالكهرباء.. وبالريموت. الستاير نفسها مش أنا اللي باعملها.. أنا متخصص في الجزء الميكانيكي من الأنظمة اللي بنركبها.

- بس انت صاحب المشروع. قال سؤاله في صيغة إقرار، وهو يخرج سيجارة من علبته.

- مضبوط. ونفخ سحابة دخان.

- احكي لي بقى.. من ساعة ما صحيت.. وكنت وفين وقت الحادثة وحصل إيه لحد ما جينالك البيت؟ الحكاية كلها بالتفصيل.. خد وقتك بس ما تنساش حاجة من فضلك. قالها الرائد وترك ولاعته أمامه، والتقط قهوته.

معتز شرباش

حكّ المهندس ظهر يده اليسرى بيُمناه، ثم ذقنه التي نبتت قليلاً عما كانت عليه عندما قابله وائل أول مرة، ثم أراح ظهره، وقال بعد زفرة خافتة:
- أنا صحيت الصبح ونزلت اشترى شوية حاجات وسبت ناهد في البيت نائمة.

- متعود على كدا؟

- ها؟ حيث لم يتوقع مُقاطعته، لم ينتبه للسؤال، فأعاده الضابط بصيغة أكثر وضوحًا:

- متعود تنزل وهي نائمة؟ ولا بتصحى تعمل لك فطار مثلاً؟

- لا لا متعود اقوم أنا انزل وهي نائمة.. ما فيش أولاد.. وهي بتصحى متأخر.
ثم صحح بجمود:

- قصدي كانت بتصحى متأخر.

- ليه ما فيش أولاد؟ وابتسم، لمعرفته أن السؤال شخصي أكثر من العادي، وفي الغالب لا ترتاح الناس عند استقبالهم مثل تلك الأسئلة، فحاول تلطيف السؤال لأقصى درجة ممكنة.

جال الزوج بملامحه في الغرفة لثوانٍ، وكأنه يبحث عن الإجابة حوله، ثم قال:

- ما فيش نصيب.

عُمر الشقي

- يعني ما فيش حد فيكم عنده ما يمنع.. بس ربنا مش كاتب.. فهمتك صح كدا؟ ولم يُلطف هذا السؤال، حتى يفهم الزوج أن الإجابات سابقة التحضير لن تُقبل.

- آه. ونظر إلى قهوته، ثم قال بخفوت:

- أنا عندي مشكلة تمنع الحمل.

توقف وائل عن كتابة شيء ما كان شرع في كتابته، ورفع عينيه صوب الزوج، الذي راوغ نظرتة، وشغل نفسه بإنهاء قهوته. ثم قال:

- تمام.. حضرتك نزلت والمدام كانت نائمة.. كالعادة. نزلت على إمتي كدا؟ ونظر إلى هاتفه الذي أعلن عن وصول رسالة نصيَّة، ولكنه لم يهتم بقراءة محتواها.

- الساعة تسعة ونص.

"دقيق جدًّا" فكّر الرائد، وكتب ملاحظة.

فأكمل الزوج:

- ااااا.. وقت الحادثة كنت في سيتي ستارز باشرب قهوة. لما ماھ... قاطعه وائل:

- كنت في سيتي ستارز في شغل؟ ولا فسحة؟

- لا لا كنت رايح اشترى حاجات.. واشرب قهوة. مش شغل.

- ما رُحُتِش الشغل يومها؟

- لأ.

معتز شرباش

- ليه؟

- يعني.. أنا شغلي بتاعي زي ما حضرتك عارف.. ومش لازم اروح كل يوم.. واليوم دا ما كانش عندي شغل.. كنت هاشتري الحاجة واشرب قهوتي وابقى اروح.. بس ماهر كلمني وانا هناك.. فرجعت ع البيت. وأطفأ سيجارته.

- كنت هتشتري الحاجة.. حاجة إيه؟

- نعم؟ سأل ذلك السؤال الذي يدفعك عقلك لسؤاله وكأنك لم تسمع سؤالاً سمعته بوضوح، حتى يعطي لنفسه - عقلك - الوقت ليفكر في الإجابة، فابتسم الضابط ولم يُكرر السؤال، وحثت عيناه بود وهو يسحب نفساً طويلاً من سيجارته، الزوج ليُجيب، فأجاب ليُثبت أنه سمع السؤال:

- لا أنا كنت نازل اتفرج، شوبينج يعني، هازاً رأسه وكأن ما قاله عادي للغاية، لا يحتاج توضيح، فهزّ الضابط رأسه متفهّماً، وهو يُطفئ سيجارته، وداعياً إياه إلى أن يُكمل، فامتثل:

- بس يا افندم.. رجعت ع البيت جري.. ودخلت البيت لاقيتها... وترك الجملة دون أن يُنهيها.

هزّ وائل رأسه، وصمت لثوانٍ، تابع خلالها ملامح الزوج الجامدة، ثم سأله:

- ماعلش يا باشمهندس.. افتكّر كويس.. لمّست جثة المدام لما وصلت؟
سامحني في السؤال. بس افتكّر كويس.

قال بملامح مُنهكة وخالية من أي تعبير:

- لأ.

عُمر الشقي

تابع وائل ملامحه، ثم سأل:

- طب ولما لقيتها؟

هَز الزوج رأسه مستفسراً عمّا يعنيه سؤال الرائد، الذي وضح:

- لما لاقيتها عملت إيه؟ بتقول ما لمستهاش.. عملت إيه؟

هَز الزوج رأسه، وقال كأنه يجيب سؤالاً لا حاجة له، لأن إجابته واضحة:

- رجعت الصلاة وطلبت من الجيران يتصلوا بالبوليس.

- بس؟!!

لاح الضيق على ملامح الزوج، وقال:

- آه بس. مش فاهم.. ماهو تسجيل الكاميرات مع حضرتك.. وبعدين بس

إيه؟ هو كان في إيه تاني يتعمل؟

اعتدل الرائد وبدأ يشعر بعدم أمان في صوت الزوج، فقرر استغلاله:

- تتأكد إنها لوحدها في الشقة مثلاً.

وقبل أن يُعقّب الزوج، الذي فتح فمه بالفعل ليفعل، أكمل الرائد وهو

يُريح ظهره ليُصِر كُرسيه وكأنه مقدّم برامج يقدم فقرة ينتظرها الجمهور:

- أنا باتخيل لو رجعت بيتي لقيت مراتي مضروبة بالنار.. أول حاجة هتيجي

في دماغي مين عمل كدا؟ مش يمكن حرامي دخل البيت وقتلها ولسًا

موجود؟

صمت الزوج لدقيقة، نظر خلالها بجمود إلى الضابط، شعر الضابط أن

الوقت توقف خلالها، حتى أنه لم يلاحظ رمشة عين واحدة على الزوج،

معتز شرباش

الذي بدت عليه رغبته في قول شيء ما ويكبحه، ثم قال بهدوء عانى لإضافته على صوته، ليُداري قسوة لاحظها وائل:

- ناهد كانت لوحدها في البيت يا حضرة الضابط.. ولأ.. ماجاش في دماغي أفتش البيت.. كل اللي جه في دماغي إن مراتي ماتت.

هاجمت لقطة من ذكريات الضابط وعيه دون استئذان منه، ولا استدعاء، كعادة الذكريات. لا يعلم تحديداً لماذا هاجمته تلك اللقطة تحديداً.

هل لأن نظرة الزوج كانت نفس نظرة الرجل الذي استدعتها ذاكرته؟ هل لأن نبرة صوته وهدوءها الواثق الممزوج بالقسوة، كانت نفس نبرة الرجل من ذاكرته؟ ولكن نبرة الرجل في ذاكرته حملت من السُخرية والاستخفاف القليل أيضاً، فهل حملت نبرة صوت الزوج الذي أمامه قدرًا أقل من السُخرية والاستخفاف، ولكن لم يلحظهما وعي الضابط، فتدخل لاوعيه ليكشف لوعيه ما غاب عنه؟

كانت الذكرى في الأقصر، كانت ليلة شتوية معتدلة البرودة، في إحدى نقاط التفتيش الشرطية الثابتة، أوقف أحد الأمناء سيارة سالم النجيدي بشكل اعتيادي، للتحقق من شخصيات مُستقلّهما، عندما لمَح النقيب وائل وجه سائق السيارة وتعرّف عليه، فذهب إليه في خطوات متحفزة، وقال:

- مساء الخير يا سالم بيه.. استأذنك تنزل من فضلك.

رفع الشاب الأسمر رأسه إلى الضابط، وقال باستخفاف:

- في حاجة يا حضرة النقيب؟

عُمر الشقي

- لا أبدًا.. اركن على جنب.. وانزل.. هنفتش العربية.
تبادل الشاب والضابط نظرات لثوان طالت، حتى قطعها النقيب بسؤاله:
- ولا في حاجة في العربية مش عاوزنا نلاقها؟
لم يُجب الشاب، وأبقى عينيه على الضابط، وكأنه يفتش داخله، فقال
وائل:
- يلا يا أستاذ.. اركن عشان الطريق، ثم قال لأحد الأمناء، بصوت عال:
- انفض العربية دي يا هادي.
تحرك الشاب بسيارته الفارهة، وصفّها إلى جوار الرصيف، ونزل منها وترك
الباب مفتوحًا، واتجه صوب الضابط، الذي استقبله بابتسامة باهتة قائلاً:
- رايح على فين كدا يا سالم بيه؟
- دا تحقيق بقى!!
أشعل النقيب سيجارته، وعينه معلقة على الشاب، وخرجت كلماته مع
سحابة دخان كثيفة:
- لا.. دي اسمها دردشة.. أصل هادي زي ما بيقولوا كدا "له نصيب من
اسمه".. هياخذ وقته في تفتيش العربية.. وانا ما يخلصنيش اسيبك تزهب
من الوقفة والبرد لوحدك.
- يعني من حقي ما جاوبش.
- ليه؟ خايف من حاجة؟ قالها الضابط بتحدي.

معتز شرباش

- ولا من حاجة ولا من حد يا وائل بيه تحسين، كانت إشارته واضحة، أني قُمت بواجبي المنزلي، وتقصّيت، وأعلم من أنت.

استقبل النقيب الرسالة، وزادته يقينًا أن هذا الشاب الذي أمامه غير بريء، وأنه على حق في اشتباهه فيه.

- وانا باحب الرجالة اللي ما بتخافش.

- ما تيجي معايا دُغري يا وائل بيه.

هز النقيب رأسه موافقًا، واطلق سحابة دخانية كبيرة، وقال:

- وما لُه؟ نيحي دُغري، كنت فين يوم ما مجاهد فرج اتقتل؟

كظم الشاب غيظه، وزفر بضيق، وقال بغضب مكتوم:

- انت بتحقق معايا في جريمة قتل يا حضرة الضابط؟

ابتسم وائل مستمتعًا باستفزاز الشاب، وأجاب مُهاجمًا بسؤال:

- مش شايفها غريبة شوية؟ أكثر راجل انت بتكرهه في البلد يتقتل ويتسرق

على إيد واحد انت برضه لسًا مهدده من شهر ونص بالقتل قصاد ييجي ٤٠

نفر على قهوة سهراية؟

صمت سالم لدقيقة، نظر خلالها بجمود إلى الضابط، شعر الضابط أن

الوقت توقف خلالها، حتى أنه لم يلاحظ رمشة عين واحدة على الشاب،

الذي بدت عليه رغبته في قول شيء ما ويكبحه، ثم قال بهدوء عانى لإضافته

على صوته، ليُواري قسوة لاحظها وائل:

عُمر الشقي

- اللي بتقوله دا يا وائل بيه كلام فاضي.. وانت عارف كويس إني كنت برّاً البلد الليلة دي.. وسألتني قبل كدا قبل ما اللي مشغلينك يقفلوا التحقيق. لو عندك حاجة ضدي قدمها لهم.. وتبقى شاطر لو عرفت تفتح التحقيق تاني.. بعد ما اتقفل في وشك.. بس لعب العيال دا مش بتاعي.. وما بافهمش فيه.

استفزه هدوء الشاب الذي استعاده، فقال:

- ورحمة أبويا يا سالم ما هتفلت مني لو كنت عملتها.

صاح سالم بغضب:

- الزم حدودك. أنا اسمي سالم بيه.

- ما لك خايف ليه؟

قال سالم بصوت عالٍ حتى يسمعه كل من في النقطة الأمنية وهو يدور ليعود إلى سيارته:

- لا دا كتير.. أنا غلطان اني واقف باتكلم معاك.. أنا هيكون ليّ كلام تاني مع المحافظ.. دا انت شكلك نسيت نفسك.. ونسيت انت بتكلم مين.

ولكن وائل ألقى سيارته بغضب، وانطلق صوب سالم، وجذبه من ذراعه بقوة ليدور جسد الشاب، فأمسكه الضابط من قميصه بقبضتيه، ودفع ظهره إلى جانب سيارته، ليصطدم بها بقوة، ثم ضغط بمرفقه على رقبه الشاب وقال وهو ينظر إلى عينيه مباشرة بقسوة:

معتز شرباش

- اوعى انت تنسى نفسك، أنا مش عيل بياكل عيش من ورا أبوك.. وب يخاف منه.

جحظت عيون الشاب، وحاول تخليص رقبته من مرفق الضابط، الذي قال بصوت لا رحمة فيه:

- رقبتك وجعاك؟ كويس.. تمرين عشان حبل المشنقة.

قطعت دقتان سريعتان على باب المكتب هجوم الذكرى الكاسح الذي فصل الرائد عن واقعه لدقيقة، فالتفت إلى القادم، النقيب شريف، الذي حيًا الزوج، ثم نظر إلى وائل وأشار إلى هاتف الأخير، وقال:

- بعثلك حاجة مهمة.. بُص عليها.

نظر وائل إلى هاتفه، وقال:

- حاضر.. هاخلص هنا واشوفها.

- ضروري بس، وأكمل وهو يغادر:

- وكلمني اجيلك.

عاد الرائد بنظره إلى المهندس عادل، وقد بدأ يدرك أن لاوعيه يحاول أن يلفت نظره إلى شيء ما، فانتبه، وقال:

- لا مؤاخذة يا باشمهندس.. نرجع لكلامنا.. يعني سعادتك كنت لوحدك في

سيتي ستارز؟

- أه.. لوحدتي.

عُمر الشقي

- طب أنا هاحتاج منك الوقت اللي.. اسمه إيه جار سعادتك كلمك فيه.
وأمسك قلمه ليكتب.

- كان في حدود الس... فقاطعه الرائد:

- لا لا معلىش.. من على تليفونك.. شوف لي الوقت بالضبط.. من المكالمة
الواردة.

احتاج الزوج لبعض الثواني ليستوعب طلب الرائد، ثم أخرج هاتفه، وبحث
عن الاتصال، حتى وجده فقال:

- الساعة ١١:٤٩ دقيقة.

- تمام. كتب الرائد التوقيت، ثم ابتسم لعادل، وقال:

- كدا سعادتك تستنى مننا تليفون بعد تقرير الطب الشرعي ما يوصل..
ونشوف ساعتها هنمشي في القصة ازاى، وانتظر رد فعل الزوج، الذي قام
بدون أن يقدمه، وسلّم على الرائد بفتور، وغادر.

نادى وائل على راضي، عندما فتح الزوج باب المكتب ليغادر:

- انده لي شريف بيه يا راضي، ثم أشعل سيجارة والتقط هاتفه ليرى ما
وصفه شريف بالضروري.

دخل الساحر منزله حاملاً خوذته التي لا يقود دراجته البخارية بدونها، أضاء النور لتظهر صالة واسعة جدًا، وكأن المقاول قد نسي بناء الحوائط التي تصل تلك الأعمدة ببعضها البعض. إلى يمينه سفرة زجاجية سوداء اللون عصرية الطراز، وإلى يساره غرفة بها كنبه طويلة مُقسّمة تدور حول الغرفة من جهتين تكفي لعدة أشخاص، وفي مواجهة باب الشقة يوجد جهاز للجري، ومكتب كبير عليه كمبيوتر حديث جدًا ومعه كل ما يحتاج إليه أي مدمن تكنولوجيا يحترم نفسه، وجهاز بيانو إلكتروني، ومعلق خلفه على الحائط جيتار "ياماها" مصنوع من الخشب داكن اللون، وإلى اليسار علّقت على الحائط مكتبة كبيرة تحمل الكثير من الروايات، العربية والمترجمة.

علّق مفاتيحه على حامل المفاتيح الصغير المُعلق بجوار باب الشقة، وترك خوذته على ذراع يبدو وكأنه قد تم تثبيته بجوار حامل المفاتيح خصيصًا لهذا الغرض، ثم تحرك باتجاه جهاز الكمبيوتر، وترك حقيبة ظهره السوداء، التي لا يغادر المنزل بدونها أيضًا، على كرسي المكتب، وضغط على الأزرار عشوائيًا لتُضيء الشاشة ويظهر أمامه طلب كلمة المرور، فكتبها، ثم ضغط زر تشغيل الأغاني لينطلق صوت هادئ ليملاً كل الشقة بسبب السماعات التي قام بتوزيعها على كل غرفها. صوت صولو قانون مصحوبًا

عُمر الشقي

بخلفية من الدفوف؛ وقف الشاب مُغمضاً عينه لثوانٍ وترك الموسيقى تتخلله، حتى انطلق صوت محمد مُنير يُغني:

أيديا في جيوبي وقلبي طرب..

بقي لثوانٍ ساكنًا يستمع فيها لصوت منير وكأنه بوذي يقوم بالتأمل في معبدهم بالنيبال، ثم ابتسم عندما تذكر كيف سار لقاءه الأول مع مريم. كان يتذكر التفاصيل وكأنه يراها تحدث أمامه. كانت تلك لعنته التي تعود عليها؛ وهي ذاكرته غير القابلة للنسيان، لا يعلم تحديدًا هل هو يمتلك ما يُسمى بالذاكرة التخيلية، أو الذاكرة فائقة الدقة، حيث كان يتذكر أدق التفاصيل الذي مرّت أمامه دون عناء، ولا ينسى كسائر البشر، وكان يتعجب في صغره من زملائه عندما كان يذكرهم بما درسوه، ولا يتذكرون.

وعندما شبّ وأصبح يدرك تميّزه، حاول أن يحدد سبب حالته، ولكنه لم يتأكد بعد قراءته للعديد من المقالات على شبكة الإنترنت، كانت هناك حالة تُسمى "الذاكرة التخيلية" أو "الذاكرة فائقة الدقة". وأشهر من كان يفترض أنهم يمتلكون تلك الذاكرة هم؛ ستيڤين ويلتشر، الذي استطاع أن يرسم آفاق مدينة كاملة لم يزرها قط، بعد جولة سريعة بطائرة هليكوبتر فوقها. وهناك أيضًا من ارتبطت أسماؤهم بالذاكرة فائقة الدقة مثل العالم الفيزيائي نيكولا تسلا، والملحن سيرجي رحمانينوف، ولكن تلك الحالة يصعب رصدها بدقة والتأكد منها، ويصعب التأكد من أن تلك الحالة هي بالفعل حالة وراثية، ولد بها صاحبها، أم أنها مهارة تم صقلها بالتدريب.

معتز شرباش

وهناك أيضًا حالة مرضية تُسمى "هايبرثيميسيا" "Hyperthymesia" وهي مؤكدة وقابلة للرصد، ولكنها نادرة جدًا. وأعراضها هي أن المريض لا ينسى على الإطلاق، وهي غالبًا ما تصيب المريض بها بالاكْتئاب، والتوتر، لأنه يرى كل ذكرياته وكأنها تحدث أمامه، فلا ينسى، ولا يتخطى أي شيء.

فالنسيان قد يبدو ضعفًا وابتلاءً، ولكنه من نعم الله على الإنسان بكل تأكيد. وهذا ما يؤكد مرضى الـ"هايبرثيميسيا".

كان يعتبر نفسه ممن رزقوا بالذاكرة فائقة الدقة، لأنه ينسى أحيانًا، أو قد يكون قد طوّر قدرة حجب بعض الذكريات المؤلمة، ولكنه اعتبر نفسه ينسى.

سارح في غربة بس مش مغترب..

أنزل منظاره المقرب، وتركه إلى جوار شاشة الكمبيوتر، بعدما لاحظ عدم عودة مريم بعد من "الكافيه" حيث تركها، وتذكر...

- لا طبعًا رواية الطاعون مش هترجع لك.

- ليه بقى إن شاء الله؟ قالت بغضب مصطنع وسعادة حقيقية، عندما عاد وأجلّ المغادرة، فقال مبتسمًا وهو لا يزال واقفًا:

- هو انت ليك أكل ولا بحلقة؟ عاوزة رواية تستمتعي بيها؟ قصادك أهه.

التانية دي عقاب مش متعة.

أسندت ظهرها وعقدت ذراعها أمامها، وقالت بتحدٍ واضح:

- ولو ما عجبتنيش؟

عُمر الشقي

- فابتسم وقد أعجبه سؤالها، فأجاب:
- هارِجَع لك الطاعون.. ومعاها اعتذار رسمي.
- ماشي.
- طب ولو عجبتك؟
- هاه؟ راوغت سؤاله.
- ولو عجبتك باقول؟
- اممممم لأ ما اعرفش.
- تعزميني على الغدا.
- ابتسمت، ولم ترد، فأكمل:
- اتفقنا.. أسيبك بقى تكملني قراية، ثم نظر إلى الرواية التي أمامها وقال كأنه يترك وصيته:
- شدّ حيلك معايا يا أديب.. أنا معتمد عليك.
- ضحكت بصدق، فابتسم، فتلك كانت أول مرة يسمع ضحكتها، وتمنّى ألا تكون الأخيرة.
- رفع يده بتحيه سريعة، ودار ليرحل، فقالت:
- استنى !! انت يا ابني مربوط بأستيك ما بتصدق تفلت؟
- ضحك وهو يعود إليها، وقال:
- وبعدين معاك؟ الناس كدا هيقولوا بتعاكسيني.
- دا على أساس إن انت اللي قاعد وانا اللي جيت لك؟

معتز شرباش

- ما تدخلينيش في تفاصيل.

- طب انت هتعرف مينين إني خلّصت الرواية؟ عشان الرهان يعني. وكست حمرة الخجل ملامحها، فزادتها جمالاً، فتأخر رده، فأصابها المزيد من الخجل، حتى قال بصوت رقيق:

- ما تقلقيش.. أنا هاعرف، وغمز لها بعينه اليمنى، فابتسمت، وقالت:

- ماشي.. هنشوف.

دار ليغادر، ففتحت شفيتها لتقول شيئاً، ولكنها منعت نفسها، فعاد هو وكأنه رآها، وقال:

- نعم؟!!!

اتسعت عيناها العسليتان، وقالت بذهول:

- إيه دا؟! انت عرفت مينين إني كنت عاوزة انده لك؟

ضحك وهو يقول:

- لا أنا ما كنتش اعرف.. بس عرفت منك حالاً.. أنا توقعت.. عشان كل مرة

امشي وتندهي لي.. فقولت آجي قبل ما تندهي المرة دي.

لم تستطع أن تمنع نفسها من الابتسام، وقد اكتسى وجهها كاملاً بجمرة الخجل، ولكنه لم يتحرك ولم يرفع عينه عنها، فتحكّمت في نبرة صوتها قدر استطاعتها، وسألت:

- طب أنا ما عرفتش اسمك.

وحدي لكن ونسان وماشي كدا..

أعاده محمد مُنير لشقته، بصوته الساحر، فجلس الشاب أمام جهاز الكمبيوتر، والابتسامة تُزيّن وجهه، وبدأ في تصفّح بريده الإلكتروني، لم يجد ما يستحق الاهتمام، ففتح صفحة الإنترنت، لیتصفح مواقع الأخبار، والfacebook، وTwitter. فوجد مقالة لفتت نظره، فشرع يقرأ.

بیتعد؟ ما اعرفش أو بقترب..

صفحة "الشرطة والشعب في خدمة النظام" على facebook..

مقالة بعنوان: **لمن يهّم الأمر**،

أطلت علينا منذ أيام مقالة لشاب يخطو خطواته الأولى في عالم الصحافة الاستقصائية، كانت تكشف عن حادثة غريبة حدثت في أحد أقسام الشرطة، التي انتشرت في كل الأحياء بهدف تحقيق أمن، لم يتحقق.

وبعد خروجها بساعات، خرج اعتذار الشاب عن مقالته، مؤكداً ما كنا نعلمه جميعاً جيداً؛ وهو أنه لا يمكن في دولة بلا قانون أن تطلب حقا.

من يختلف على أن من حق الجميع أن يعلم الحقيقة؟ من يختلف على أن من حق الصحفي أن يمارس عمله؟

لو سألت أي شخص، وزير داخلية كان، أو بائع في مشتل، أو سائق نقل ثقيل، سيجيبك الجميع بالإجابة النموذجية؛ "الشفافية"، ولكن تلك الإجابات المُعدة مسبقاً، لا تعدو كونها شعارات محفوظة، يستخدمها الجميع لأغراض مختلفة، ولكن هل يسعى من في موقع المسؤولية إلى تحقيق الشفافية حقاً؟ الإجابة "لا".

معتز شرباش

أهدي هذه المعلومة لسيادة الـ"باشا" الذي فكّر واخترع فكرة الإعلان عن أن ما حدث داخل قسم الشرطة المذكور، في مقالة الشاب، كان مجرد إجراء تدريبي جديد، تبنته وزارتنا المهيبة بهدف الارتقاء بقدرة أفرادها، عن طريق اختبارهم في مواقعهم أثناء تأدية أعمالهم، دون سابق إنذار، للوقوف على نقاط الضعف، ونقاط القوة إن وجدت.

وبالطبع نقاط القوة ستصبح عصية على الإيجاد، حيث أن أدوات الضرب، والربط، والتعذيب، والتنكيل، لن تكون متوفرة للأفراد محل الاختبار المفاجئ.

فكيف إذاً سننتظر النتائج ممن تعود على استخدام أدوات، حُرّم منها عند الاختبار؟

هذه المعلومة مؤكدة من أحد مصادرنا الكثيرة، والذي، بالطبع، ولأسباب واضحة، لن نُعلن عن اسمه.

المعلومة مفادها أن ما حدث داخل القسم كان بهدف الوصول إلى معلومات خاصة، موجودة فقط على أجهزة كمبيوتر البحث الجنائي، التي يوجد منها واحد داخل كل قسم، لا يوجد لدينا في الوقت الحالي، أي معلومة تُشير إلى نوع المعلومات التي سعى من قام بالعملية خلفها، ولا نعلم هل نجح في مسعاه، أم نجح أفراد القسم في ردعه.

ولكننا نعلم أن ما حدث داخل القسم لم يكن إجراءً تدريبيًا، ولكنه كان هجومًا منظمًا، وغير متوقع.

ونعلم أن الداخلية لا تعلم من قام بهذه العملية ولم تلق القبض على أحدهم، ولن تستطيع أن تقوم بما تجيده من تليفق التهم لأحدهم، لإغلاق الملف، لأنها أعلنت بالفعل أن ما حدث لا شبهة جنائية فيه، وإن كانت تستطيع أن تخطف من تشبهه في قيامه بالاقتحام، دون تهم، ودون قضية، بالطبع.

فالمواطن العادي في نظر هؤلاء، مجرد حشرة.

أود في نهاية مقالي أن ألفت نظر ديناصورات وزارتنا الداخلية، إلى أن الانقراض قد طال فصيلتهم، ولم يَطُل الحشرات، التي تعتقد هذه العمالقة أنها يُمكنها سحقها تحت خطواتها، فمن يبقى؛ هو من يستطيع التكيف مع مُحيطه.

وفي عصر الإنترنت، لن يبقى من لا يزال يستخدم سياسة "النوم في العسل".
الحقيقة دائماً تجد الطريق إلى العقول، ولو بعد حين، وفي عصر الإنترنت، لا يطول هذا الـ "حين".

نلتقي وإياكم في جولات أخرى.

بقلم: حشرة.

لمتابعة القصة من البداية:

- رابط مقال "النوم في العسل؛ أقدام حيلة في كتاب الداخلية" بقلم عماد المنسي

- رابط مقال "اعتذار واجب" بقلم عماد المنسي

معتز شرباش

ألقى الرائد وائل هاتفه المحمول، بعد انتهائه من قراءة المقال، أمامه على المكتب، وقام منتفضاً، ليصرخ كُرسيه اعتراضاً، واندفع صوب باب غرفة مكتبه المُغلق، ولكن النقيب شريف قام واستوقفه قائلاً:

- في إيه بس؟! رايح فين كدا؟!!!

صرخ قائلاً:

- هاشوف ابن كلب مين سرّب المعلومة دي.. دا موضوع خطير يا شريف.

وضع النقيب يده على كتفه، وأشار صوب كُرسيه، وقال مُهدّئاً:

- طب ممكن تقعد.. انت عارف الأمور مش بتتاخذ كدا. واحدة واحدة بس عشان نعرف نفكر.

حاول الرائد التحكّم في سرعة أنفاسه، ولكنه عجز، وقال وهو يعود إلى كُرسيه، فالنقيب شريف عنده حق:

- احنا كدا رسمي لابسين طُرح يا شريف، وضرب بيده سطح مكتبه بقوة، وأكمل:

- هي ناقصة؟ واحد يدخل يقلّبنا في القسم.. وما نعرفش نحافظ على محتجز عندنا.. وأخرتها مش عارفين نحافظ على معلومة في تحقيق بالخطورة دي؟ انت فاهم كلام زي دا هيعمل إيه في صورتنا في الوزارة؟ وتحقيق.. وليه ما قُلتش؟ وازاي؟ وفين؟

زفر شريف بضيق، وسأل مُحاولاً إعمال العقل في الحوار، وتهدئة الرائد عن طريق جرّه لنقاش منطقي:

عُمر الشقي

- طيب واحدة واحدة بس.. واهدا عشان نعرف نفكّر. هو كريم من المعلومات رد عليك؟ ولا لَسَّا؟

- لَسَّا يا شريف.. بس أنا دالوقت في المصيبة.. قاطعه شريف بإشارة من يده، أن اصبر، وقال:

- ما هو دا أساس المصيبة. ثم اعتدل ليميل صوب مكتب الرائد وكأنه يُدلي بسرّ حربي، وقال:

- لازم أول حاجة نتأكد من شكوكك.. لأن لو شكوكك طلعت غلط.. ودا اللي هيحصل إن شاء الله.. هيبقى اللي انت قرّيته دا مجرد خبر كاذب.. ومعلومة ما لهاش أي علاقة بالواقع.. بس لو طلعت شكوكك صح.. والواد دا فعلاً كان جاي عشان جهاز البحث.. يبقى احنا في مُشكلة.. وللازم نعرف مين "حشرة" دا.

خيّم الصمت لثوانٍ على مكتب الرائد الذي يغلي بداخله بركان غاضب، حتى قال شريف:

- كَلّم كريم.. كَلّمه حالاً.. دي أول معلومة محتاجينها حالاً.

معتز شرباش

- ألو.. أيوة يا سمسّم.. المقالة مكسّرة facebook. قالها الصحفي عماد بسعادة بالغة، عبر الهاتف.

- أي خدمة يا "حشرة".. ما لقيتش اسم غير كدا تنزل بيه؟ جتك القرف في شكلك، وضحكت.

- بدمتك مش القفلة صايعة؟ حته انقراض الديناصورات.. وبقاء الحشرات دي مش أي حد يجيها.

- بصراحة المقالة أستاذة.. وتحسها مطرقة زي كفوف شكوكو.. بس المهم ربنا يستر نصحي ما نلاقيكش. وضحكت بمرح.

- وانا حد يعرفني؟ هتخوّفيني ليه؟ بتوجّس.

- يا ابني اجمد امال.. انت بس امسح الرسالة اللي بعّتي فيها المقالة احتياطي، تلاعبت بأعصابه.

- يخرب بيت كدا.. هما مراقبين facebook؟ طب وهاعمل إيه ل... قاطعته:

- يا ابني ما تجمد بلاش هبل.. هما مش مراقبين ٩٠ مليون.. في ناس بعينها بتراقب.. انت بالكثير حشرة يراقبوك بتاع إيه.. أنا باقول احتياطي.

- طب وصفحة "الشرطة والشعب في خدمة النظام" ما حدش من اللي ماسكينها يقول؟

- يقول إيه يا عبيط؟ ولا أصلاً حد يعرف مين اللي ماسكها؟ العيال دي كبيرة يا عماد.. ومش جوا مصر.. والمقالة اتبعتت لهم من ناس ثقة، لو مش

عُمر الشقي

ناس ثقة وضامنينها ماكانوش نزلوها، ما تقلقش كدا.. احنا مش بنلعب، بس
برافو عليك وتسلم إيدك. طمأنته حتى يهدأ، ونجحت.

- اااا.. طب باقول لك إيه.

- ها؟

- ما تيجي النهاردا نحتفل بالقفا الأول لشكوكو.

ابتسمت، ووصلت ابتسامتها إلى عماد كزفرة سريعة، وقالت:

- ماشي.. هاخلص مشواري واكلمك. سلام.

* *

معتز شرباش

قطع رنين هاتف هيثم المحمول، مباراة كرة القدم التي يلعبها على جهاز الكمبيوتر، ضد اللعبة، والتي كان مستمتعاً بها لأقصى درجة، ليُجيب بضيق:

- أيوة.

- بعثلك Link.. عاوز اعرف مين "حشرة" دا حالاً.

- حشرة؟! تساءل هيثم بحيرة.

- انت شارب يا هيثم؟

- وانا من إمتي فايق؟ بس دا ماله ومال شغلي؟ أنا مش باعرف اشتغل وانا فايق.

- طب افتح الLink وانت تفهم. قال بضيق، ثم أگد:

- حالاً يا هيثم.

عُمر الشقي

- مع السلامة يا كريم.

قالها وائل وترك هاتفه أمامه، ثم رفع رأسه إلى معاونه، وقال وهو يضغط زر استدعاء راضي:

- تشرب قهوة؟

أوماً شريف موافقاً، عندما دلف راضي إلى المكتب، ورفع يده بتحيةة سريعة، ليقول وائل:

- اتنين قهوة من البُن بتاعي.. وقول لمحمود يعملها بمية ساعة.. ويقلبها كام مرة وهي ع النار.. ما يكسّش.

أخرج سيجارة من علبته، وأشعلها، وقال مُرتاحاً بعد مغادرة راضي:

- السيناريو بتاعي طلع فشتك.

- الحمد لله.. بس كريم اتأكد ازاي؟ أنا ما فهمتش منك حاجة وانا سامعك بتكلمه.

اعتدل وائل، ليصّر كُرسیه، كالعادة، وقال مُفسِراً:

- بُص يا سيدي.. كريم قالي قصة التسلل بتاعة الكمبيوتر دي لو حصلت..

فهيّ لها هدف، وطبعاً الهدف مش الكشف على مُسجل.. لأنه ممكن يعمل

فيش، وما فيش مُسجل عليه أحكام هيعمل كل الفيلم دا عشان يكشف على

ملفه الجنائي، يبقى إيه الهدف اللي باقي؟

نفث شريف دخان سيجارته، وانتظر، ليكمل الرائد:

معتز شرباش

- وحدة البيانات المركزية.. اللي أجهزة البحث كلها متوصلة بيها.. عن طريق شبكة مغلقة، الشبكة دي هي الهدف.. ومستحيل الوصول لها إلا عن طريق واحد من أجهزة البحث اللي متوصلة مباشرة بالشبكة دي.
- تمام.

انتظر وائل حتى غادر محمود المكتب، بعد وضعه فنجان قهوة كل من الضابطين أمامه، ليُكمل:

- وهو راجع عنده واتأكد إن ما فيش أي اتصال حصل بين جهازي هنا.. والوحدة المركزية من يوم الاقتحام.. لحد دالوقت.
رشف شريف من قهوته، وأعاد الفنجان إلى مكانه، وسأل:

- وهو متأكد من دا؟

- مليون في المية. ثم أكمل:

- ودا معناه إن بنسبة تسعة وتسعين في المية.. أنا تفسيري كان غلط، لأن اللي جه دا لا يمكن زي ما قولت يكون عمل كل دا عشان يكشف على مُسجل.

- طب الحمد لله.. كدا يبقى موضوع صفحة الـ facebook فشك.. وكلام فارغ.

أراح الرائد ظهره، وقال وكأنه يُحدث نفسه:

- بس دا مش معناه إني مقتنع بقصة إنه جه عشان ينصب على رامز.. الواد دا وراه حاجة.. أنا متأكد.

عُمر الشقي

ابتسم شريف وهو يُطفئ سيجارته، وقال:

- يا عم وائل.. صدقني ساعات الحاجة بتكون زي ما هي من غير أبعاد
مستخبية.

تنهد وائل ومدّ يده ليلتقط السيجارة، ليكتشف أنه نسيها، وأنها احترقت
بالكامل، فأخرج غيرها، وهو يقول:

- لا لا يا شريف.. الواد دا وراه قصة.. وانا مش هارتاح إلا لما اعرف كان
جاي ليه.. وهو مين.

* *

معتز شرباش

- "عُمر"

- عُمر؟! -

أجابت مريم وهي تضحك:

- آه عُمر.

أسندت جينا ذقنها على قبضتها، وقال بهيام متهدئة:

- طب وبعدين؟

- ولا قبلين.. مِشي.

اتسعت عينا جينا على آخرهما، وقالت مستنكرة:

- إيه اللي مِشي؟ وفين موبايله؟

قامت مريم، ووضعت الرواية على مكتبها، وهي تقول:

- بس بلاش هبل.. أنا هاقول له هات موبايلك يعني؟ وبعدين بلاش كدا.. انتِ

عارفة رأيي في الموضوع دا.

- انتِ مش وش نعمة.. ليه يارب تبعت المُر للي ما عندهاش قلب دي؟

ونظرت إلى سقف الغرفة بملامح ممتعضة، فضحكت مريم.

دقت والدة مريم على باب الغرفة، دقتين خفيفتين، وقالت بصوت عبّر

الباب:

- الأكل يا بنات.

انتهى عُمر من غسل الصحون، التي استخدمها في غدائه، وجفف يديه، ثم خرج إلى صالة شقته، وهو يستمع إلى صوت موسيقى عُمر خيرت، التي تملأ الشقة بخفوت يليق بها، وكأنها همسٌ ساحرٍ. أزاح ستارة الواجهة، ونظر عبر الزجاج صوب شرفة غرفة نوم مريم، ليجد أضواءها مطفأة، وباب الشرفة وشباكها مغلقان، عاد إلى كنبته الطويلة، في غرفة المعيشة، وفتح التلفزيون، وجلس أمامه يتابع، بوعي غائب، فيلمًا أجنبيًا، شاهده أكثر من مرة.

تبدو على ملامحه علامات التفكير العميق، يبدو وأن وعيه يتعرّض لهجوم قوي، من التوتر والتساؤلات، التي لا إجابة عنده لها. لم ترحم التساؤلات وعلامات الاستفهام وعيه، فقرر أن ينفضها بأفضل وسيلة ممكنة؛ الجري، حيث اعتاد، أن يمارس الجري كلما شعر بالتوتر، أو أراد أن يُطفئ عقله مؤقتًا، فكل جهاز يحتاج للراحة والعقل جهاز في النهاية. قام وأطفأ التلفزيون، وأطفأ النور، واتجه صوب الكمبيوتر، رفع مستوى صوت الموسيقى إلى ما بعد المنتصف بقليل، ثم تحرك صوب جهاز الجري، على ضوء شاشة الكمبيوتر، وضبطه على سرعة عالية، وشرع في الجري. راح وعيه يغيب تدريجيًا، مع الإرتفاع التدريجي لسرعة الجهاز أسفله.

مذكرات

٧

قتلها.. وأفلت من العقاب.. يقولون قتلت نفسها.. انتحرت.
عندما يصدر أحدهم حكماً بإعدام بريء، ويقوم عشاوي بتنفيذه.
هل يصح اتهام عشاوي بالقتل؟
ماذا لو قام البريء بنفسه بلطف جبل المشنقة حول رقبتة؟ هل يُسمى
هذا انتحراً؟
هو من أصدر حكمه بإعدامها.. هي فقط نفذته..
هي فقط اكتفت من الشعور بالألم.. وهل هذا ذنب؟
قتلها ألف مرة.. ولم يُتهم بالقتل؛ فقط، لأنه تركها، بعد كل مرة،
تتنفس.
وهل كل من يتنفس على قيد الحياة؟
كيف استطاع أن يُطفيئ فيها رغبتها في الحياة.. وهي الحياة؟

عُمر الشقي

لم يكتفِ بلعنة بقائها على ذمته، واغتصب كل شيء فيها..

حتى قتل الحياة فيها..

وكيف تحيا هي بلا حياة؟

ما زالت هي في نظري، برغم اغتيالها، الحياة..

ماتت حياتي.. ولكنني، لا زلت، للأسف، باقٍ.

* * *

معتز شرباش

انتبه إلى العلامات.

استقبل هاتف وائل رسالة من خطيبته مَي، فتح الرسالة وقرأ

محتواها:

"لا يا وائل مش هاسامحك المرة دي.. يا وائل دانت كنت لسا بتصالحني بسبب غلطة وما خلصتتش.. تقوم تغلطها تاني؟ أنا بدأت اقتنع إنك مش هتبقى زوج كويس.. دي المفروض أجمل أيام عمرنا.. أمال الوحشة هتبقى ازاي؟ دي إشارات من ربنا.. واللي بيهمل الإشارات دي بيبقى غبي وبيخسر"

ترك وائل هاتفه على المكتب أمامه، وتمهد بضيق، ثم وضع يده على وجهه ومال إلى الخلف بكرسيه، الذي واساه بصرير بدا حزينًا ومتعاطفًا.

كان يعلم أنه مُقَصِّرٌ في حق خطيبته، ولكنه ليس دائم التقصير، كان يُقَصِّرُ فقط عندما تحتاج إحدى قضاياها وقتًا ومجهودًا وتركيزًا أكثر من الطبيعي. كان يتمنى منها أن تتفهم هذا، وتحترمه، وتقدره، إنه يحبها، وهي تعلم هذا، فلماذا لا تستطيع تقبل هذا العيب؟

مَن مِنَ النَّاسِ بِلَا عِيُوبٍ؟

وعيبه أنه يهتم بعمله ويراعيه، أحيانًا بشكل مبالغ فيه. هل يصح تصنيف هذا كعيب من الأساس؟

ولكنه أيضًا يعلم أن خطيبته امرأة، وأن المرأة تحتاج إلى أن تشعر بالأمان، وتحتاج إلى أن تكون واثقة من أن وقت احتياجها لرجلها لن يمر بدونه إلى

معتز شرباش

جوارها، وهو يعلم هذا وينوي القيام به، ولكن كيف ستكون هي واثقة من شيء وهي ترى عكسه؟ وكيف يدعي هو أنه سيقوم بشيء يفشل في كل مرة يحاول القيام به؟

تشعر مَي بأهمية عمله، فلا يصح أن تشعر بأنها أقل أهمية عند وائل منه، وإن تمكّن منها هذا الشعور، فهذا لأنه قَصَّر في طمأنتها، ودوره وواجبه أن يثبت لها العكس.

ففي العلاقات، لا يهم ما تشعر به بداخلك، ولكن ما تستطيع أن تُعبّر عنه، وتثبته، في شكل أفعال ومواقف.

اعتدل بكرسيه، الذي صرَّ مُشجَّعًا، وأمسك هاتفه وكتب:

"أنا ما اعرفش انتِ عملتِ إيه في حياتك تستاهلي عليه العقاب.. بس اللي اعرفه إن أنا عقابك.. ما هو لما واحدة زيك تحب واحد زيي يبقى أكيد تخليص ذنوب.. والله العظيم باحبك.. ووالله العظيم مقصّر معاك.. ووالله العظيم عارف عيبي.. بس والله والله والله انتِ أغلى عندي بكثير من أي حاجة في الدنيا.. أنا بس ساعات بتروح مني.. وما حدش ما بيغلطش.. وليك حق تزعلي.. بس اوعي تقولي كلام معناه إنك بتفكري تبعدي.. ما فيش الكلام دا.. هاعتذر وهاعتدل وهاعمل اللي اقدر عليه عشان آخذ بالي بعد كدا.. بس سامحيني"

أرسل الرسالة وترك الهاتف على المكتب، وبقيت عيناه معلقتان به، في انتظار الرد.

عُمر الشقي

بعد دقيقة من الصمت والترقب، دلف شريف معاونه مندفعًا إلى مكتبه، لينتزع من شروده وانتظاره بقسوة، وقال وهو يناوله ملفًا جاء به إليه:
- تقرير الطب الشرعي.

التقط وائل الملف شاردًا، ونصف وعيه لا يزال في انتظار رد حبيبته، وسأل
بشروود:

- فيه حاجة غريبة؟

- ما قريتوش.. أصل أنا عندي مشوار ومستعجل.. هامشي أنا ولو في حاجة
كلمني، قال وهو لا يزال واقفًا في منتصف الغرفة، مشدودًا كالوتر.
- ماشي خلاص.. توكل على الله.

غادر شريف، وهزّ وائل هاتفه، وكأنه يتأكد من أن هاتفه ما يزال صالحًا
للعمل، وكأن هزّه إياه سيُعجّل بوصول الرد الذي ينتظره.

زفر وائل بضيق بعد دقيقتين من الانتظار، ثم ضرب جرس استدعاء
مُجنّده، الذي دلف إلى مكتبه مُلبّيًا، فطلب منه أن يوصي الساعي بإعداد
قهوته كما يحبّها، وصرفه، ثم قال عندما همّ راضي بالمغادرة:

- وصّي ع القهوة وتعالى يا راضي عاوزك.

"ربنا يستر" فكّر راضي.

عادت عين الرائد لتتعلق بهاتفه، وشروده بادٍ على ملامحه.

"معقول مش هترُد!!"

معتز شرباش

عاد راضي ومثل بين يدي الضابط، الذي أشعل سيجارة، وأشار له بالجلوس قائلاً:

- اقعد يا راضي.

تابع الرائد مُجنده وهو يجلس، حتى يُربكه، ويسهّل استجوابه، وانتزاع منه الحقيقة، ولما تأكد من ارتباك راضي، ومن استعداده تمامًا للاعتراف بكل شيء، سأله مبالغتًا وهو يعتدل في اتجاهه:

- كان اسمه إيه الواد اللي جه أخذ وادّي معاك في الكلام امبارح يا راضي بخصوص القسم هنا؟

- ااااا.. سعادتك كان اسمه أحمد يا وائل بيه.

كسى الغضب ملامح الضابط، عندما تأكدت شكوكه، فهو لا يعلم من الأساس من سرّب المعلومة، ولكنه أوقع راضي، بكل سهولة، مُستخدمًا أقدام حيلة في الكتاب.

- صحفي؟

- لا يا وائل بيه.. وعزة جلال الله.. دا شغال في المكالمات.. كان جاي يسأل على حضرتك عشان يستفهم منك على... قاطعه الرائد، عندما جاء محمود بجهوته، فقد حصل على مبتغاه بالفعل، ولا يهيمه معرفة الكذبة التي ادعاها هذا الـ "أحمد" ليوقع راضي في شباك تصديقه، حتى يحصل منه على معلومات سرّية. وأشار الرائد لراضي ناحية الباب، ليخرج المُجنّد دون تأخير، ويغلق الباب خلفه.

عُمر الشقي

قربَّ الرائد قهوته إليه، بعدما تأكد من أن هاتفه يعمل، ومن عدم وصول رسالة من مَي، ثم فتح الملف الذي يحوي تقرير الطب الشرعي، وشرع يقرأ بتركيز، ويشرب قهوته باستمتاع.

مرّت الدقائق بطيئة، جاءت خلالها رسالة، لم يلحظ وصولها الرائد عندما وصلت، كعادته، عند انهماكه في التفكير، ولم يلحظها عندما التقط هاتفه، واتصل بشريف معاونه، قال بمجرد سماع صوته:

- شريف.. معاك ورقة وقلم؟

- ورقة وقلم؟! آه.. لا لا.. ثواني كدا. وسمعه وائل بنفاد صبر، وهو يطلب ورقة وقلم من أحدهم، وقال بمجرد أن عاد إليه النقيب:

- عاوز بكرة الصبح تسجيل كاميرات مراقبة مول سيتي ستارز.. الساعة... وصمت لثوانٍ، ثم مدّ يده يلتقط مُفكرته، وقال:

- ثواني... وفتح المفكرة على صفحة "الانتحار"، وقرأ منها:

- الساعة ١١:٤٩ دقيقة. ترك المُفكرة، وقال بتوتر:

- بُص يا شريف.. الراجل جوز الست اللي ماتت المفروض على كلامه كان هناك وقت اتصال جاره.. روح لهم الصبح.. شوف التسجيلات واطأكد إنه كان موجود هناك.. ولو لقيته اعرف لي كان هناك من إمتي.. وعاوز تسجيل من أول دخوله المول لحد خروجه منه.

- تمام.. هو في حاجة في تقرير الطب الشرعي؟

معتز شرباش

- بكرة بقى يا شريف.. ما تشغلش بالك مش عاوز ابوظ لك الخروجة. وأغلق الخط، وبالطبع لم يلاحظ مدى سخافة ما قاله، لأنه بالفعل "بوظ خروجة" معاونه.

عاد الرائد إلى تقرير الطب الشرعي مُجددًا، وكأنه يستنطقه ليؤكد شكوكًا غرزت أنيابها في صدر الرائد، حتى تذكر أنه كان في انتظار رسالة من مَي، فأمسك هاتفه، ليجد رسالتها في انتظار اطلّاعه عليها، ففتحها:
"باحبك"

ابتسم وائل ابتسامة فرضت نفسها على ملامحه، ولكنها سرعان ما تلاشت عندما وقعت عيناه على تقرير الطب الشرعي الذي بدا وكأنه يقول له "دا وقت حُب؟"، فترك هاتفه، وشرع يفكر في كيفية تحوّل مسار القضية بعد هذا التقرير.

"يعني انت كنت لسا بتقول لنفسك إيه.. ومش هترد على رسالتها بكلمة حتى؟"

لامه ضميره، فنفض عنه، بصعوبة، شبح قضية السيّدة مؤقتًا، وأمسك هاتفه، وكتب وهو يقوم ليغادر مكتبه رغمًا عنه:

"ممکن بقى آجي لك؟؟ بس تنزلي.. مش عاوز اطلع.. بصراحة؛ مش طالبة سيادة اللواء"

* * *

٣٠

اعتدل عماد المنسي في جلسته، وفرك قطعة صغيرة من الحشيش فوق طعام كلبته الصغيرة صوفي، التي وقفت تتابعه بلعاب سائل. كانت تعلم جيّدًا أن ما يضيفه عماد، سيصيبها بالخدر، لأنها جرّبتة من قبل، ولكنها لا تمنع، بل ترغب فيه.

فمقولة "مَن عاشر القوم" تنطبق على الحيوانات أيضًا.

دقات على باب الشقة، عجّلت بانتهاء عماد من فرك الحشيش، ولم تهتم صوفي، باستقبال القادم، كعادتها؛ فالجوع ضيف ثقيل، لا يسمح لمضيفه بأن يستمتع بأي شيء طالما هو موجود.

فتح عماد الباب، وتحرك ليسمح لأسماء بالدخول، وابتسم قائلاً:

- سمس بقى.

دخلت أسماء وانحنّت تداعب رأس الكلبة، التي رفعت رأسها لثوانٍ لتقبّل التدليل، بأدب، ثم عادت لطبقها تأكل بفوضى وتعجّل طفل.

- هلكانة، قالت أسماء وألقت بجسدها على الكلبة بإنهاك، ثم أضافت:

- عندك حاجة تتاكل؟

غمز مُبتسمًا وهو يتجه صوب الثلاجة:

- عندي حاجة تتشرب. وأخرج زجاجتي "بيرة"، لتراهما، ثم أعادهما، وأغلق

الثلاجة. ثم عاد إلى الكلبة وهو يكمل:

معتز شرباش

- وحاجة تتعَفَّر. وأشار إلى سجائر ملفوفة بعناية على الطاولة أمامهما. ثم قال:

- والأكل جاي في السكة.. أما الحلو بقي.. فوصل قبل الحادق. وغمَز لها في إشارة إلى أنها هي المقصودة بـ"الحلو".

فابتسمت، وقالت بمرح:

- الله الله.. إيه الدلع دا كله؟ دا انت مزاجك في السما.

- ولسًا لما ناكل ونشرب ونعَفَّر. وصمت لثانية غمَز، خلالها، إليها بمرح، ثم أضاف:

- ونحَلِّي.

- يا راجل طب مش كنت تقول.. كنت سعيت لك تنشر مقالك من بدري طالما هيظبطك كدا.

- هو انا كنت كئيب قبل كدا؟ أنا بس مبسوط عشان المقالة سمّعت. ثم التقط هاتفه، وقال:

- تصدقي أنا جالي فوق الـ ٦٠٠ friend requests على أكونت "حشرة" لحد دالوقت بس؟

- ولسًا لما تعرف إن في كلام في لوبي المعارضة إنهم بينفكروا يستغلّوا نجاح المقال.. وتبقى سلسلة مقالات.. في أفكار كثير.. بس باختصار يعني عشان مش قادرة اتكلم قبل ما أكل.. في ناس ثقيلة في المعارضة هتعرض عليك قريب شغل.. وهيكون ليك دور مهم في توصيل رسائل مهمة للجمهور.

عُمر الشقي

انتفض عماد، وسأل بفرح:

- بتتكلمي بجد؟ يعني هيبقى ليّ دور حقيقي؟ ثم عاد وعقد حاجبيه وسأل

بتوجس:

- رسايل ازاي يعني؟

- يا ابني ما تبقاش غشيم وحمار.. إيه اللي رسايل ازاي؟ هتبقى جاسوس

يعني؟ ما تصحى بقى وتفوق.. احنا في ٢٠١٠.. القصة وما فيها إن رسايل

المعارضة لما بتتقال بجمود وبشكل مباشر.. مش بتوصل بشكل مؤثر

لشريحة كبيرة من الناس.. الناس مش بتصدق الباشا أبو بدلة بالشيء

الفلاني لما بيتكلم عن الفقر والقهر.. الكلام لازم ييجي من حد شبيههم.

وكمان لأن دايمًا إعلام النظام الفاجر بيشوّ المعارضة.. ويحطهم في خانة

المُخربين.. وخانة عبده مشتاق.

فدايمًا اختيار طريقة توصيل الرسالة.. والرسول نفسه.. بتكون جزء

أساسي من الرسالة.. دي كلها حاجات أخذناها في كورسات.. ازاي تأثر في

الجمهور.. وازاي توصل فكرتك.. ومين يقولها. فاهم حاجة؟

- آه معاك. قال بانتباه.

قفزت صوفي إلى جوار عماد، الذي داعب رأسها، فنامت على ظهرها،

ليداعب بطنها، فامتثل، وهو يستمع بتركيز شديد إلى أسماء، التي أكملت:

معتز شرباش

- انت بقى موهوب في الحتة دي بالفطرة.. دي اتقالت قصادي النهاردا من الأستاذ عاصم سليمان نفسه.. قال الولد دا موهوب.. لو اتوجّه صح.. هيفيدنا جدًّا.

- عاصم سليمان كبير معارضي النظام بنفسه؟ بس دا... وارتجف صوته لثوانٍ برغم محاولته إخفاء توجسه، وأكمل:

- دا يعني مش هيسبب لي مشاكل مع الداخلية؟ انت عارفة أنا مش وش بهدلة.

- يا ابني انت ما فيش حاجة ضدك.. دا أكونت كتب مقالة وبعدها صفحة ع facebook عجبها وعملت له share. ودا اللي خلاهم يقولوا هو يعمل حساب ويكتب المقال واحنا ننزله.. عشان ما يبقاش في حاجة تربط اللي كاتب المقال بالي ماسكين الصفحة.. دول اللي الداخلية بتدور عليهم.. ودول اللي ما حدش يعرفهم غير قليلين جدًّا.. بس هما برّا مصر.. دا أكيد.

وبعدين أساسًا لو اتمسكت.. هما يومين وهنقلب الدنيا وهتطلع.. وساعتها هتبقى بطل ومناضل رسمي.

ما تقلقش.. دي لعبتنا.. مش حد مننا اللي ممكن يتفرم ويتسكت عليه ولا يختفي أو يتخطف.

هزّ عماد رأسه مُتفهمًا، فهذا هو كل ما كان يتمناه يوم ركوبه القطار، وتوجهه صوب القاهرة.

يعلم أنها قاهرة، ولكنه لم يأت ليُقهر.

عُمر الشقي

ولكنه أيضًا، يعلم عن بطش النظام بمعارضيه، ولا يستطيع منع الخوف والقلق والتوتر من النيل منه.

"ما فيش حد بيوصل بسهولة.. وانت مختار طريق صعب بس يستاهل.. البلد دي تستاهل.. اجمد يا عُمدة" فكَر وداعب صوفي، التي هزّت ذيلها بكسل، وكأنها سمعت جُمَلته الصامته وتأييدها.

- أنا بس مش غايظني غير الاسم الله يقرفك.. حشرة؟ قالت أسماء بامتعاض.

قام فجأة، وكأنه أراد أن ينفُض عنه الخوف قبل أن يتمكن منه، واتجه صوب السماعات الرديئة في آخر الغرفة، وضغط زر التشغيل في جهاز Mp3 Player صغير، موصلاً بها، لينطلق صوت عبد الحليم حافظ من السماعات:

وان لقاكم حبيبي سلّموا لي عليه..

- ومالها الحشرة؟ ماهو Spiderman حشرة.

طمّوني الأسمراني عاملة إيه الثربة فيه..

* * *

معتز شرباش

لم تعشق بعد.. حتى يُغَيِّرَكَ العشق.

٣١

خرجت مريم من باب العمارة التي تسكنُ بها، واضعة نظارتها
السوداء لتقيها من شمس الصيف، التي لا ترحم، لتجد عُمر منتظرًا إيّاها
بجوار سيارتها.

كانت الشمس ساطعة، والسماء بلا سُحب، ولكن نسمة صيفية رائقة كانت
تجول في الفضاء، ساهمت مع صوت العصافير القليلة، التي ما زالت
تحتفظ برصيد، ولو قليل، من نشاط الفجر، في إضافة على السماء بهجة،
لم تنجح حرارة الشمس القاسية في تعكيرها.

لم يلحظ اقترابها منه في البداية، حتى وصله عطرها، فأدار رأسه صوبها
وابتسم، فقالت:

- لا أنا كدا هابتدي اخاف منك.

نظر إليها، وابتسم قائلاً:

- حقّك.. أنا يتخاف مني فعلاً.

- لا يا شيخ؟ دا انت حتى شكلك ما تعرفش تأذي فرخة.

اعتدل ناصبًا قامته، فاسحًا لها الطريق لتركب سيارتها، وأجاب:

- ما هي دي الفكرة.

ابتسمت ولم تُجِب، ثم ركبت سيارتها، وفتحت الزجاج، وقالت:

- طب وانت هتسند على إيه بعد ما أخذ عربيتي وامشي؟

معتز شرباش

ضحك، وأجاب:

- تمشي تروحي فين؟ أنا فصلت البطارية.. مش هتدور أصلاً.. عشان تتحايلي عليّ أوصِّلك.

عقدت حاجبها لثوانٍ، وتفحصته بحثًا عن أي أثر لمزاح في كلامه، أو جدية، فلم تجد، كانت ملامحه محايدة بثقة، برغم ابتسامته، فمدت يدها وأبقت عينها عليه، وأدارت محرك السيارة، فدار بشكل طبيعي، فضحكت، ثم رسمت علامات الامتعاض على ملامحها عندما ضحك باستمتاع لأنه خدعها، وقالت:

- ما تقدرش أصلاً.

- لو تعرفيني كويس مش هتقولي كدا.

انتبهت لجملته، وسألت بصدق:

- ليه؟

- عشان أنا ما فيش حاجة ما اقدرش ما اعملهاش.

- مغرور.

هز رأسه نافيًا، وأجاب:

- شاطر.

رفعت أحد حاجبها بتشكُّك، وعدم اقتناع، ثم قالت:

- طب بعد إذناك بقى عشان... وانتظرت أن يتحرك ليُفسح لسيارتها طريق الخروج، دون رغبة حقيقية.

- إيه؟ عندك ميعاد مع روايتي في "الكافيه" وخايفة تتأخري عليها؟

عُمر الشقي

- انت كمان عارف أنا رايحة فين؟

- دالوقت عرفت.

ضحكت، فتحرك ليدور حول السيارة، واستفزها انه دار من خلف السيارة، فلم تتمكن من النظر إليه جيّدًا وتفحصه، كما كانت ستفعل لو دار من أمام السيارة، حيث أنها لا تستطيع أن تتفحصه وهو ينظر إليها بسبب خجلها.

فتح الباب المجاور إليها ودلف إلى السيارة، وقال بثقة:

- أنا كنت ناوي استنى لحد ما تخلّصي الرواية وبعدين آجي اعرف رأيك..

وأخذ عزومتي.. بس بصراحة شُفتك نازلة.. طلبت معايا آجي معاك. ممكن؟

نظرت إليه بشك، وسألت:

- شُفتني فين؟

- آه صحيح.. أنا ساكن في العمارة دي.. الدور المقفول بقزاز اسود دا. وأشار

صوب شقّته.

نظرت صوب شقّته، ثم نقلت نظرها إليه، وقالت بغضب:

- وانت بقى بتراقبني؟

أجاب بهدوء وثقة، كأنها سألته عن الوقت:

- مش Stalking يعني.. بس بالاحظك. انتِ في وش البلكونة.. صعب ما

اشوفكيش.

لَمْ تُجِب، وَلَمْ تتحرك بالسيارة، وَلَمْ ترفع عينيها عنه، حتى قال بصِدق:

- أنا مش باراقبك يا... وتذكر أنه لا يعرف اسمها، فأكمل:

معتز شرباش

- مش باراقبك.. أنا بس محتاج صاحب.. مش أكثر من كدا. وشُفتك وحسيت إننا ممكن نبقى أصحاب. بس لو ضايقتك.. اعتبريني ما حصلتش. بس أنا محتاج صاحب.. زيّك بالضبط ويمكن أكثر. قالت وهي لا تزال ثابتة في وضع استجوابه:

- وانت عرفت مينين بقى إني محتاجة صاحب؟ بتراقب مكالماتي؟

- ما بلاش وضع attack دا.. أنا كان ممكن اقولك أي حاجة تصدقها. صممت لثوانٍ، فكّرت خلالها في منطقته، الذي وجدته سليماً، فهو لم يراوغ، ولم يكذب، وملامحه صادقة بشكل مريح، وهو في النهاية أصاب الحقيقة عندما ذكر حاجتها لصديق، فهي تملك من الوقت الفارغ أكثر بكثير مما تستطيع صديقتها الوحيدة حيناً ملاءه.

لم يضغط، لم يحاول إقناعها، فقط انتظر هناك، بملامح محايدة، مُطمئنة، مُطمئنة.

"هذه الملامح لا يمكن أن تكون كاذبة، ولو كانت كذلك، فهو بارع للغاية، بارع لدرجة استحقاقه لفرصة"

بعد صمت متوتر منها، وانتظار واثق منه، أمام نظراتها المتفحصة، تحركت هي بالسيارة صوب "الكافيه"، حيث اعتادت أن تذهب لتقرأ، لتعطي هذا الغريب فرصة ستُغيّر حياة كل منهما.

٣٢

- مذبوط يا أحمد بيه.. دي جريمة قتل بدون شك.
- أول ما اوصل مكتي هابص ع التقرير.. وهارجع لك. في حد معين في بالك؟
- في تلك اللحظة، دلف النقيب شريف إلى مكتب وائل، الذي لم يسمع طرقاته التي سبقت دخوله. فرفع حاجبيه في تساؤل واضح، ليرفع شريف اسطوانة أمام وجهه، وكأنه توقع السؤال، وفهمه دون كلام، فرفع الرائد علامة الإجابة أمام معاونه، وأجاب مُحدثه عبر الهاتف:
- أنا لسًا واصلة لي حاليًا تسجيلات كاميرات المول.. هاتأكد من مكان الزوج وقت الوفاة.. وهنتكلم تاني أكيد.
- تمام.. الله المُستعان.
- سلام مؤقت يا أحمد بيه.
- مع السلامة.
- أغلق وائل الخط، ومال بظهره إلى الخلف، وبدأ كُرسیه الكلام بصريه المعتاد، ليُكمل الرائد بحماس:
- قتل مش انتحار.
- معقول؟! سأل النقيب وهو يشعل سيجارته.
- ١٠٠٪.. طمّني.. لقيته؟ قال وائل وهو يضغط زر استدعاء راضي.
- مدّ شريف يده بالاسطوانة إلى الرائد، وأجاب:

معتز شرباش

- موجود هناك من قبل ١١.. ومشي بعد مكالمة جاره على طول.
- دخل راضي إلى المكتب، ليطلب وائل قهوته، وقال شريف للمُجند:
- وانا كمان يا راضي.. من بُن وائل بيه.
- المرة الجاية لما هاشتري بُن.. انت اللي هتحاسب عليه. قال وائل مُحذِرًا،
فهزّ شريف رأسه موافقًا، وقال:
- أمين.
- طب قُل لي.. طول الوقت كان قصاد الكاميرات؟ ما هو ممكن يبقى ظهر
واختفى ورجع ظهر تاني.
- نفى شريف بهزّة من رأسه وهو يسحب نفسًا طويلاً من سيجارته، ثم أتبعها
بقوله:
- لا لا ماغابش عن الكاميرات ثانية.. أنا تابعته بنفسي.. والCD معاك فيها
طول فترة وجوده في المول.. من لحظة دخوله لحد ما خرج.
- طب عاوزين لابتوب نشوف الحاجة دي عليه.. ما تشوف لنا حد من
ضباط الوردية برّا معاه جهاز نستلفه منه.
- حاضر.. أشرب بس القهوة وهاتصرف لك في جهاز.
- دلف محمود الساعي حاملاً قهوة الضباط، وكأنه جنيُّ حقق أمنية شريف
بمُجرد أن نطقها الأخير، وفي الحقيقة، لو كان جنيًّا، ما كان لشريف أن
يطلب سوى قهوته، بسبب سهره ليلة أمس، واستيقاظه مبكرًا للحصول
على التسجيلات، وأيضًا بسبب عدم قدرته على التركيز.

عُمر الشقي

- كنت بتكلم أحمد بيه سامح وكيل النيابة؟ سأل شريف بعد أول رشفة.
- اممم. قال وائل بشرود، مومناً بالإيجاب.
- في إيه في تقرير الطب الشرعي بقي؟
- رفع وائل تقريره، وناولته لمعاونه، وقال وهو ينظر إلى مُفكرته:
- المسافة.. والبصمات.. والبارود.. كلهم بيؤكدوا إن ناهد مش هي اللي ضربت نفسها بالرصاص.
- وضع النقيب التقرير إلى جواره، على مكتب وائل، وبدأ يُطالعه بتركيز.
- قال النقيب بعد أن فرغ من القراءة:
- المسافة مش دائماً دقيقة.. معروفة، بس في علامات استفهام مش مفهومة فعلاً.
- اعتدل وائل وأجاب مؤكداً:
- الزناد ما فيش عليه بصمة.. ازاي؟
- فكّر شريف لثوانٍ ثم أجاب:
- ممكن تكون ضغطت الزناد بظاقرها.. مش ببطن عُقلة صُباعها.. بتحصل.
- يا شريف.. يعني هي اشترت سلاح.. وما فيش ولا مرة لمست الزناد؟ دا أول حاجة أي حد بيعملها لما يمسك سلاح.. بيحط إيدَه على الزناد كأنه بيضرب بيه، دي شهوة لا يمكن السيطرة عليها.
- ثم فتح ملفاً أمامه، وأخرج منه صورتين ناولهما لشريف، وقال شارحاً وهو يشير صوب الصور:

معتز شرباش

- شوف دي بقى.. بصماتها على إيد السلاح في اتجاه الماسورة، اللي بيمسك سلاح بيحط إيد السلاح على كف إيده.. ويلف إيده حوالها فبصماته بتكون على إيد السلاح عكس اتجاه الماسورة.

صمت لثوانٍ ليُعطى لمعاونه الفرصة لمراجعة ما قاله، ثم أكمل:

- ما فيش بصمة واحدة على فارغ الرصاصة.. يعني حطت الرصاصة في المسدس من غير ما تلمسها؟ ما فيش بصمة واحدة على ماسورة السلاح.. يعني سحبت الماسورة من غير ما تلمسها؟ بصماتها موجودة بس على إيد المسدس.

ودا مالوش غير معنى واحد.

أكمل شريف جُملة رائده الذي صمت، وهو يومئ برأسه:

- إن حد قتلها وطبع بصاماتها ع السلاح.

خيّم صمت ثقيل على المكتب لدقيقة، ما كان ليُخيّم عليه لو كان للأفكار صوت، فكل من الضابطين كان غارقًا في تفكير صاخب، وتساؤلات بلا نهاية، ولا إجابات، حتى قطع النقيب الصمت، قائلاً:

- طب نبليّ المديرية بقى.. ونشتغل في الاتجاه دا.

- بالظبط. اعتدل وائل، وأكمل بعد انتزاع معاونه له من تساؤلاته:

- عاوز اقابل الجار ومراته.. والبواب.. وأقرب حد للقتيلة.. أم، أخت..

ونشوف بعدها هنوصل لفين. ثم أكمل عندما لمح الاسطوانة التي أمامه:

عُمر الشقي

- وعاوز جهاز يا شريف اشوف عليه التسجيل دا، جهاز البحث مش هينفع ما انت عارف.

- حاضر.. هاتصرف أنا، قالها النقيب، ثم غادر المكتب ليُنفذ.

"فينك يا أحمد خالد توفيق؟ قضية الغرفة المغلقة بامتياز أهه" فكَرَّ الرائد، وهو يرسل رسالة نصيَّة لخطيبته، كما قرَّر أن يفعل، بعد شجارهما الأخير، على مدار اليوم، كنوع من إثبات الاهتمام، وإعطائها حقَّها من وقته. كان يعلم أنه يجب أن يفسح لها مكانًا في وسط يومه؛ هذا واجبه، وحقها.

* * *

مذكرات

٨

وكان اغتيال الحياة فيها، وفي، لا يكفي..

وكان قتله لها، في حياتها، ألف مرة لا يكفي..

فقاموا بإعادة قتلها، وتعذيب، مُجددًا، بسلاح سوء الظن، والتشويه..

لم أحتمل مشاهدته وهو يدعى التأثر، وهو يصفح المعزين، المدعين

مثله..

كيف قبلوا أن يتقبل القاتل عزاءه في من قتل؟

واجهته.. ولعنته.. وأعلنته قاتل حياتي..

وسط حاشيته.. ووسط حاشيتي.. التي ألقى بأخشاب الطعن، إلى نار

الكذب، التي أشعلها هو بذكاء ثعلب خبيث، لتعلو، وتحرق كل شيء،

كان يربطني بهؤلاء..

ألم يكفيكم السكوت على مقتلها؟ وتقديم العزاء للقاتل؟

عُمر الشقي

ادّعى أنها كانت تعشقتني، وأنه علم بهذا بعد انتحارها، من
مذكراتها..

وصمها، وإيأى، بالعار.. واعتبر الجميع مهاجمتي له الدليل الدامغ
على صدقه.

لم أباله بعاري.. وقتلني عارها.

انتقلت النار، تحرق سيرتها، على السنة من كان يجب عليهم أن
يظفئوها.

* * *

فتح عُمر باب "الكافيه"، سامحًا لمريم بالدخول قبله، ثم تركه ليعود ببطء إلى مكانه، ليوقف دخول ضجيج العاصمة، الذي تسلل عندما فتح عُمر الباب إلى داخل "الكافيه"، مُعكِّرًا هدوءه، وموسيقاه الساحرة، وجوّه المكيف، لثوانٍ، وهو يقول:

- آه والله بجد.. ما بانساش.

رفعت حاجبها في غير تصديق، وقالت وهي تجلس:

- ياه.. الحكاية دي أكيد قاسية جدًّا. مش مُتخيّلة.

ابتسم، في شكل زفرة خفيفة حَمَلت من الهم الكثير، وقال:

- اتعوّدت.

- لا يمكن حد يقدر يتعوّود على حاجة زي دي.

جاء محمد النادل، وانصرف بعد كتابة طلباتهما، لتسأل مريم:

- ازاي ممكن حد يتعوّود على حاجة زي دي؟

تنهد عُمر تنهيدة طويلة، وكأنه يرغب في إتاحة مزيد من الوقت لنفسه، حتى

يفكر في إجابة سؤالها.

عُمر الشقي

"هل يجدر بي الإجابة بصدق على هذا السؤال؟ علمًا بأن هذا أول لقاء حقيقي بيننا" سأل نفسه، ثم أجابها - مريم - ، بصدق:
- بالبُعد عن الناس.. والتعب.

أجابها بعد اتخاذه قرارًا، أن يصارحها بكل شيء، فلجوؤه إليها في الأساس، كان بسبب حاجته لصديق، خارج إطار فريق عمله، ولا يصح ولا ينفع أن يتخذ المرء صديقًا، ويكذب عليه، وإلا فلماذا يصادقها من الأساس؟
حملت نظرتها تأثرًا واضحًا، وقالت:

- ليه تبعد عن الناس؟ وما فهمتش التعب.

انتظر عُمر حتى غادر محمد بعد وضع المشروبات بينهما، وقال دون أن ينظر إليها مباشرة:

- الناس بتغلط أكثر ما بتعمل أي حاجة تانية يا مريم. عن سهو.. أو إهمال.. أو قسوة.. أو حقد.. غل.. غيرة.. غباء.. طمع. غلط الناس مع حد ما بينساش زيي بيتحول لجحيم، مع الوقت كل اللي بيقترب مني.. لسبب ما بيغلط.. ولما بيغلط - ودا طبيعي - أنا ما بانساش.. يبقى الحل إيه؟ ما اقربش من حد. إلا لو تعرفي سكة بلد الملايكة بقى؛ أنا لعنتي علاجها الوحيد "المدينة الفاضلة".

ابتسم ورفع رأسه ونظر إليها متوقعًا نظرة الشفقة، التي تثير غضبه، فهو لم يَكُن، ولن يكون أبدًا ضعيفًا أمام لعنته حتى يستحق الشفقة، ولكنه

معتز شرباش

وجد بدلاً من تلك النظرة التي توقعها، نظرة شغف وإعجاب. سحرته النظرة تلك، حتى أنه ابتسم، وسأل:

- ما لك؟ بتبصي لي كدا ازاي؟ ثم صَحَّحَ، وقال:

- ليه؟ اقصد بتبصي لي كدا ليه؟

- كدا ازاي؟

- كدا. وأشار إلى وجهها، فضحكت وقالت:

- أنا مستغربة بس.

- من؟

- عشان انت فيك شبه كبير مئي.

رفع كوبه ليشرب منه وقال مازحًا:

- انت مش حلوة قوي كدا يا مريم.. انت حلوة.. بس مش للدرجة دي.
وضحك بمرح.

- بَطَّل.. أنا باتكلم بجد.. أنا واحدة معقدة يا ابني. ما كنتش اتوقع ألاقي حد معقد زيي كدا.. وكمان تطلع عادي.

- عادي ازاي؟ كنت متوقعاهم بـ ٣ أرجل.. وعين واحدة؟

عُمر الشقي

- يا ابني لأ.. كنت متوقعة الراجل المعقد دا بنضارة كدا.. ووشه بيحمر لما بنت تكلمه.. وبيلبس بنطلون قماش ويدخل القميص جوا.. عارف انت الجوّ دا؟

- أه.. وطربوش. بنطلون إيه وبتاع إيه؟ احنا في ٢٠١٠. قال مُستنكرًا.

- اتريق اتريق.

- طب وانتِ بقى متعقدة ليه؟

كسى وجهها ضيق واضح، وأجابت بعد زفرة حارة:

- بابا الله يرحمه.. من ساعة ما سابني وانا رافضة اتعلق بحد عشان ما يسبنيش تاني، إحساس الفقد دا وحش قوي يا عُمر.

حاول أن يبتسم مواسيًا، ولكنه فشل، فهزّ رأسه متفهمًا، وقال:

- اسأليني أنا.. فاكراه، وأشار إلى عقله.

أصدر هاتف عُمر المحمول رنينًا خافتًا، فاستأذن الأخير مريم ليُجيب:

- أيوة يا هيثم.

- بُص يا كبير.. قصة أعرف مين حشرة دي صعبة جدًّا.. أنا دخلت رسايل

الfacebook بتاعة الصفحة.. بس الرسايل ممسوحة.

- انت مش قُلت قبل كدا ما فيش حاجة بتتمسح في الحقيقة؟

معتز شرباش

- أيوة.. بس بتتفرکش إلكترونيًا. بُص هي زي ما تقول كدا.. ورقة ومليانة كلام.. وانت قطعها ١٠٠ حته.. هتلاقي الكلام.. بس مش هتتعرف تفهم منه حاجة.

- طب وبعدين؟

- الحاجة الوحيدة اللي قدرت افهمها إن المقال دا له علاقة بواحد اسمه عماد. ما اعرفش اكر من كدا.

تذكر عُمر، فورًا، نظرًا لذاكرته الحديدية، اسم عماد المنسي، صاحب مقال "النوم في العسل"، فأجاب:

- تمام.. كدا زي الفل.

- في حاجة تانية.

- ها؟ بنفاد صبر.

- أنا معطّلك؟

- اخلص.

- الحاج ثروت الناظر مش عاوز يدفع فلوس عملية القسم.. وعاوز يقابلك شخصيًا.

عقد عُمر حاجبيه، وكسا الغضب والاستغراب ملامحه، وقال:

- إيه الهبل دا؟ هو البرنامج ما اشتغلش؟

عُمر الشقي

- لا بالعكس.. البرنامج اشتغل زي الفل.. في حد استخدم الجهاز النهاردا..
والبرنامج اترفع وكله تمام.

- طب ليه بقى مش عاوز يدفع الفلوس؟

- مش عارف بس هو عاوز يقابلك.. واللي بيراسلني قالي الحاج عجبه شغلك
جدًا وعاوز يشتغل معاك.

- آه.. فهمت. طب بُص؛ ابعت التقرير دا لنادر.. وقُلْ لهُ عاوزين نتصرف في
الموضوعين النهاردا.. وقُلْ له حشرة دا هو "عماد المنسي" بتاع "النوم في
العسل" هنشوف.

- النوم في العسل بتاع عادل أدهم؟

- لا وانت الصادق النوم في العسل دا اسم الصنف اللي انت مصطبج بيه..
فوق واعمل زي ما قُلْت لك.. سلام.

أعاد هاتفه إلى الطاولة، وابتسم محاولاً أن يغطي على ملامح الغضب التي
اعتلت ملامحه منذ ثوانٍ، وفشل:

- ما لك؟

تنهّد، وقال بضيق:

- ما هو دا بقى التعب.

- تعب؟! استفسرت.

معتز شرباش

- مش أنا قلت لك أنا اتعودت على حالي؛ بالبُعد عن الناس.. والتعب؟

- آه صحيح.. نسيت.

ابتسم وقال:

- بس أنا ما بانساش. ثم أكد:

- حرفيًّا.

ضحكت وسألت:

- ما له التعب؟

- شُغلي.

- مُتعب؟

- جدًّا.. ودي ميزته.. وكمان مُسلي.. وخطير.. بيخلي دماغي تظفي ما تفكرش.

أكثر وقت بارتاح فيه لما دماغي تبطل تفكير.. ودا بيحصل وانا باشتغل.

- وانت بتشتغل إيه؟ سألت بفضول واضح.

نظر إليها لثوانٍ، ثم أجاب بابتسامة، وكأنه أراد بها تلطيف الجواب:

- شقي.

* * *

- اتفضل يا باشمهندس.. ما علش بقى.. تاعينك. قال وائل بسُخرية مُستترة، وهو يُرحب بزوج القتيلة، عادل.

أجاب عادل، الذي بدا وكأنه بدأ يعتاد على فقدانه لزوجته، حيث يبدو وكأنه قد حصل على قدرٍ كافٍ من النوم، وإن بقيت لحيته مدببة كالشوك:

- لا يا وائل بيه.. ما فيش تعب ولا حاجة.. خير؟!

- ارتاح الأول طيب ونطلب قهوتنا وبعدين نتكلم.. مش كدا ولا إيه؟ وابتسم وائل.

- اللي تشوفه. أجب الزوج بعدم ارتياح واضح لابتسامة الرائد.

"نَجَحْتُ" فكَرَّ وائل عندما شعر بعدم ارتياح الزوج.

- اتنين قهوة واحدة مضبوطة للباشمهندس.. والتانية بتاعتي. قال الرائد مُخاطبًا الساعي، ثم نظر للزوج وقال:

- مش قهوتك مضبوطة برضه يا باشمهندس؟

- تمام.. سعادتك لسَّا فاكِر، وابتسم مُجاملاً.

- أنا ظابط مباحث يا عادل بيه.. شُغلي آخذ بالي من التفاصيل.. وافتكرها. ثم اعتدل وأراح ظهره على كُرسیه، وأكمل مع صرير الكرسي السخيف:

معتز شرباش

- في شُغلنا دا يا عادل بيه.. أصغر التفاصيل هي اللي بتجِل أكبر القضايا.
وركّز نظره على الزوج، الذي نظر إليه بدوره ولم يُجب. وكان كل منهما يحاول أن يقرأ أفكار الآخر. حتى تنهّد وائل، وقال بجديّة مَنْ قرر أن يبدأ العمل:

- طبعًا يا عادل بيه أنا مش محتاج أفكر سعادتك إن الكذب هنا هو أكبر غلطة ممكن تكون بترتكبها في حق نفسك.. وأكبر إهانة ممكن تتوجه لظابط مباحث.. مضبوط؟

هَزَّ الزوج رأسه في عدم فهم، ونال التوتر من ملامحه، ولم يُجب، فأكمل الرائد وكان جواب الزوج الذي لم يصله لا أهمية له:

- معلومة تانية مُهمة برضه... وقطع كلامه عندما دخل محمود حاملاً القهوة، وأكمل بعد أن غادر الساعي:

- إن أي سؤال باسأله هنا.. وانت بتجاوب عليه.. أنا باتأكد من إجابته.. ما فيش في تحقيقات المباحث أمر مُسلّم بيه.. ولا حد فوق مستوى الشُّبهات.. وطبعًا ما فيش حد مُتهم إلا بالدليل.. يعني مش عاوزك تفهم كلامي دا وكأنه توجيه اتهام لسعادتك من أي نوع.. دا شُغلنا العادي.. ومش مطلوب منك غير إنك تساعدنا نساعدك. ثم ابتسم بود، وأشار للزوج وقال:

- القهوة يا عادل بيه.

تنهّد الزوج ورفع فنجاناه ورشف منه بتوتر، ثم سأل وهو يعيده:

عُمر الشقي

- هو في جديد ظهر في القضية يا وائل بيه؟
- آه.. المدام اتقتلت ما انتحرتش.
- توتر الزوج، ولم يُعقّب.
- هو في وثيقة تأمين على حياة المدام؟ سأل الضابط فجأة، عندما لاحظ توتر الزوج، فهذا أنسب وقت لسؤال غير متوقع، حتى لا يُعطيه مساحة للتفكير في إجابة مُنتقاه.
- نعم؟! آه. أجب بتردد. ثم قال بلهجة متماسكة:
- في وثيقة تأمين على حياتي وحياتها.. يصرفها الي عايش فينا.. بس تعتبر لاغية في حالات القتل أو الانتحار.
- "إجابة دقيقة جداً.. وكأنه توقع السؤال وحضر إجابته.. هذا الرجل مُجرم.. أو ذكي جداً.. أو كلاهما" فكَر الضابط. ثم فتح مُفكرته، وسأل:
- هاحتاج اسم شركة التأمين.
- كتب الضابط الاسم حتى يتأكد من صدق معلومة الزوج، ثم قال وهو يشير صوب جهاز لابتوب موضوع إلى جواره:
- أنا وصلني تسجيل الكاميرات في المول لما جالك اتصال جارك.
- تمام.

معتز شرباش

- لاحظت حاجة كدا.. مش عارف.. يمكن أنا بحُكم سُغلي شكّك زيادة عن اللزوم.. بس تعالى كدا نشوفه سوا.

عدّل الضابط وضع الجهاز، ليسمح للزوج برؤية الشاشة، ثم ضغط على زر التشغيل.. ليظهر الزوج وهو يدخل من بوابة كشف المعادن عند أحد مداخل المبنى التجاري.

- عندي كذا ملاحظة كدا محتاجين توضيح.. رقم واحد.. سعادتك قُلت معايا هنا إنك كنت رايح تعمل شوبينج عادي.. وبرغم دا ما دخلتِش ولا محل.. انت بس اتمشيت وبعدين قعدت تشرب قهوة لحد ما جالك الاتصال. وصمّت.

قال الزوج وقد بدأت تظهر عليه ملامح الضغط، وشعوره بأنه مُتهم:

- أنا كنت هالف واشتري.. بس بعد ما اشرب قهوتي.. وللأسف حصل اللي حصل فمشيت.

لم يُعلق وائل، وإن تابع الزوج جيّدًا وهو يُجيب، وأكمل:

- رقم اتنين.. انت طول الوقت كنت قصاد الكاميرات.. يعني ما دخلتِش حمام ولا محل.. حتى الكافيه اللي دخلته مفتوح والكاميرا كانت جايبة رجلك وانت بتدفع.. وأخذت كوبايتك وخرجت قعدت قصاد الكاميرا، اعذرني أنا ضابط مباحث.. بالذمة مش لو مكاني هتجس إن دا مقصود؟ إنك طول الوقت قصاد الكاميرا؟

عُمر الشقي

تشتت نظرات الزوج لثانية واحدة، ثم أجاب مُستنكراً:

- يا افندم أنا مش عارف أصلاً لو في مكان مش متصور ولا ما فيش..
بصراحة مش عارف المفروض أزد اقول إيه.. حضرتك تقصد إني كنت
عارف يعني إن مراتي هتقتل وتعمدت أظهر عشان ابراً نفسي؟

ابتسم وائل مُستمتعاً بانزعاج الزوج، وقال:

- أنا ما اقصُدش غير اللي باقوله.. لو قاصد حاجة هاقولها.. أنا ظابط
مباحث مش بالقح كلام. ثم أكمل دون انتظار رد فعل الزوج على تحذيره
الودي:

- رقم ثلاثة.. لو تلاحظ هنا. وأشار صوب الشاشة:

- دا الاتصال الوحيد اللي وصلك.. من جارك.. اتفرج معايا كدا. وصمت.

تابع الزوج نفسه وهو يُجيب على الهاتف، وتابع اعتداله على الشاشة، ثم
وقوفه وملامحه التي انزعجت، ثم توجهه صوب باب المبنى التجاري. ثم نظر
إلى الضابط، الذي سأل بخُبت:

- أخذت بالك؟

هز الزوج رأسه، وسأل:

- من إيه؟ مش فاهم.

ضغط وائل زر إعادة التسجيل إلى الخلف للحظات، وتوقف عند وصول
اتصال الجار، ثم ترك التسجيل يعمل بالسرعة العادية، وقال:

معتز شرباش

- تاني كدا.. شوف وقُل لي؛ مش ملاحظ حاجة غريبة؟

تابع الزوج التسجيل بضيق، وتابع وائل الزوج بصبر، وقد وضع إصبعه على زر الإيقاف، وعند ثانية مُحددة، ضغط إيقاف، لتتوقف الصورة على لقطة لم يلحظها الزوج في المرة الأولى، ولم يتوقعها، وظهر عدم توقعه جلياً من عرقه الذي ملأ جبينه فجأة، وهو ينقل بصره بين الضابط وشاشة اللابتوب على تلك اللقطة.

كان الزوج على شاشة اللابتوب، في تلك اللقطة، ينظر مباشرة إلى عدسة كاميرا التصوير، وكأنه يريد أن يتأكد من أن تلتقط الكاميرا صورة وجهه كاملاً، لتثبت وجوده في هذا المكان، في تلك اللحظة.

* * *

- شقي؟!!!

تساءلت مريم باستنكار، عاقدة حاجبها دون فهم. وبصوت عالٍ نسبيًا، طغى لثانية على هدوء المكان، الذي كان أي صوت فيه أعلى من الهمس بقليلٍ يمكن تصنيفه كضجيج، ولكنها لم تلاحظ تعكيرها هدوء المكان، بسبب فضولها.

- آه شقي، عارفة معنى كلمة شقي؟ يا متعلّمة يا بتاعة الروايات؟ وابتسم مُداعبًا.

فكّرت لثوانٍ، ثم سألت:

- يعني تعيس.. انت بتشتغل تعيس؟ بعدم فهم.

- لا كدا هاقوم امشي.. رگزي معايا.. حد بيشتغل تعيس يا مريم؟

- ما هو شقي معناها تعيس. أو.. آه... ثم قطعت جملتها ونظرت إليه لثوانٍ، ثم قالت بتردد خافت:

- خارج عن القانون.

لم يُعقب. كان يسمح لها باستيعاب ما قالته لتوّها، ثم قال بهدوء بعد ثواني:

معتز شرباش

- أنا كدا فعلاً.

انتزعت مريم نفسها من صدمة ألمت بها لدقيقة كاملة، احترمها عُمر،
وسألت بلهجة من يرفض التصديق:

- لا مش فاهمة.. يعني إيه خارج عن القانون؟

- دي قصة يطول شرحها.. وصدقيني مش عارف إيه اللي خلّاني باكلمك
بصراحة كدا.. بس يمكن كل حد بييجي عليه وقت يحتاج يفضفض.. حتى
أنا.

غليها نصفها المُعجب به، وسبقها في الإجابة، فقالت دون تفكير موافقةً إيّاه:
- يعني إيه حتى انت؟ ما انت بني آدم ولازم تلاقي حد تتكلم معاه، ثم أدركت
أنها تعاطفت معه دون قصد، فأكملت مُصححةً:

- بس خارج عن القانون ازاي؟ حرامي؟ بتقتل؟ نصّاب؟

كست ملامحها علامات عدم الارتياح، والتوتر، ولها كُل الحق، فقال عُمر
الذي لاحظ توترها:

- بُصي يا مريم.. أولاً أنا لا يمكن أذيك.. فاعني في أي لحظة تخافي وانتِ
معايا.. ثانياً أنا مش بأذي حد أصلاً.. أنا بس مش ماشي صح حسب وجهة
نظر معظم الناس.

- ما فيش حاجة اسمها كدا. باستنكار، وضيق، قالت.

ابتسم وكست ملامحه خيبة الأمل وأجاب بخفوت:

عُمر الشقي

- دا رأيك.. وانا أسف لو ضايقتك.. ما اعرفش ليه ما كدبتش عليك..
وحسيت إني محتاج اقول لك الحقيقة.. بس انتِ عندك حق.. ما فيش
حاجة اسمها حد يقبل حد ما يعرفوش بعد ما يعرف عنه إنه كدا.

ثم رفع كوبه وأنهاه على عجل، وأكمل مبتسمًا ابتسامة من جُرح:

- رواية الطاعون هتوصل لك البيت.. ومش هتشوفي وشي تاني، وهمّ
بالنهوض، فاستوقفته، دون وعي منها، أو تفكير، قائلة:

- إيه الأفورة دي؟ انتِ قلبت رأفت الهجان ليه كدا؟

- انتِ هتستعبطي بقي؟ بغضب باسم.

- دا انتِ أخذت عليّ قوي.. أنا تقول لي هتستعبطي؟!

- ما انتِ قُلتِ ما فيش حاجة اسمها كدا وبتاع.. وحسستيني إنك هتبليغي
عني.

فابتسمت وقالت:

- طب بدمتك مش اعرف الأول انتِ مخالف القانون ازاي؟ ولا عاوزني
اتصل ابليغ عن واحد "شقي" وخلص، ورفعت علامات التنصيص، ثم
أكملت:

- لازم اعرف اقولهم إيه لما اتصل ابليغ عشان ما حدش يضحك عليّ.

معتز شرباش

- تصدقي اقتنعت. وضحكا بمرح لثوانٍ، حتى خفتت الضحكات، وذابت، ثم نظر كل منهما إلى الآخر، يسأله، أو يسأل نفسه ويبحث عن الإجابة في ملامح الآخر.

لم تشعر مريم بأي تهديد لها من عمر هذا، ولم تفهم السبب، فقط رفضت تصديق فكرة أنه يمكن أن يؤذيها. وكان عمر هو الآخر يثق تمام الثقة في أنها لن تخافه، وستسمعه، وتصدّقه، وتتقبّله.

اتفقا دون اتفاق أن يُخاطرا من أجل صداقتهما، خاطرت هي بعلاقة مع "خارج عن القانون" حسب قوله، وخاطر هو بأن تهرع هي لإبلاغ السلطات عنه، لا يخاف إبلاغها السلطات لأنها لا تملك عنه ما يكفي من المعلومات لإثبات أي شيء عليه، ولكنه كان يثق في أنها لن تفعل.

من أين جاءت ثقة كل منهما في الآخر؟ لم يفكر أحد منهم في إجابة هذا السؤال.

حاجة مريم لصديق، وإعجابها بطريقته، وثقته في نفسه، سمحوا لها بإزاحة الخط الأحمر الذي ترسمه كل فتاة في طريق الشاب الذي يحاول الاقتراب منها، حتى تسمح له بالمرور، دون تفتيش أو تدقيق أو تمحيص، وكأنها رئيس عمل مرتشٍ ومتواطئ مع عميل اشترى ضميره.

وحاجة عمر لصديق يعرف عنه كل شيء، دون تجميل، ويقبله كما هو، دفعته لقبول مخاطرة الإفصاح عن سرّه، فسنوات مضت عليه، لا يعرف

عُمر الشقي

أسراره غير حوائط منزله، ومساعديه، ووصل لمرحلة من الوحدة، تقترب من اليأس، فخاطر، وكله ثقة في تلك الجميلة، التي لسبب ما، لا يستطيع تصورها تخافه، أو تخونه.

قطعت مريم الصمت الصاخب، وقالت:

- ممكن بقى تقول لي خارج عن القانون ازاي؟

- أقدر أثق فيك يا مريم؟ سأل بصدق.

- أنا اقدر اثق فيك يا عُمر؟ أجابت بذكاء.

فابتسم ابتسامة عذبة.

قابلتها هي بابتسامة أعذب من أن تُنسى، حتى وإن لم يكن يمتلك ذاكرة خارقة.

* * *

تألّأت حبّات العرق على جبهة عادل، الذي فقد كل سيطرة على ملامحه، وتكلّمت لغة جسده بكل صراحة، وصراخ، واعترفت أنه لم يتوقع سؤال الضابط، ولم يستعد له. وبقي الرائد دون رد فعل، وكأنه مشاهد يستمتع بعرض مسرحي لشكسبير، ويتمنى ألا ينتهي.

نقل الزوج نظره بين شاشة اللابتوب، ووجه الضابط، عدة مرات، ثم ظهرت على ملامحه علامات كفاحه للسيطرة عليها، ونجح أخيراً في إقناع نفسه، أنه لا يوجد ما يُدينه في تلك اللقطة، وترجم هذا بقوله:

- أنا مش فاهم حضرتك تقصد إيه.

ضحك وائل باستمتاع ملحوظ، وترك ضحكته تجلجل حتى زالت من تلقاء نفسها، دون تدخل منه، ثم قال:

- يا باشمهندس قول كلام غير دا.

- مش فاهم حضرتك. قالها وقد أحكم سيطرته على نبرته وملامحه بشكل كبير، فهاجمه الضابط:

- لا فاهم يا عادل بيه. ثم رفع إصبعه في وجه الزوج وقال بحدّة:

عُمر الشقي

- وآخر مرة هاسمح لك تهين ذكائي.. أنا بأسألك وبشكل مباشر.. ومش هاقبل منك غير إجابة مباشرة.. عندك حاجة المفروض اعرفها منك؟ قالها الرائد، وضغط على كلمة "منك" جيّدًا. ثم أكمل بنفس الجِدّة:

- وباقول منك لأنني هاعرف كل اللي محتاج اعرفه.. انت مش في برنامج تليفزيوني هتختار تقول إيه وما تقولش إيه.. انت في تحقيق رسمي في قضية قتل قصاد ظابط مباحث.. هنا اللي بنحتاج نعرفه هنعرفه.. منك أو من غيرك.. علشان كدا باقول منك.. لأنها هتكون في مصلحتك.. أحسن بكتير من إني اكتشف من وراك حاجة كنت المفروض انت تقولها لي.

فتح الزوج فمه ليُجيب، ولكن الرائد أكمل دون توقف، كالموج:

- غلطة واحدة، قالها ورفع سبابته، ثم أكمل:

- هي غلطة واحدة بتكون كفاية عشان كل اللي فاكره مستخبي يتكشف. غلطة واحدة يا عادل بيه، مكاملة تليفون، تحويل بنك، تذكرة سفر، بوليصة تأمين. رسالة ع facebook. وما فيش حد ما بيغلطش.

تملّك القلق والتوتر من الزوج، وتخشبت ملامحه، وتسارعت حركة بؤبؤتيه، في علامة على تفكير، وكأنه يراجع كل ما قاله الرائد في عقله، ويتأكد من عدم إغفاله لشيء منهم، ولاحظ الرائد ملامحه التي أعلنت بوضوح عن انهيار وشيك، فقال بنبرة أقل جدّة:

معتز شرباش

- فياريت يا عادل بيه ما تقوليش مش فاهم.. وتفسّر وجودك طول الوقت
قصّاد الكاميرات.. وتفسر بالتحديد بصّتك دي للكاميرا وقت المكالمة. وأشار
إلى شاشة اللابتوب، ثم أنهى كلامه قائلاً:

- أنا عارف إن مش انت اللي قتلت مراتك.. واضح، وأشار صوب الشاشة
مُجدداً.

- بس أنا برضه عارف إن في حاجة هنا انت مش قايلها لي.. واحب اعرفها
منك، لأنني كدا كدا هاعرفها، بس لصالحك انت اعرفها منك، دي فرصة..
استغلها.

* * *

مذكرات

٩

ولكن يبقى السؤال: هل صدق؟ ماذا لو حقاً عشقتنى هى الأخرى دون

إفصاح؟ ماذا لو كانت تنتظر منى الخطوة الأولى؟

أى خطوة كانت تنتظر؟ وعلى أى طريق؟

وهل للجنة طريق على الأرض؟

يبدو وكأننى استنفدت، كى أصبح حبيبها، كل رصيدى من الحظ. فلم يتبقَ

لى ما يكفى من الحظ، لأحيا.

أعتبر نفسى، إن صدق، برغم كل شىء، صاحب حظ عظيم.

أرانى سقطت، رغماً عنى، فى فخ لعنته..

تتمنى نفسى الملعونة أن تصدق كلماته، التى تحرق نكرى حبيبتى..

أى شيطان أصبحت؟

* * *

- أنا باشتغل مُهمات للناس اللي معاها فلوس ومحتاجة حاجات غير تقليدية.

- أي نوع من المُهمات؟! سألت بتوجُّس.

فابتسم مُطمئنًا:

- مريم.. أنا مش قتال قُتلة.. ولا بلطجي.. ولا حرامي.. أنا عندي خطوط حمرا مش باخطيها.. اهدي بقى عشان اعرف افهمك.

هزّت رأسها، فأكمل:

- أنا ساعات بيجيلي شغل ناس محتاجة تسرق حاجة.. بارفضه.. واللي عاوز يسرق كمبيالات كاتبها على نفسه.. ولا عاوز يخوِّف حد واخد جراج تحت بيته وضع يد.. ولا اللي عاوز يخبط حد بعربية يرقده قرصة ودن عشان مضايقه.. كل دا شغل بلطجية وهجّامين.. مش بتاعي.

الخدمة اللي أنا باقدمها خدمة شيك.. وما حدش غيري يقدر يعملها.. أنا باعمل الشغل اللي ما يخطرش على بال حد. بمقابل بيتحدد حسب الخدمة.

- ماعلش.. برضه مش فاهمة. إدي لي مثال طيب.

عُمر الشقي

فكّر عُمر لثوانٍ، ثم قال:

- يعني مثلاً تزوير عملية سرقة بالإكراه لمكتب صرافة عشان يتهرب من ضرايب أو ينصب على شركة التأمين.

اتسعت عينها انبهاراً لثانية، ثم تحوّل انبهارها لابتسامة دون قصد، ثم أدركت مدى خطأ فعلتها، حيث أنها لا يصح أن تنهّر بما يفعله، أو على الأقل عليها ألا تُظهر إن فعلت، فامتعضت، أو حاولت، ولم تعقب.

- باروح اسرق المكتب.. والعملية تتصور بكاميرات المراقبة.. عشان يبقى كله حقيقي وبالذليل.. وطبعاً موظفين المكتب ما يعرفوش.. علشان لو يعرفوا هيبان من رد فعلهم إنها تمثيلية.. أنا باقوم بعملية سرقة حقيقية.. بس بالاتفاق مع صاحب المكتب.. وباخذ نصيبي وارجع الباقي.

- عملت دا فعلاً؟ بانهار لم تُخفِه.

- كذا مرة، أجاوب بحياد وكأنه يتحدث عن أحوال الطقس.

- يخرب بيتك. وضحكت، ثم خفضت صوت ضحكتها، ونظرت حولها تلقائياً، وكأن الناس حولها سيعلمون على ماذا تضحك، إذا هم سمعوا ضحكتها.

ضحك عُمر، وقال:

معتز شرباش

- صدقيني دي الطريقة الوحيدة اللي بتطفي دماغي.. الأدرينالين.. الشعور
بالخطر.. التوتر اللي بيكتسح خلايا جسمي كلها وانا في المهمة بقى إدمان..
كأني باعمل دماغ.

ثم ابتسم ومال برأسه واعترف:

- دا غير إن مكسبها كويس جدًّا.

- بس مش خطر عليك؟

قال مُزيلاً قلقها بسحر غريب:

- عُمُر الشقي بقي.

فابتسمت.

* * *

٣٨

خيّمت على غرفة مكتب الرائد سحابة توتر، استمتع بها الضابط، ولم يحاول التدخل بأي شكل لتعكيرها، فقط بقي هناك مُعلّقًا بصره بالزوج المتوتر، الذي بدأ يفقد القدرة على التحكم بأعصابه، ويظهر هذا جليًا في حركة يده، وبؤبؤتيه.

تململ الزوج دون أن يُعقّب على جملة الرائد، التي حملت تهديدًا واضحًا، وتحذيرًا شديد اللهجة، ولم يحاول الرائد مساعدته على الكلام، فقط ترك الفرصة للزوج لكي يختار كيفية سير التحقيق، وانتظر.

أدرك الزوج أن الرائد لن يتكلم، وأن عليه الإجابة، أو بالأحرى تفسير لقطة الكاميرا، التي كانت لا تزال ثابتة على شاشة اللابتوب، وكأنها تنظر إليه وكحال الضابط، تطالبه بالتفسير. فتململ مُجددًا، ثم قال بنبرة كافح حتى يجعلها محايدة، لا مبالية، وفشل:

- أنا مش عارف انت ليه متحامل عليّ كدا وبتعاملني كمُتهم.. سيادتك لسّا
قایل إنك عارف إن مش انا اللي قتلت ناهد.. طب ليه أنا ملاحظ إني محلّ
شكّ؟ مش فاهم.

معتز شرباش

لم يُجب الضابط، وإن كست ملامحه سحابة غضب، بسبب إصرار الزوج على إنكاره إخفاء أي شيء عن وائل، ظهرت في سرعة أنفاسه، التي كانت ستُخيف الزوج إذا تمكّن من سماعها عبر المكتب، فأكمل الزوج، وقد استعاد ثقته في نفسه نسبيًا، وبدأ صوته بالتدرج يعود إلى الهدوء والاتزان:

- أنا ما عنديش مانع تشك فيّ.. أنا يهمني يتقبض على اللي عمل كدا، وهزّ رأسه بإقرار يمينًا ويسارًا، كأنه يُقرّ حقيقة، ولكنه، دون وعي منه، وقع في خطأ فادح، يوقّعنا فيه، أحيانًا، عقلنا الباطن عندما نكذب، حيث أن هزة رأسه كانت هزة نفي واضحة، لم تُخطئها عين الرائد المُدرّبة.

- بس سعادتك لما تشك فيّ.. يكون بدليل.. وثيقة التأمين اللي سألتني عنها؛ كأنها لم تكن لو انتحرت أو اتقتلت.. وممكن تتأكد بنفسك.. واللقطة اللي سعادتك بتطالبني بتفسيرها دي.. دليل براءة مش إدانة.. أما بخصوص ليه بأبص للكاميرا؟ والله دي ممكن تبقى صدفة.. عيني جات عليها لما رفعت راسي.. مش فاكر.. بس دي مش دليل على أي حاجة أصلًا.

السؤال بقى يا سيادة الرائد؛ إيه اللي حضرتك عملته عشان تقرب من القبض على قاتل ناهد؟ غير إنك بتطارّد شخص كان موجود في مكان تاني خالص وقت قتلها؟

"أفضل وسيلة للدفاع هي الهجوم.. تعجبي" فكّر وائل، ثم ابتسم وأجاب بأدب جمّ:

عُمر الشقي

- عندك كل حق في سؤالك.. والشرطة وأكد النيابة هتعمل كل اللي في وسعها علشان تقبض على اللي دبّر... وضغط على حروف "دبّر". ثم أكمل:

- ونفذ عملية قتل مدام سعادتك.. خليك واثق من كدا.

ووعد شخصي مني أنا لسعادتك يا باشمهندس.. اللي عمل كدا هيتشلق.
اعتبر القضية دي هدف حياتي من النهاردا.

اجتاحت رعدة سريعة جسد الزوج، عندما وعده الرائد بشنق المسؤول عن قتل زوجته، لاحظها وائل بالرغم من أنها لم تدم لثانية واحدة.

ذكّرت الرعدة تلك، برعدة مماثلة رآها في عين شخص آخر منذ سنوات مضت، وسبب تذكّرها الآن إنها جاءت بعد وعد مماثل من الرائد الذي كان على رتبة نقيب وقتها، جاء أيضًا بعد هجوم المُشتبه به وقتها.

تذكر الضابط عندما ذهب ليواجه سالم، في مدينة الأقصر بعد شجاره معه في نقطة التفتيش الشرطة، وتحويل الأول للتحقيق بعد أن قدّم سالم شكوى ضده.

كان سالم جالسًا، ينفخ دخان شيشته، أمام أحد محلات والده، والتي يستخدمها كواجهة لأعمال كثيرة غير شريفة، مستمتعًا بشتاء الأقصر المنعش، اقترب منه وائل بتحفُّز، زاده غضبًا ابتسامة سالم الساخرة، التي

معتز شرباش

استقبله بها، دون أن يتحرك. وقف وائل أمام سالم، الذي نفخ سحابة دخان كثيفة في الهواء، ثم رفع صوته منادياً أحد صُبيانَه:

- هات يا حريقة كرسي للباشا.

لم يتحرك وائل، ولم يرفع عينه عن سالم، الذي اختفت ملامحه، لثانية، خلف سحابة دخان كثيفة مرّت عبر رئتيه، قبل أن ينفخها لتختفي في سماء الأقصر الداكنة، المُطرزة بالنجوم.

جاء "حريقة" بكرسي خشبي، ووضعه بأدب خلف الضابط، الذي جلس في مواجهة سالم، فسأل الأخير مبتسماً بتشفٍ:

- تعسّل يا وائل بيه؟ ولا تشرب حاجة سُخنة؟ ولا كيفك في شيء تاني؟

- شاي يا سالم.

تعكّرت ملامح سالم لثانية واحدة، بسبب مناداة النقيب له باسمه دون ألقاب، وهو الذي توقع أن قدوم الضابط إليه، كان ليعتذر عما بدر منه قبل أيام، بعد تحويل الأخير للتحقيق، حيث ظنّ أن "قرصة الودن" تلك كافية لإخضاع الضابط، ولكنه بدأ يشعُر بخلاف ذلك.

أشار سالم لصبيّه، وقال:

- اتنين شاي بنعناع يا حريقة.

عُمر الشقي

ثم سحب نفساً طويلاً، وعيناه تحاولان سبر أغوار الضابط، ولكن دون أن يسأله عما جاء، فقط انتظر بصبر، حتى قال وائل بعد صمت متوتر:

- أنا عندي موهبة من وانا صغير.

- بتغنيّ اياك !! سأل سالم ساخرًا.

تجاهل النقيب سخريته، فقد توقع أن يتعرّض للاستفزاز، من قبل أن يأتي، واستعد له جيّدًا، ولكنه رغب بشدّة في المجيء، حيث أراد أن يرى عين سالم عندما يهدّده بشكل مباشر.

أراد أن يعرف، وهو يثق في قدرته على كشف ستر الشخص، عن طريق عينيه، فتحامل على نفسه حتى يكمل مهمّته التي جاء مُخاطرًا بمُستقبله الوظيفي كله من أجلها، وقال:

- عندي موهبة الحُكم على البشر من عينهم.. باعرف إن كان اللي قصادي كدّاب ولا صادق.

أوماً سالم برأسه، وقال بنبرة لا تخلو من الاستخفاف:

- دي حاجة حلوة خالص.. على الله بقى تنفعك الموهبة دي في شغلك.. اللي انت سايبه وقاعد تجري ورا ناس مضايقينك مش عارف في إيه.

أجاب الضابط بصوت قاسٍ، لا تردد فيه:

معتز شرباش

- أنا باوعدك يا سالم.. وعد مش هيسقط مهما طال الوقت.. ومهما حصل لي.. وعد يا سالم إن اللي دبّر وقتل دكروري هيتشنق.

اجتاحت رعدة سريعة جسد الزوج، عندما وعده الرائد بشنق المسؤول عن قتل دكروري، لاحظها وائل بالرغم من أنها لم تدُم لثانية واحدة.

"هتفضل القضية دي نقطة سودا في حياتي"

هاجمت موجة كآبة كاسحة الضابط دون إنذار، عندما تذكر أنه فشل في الحفاظ على هذا الوعد، وتمنى أن يحافظ على وعده الذي قطعه لتوّه أمام الزوج، الذي كان يعلم الضابط يقيناً أنه عنده ما يخفيه، ويخيفه.

* * *

- بس شُغلك دا خطير يا عُمر.. مع مُجرمين.. وناس مش كويسين.

- ما تقلقيش.. أنا اللي زي يتخاف منه.. مش عليه.

غمزت، وقالت:

- يا واد يا خطير انت، بس مش مصدّقاك.. شكلك ما يجيبش حد خطير

يتخاف منه خالص.

ضحك عُمر وهز رأسه نافيًا:

- لا مش عشان خطير.. وأدهم صبري في نفسي وكده.. أنا يتخاف مني عشان

ما حدش يعرفني.. ما حدش بيشوفني، أنا زي الشبح يا مريم.

والناس بتخاف من اللي مش بتشوفه قصاها.. الناس بتترعب من اللي

ماتعرفوش، وأنا ما حدش يعرفني.. ولا بيشوفني، عشان كدا بيخافوا مني،

- ازاي ما حدش بيشوفك؟ ولا يعرفك؟ أmaal بتشتغل معاهم ازاي؟ وعقدت

حاجبها بفضول.

ابتسم، وظهرت عليه ملامح التردّد. فقالت:

- أنا مش قصدي اتطفل.. أنا بس... وتركت الجملة مُعلّقة، عندما لم تجد

ما تُكملها به، وكأن فضولها، سيُفهم على أنه اهتمام به، أو لعلّه كذلك.

كانت جاذبيته أقوى من أن تتركها تدور حوله من بعيد كما تفعل الشمس

الرحيمة مع كواكب مجموعتها، كانت كل دورة لها حوله تضيق عن التي

معتز شرباش

سبقتها، وكانت تعلم أن مصيرها الاحتراق، ولكنها لم تعبأ، ولم تخش مصيرها، ولم تحاول الخلاص منه، فقط ارتاحت لتفسيرها الكاذب؛ أن ما يحدث هو مجرد فضول.

حيث أنها كانت ترفض مبدأ الاهتمام به، فوضعت تحت خانة الفضول، كما يُسمي المرتشي الرشوة بـ"الشاي" فتصبح مقبولة.

وكان هو يشعر بها، ويفهم أن فضولها يجب أن يكون أقوى من أن يُرد، وهذا طبيعي، فلا تقابل كل فتاة شاباً لطيفاً، وسيماً، خارجاً عن القانون كل يوم. وهذه تركيبة يصعب مقاومة الفضول والإعجاب أمامها.

أفصح عن عمله، وتفصيل لم يتصور أن يفصح عنها لغريب، ثم شعر بالتردد عندما سألت عن المزيد، وكأنه لم يكن يعلم أن الفضول سينال منها عندما تعرف طبيعة عمله. فلماذا التردد إذا؟ هل يحاول فقط أن يبدو أمام نفسه، وكأنه أجبر على الإفصاح؟

كان يعلم في قرارة نفسه أنه قرر بالفعل مصارحتها بكل شيء في اللحظة التي قال فيها كلمة "شقي". حتى وإن كان قد قالها دون وعي حقيقي منه، فهذا الذي قرر هو لاوعيه، لاوعيه هو، فلماذا إذا التأجيل والتردد؟

نعم يحتاج لصديق، وها هي أمامه، تسأله عن عمله، وهو لأول مرة في حياته، يرغب في الإجابة على هذا السؤال.

كأن لها سحراً أقوى من أن يُبطل.

* * *

عُمر الشقي

كل جُهد يُكافأ، ولو بعد حين.

لا يعلم وائل سبب عودة ذكريات قضية الهجّام سليمان لمطارده، كأحلام يقظة غير اختيارية. ولكنه كان يشعر بأن هناك سببًا لذلك، وكان يثق في حدسه حد اليقين، كأن القضية القديمة تحاول إخباره بشيء، أو كأن هناك رابطًا من نوع ما بين القضيتين.

ارتعد وائل من فكرة أن يكون الرابط هو حدسه الخاطيء؛ حيث أنه يُكرر خطأ، ينفي دائمًا وقوعه فيه أول مرة من الأساس، فحدسه يرفض السماح له بالاعتراف أنه أخطأ بالاشتباه في سالم، وها هو يُكررها ويوجّه شكوكه صوب رجل تثبت كل الأدلة أنه لم يرتكب الجريمة، ليس بريئًا بعد، فقد يكون ساعد ودبّر، ولكنه حتى الآن لا يوجد دليل واحد يثبت هذا، سوى لقطة لا تثبت شيئًا.

فعلها في الأقصر، وها هو يعيدها مُجددًا، يشتبه في شخص، لا يمكن أن يكون قد ارتكب الجريمة، ولكن حدسه، الذي يثق به ثقة عمياء، يؤكد له أن سالم هو من دبّر قتل دكروري في الأقصر، ودبّر توجيه التهمة إلى الهجّام، ويؤكد أيضًا - حدسه - أن عادل هذا، شريك في مقتل زوجته، أو يخفي شيئًا على الأقل، ومن يخفي شيئًا على الشرطة في تحقيق رسمي، هو مُجرم.

عُمر الشقي

هل يُمكن أن يكون وائل على مشارف عدم الوفاء بوعده قطعه مُجددًا؟

وهذا هو وجه الشبه بين القضيتين؟

هل يُحذّره عقله الباطن من خطأ حدسه؟ هل يضيع وقتًا ثمينًا في مطاردة

بريء كما لمَّح الزوج؟

كان يعلم أنه عندما ينجرف خلف حدس، لا يُمكن إيقافه، كموجة بحر

كاسحة.

هل يجب عليه أن ينتبه للإشارات، ويسير في التحقيق وفق ما تقدّمه

المعلومات والأدلة فقط؟

وهل هو أخفق فعلاً في الوفاء بوعده السابق؟

لماذا يرفض حتى مُجرد افتراض أنه أخطأ في الماضي؟ وأن حدسه كان

خاطئًا؟ هل غشاوة غروره أعتَم من أن تسمح له برؤية الحقيقة؟ ومَن من

البشر لا يُخطئ؟

قد يكون الهجّام سليمان خدعه، عندما شعر منه بإمكانية تصديقه،

فتلاعب بحدسه، وأسمعه ما أراد أن يسمع وقتها، ليُجنّده ويسخره لمحاولة

إلصاق الجريمة بآخر، واستغل شجاره - الهجّام - مع سالم قبل القبض

عليه بشهور، ليوجّه وائل وشكوكه صوبه، هذا وارد جدًّا، فسليمان هذا

مُجرم متمرّس، بلا شك.

معتز شرباش

قاسية هي الأفكار عندما تتصارع داخل العقل. لا ترحم، تصيب صاحبها، خاصة إذا كان صاحب ضمير نقي، بالشك. تهاجمه، وتسأله عن كل ما فعل، وكأنها تستجوب مشتبه فيه، مُذنب حتى يثبت براءته. حاول وائل الهروب من دوامة الأفكار، التي تتحول لثُقب أسود تبتلع الوقت، وتصيب عقله بالإرهاك، ولكن دون جدوى. كلما حاول اتخاذ قراره بالسير وفق الأدلة فقط، وإزاحة حدسه جانبًا، منعه حدسه كسدٍ عالٍ بلا فتحات، تسمح لشكوكه بالمرور عبره، ولكن شكوكه أيضًا لا ترحمه، وتضرب سد حدسه ضربات موجعة، تصيب الضابط بالصداع، والألم، والذنب.

"هتفضل القضية دي نُقطة سودا في حياتي"

* * *

مذكرات

١٠

لست بشيطان..

ولا هم..

لا أظن الشيطان في قسوة هؤلاء..

هؤلاء الـ "بشر".

البشر..

تلك الفصيلة التي أنتمى، آسفاً، إليها.

أصبحت الشيطان في نظرهم..

ويا ليتنى شيطان.. انتمائي للبشر عار..

وأصبحت ملعوناً بينهم..

وكيف لا؟ وأنا الذي دنست سُمعة العائلة بأسرها.

شعر الجميع بالارتياح لهذا التفسير.. لأنه لا يتطلب منهم مواجهة

صاحب النفوذ، واتهامه بالقتل..

معتز شرباش

شَعَرُ الْجَمِيعِ بِالنِّقَاءِ وَالْعِفَّةِ.. بَتَدْنِيَسِ نِكْرِي أَطْهَرَهُمْ..

صَدَّقُوهُ حُدَّ الْيَقِينِ..

لَأَنْهَمُ أَرَادُوا ذَلِكَ.

وَبَقِيْتُ أَنَا الْمَلْعُونُ بِعَجْزِي عَنْ حِمَايَتِهَا..

لَمْ أَتَصَوَّرْ أَنْ يَأْتِيَ الْيَوْمَ الَّذِي يَتَحَقَّقُ فِيهِ الْحَلْمُ، الَّذِي كَانَ لِي حَيَاةً..

لِيَقْتُلَنِي..

كُلُّ مَا أَرْغَبُهُ، بِقَدْرِ رَغْبَتِي فِيهَا، وَأَكْثَرُ، أَنْ أَعَاقِبَ هَؤُلَاءِ..

* * *

٤١

كان والد عُمر رجلاً بسيطاً، يتميز بالذكاء، وسوء الحظ، لم يحظَ بالمال الوفير، ولكن رزقه الله الرضا، لم يكن غنياً، ولكنه استغنى، لم يحظَ بعُمر طويل، ولكنه عاش سعادة عُمر طويل.

يتذكر عُمر سنواته القليلة التي عاشها مع والده، قبل وفاته بسبب ذبحة صدرية، لم ينتبه لها والده، وعالجها بمُسكن أودى بحياته، ويتذكر معاناة والدته، وعملها كمسؤولة توزيع في إحدى دور النشر، بعد وفاة والده حتى تؤمن له نفس مستوى الحياة المتوسطة التي أمّنها لهم والده، من خلال عمله كمُدّرس لغة إنجليزية بسيط الحال، حتى جاءها هبوط حاد في دورتها الدموية، ليحرمه منها هي الأخرى.

تعلّم عُمر من والده الرضا، والقُدرة على رؤية الجانب المُضيء في كل شيء. فكانت أحلامه بسيطة جداً. ولكنه تعلّم أيضاً أن أكثر ما يمكن أن يُرهق الروح، وخاصة روح شخص لا ينسى مثله، هو الفُراق.

تعلّم أن كل شجرة مهما طال عُمرها، سيأتي يوم عليها تُنتزع من التربة، وأن مقدار ألم انتزاع الشجرة من تُربتها، يساوي مدى قوّة جذورها، وعمقها. فعُمر الجذور، وقوّتها، لن يمنعا انتزاعها، ولكنهما سيزيدان ألمه قسوةً.

تعلّم أن الدنيا جميلة، ولكن كالحلم، ففضّل الاستيقاظ، فالواقع برغم بشاعته، فهو على الأقل حقيقي، وصادق.

معتز شرباش

يتذكر عُمر كل شيء، ولكن أكثر ما يتذكره سحرًا وجمالًا، كانت ألعاب والده السحرية، والتي كانت موهبته الخاصة، حيث كان يتمتع والده بخفة يدٍ مُذهلة. لم يَمَل عُمر من ألعاب والده، مهما كرّرها أمامه، بالرغم من أنه كان يتذكرها، ككف يده.

تعلّم من والده أن الحيلة تحدث أمام عينه، ولكنه لا يراها، لأن الساحر الجيّد هو الذي يوجّه نظر جمهوره، صوب الجهة المعاكسة لتلك التي تحدث فيها الخدعة.

شَبَّ عُمر، وأكمل تعليمه بمساعدة ما تبقى له من إرث ضئيل، وعمل مؤقت التحق به حتى تخرّج، ثم قرر أن يدرس تصميم مواقع الإنترنت، ففعل، حتى أتقنها، وبدأ في تأسيس شركة خاصة، سماها Drafts، كانت أرباحها تكفيه، ولكنه لم يشعر أبدًا بالانتماء، بعد انتزاع القدر كل من اهتم لأمره، وتركه وحيدًا.

كانت ذاكرته، وعقله الذي لا يهدأ، تُشكّلان عقبة في طريق راحته، فلم يرتح يومًا.

- انتِ مُتخيلة يعني إيه ما بانساش؟ مجرد ما آجي أحاول أنا.. أفضل افتكّر كل حاجة، كلمة راحة دي الحاجة الوحيدة اللي نسيتمها.. أو ما عرفتماش أصلًا.

عُمر الشقي

لم تُجِبَ مريم، فقط هزّت رأسها بتعاطف حنون، وتركته ليكمل قصّته، التي أسرتها.

- حاولت افصل دماغي بالقراءة.. أدمنتها.. بس بالوقت أدركت إني مش باعالج نفسي.. أنا باعمل العكس.. لأنني بازود المواد اللي عقلي بيستخدمها ضدّي.. بقيت عايش بدل حياتي ألف حياة.. وعقلي بقى يعذبني كل يوم.. مش بس بذكرياتى.. لأ بذكريات لأبطال روايات حبيتها وروايات كرهتها.. زي الطاعون مثلاً.

وابتسم، فاستجابت بابتسامة مُتفهمة، عذبة.

- الرياضة كانت بتساعد كثير.. لما باتعب وباهلك.. دماغي مش بتشتغل زي العادي.. عملت قرشين وجبت كام جهاز في البيت اتمرن عليهم.. عشان ما اختلطش بناس في چيم أو غيره.. وشغلي كله كنت باعمله بالإيميل.. ومن منازلهم، بس فضلت تعبان. وتنهّد، ثم أكمل:

- بقيت امارس رياضة بس بشكل غريب.. بقيت مثلاً امشي على سور البلكونة.. أطلع السطوح أجري على السور.

اتسعت عيناها رُعبًا، في عدم تصديق، ولكنها لم تقاطعه.

- كنت اتعلق برّا البلكونة في عز الليل.. ومنها أنط على بلكونة الجيران.. وامشي على السور من برّا زي Spiderman. وضحك مستمتعًا بخوفها، فقالت:

- إيه الجنان دا؟ أنا مش فاهمة.. ليه يعني أصلاً؟ عاوز تموت؟

معتز شرباش

- تؤ.. مش عاوز اموت.. بس انا اكتشفت إن الأدرينالين بيسكّن دماغي.. ولا أجدع مُخدر. وبعد شوية قراية وبحث اكتشفت إن في ناس فعلاً بتدمن الأدرينالين.

عارفة لما تخافي فجأة.. وتلاقي أطرافك بتترعش.. وجسمك كله مهزوز كدا؟ دا تأثير الأدرينالين.. أنا بقي أدمنت الشعور دا.. لأنني اكتشفت إنه بيسكّت دماغي نهائياً.. ومفعوله بيستمر لساعات طويلة.

بانام يا مريم زي الطفل.. بعد كل عملية.. وولا باحس بحاجة، دي نعمة والله.

بس طبعا بعد فترة من الحركات العبيطة دي.. أتقنتها.. وما بقيتش باخاف منها.. وطبعاً بسبب عدم خوفي منها ما بقاش الأدرينالين اللي بيفرزّه جسمي كفاية.

ثم تنهد وصمت لثوانٍ، وكأنه سيبدأ بعد الاستراحة فقرة جديدة من حياته:
- لحد ما حصلت حاجة غيّرت حياتي.. علامة. وأشار إلى السماء.

* * *

٤٢

- يعني انت شُفته وهو خارج الصُبح لوحده؟

سأل الرائد وائل، بؤاب العمارة التي حدثت بها جريمة القتل، وهو يُشعل سيجارته، ثم رفع منفضة السجائر، وأفرغ محتوياتها في سلّة القمامة أسفل مكتبه، عندما لم يجد مكانًا يترك فيه سيجارته المُشتعلة، بسبب امتلاء المنفضة، ودارت في مُخيلته صور مرضى سرطان الرئة، عندما أدرك أنه دخّن ما يفوق ضعف مُعدّله الطبيعي، كعادته أثناء التحقيق في قضية صعبة.

- لا يا بيه.. الكذب خيبة.. أكيد كنت باجيب طلبات من برّا.

- ولما رجع؟ قابلته؟ ورفع قهوته، تقريبًا العاشرة، لِيُزيد مُعانة جسده الصحية.

- أيوة يا بيه دخل من باب العمارة على السلم على طول ولا سلام ولا كلام.

- ما ركبش الأسانسير؟ سأل عاقدًا حاجبيه.

- لا يا بيه.. أنا فاكر كويس.

- كان شكله مستعجل؟ عشان كدا ما استناش الأسانسير؟

معتز شرباش

- لا لا يا بيه.. الأسانسير كان تحت.. بس هو طلع على السلم على طول.. أنا فاكّر عشان حاولت أندّه له.. أقول له يركب الأسانسير.. بس ما سمعنيش.. ما خدش باله أكيد وهو في حالته دي.. وعرفت بعدها اللي حصل لما طلعت.
- إيه اللي يخليه يطلع ٦ أدوار على رجله؟ سأل الرائد بخفوت، وهو يدوّن شيئاً ما في مُفكرته، وكأنه يسأل نفسه. فأجاب البوّاب:
- ما انا بقول لسعادتك هو أكيد... قاطعه الرائد بإشارة من يده، أن يصمّت، ثم عاد إلى أفكاره، ومُفكرته.

* * *

٤٣

استيقظ عماد على صوت رنين هاتفه المحمول، مصحوبًا بلعق صوفي كلبته لوجهه، وكأنها تعلم بأهميّة المكالمة، وتُحثّه على الرد، حتى لا يفوتها. ففتح عينيه، وأزاح كلبته عنه برفق، ونفض رأسه بقوة، محاولًا عبثًا طرد صُداع احتلّها.

مدّ يده وتحسس حوله، حتى وجد الهاتف، ففتح الخط دون معرفة من المتصل:

- ألو، ثم تذكّر أنه لم يعرف المتصل، فرفع الهاتف عن أذنه، ونظر إلى شاشته، ولكن ضوءها ألم عينه، فأبعده وأغلق عينه لثانية، ثم أعاده إلى أذنه وقرر أن يعرف المتصل على طريقة التسعينيات. فجاءه صوت أسماء الناعم التي كانت قد تحدثت منذ الثانية التي فتح فيها الخط، فلم يفهم عما تتحدث:

- ...حلو كدا بقى زي اللي فاتوا.. دي فرصة عشان لو طلعه...

- ششششششششش. صاح عماد، ثم أكمل هو يقعد على طرف السرير:

- ما لك يا بنت المجنونة ع الصبح؟ مش فاهم منك حاجة.

- اسمع يا زفت.

- عاوزه إيه؟ قال بضيق، وهو يمسح جبهته، على أمل إزاحة الصداع.

معتز شرباش

- القيادات في الحركة هيتحركوا النهاردا على الأرض وعلى النت عشان في واحد مات في قسم شرطة من التعذيب.. أنا بعثك القصة كلها على الميل.. كنا عاوزين مقالة شديدة كدا على أكونت حشرة.. بس خُد بالك دي فرصة كبيرة.. الحكاية المرة دي سُخنة.. والاهتمام بيها هيكون على مستوى عالي جدًا.. محليًا وخارجيًا.. ركّز.. عشان المقال دا لو سمّع.. انت هتتنقل نقلة تانية خالص.. وهتسيب الشغل وتقب على وش الدنيا.. اسمع مني.

يلا.. أسيبك أنا عشان بنحضر لمسيرة.. وهاستنى منك تليفون.. بس في أسرع وقت يا عماد.. القصة كل ما تنزل بدري كل ما هتتخدم أكثر، سلام، وأغلقت الخَط.

ألقي عماد بالهاتف على السرير بإهمال، وأراح ظهره بعرض السرير، وحاول أن يسترخي، ولكن إثارة مكالمة أسماء احتلت كيانه، ونفضت عنه كسل النوم، فقام وقد قرر أن يستغل الفرصة التي جاءته على طبق من ذهب، وإن كان مُلطحًا بدماء أحدهم، هذا الذي قُتل مُعدَّبًا.

قفزت خلفه صوفي من على السرير إلى الأرض بنشاط، وكأن حماسه انتقل إليها، أو شعرت به، فعزمت على مساعدته، وتشجيعه.

٤٤

- حصل إيه؟! سألت مريم بفضول ولهفة.

- لقيت اللي كنت بادور عليه.. فجأة وبدون مُقدمات. ثم تغيّرت ملامح وجهه،
وسأل:

- تشربي حاجة تانية؟

ضحكت، وقالت:

- إيه يا ابني انت مش طبيعي كدا عادي؟ ماشي.. قهوة.

ضحكا، وطلب قهوة لكل منهما، ثم أكمل بحماس:

- كنت سهران ليلة.. ولقيت حد منزل على facebook قصة قصيرة لولد
اسمه نادر.. اسمها "عُمر الشقي".

باختصار وبدون الدخول في تفاصيل.. أنا لقيت نفسي في بطل القصة.. لو
عاوزة تقرّيبها أبقى ابعثها لك.. أنا الوحيد اللي عنده منها نُسخة، وأشار إلى
عقله، ثم أكمل:

- لأنني مسحتما بعد كدا من كل حنة ع النت.

- ليه!!?

معتز شرباش

- اصبري.. جاي لك في الكلام. وانتظر حتى وضع محمد القهوة أمامهما، وغادر، والغيرة تملأ عينيه، لأنه اعتاد أن يرى مريم بمفردها، وها هي تجلس لساعات مع غريب، جاء قبل يوم، وتعرّف عليها بشكل أو بآخر، تحت أنفه. لم ينو محمد أبدًا أن يبدأ علاقة مع مريم، أو يصاحبها، ولكنه شعور أناني، غير مُفسّر، ينتاب الرجل الشرقي عندما يشعر أن تلك الفتاة التي يعرفها، ولو بشكل عابر، تعرف غيره، وكأنها كانت له، ولم تُصبح كذلك، أو كأنه أولى بها، برغم عدم وجود لديه أية نيّة للتقرب منها.

- القصة دي كانت بتتكلم عن شاب خسِر كل حد له في الدنيا في حادثة نجا هو بس منها.. بما فهم خطيبته.. كان بائس حد الرغبة في الموت.. ولما كان أجبن من إنه ينتحر.. قرر إنه يعمل عمليات مجنونة كنوع من الانتحار المُقنّع.. كان بيسرق محلات ذهب تحت تهديد السلاح.. ومكاتب صرافة.. وصل به الفُجر إنه يسرق خروف صاحي من محل جزّارة. ضحكت باستمتاع وهي مأخوذة تمامًا بحكايته.

- المهم إن القدر والحظ كانوا بيساعدوه كنوع من السُخرية منه.. ومن رغبته في الموت.. عشان كذا نادر سمّاها "عُمر الشقي".. المهم إن الموضوع اتطور بالبطل لما قابل بنت في واحدة من عملياته.. وبعدي... ثم قطع سرده، وقال مُختصرًا:

عُمر الشقي

- مش هاحرق لك القصة. لم تُخطئ عيناه لهفة مريم على سماع قصة بطل "عُمر الشقي" مع الفتاة، ولم تُخطئ أيضًا حسرتها عندما قطعها، ولكنه لم يُبين، وأكمل بنفس الحماس تاركًا إيّاها مُعلّقة برغبتها في سماع باقي القصة:

- أنا لما قرّيت القصة.. اكتشفت إن هوّ دا اللي أنا محتاجه؛ الشعور بالخطر.

المهم إن القصة وصلت إنه كوّن فريق عمل من ٣.. واحد راس مدبّر.. ومُخطط رائع.. عشان هو نزعتة الانتحارية مكانتش تناسب اللي كان عاوز يعملها بعد ما اتعرف على البطلة.. فبقى محتاج حد يفكر.. ويوجهه صح.. وطبعًا كان محتاج واحد هاكر كمبيوتر على أعلى مستوى.. وأخيرًا طبعًا المجنون اللي مش بيخاف.. البطل اللي بيقوم بالعمليات بنفسه. وأشار إلى صدره، وابتسم.

فسألت بفضول وهي تُعيد فنجانها على طبقه:

- وبعد ما قرّيت القصة ولقيت نفسك فيها؟

- قرّرت اعمل زيّ هشام.

- هشام مين؟

- بطل القصة.

كشّرت ملامحها، وقالت:

معتز شرباش

- مش لايق.

- هو إيه؟!

- الاسم.. قصة اسمها "عُمَرُ الشَّقِيّ" لازم بطلها يكون "شقي".. واسمه "عُمَر". وابتسمت ابتسامة ساحرة، لم تمنعه من ملاحظة احمرار وجهها خجلاً. فقال باسمًا:

- ماهو حَصَل فعلاً.. وساعتها القصة ممكن يبقى اسمها "عُمَرُ الشَّقِيّ" أو "عُمَرُ الشَّقِيّ". وغَمَز، وأشار إلى نفسه مُجددًا.

* * *

مذكرات

١١

أبرياء..

هؤلاء القتلة، كلهم، أبرياء..

في نظر القانون أبرياء..

الغيبة والنميمة لم تُجرّم في قانون البشر..

لأنه قانون البشر.

لذلك هم في نظر بعضهم البعض أبرياء..

رحلت من كانت رمزاً للبراءة..

وكان رحيلها نزع براءة كل شيء..

فلم يتبق سوى الدنس.

دنس، نجس، لَطَخَ أمامي كل من حاول تلطيخ سيرتها.

لن تُخلصهم من هذا الدنس، حتى وإن قامت وصُلبت في سبيل

خلاصهم..

معتز شرباش

فهذا الدنس جزء من بشريتهم الدميمة.

بعد رحيلها لم يبق سوى هؤلاء..

البشر..

لم يبق سوى القتلة..

البشر قتلة..

كل البشر..

* * *

٤٥

- أنا بصراحة يا وائل بيه قلت إنه صوت حاجة اتكسرت.. أو باب اترزع..
بس الجماعة هي اللي أصرت إنه صوت مسدس. قال ماهر المحامي، جار
المهندس عادل، فسأل وائل مُستوضحًا:

- جماعة إيه؟

- جماعتي حضرتك.

- آه.. المدام.. ماعلش أنا شارب ٢٠ قهوة ومخلص علبتين سجائر في كام
ساعة.. سامحني، طب ولما كلمته في التليفون.. لاحظت أي حاجة غريبة
عليه؟ أي حاجة.

قال المحامي وهو يُعيد كوب الماء إلى الطاولة الصغيرة أمامه بعد أن فرغ:

- لا والله يا وائل بيه.. أنا بعد ما عرفت اللي حصل توقعت أسئلة سعادتك..
أنا محامي برضه ومش جديد في القصة.. دورت المكالمة في بالي كذا مرة..
كانت طبيعية جدًا.

- إزاي؟

- إزاي إيه؟ باستغراب.

- إزاي كانت طبيعية جدًا؟! انت متصل بواحد تقول له سمعنا صوت ضرب
نار في شقتك.. قُل لي إزاي المكالمة دي ممكن تكون طبيعية.

معتز شرباش

توتر المحامي، وزاده توتره توترًا، حيث أنه كان ممن يُحبون التملق لرجال الشرطة، وإخفاقه في إبهار الضابط، يُقلل، من وجهة نظره، من فرصه - المنعدمة من الأساس- في أن يصبح صديقه قريبًا، فبدا كالطالب الذي يخضع إلى اختبار شفوي، يعتمد مُستقبله كله على نتيجته، في مادة لا يفقه فيها شيئًا، ونسي أن يُجيب، حتى ذكّره الرائد.

- ها؟! احكي لي كدا.. كانت طبيعية ازاي؟

قال بصعوبة، بصوت ملاء الشك، والتردد، بعد أن فقد الثقة في كل إجاباته التي أعدّها وتمرنّ عليها قبل المثل أمام الضابط:

- يا وائل بيه اقصد إنه ما قالش حاجة غريبة.

- وانت مش شايف إن دي في حد ذاتها حاجة غريبة؟

- مش عارف والله يا... قاطعه وائل بضيق وقال:

- يعني ما وصلكش إحساس إنه كان متوقع المكاملة؟ ركّز وافتكّر كويس..

هدوؤه وكلامه بطبيعية ما كانش طبيعي زيادة عن العادي؟

قال المحامي بتسليم:

- عندك حق يا وائل بيه.. فعلاً. ثم اعتدل بحماس وأكمل:

- آه.. هو ما استغريش خالص.

شعر وائل أن المحامي يقول ما شعر هو أن الضابط يريد أن يسمعه، فقال له، دون يقين منه، فقرر أن يتخطى تلك التفصيلة، لأن شكّه في صدق المحامي، ينسف يقينًا يحتاجه الضابط لكي يشتبه في الزوج بضمير مرتاح.

عُمر الشقي

- طب ولما رجع البيت؟

أجاب المحامي وقد استعاد صوته ثقة افتقدتها لثوانٍ:

- بعد المكالمة يبجي بساعة أو أقل حاجة بسيطة خبط عليّ.. وطلب مني اتصل بالشرطة. ودخل الشقة وفضل قاعد زي ما سعادتك جيت لقيته. وما حدش فينا أنا ولا الجماعة دخل الشقة.. عشان أنا وصييتها إن هيبقى في تحقيق وممكن نلمس حاجة تئذي التحقيق. وأراح ظهره برضى واضح عن نفسه.

أغمض وائل عينيه، محاولاً تجنّب الألم النفسي الذي يتعرض له أثناء مشاهدة المحامي يقوم باستغلال جريمة قتل في إثبات عبقريته المنعدمة، وسأل بصوت من لا يحتمل المزيد من السخافة:

- ولما جه من برّا ما حدش قابله قبل ما يدخل الشقة؟

- لا يا بيه.. أنا كنت مستنيه ورا الباب بصراحة.. كنت هاعرف إنه جه من صوت الأسانسير.. بس سيد البواب قال لي إنه ما استناش الأسانسير وطلع جري ع السلم.. عشان كدا ما سمعتوش.. وما عرفتش إنه جه إلا لما خبط عليّ.

تذكّر وائل الصوت المزعج الذي أصدره المصعد عندما وقف به في الدور السادس، يوم ذهب لمعاينة الشقة.

أضاءت فجأة في رأسه فكرة، وانهمرت التفاصيل، تسقط في أماكنها الصحيحة، كأحجية تحل نفسها، بنفسها.

معتز شرباش

"خرج الضابطان من مصعد البناية، فأصدر المصعد، كإشارة للتوقف، صوتًا عاليًا، وكأنه قطار يُعلن وصوله لوجهته."

"- لا لا يا بيه.. الأسانسير كان تحت.. بس هو طلع على السلم على طول.. أنا فاكّر عشان حاولت أنه له.. أقول له يركب الأسانسير.. بس ما سمعنيش.."

"كان الزوج على شاشة اللابتوب، في تلك اللحظة، ينظر مباشرة إلى عدسة كاميرا التصوير، وكأنه يريد أن يتأكد من أن تلتقط الكاميرا صورة وجهه كاملاً، لتثبت وجوده في هذا المكان، في تلك اللحظة."

"هتفضل القضية دي نقطة سودا في حياتي" !!

تحركت فكرة ما، في آخر مجال رؤية وعي الضابط، على أطراف لاوعيه. شعّر بوجودها، ولكنها اختفت بمجرد محاولته الإمساك بها، كتلك الأشباح التي تتخيل وجودها في أركان الغرفة المظلمة، عند قراءتك لإحدى قصص الرعب، وحدك بالمنزل، في ليل شتوي كئيب.

ولكن على عكس الأشباح، كان الرائد واثقًا، حدّ اليقين، من وجودها، ولكنه لم يتمكن بعد من القبض عليها، ولكنه كان يعلم أنها ستسقط قريبًا في فخ سعيدهُ لها في وعيه، هو فقط يحتاج إلى استدراجها إليه بالمزيد من التفاصيل، التي سيكشفها التحقيق.

* * *

٤٦

خرج عماد من غرفة نومه، ليجد شخصًا غريبًا في صالة شقته الصغيرة. سرت رعدة فزع في جسده كله، تبعثها دفعة أدرينالين، تسببت في ارتعاش يده، التي رفعها ليُشير إلى الزائر المجهول، الذي يخفي الظلام ملامحه، ويزيد من رعب عماد.

- انت مين وبتعمل إيه هنا؟! صرّخ بصوت عالٍ.

- أنا محتاج أسألك كام سؤال.. لو جاوبت عليهم بسرعة.. هاختفي زي الكابوس اللي صحيت منه، ولا مش عاوز تصحى؟!

تحرك عماد بهدوء خطوات قليلة، وكأنه في مواجهة وحش نائم، ويخشى إصدار أي صوت يوقظه، أثناء تحدّث المجهول، الذي كانت ثقته في نفسه أعلى من أن تسمح له بملاحظة حركة عماد الهادئة، والتي فسّرها على أنها حركة غير مقصودة بسبب الخوف.

وفجأة التقط مضرب Baseball ثقيل، كان يبعد عنه خطوات، قطعها عماد بذكاء، وهجم على المجهول، الذي لم يتوقع الهجوم، ولا الضربة التي شقت رأسه نصف...

معتز شرباش

خرج عماد من غُرفة نومه، بسبب سماعه لصوتٍ غريب في صالة منزله، حاملاً في يده مضرب Baseball ثقيل، وحاشداً كل ما يملك من أسلحة، وهي مَضربه الذي يبقيه في متناوله دائماً، والكثير من التحفُّز، وجرعة أدريالين تعرف عملها جيِّداً.

فتح باب غُرفته، ليجد على بُعد خطوات منه، رجلاً غريباً، تفصلهما كنبته الكبيرة، مما جعل من المُستحيل على عماد، أن يصل إلى الرجل، قبل أن يُرديه مُستخدماً هذا المسدس الضخم، الذي تأكد المجهول من إظهاره بوضوح، في وجه عماد، برغم ضوء الصالة الخافت.

توقف الزمن لثوانٍ، حتى قفز كلب عماد الأسود الضخم على ظهر المجهول، والذي حَرم لونه، الغريب من ملاحظة وجوده عند تسلُّله إلى الشقة، وأطبق فكَّه على رقبة الغريب، الذي تأوه في ألم واضح، وسالت الدم...

خرج عماد مُسرِعًا من عُرفة نومه، بعد سماعه صوت تأوه كلبه الضخم، كان الكلب يتأو وكان هناك وحشًا يلتمهه حيًا. تسمّر غير مُدركٍ لما يراه أمامه لثوانٍ، مرّت وبدأت تتضح رؤيته، وكأن كان هناك سحابة دُخان، وانقشعت تدريجيًا عن عقله، فرأى أمامه رجلًا غريبًا، ممسكًا بيده صاعقًا كهربائيًا، وإلى جواره كلبه، بعد أن تحوّل إلى نُسخة أليفة منه.

ترجم عقل عماد ما حدث؛ تسلل أحدهم، وصعق الكلب، حتى أدرك الحيوان، بغريزة البقاء للأقوى، أنه لا قبل له بهذا الذي بضغطة زر، يستطيع تحويل جسده إلى جحيم بلا مفر، فهدأ عند قدميه.

رفع الغريب مسدسًا كبيرًا، لا يقل إرهابًا، لعماد، عن الصاعق للكلب، في وجه الصحفي، وقال بصوت لطيف لا يناسب جبروت صاحبه:

- هما سؤالين وهاختفي زي الكابوس اللي بتحمد ربنا إنك صحيت منه، ولا انت مش عاوز تصح...
لم يتوقع الزائر الطاسة التيفال، التي اصطدمت بوجهه فجأة كقطار دون قضبانه، والتي ضربه بها رفيق عماد في السكن حتى يضع نهاية كوميدية، لمشهد مرع...

معتز شرباش

استمر نادر لساعة كاملة، يتوقع كيفية سير الزيارة، التي لا مفر منها، التي سيقوم خلالها عُمر باستجواب عماد، حتى يعرف منه مصدر معلوماته التي كادت تفضح عملياتهم، التي ظنَّها نادر عصيَّة على الفضح.

في نهاية مُحاولاته، التي استمتع خلالها بقتل عُمر أكثر من مرة، وضحك كثيراً، توصل إلى كل العوائق التي قد تُعيق استجواب عُمر المهم، ورسم خطة العمل، وأرسلها إلى عُمر، عبر هيثم، ومعها قراره فيما يخص امتناع ثروت هذا عن سداد مُستحققاتهم.

* * *

٤٧

عاد عُمر إلى مريم حاملاً كيساً بلاستيكيًا، وضعه على شنطة
سيارتها، وانتظر إلى جوارها، يقرأ "إيميلاً" وصل إليه لتوه من نادر، عبر
هيثم، حتى تنهي هي مكالمته، كانت تبدو مُهممة.

- لا يا ماما.. ما فيش والله.. شوية زهق بس.. حاضر مش هاتأخر،

وبعدين يا ماما لسنا بدري.. الساعة ما جاتش ستة أصلاً.

- انتِ نازلة من الصبح يا مريم.. وحياتي عندك ما تقلقيني عليك.. فيه
حاجة؟

- يا ماما مانا باكلمك أه.. فيه حاجة إيه بس؟ اتغدي انتِ.. وانا هاطمنك
عليّ كل شوية.

ثم مالت برأسها بعيداً عن عُمر حتى لا يسمع، وأضافت:

- يا ماما انتِ كل يوم تقولي لي اخرجي.. واتفسحي.. وعيشي حياتك.. ولما
اسمع كلامك تندميني كدا؟

- يا حبيبتي اعملي اللي نفسك بيه.. بس قولي لي.. أنا ما حيلتيش غيرك
اخاف عليه.. ويشيلني.

- حاضر يا ماما.. بلاش دراما بقى.. أنا زي الفل ومبسوطة.. ومش هاتأخر
والله.. يلا بقى سلام عشان الأكل جه.

- خدي بالك من نفسك يا حبيبتي.. مع السلامة.

معتز شرباش

أعادت مريم هاتفها إلى جيبها، ونظرت إلى عُمر بخجل، وقالت مُهدّدة، حتى تداري حمرة وجهها:

- اوعى يكون حَطّ بصل.. هارجّعك بهم.

فضحك وقال:

- تصدقي نسيت اقول له يزود البصل عندك؟!

نظرت له مُتفحّصة، والسيارات خلفها، تعزف مقطوعة غير موسيقية، يتجاهلها عقل من تعود على العيش في العاصمة الصاخبة، ولكنها قد تصيب الزائرين، من مُعتادي الهدوء بالهلع، حتى يعتادوا عليها. كانا قد صفا السيارة، في أحد شوارع مصر الجديدة، العتيقة، ذات العمارات أوروبية التصميم، واشترى عُمر "سندوتشات" ووقفنا يأكلاها، على جانب الطريق، على غير عادة مريم، فهي لا تتذكر أنها قامت بهذا أبداً من قبل.

قالت وهي تنظر خلفها، صوب سيارة أطلق سائقها بوقها، لدقيقة كاملة، حتى يتعجّل السيارة التي أمامه، لتسير، في حين أن الطريق أمامهما مليء بالسيارات، ولا يوجد سبيل للسير، سوى الانتظار، الذي لا يطيقه مُطلق البوق المُزعج.

- ها؟! قل لي بقى.. إيه المشروع اللي شغال عليه حالياً.. وقّلت مطلع عينك وتاعبك؟! سألت وهي تمضغ أول قضة من "السندوتش"، الذي بدا من ملامحها، أن طعمه راق لها كثيراً.

عُمر الشقي

- مخلّل؟! سأل عُمر وهو يناولها شوكة بلاستيكية، غُرزت في قطعة خيار
مخلل صغيرة.

نظرت صوب الشوكة بتوجُّس، وقالت:

- أنا مش فافي والله.. بس الأكل بالذات لازم يكون مغسول كوي..

مد عُمر يده صوب فمِّها ليُسكتها، ففتحته دون إدراك، والتهمت الخيارة،
فراقت لها، وضحكت رغماً عنها، فاضطرت إلى ترك السندوتش، ووضع
يدها على فمِّها، لتمنع الطعام من الوقوع خارجه، وقالت:

- يا ابني هتموتني.

ضحك ولم يجب على جملتها، ولكنه أجاب على سؤالها، وكان ما حدث
لتوه، لم يحدث:

- المشروع اللي شغال عليه.. المفروض خلص خلاص.. بس حصلت مُشكلة
واحدة.. وعقدت القصة كلها، وللأسف مُضطر أعمل حاجة مش باحب
اعملها خالص.. بس مُضطر.

سألت باهتمام وهي تلوك الطعام باستمتاع ملحوظ:

- إيه الحاجة دي؟!!

- أسرق.

- لمون يا ابني للحاجة.. وهات لي قهوة. قال وائل للساعي، ثم نظر إلى والدة السيدة المقتولة، وقال بتعاطف:

- ربنا يصبرك يا ماما.. أنا مش هاطول عليك.

- ربنا يبارك لك يا ابني.. اتفضل. قالت السيدة بأسى، وفقدان طاقة.

- كان في أي نوع من المشاكل بين ناهد وجوزها؟! أي حاجة تخلّيه... يعني... عاوز يخلص منها؟

نظرت له السيدة المُسنّة بوعي غائب، متسائلة، فأضاف موضّحًا:

- دا شغلي ماعلش.. بنراجع كل الاحتمالات.. ماعلش.. جاريني وجاوبي على السؤال من فضلك.

- لا يا ابني ولا يهملك.. أنا بس مش متصورة عادل يعمل كدا.. وبعدين ما هو حضرتك ما كانش معاها.. مش كدا ولا إيه؟!!

قال وائل بؤد، بعد أن بذل مجهودًا كبيرًا في إخفاء ضيق انتابه من سؤالها:

- يا حاجة ما تشغيلش بالك انتِ هو كان فين.. ولا حصل ازاي.. دا شغلنا

احنا.. ساعديني اعمله من فضلك.. ها؟! كان فيه بينهم مشاكل من أي نوع؟

صمتت لثوانٍ، بدت خلالها وكأنها لا تنوي الإجابة، وكان السؤال لم يصلها

من الأساس ثم قالت بصوت بحّة الألم:

عُمر الشقي

- لا يا حضرة الظابط.. هو راجل بارد جدًّا.. وعمري ما شُفته متعصب.. ولا حتى ناهد بنتي عمرها حكيت لي إنه شخط فيها حتى.
هو كان بيعحبها.. بس هي ما كانتش بتحبه.. بس ما كانتش فيه بينهم مشاكل وخناق.

وموضوع الخلفة دا كان كاسر عينه قصادها.. وقصاد العيلة عندنا.. وهي طلبت الطلاق.. وهو كان رافض.. وكان بيقول لو الخلفة هي السبب نحاول بالعمليات.. بس هي كانت رافضة.
هَزَّ الرائد رأسه، وصمت لثوانٍ، لعلها تُضيف، ثم قال، عندما أدرك انتهاءها:

- تفتكري ممكن يكون عمل كدا؟

- إن بعض الظنِّ إثم يا ابني.. بس أنا طول عمري باخاف من الراجل اللي بيكتم دا.. الراجل العصبي.. اللي بيقول كل اللي جواه أول بأول.. بيبقى طيب زي العيل الصغير.. لكن اللي بيكتم وما ينطقش دا يتخاف منه..
الكتمة وحشة يا ابني.. وبتحرق الجتة.. وبتخلي شيطانك صاحي.. ربنا يرحمها.. كانت بتخاف منه وهو ساكت أكثر من أي وقت تاني. وبكّت بصوت خافت، حزين.

توقفت مريم عن الأكل، وقالت دون انتباه للفتات الذي طار من فمها:

- تسرق؟!!!

ضحك عُمر عندما تداركت هي موقفها، وأغلقت فمها الذي تدلى في استنكار

واضح، ووضّح:

- هاسرق حقّي.

قالت بنفور مُستنكرة:

- ما فيش حاجة اسمها كدا.. لو حقك.. مش هتحتاج تسرقه.

قضم بنهم من طعامه، ثم سأل بصوت عالٍ، حتى لا تغطي عليه أبواق

السيارات:

- طب ولو حد سرق مني حقّي؟ مش من حقي اسرقه؟

- احنا في بلد فيها قانون. بغضب.

ضحك وقال:

- يا بنتي اهدي بس.. قانون إيه؟ أنا أساسًا عامل عملية لو اتمسكت بعملها

هتحبس.. واللي طلبها مش عاوز يدفع حسابي.

عُمر الشقي

- ما هو عشان بتشتغل مع مُجرمين.. تستاهل.

- يعني أنا غلطان إني حكيت لك.. مش اتفقنا من الأول ما حدش يحكم ع
التاني؟

تهتدت بضيق، وقالت:

- عندك حق أنا آسفة.. بس ماعلش يعني؛ ما هو أنا طبيعتي مش قابلة اللي
بتقوله دا لسا.

ابتسم، وقال:

- عارف.

- طب واللي هتسرقه دا يا عُمَر مش حد خطير؟ ممكن يئذيك.

- مش قُلت لك أنا ما حدش يعرفني أصلاً؟ وبعدين هو لو خطير.. كان
احتاجني أعمله شغله الخطير؟

- مش مُقتنعة.

ضحك ولم يُجب، فقالت:

- طب بس بشرط.

- هو إيه اللي بشرط أصلاً؟

قالت بعفوية وكأنها تُقر واقعاً:

معتز شرباش

- هاسيبك تسرق بس بشرط.

ضحك بصوت عالٍ لثوانٍ، ثم قال:

- هتسيبيني؟! لا لا.. انتِ أكل الشارع غلط عليكِ.. دماغك ضربت.

- استنى بس.. باتكلم بجد.. أنا عاوزة اتفرج.. دا شرطي الوحيد.

نظر لها بصمت لثوانٍ، حتى يتأكد من جدية طلبها، ثم قال بعدما تأكد:

- بطّلي جنان.. دي مش رواية بوليسية بتقريها وانتِ قاعدة في البلكونة.. دي عملية بجد.

ثم قال بحزم مُحذراً:

- ما تخلينيش اندم إني حكيت لك.

- أنا مش عاوزة آجي اسرق معاك.. انت اتجننت؟ لا طبعًا. أنا بس عاوزة اتفرج عليك وانت بتشتغل.. يعني بتخطط ازاي.. تشرح لي القصة.. مين اللي ضحك عليك دا.. مش يمكن نلاقي حل غير السرقة؟

ثم أضافت بثقة:

- مش انت حكيت؟ ووثقت فيّ؟ يبقى تحكي للآخر.. ما ليش دعوة.

صمت لدقيقة كاملة، فكّر خلالها فيما قالت، ثم قال بلهجة من قَرر خوض تجربة جديدة:

عُمر الشقي

- عندك حق.. بس بشرط.
- موافقة. قالت بحماس.
- طب مش تعرفي الشرط الأول؟
- قول. بنفاد صبر.
- تحكي لي انتِ كمان.
- أنا ما عنديش حاجة تتحكي.. حياتي مُمل..
- يبقى أنا كمان ما عنديش حاجة تتحكي.
- يوووه.. ماشي حاضر موافقة.. هاحكي لك.. انت الخسران.. بس ما تجيش تزهق وتقولي اسكُتي.
- اتفقنا.. Ladies first.. يلا.
- وحياة طنط؟

* * *

مذكرات

١٢

عندما تتسلل نملة إلى خزانة السكر؛ انت لا تقتل تلك المذنبه وحدها..
ولكنك تتبّع خط سيرها وتقتل كل النمل.. برغم براءة معظمهم من ذنب
أكل سُكرى. فلماذا؟!

لأنك على يقين بأن سرقتهم للسكر جزء من طبيعتهم.. لن يتخلّوا عنه..
مهما كان عقاب كل نملة فعلتها من قبل.

نعم..

كل البشر قتلة.

خرج المهندس عادل من باب العمارة التي تقع فيها شركته، ليجد الضابط وائل يبدو منتظرًا إيّاه عند سيارته، فتوجّه صوبه، وصافحه بفتور، وسأل:

- سعادتك عرفت منين إني هنا؟

- انت ما تعرفش إنك تحت عينينا ولا إيه؟ واصطنع أسخف ابتسامة استطاعها، ثم تجهم، وقال دون تأجيل:

- واحد جا له تليفون إن فيه صوت ضرب نار اتسمع جوًا شقته.. رجع جري ع البيت.. تفتكر إيه اللي ممكن يخليه يطلع ٦ أدوار ع السلم؟! ونظر صوب الرجل متفحصًا ملامحه، وكل حركة يقوم بها.

لم تُخطئ عين الضابط، التوتر الذي نال من ملامح، ولُغة جسد المهندس، الذي رفع يده ملوِّحًا، وهزّ كتفه باستهتار مُصطنع، وحكّ دقنه، ثم قال بصوت أكمل فضحه:

- مش شايف إن دا سؤال سخيف جدًّا.. سامحني يعني.. بس كنت هاجيب منين صبر استنى الأسانسير؟

"كذب، كما توقعت"

- طب ولو الأسانسير كان في الأرضي؟

- ما شفتوش.

معتز شرباش

"إجابة جاهزة، دون دهشة، ودون إنكار.. كان يعلم أن المصعد في الأرضي
وتجاهله عمدًا"

- طب وسيد البواب؟ ما سمعتوش برضه لما نده لك يقول لك الأسانسير
واقف قصادك؟

- لأ.. ما سمعتوش. بضيق وتوتر وغضب مكتوم.

ابتسم وائل ابتسامة المنتصر، وهزّ رأسه برضى كمن حصل على ما أراد، ثم
قال:

- هنتقابل تاني. ورحل، وترك خلفه رجلًا يرتعد من التوتر.

* * *

أسند عُمر مرفقيه على سور الكوبري، ونظر صوب النيل وقال
بصوت هادئ، كصفحة النيل المُتسَاب، كالدماء في شريان جسد ساكن،
قلبه ضعيف النبض:

- بعد ما قرّيت القصة.. قررت اجمع فريقتي الخاص.. دوّرت كثير على هاكر
شاطر.. لحد ما عرفت سكّة حد.. طلعت عيني عشان الاقيه.. بس اللي
يفضل ورا اللي عاوزه بيوصل له في الآخر.. وعرضت عليه عرض صعب
يترفض.

كان حلمه يبقى واحد من أكبر المُبرمجين في شركة من الكُبار.. بس أنا وعدته
باللي فعلاً بيتمناه.. وعدته بالفلوس.

نظر صوب مريم، التي بدت كطفلة سقطت في حفرة بلاد العجائب. كانت
مأخوذة بقصّته التي تليق بصفحات الروايات، وقال:

- للأسف في الزمن دا معظم شبابنا بقى حلمهم مُجرد وسيلة لتحقيق
الفلوس.. يعني مش بيحلم يحقق نفسه في المجال اللي شايف نفسه فيه..
لا.. هو بيحلم يبقى غني.

وطبعًا لما عرضت على هيثم يشتغل معايا.. وبقى أغنيا وافق فورًا.
وبعدها وصلت لنادر بمساعدة هيثم.. وعرضت عليه نفس العرض.

معتز شرباش

عاوز تبقى كاتب وتصرف فلوس عشان تنشر كتاب؟ ولا تشتغل معايا..
وتبقى غني؟ هتكتب برضه.. بس هتكتب خطط وسيناريوهات.. وانا
هانفذاها. بصراحة نادر عبقري.. بس هو مجنون شوية.. عنده خيال وذكاء
مش طبيعي في وضع الخطط والتمويه.. بس للأسف بيكلم نفسه كثير..
وساعات بيشفوف شخصيات من القصص اللي بيكتبها قُصاده.. بس في
الحقيقة.. هو عبقري.

وطبعًا قبل فورًا.

زي ما قلت لك.. أحلامهم كانت وسيلة. قال بأسف.

- انت زعلت عشان وافقوا يشتغلوا معاك؟

- لا بالعكس.. أنا بس كنت اتمنى يقاوموا المقاومة اللي كنت متوقعها.. لكن

تخلّيم عن أحلامهم بالسرعة دي.. لفت نظري لحاجة كانت غايبة عني. إن

ما بقاش في حد عاوز يحقق نفسه عشان نفسه.

بقت كل الناس يدوب بتتمنى تعيش.. بتفرق من شخص للتاني.. بس

الحقيقة بقى كله بيتمنى يعيش، فيه اللي بيتمنى يعيش بمليون جنيه في

الشهر.. وفي اللي بيتمنى يعيش وبس.

ما بقاش في حد عنده رسالة وحلم.. ومؤمن بهم. إلا قليلين قوي. حتى أنا..

كل هدي في اعيش.. بسبب ذاكرتي العيشة مُتعبة.. فعملت كل دا عشان اعيش

وبس.

ثم تنهّد، وقال مبتسمًا:

عُمر الشقي

- مش طالبة فلسفة.. المهم؛ بدأنا نشتغل فعلاً.. وهيثم بقى يجيب شغل من على الـ Dark و الـ Deep Web.. ونادر يرسم خطة التنفيذ.. وانا انفذ. وبقى معانا فلوس.. وانا بقيت عايش على جرعة الأدرينالين.. اللي باخدها في العمليات.

من فترة جات لنا عملية جديدة.. حد كان طالب فيروس كمبيوتر.. ينزل على نظام البحث الجنائي يمسح التاريخ الجنائي بتاع شخص مُعين. فيروس ذكي. هيثم قدر يعمل الفيروس.. وكان تمنه غالي جداً.. بس بعدها العميل طلب حد يدخل الفيروس على نظام البحث، وطبعاً أجهزة البحث الجنائي معزولة.. يعني هيثم ما يقدرش يهاك عليها من الإنترنت.. لازم حد يوصل الفيروس بنفسه على شبكة البحث.

بس المشكلة كانت في إننا مش عاوزين الشرطة تكتشف الموضوع.. أولاً عشان ما تاخُدش بالها وتكتشف وتمسح الفيروس.. وثانياً عشان دي أول مرة نعمل عملية جواً جهاز سيادي ومش عاوزين ندخل في حاجة أكبر مننا. لحد ما نادر العبقرى حلها.. خطته كانت عبقرية وبسيطة.. تعتمد على توجيه نظر الناس كلها في سكة غير السكة اللي بنعمل فيها العملية.. زي الساحر، وزي ما كان أبويا الله يرحمه علّمني.

الخطة كانت إننا نعمل عملية اقتحام في قسم.. وتنتهي بمحاولة تهريب فاشلة لمحتجز أبوه غني.. وننصب على الراجل في فلوس.. بس في الوقت اللي أنا فيه جواً القسم.. أحمل الفيروس على جهاز البحث. وساعتها ما حدش

معتز شرباش

كان ينفع يشك في إن اللي دخل القسم كان له علاقة بجهاز البحث من أصله، وفي نفس الوقت ما هربتش المُحتجز.. يعني باختصار كدا.. يا دار ما دخلك شر.. الداخلية مش هتستفز قوي يعني.

- يخرب بيتكم.. وبعدين؟! بانهار واضح.

- العملية اتنفذت وكله تمام.. بس الحظ لأول مرة يعاندنا، فيه حد شك في موضوع جهاز البحث.. ما اعرفش ازاي.. بس فيه حد شك.. والخبر اتسرّب ع الإنترنت. وفي نفس الوقت.. بعد نحاجنا في تنفيذ العملية.. العميل مش راضي يدفع الفلوس إلا لما يقابلني.. واضح إنه منبر بشغلي وعاوز يجتدني.. وبيضغط بالفلوس.

دالوقت أنا بقيت مُضطر أسرق فلوسي من العميل.. ولازم يتعاقب. هو راجل ملياردير.. وعنده نفوذ.. ومشاريع كتير في البلد.. بس مش دي المُشكلة. المُشكلة الحقيقة؛ إني عاوز اعرف اللي عرف موضوع البحث دا عرفه منين.. لازم اعرف الغلطة فين.

نادر لسّا باعت لي من شوية خطة العمل على الجبهتين دول.. غالبًا هابتدي النهاردا.

نفضت مريم رأسها بقوة، في محاولة لاستيعاب ما سمعت، وكأن عقلها سيتسع لكمية أكبر من المعلومات بعد هزّها إياه، وقالت:

- بسرعة كدا؟ ومش مُشكلة ازاي؟ دي سرقة يا ابني.. وبتقول عنده نفوذ..

يعني خطير.. وبعدين هتعرف منين الغلطة فين؟

عُمر الشقي

- موضوع السرقة دا مش جديد علينا.. عملناه قبل كذا كذا مرة.. وهو عنده أكثر من مكتب صرافة.. وشركات كتير.. هنشوف أسهل مكان وهاروح آخد حقي منه، ما هو في مجالنا دا ما ينفعش يحصل كذا واسكت.. لأن دا معناه إني ضعيف.. لازم الرد يكون حاسم ويخوّف.

أما المعلومات؛ فهاعرفها من اللي سرّبها.. هيثم عرف اسمه.. وهيجيب عنوانه.. وانا هاروح اسأله.

- بالبساطة دي؟ هتروح تسأله؟

- مش بالبساطة دي طبعًا.. بس باختصار؛ هاسأل وهو هيجاوب.. لأنه مش هيبقى عنده بديل غير كدا.

ثم اعتدل ونظر إليها، وقال بغضب مُصطنع:

- مش هنتكلم عنك شوية بقى قبل ما اليوم يخلص؟

* * *

فتح وائل دُرَج مكتبه، وأخرج منه ملفًا قديمًا، وضعه أمامه على المكتب وفتحه، وطالع سطور أول ورقة، كانت بها ملاحظاته عن القضية، التي ينظرُ إلى نسخة من ملفها؛ تلك القضية التي لم تتوقف عن هدم جدار ثقته في نفسه كضابط مباحث فدّ. فكلما أقام الجدار، هاجمته ذكرى تلك القضية، وأصابته في مقتل.

"هتفضل القضية دي نقطة سودا في حياتي"

ظَلَّ ينظرُ إلى ملاحظاته بوعي شبه غائب، حيث كان يستنطق القضية في الحقيقة.

لا يعلم الضابط لماذا توحّش هجوم ذكرى تلك القضية، على وعيه، كما تهاجم الوسوس، المريض النفسي، مع بداية تحقيقه في قضية الزوج، الذي أصبح اليقين من أنه هو من قتل زوجته، قاب قوسين أو أدنى من احتلال قناعة الضابط.

"لماذا الآن بالذات؟!"

تأكد الضابط أن عقله الباطن، يرسل له رسائل مُشفّرة، استقبلها وعيه دون مجهود، فصوتها أصخب من ألا يُلاحظ، ولكن بقي فك تشفيرها عصيًا.

عُمر الشقي

يحتاج وعيه المزيد من الإشارات، فجلس أمام ملف القضية، الذي لطالما استدعاه، في ليالٍ تعكّر فيها مزاجه، بحثًا عن خطأ اقترفه، أو ثغرة لم ينتبه لها، أفلت منها مُجرم، كان يعلم الضابط بوجوده، ولم يستطع إثبات أي شيء عليه، أو إثبات حتى وجوده.

ترفض القضية القديمة الإفصاح. ويملاً الصمت فراغ الغرفة، عكس رأس الضابط، التي يملأها ضجيج، إشارات تُبث بلُغة لا يفهمها، حتى العاصمة خلف زجاج باب شرفته صمتت، وكأنها منافس شرس، واثق من فشل وائل، تنظر إليه باستفزاز، وتشفّ، ولكنها تعطيه الفرصة كاملة ليُفكر، حتى لا يبرر فشله بأن صخبها منعه من التفكير.

بدا وكأن الزمن قد توقف لدقائق، لم ينطق خلالها ملف القضية، حتى تنهد الضابط بإنهاك واضح، وجسد مُرهق، معدوم الطاقة، بعد يوم كامل من استهلاك قهوة تكفيه لأسبوع كامل، وسجائر تكفيه لضعف ذلك.

أصدر هاتفه صوتًا خافتًا، مُعلنًا عن وصول رسالة، من خطيبته، ظهرت على الشاشة فور وصولها تقول: "مستنياك تكلمني.. مش هانام". نظر وائل إلى هاتفه لدقيقة كاملة، وكأنه مسافر عبر الزمن، ولا يعلم ما هذا الشيء، وبدا وكأنه لا ينظر إلى الهاتف سوى بعين سارحة، ووعي غائب، لا يدرك أن عليه أن يقرأ الرسالة، ويجيب.

معتز شرباش

تجاهل الهاتف مؤقتًا، والتقط قلمًا من الدرج، وورقة بيضاء، وبدأ يفعل ما يُجيده؛ التحقيق. بدأ يطرح الأسئلة على نفسه، ويبحث عن الإجابات، أمامه على الحائط، حيث صور مسرح الجريمة الحديثة، وفوق المكتب حيث ترك ملف القضية القديمة، وأخيرًا وليس آخرًا، في عقله الباطن، حيث الرسالة المُشَقَّرة.

تمنى أن تتمكن أسئلته من فكّ طلاس رسالة عقله الباطن.

كتب أعلى الورقة "أوجه الشبه بين القضيتين"، ثم ترك القلم وبدأ يُفكِّر.

لَمْ يَحْتَجِ الضابط لأكثر من دقيقة، حتى يدرك أن أوجه التشابه بينهما كثيرة.

المُشتبه فيه الأول من وجهة نظر الضابط، في كل منهما، يملك حجة غياب، لا غبار عليها، وكأنهما تعمداً منع أي شك من التسرُّب لنفوس المحققين فيهما.

كل قضية منهما، لا تحتاج سوى لدقيقة واحدة من الملاحظة، حتى تجد الفاعل، دون مجهود، وكأنها أحد الأحاجي، التي تظهر على التلفزيون، مُغلَّفة بغلاف شفاف من الغموض، لتستفز المشاهدين للاتصال، طمعًا في الفوز بجائزة لا تزيد عن واحد بالمئة، مما يجمعه صاحب القناة من جيوب المتصلين، الذي يعتقد كل منهم أنه فقط من حلّ اللُّغز، والذي يمكن رؤية حلِّه من الفضاء.

عُمر الشقي

أثناء التحقيق في كلتا القضيتين، كان وائل على يقين، أن هناك طرف ثالث. طرف ارتكب الجريمة، ثم أوقع، بطريقة ما، سليمان الهجّام، في فخ نُصب من أجله بعناية. وطرف ثالث قتل ناهد منذ أيام، واختفى بلا أثر، كالعطر الرخيص.

بدأت معنويات الضابط في الارتفاع، ونال منه الحماس، وضخ قلبه الدماء في عروقه بنشاط، جدّته بداية عودة ثقته في ذكائه.

شعر بالطلاسم تتحرك في لاوعيه، كالدخان، حفّزها تفكيره المُرتب، وبدأت في الحركة، في سبيلها للّفك.

دَوّن وائل أوجه الشبه على الورقة أمامه؛

١. المُستفيد الأكبر عنده حجة غياب مؤكدة.

٢. القضية نازلة محلولة.

٣. طرف ثالث.

الجريمة الكاملة؟!!!

معتز شرباش

ثم ثبّتها على الحائط أمامه، وثبّت تحتها ورقة ملاحظاته عن قضية سليمان الهجّام، وأخذ ينظر إلى الحائط بشرود، وفي عقله فكرة، أو نظرية، أو سؤال، بدأ يتجمّع من فوضى أفكاره، كقطرات ماء مُنهمر، على زجاج سيارة مُسرعة، ثم بدأت حروفه تترتب من تلقاء نفسها، وكأنه، بملاحظته أوجه التشابه، أدخل مفتاح حل الشفرة، لتظهر الفكرة، في شكل سؤال، فجأة، بوضوح يليق بنهار مُشمس، جاء بعد ليل ممطر طويل، على سطح وعيه.

"هل يمكن أن يكون الفاعل في القضيتين قاتلاً مأجوراً، خفياً كالشبح، يجيد التخطيط، لدرجة تنفيذه الجريمة الكاملة مرتين على الأقل، دون حتى الاشتباه في وجوده؟"

* * *

مذكرات

١٣

أعدائي هم البشر..

كلهم..

والقانون..

الذي وضعه البشر..

الذي لا يُجرّم القاتل..

لأن من وضعه من فصيلة البشر..

كل البشر قتلة..

والقانون هو سلاح الجريمة..

ولن أقتل منكم، فقط، من تسلل إلى خزانة السكر..

كلكم تستحقون القتل..

وبالقانون.

خرج عماد من غرفة نومه، على إثر دقائق متكررة، مُلِحَّة على باب شقَّته، منع ظلام الشقة، الذي يغطيها، سوى من ضوء خافت تسلل من مكان ما، من ظهور علامات الدهشة والاستغراب على ملامح الصحفي غائب الوعي، بسبب ما دخَّنه قبل أن ينام.

حَطًا خطوات حذرة في صالة شقَّته، حتى يتجنب اصطدام أصابع قدمه، في كرسيِّ اعتاد اصطياذ قدمه، بغريزة تجنُّب الألم، التي لا يُضعفها مُخدر، ولا يمنعها غياب وعي.

تمكَّن من العثور على مفتاح إضاءة الصالة، دون حوادث مؤلمة لقدمه، وفتح النور.

ولكن على عكس ما توقع، كان الطارق يجلس، داخل الشقة، على كرسيه الخشبي، الذي اعتاد الاصطدام به، كلما غادر غرفته أثناء الليل، ويسند ظهر الكرسي على باب الشقة، مما ترك أرجل الكرسي الأمامية مُعلقة في الهواء، وكان يطرق الباب من الداخل حتى يوقظه.

"لهذا إذا لمْ أصطدم بالكرسي كالعادة، فالكرسي في غير موضعه" سرح وعي عماد هلاميَّ التركيز لثانية.

وبذل مجهودًا كبيرًا، حتى يتمكن من تحريك أي من أعضاء جسمه، وعجز. مارس كل من؛ المُخدر، والمسدس المصوّب إلى صدره، والقناع الذي

عُمر الشقي

يستخدمه الممثلون الأجانب عند أدائهم أدوار القوات الخاصة، الذي يُغطي وجه الزائر، أقصى درجات الكبت، ومنع الإرادة، ففقد السيطرة على نفسه، وصدرت منه رعدة، دارتها بيجامته الواسعة، ولم يتحرك.

كان عُمر قد نَفَذَ تعليمات نادر بدقة، أخفى وجهه بقناع يرتبط في العقول بالقوة المُفرطة، وأعطى ظهره لباب الشقة، حتى لا يهاجمه أحد بشكل غير متوقع، وعلّق صاعقًا كهربائيًا في حزامه تحسبًا لأي مواجهة قريبة المدى، مع أي أحد، أو شيء، وتأكد من وجود الكثير من قطع الأثاث بينه وبين عماد، مما سيعيق هجومًا انتحاريًا قد يقوم به الأخير.

"عبقري هذا النادر"

كان يستمتع عُمر برؤية مشاهد نادر تتحقق، وكأنه شاهدها من قبل.

- عندك كلب؟

"تأكد من عدم وجود حيوان أليف.. أو مُفترس"

- انت جاي تسرق صوفي؟ نايمة. أجاب عماد بآلية.

"أوهمه أنك لست وحدك"

- أنا حبيت ادخل لوحدي.. بس أي تصرف غبي منك.. الرجالة برّا الباب دا

هيحصلوني.. واتمنى لمصلحتك دا ما يحصلش.

هُما سؤالين وهاختفي زي الكابوس اللي بتصحى منه مش فاكره.

هَزَّ عماد رأسه هزّة أقرب إلى الرعشة، اعتبرها عُمر إيماءة موافقة، وعلامة

على نجاح خطة شلّ تفكير الخصم، فأكمل:

معتز شرباش

- انت صاحب حساب "حشرة" .. نزل...

- مش اند...

- لا لا.. انت هتتكلم لما أنا أسألك السؤال اللي جاي أسأله.. اللي قُلته دا

معلومة.. إقرار.. مش سؤال.

لما اسألك هتجاوب.. تمام؟

رعشة أخرى، دخل وعي عماد رسمياً في وضع الدُمية.

- نزلت معلومة خاصة بجهاز البحث الجنائي في مقالتك.. عرفت منين

المعلومة دي؟ جاوب. وأشار عُمَر صوب عماد بمُسدسه باستهتار، فجفل

الأخير وتمتم:

- من مجند الخدمة في القسم.. بتاع ظابط المباحث.

- والمُجند جاب المعلومة دي منين؟

- من ظابط المباحث..

قطع أذان الفجر جُملة الصحفي، الذي انتفض عند سماعه الصوت العالي

غير المتوقع، ثم هدأ نسبياً بعد إدراكه أنه الأذان، فسماعه أصوات البشر،

بعث في روحه القليل من الاطمئنان، وكأنه ليس بمُفردة.

رفع عُمَر مُسدسه ووجهه صوب عماد، وأشار له أن يكمل حديثه، فامتثل،

ولكن بصوت أعلى حتى يطفى على صوت المؤذن:

- من ظابط المباحث في القسم يا باشا.. زميل سعادتك.. مش حضرتك

مباحث برضه؟

عُمَر الشقي

"إن ظنَّ أنك جهة سيادية لا تؤكّد أو تنفي.. الغموض يُربك الخصم.. وبينك

عقله في تفسيرات طويلة مُنهكة.. لن تنتهي قبل حصولك على مُبتغاك"

ابتسم عُمَر باستمتاع، كما يفعل دائماً وهو يرى نبوءات نادر تتحقق،

وساعده قناعه على إبقاء وجهه جامداً أمام الصحفي المُرتعد خوفاً. وقال

مُتجاهلاً سؤال عماد، بصوت جامد وعالٍ نسبياً بسبب الأذان:

- اسمه إيه الظابط دا؟

- ااا. ثم صمت ليتذكر. كان قد كتب مقالة عن حادثة انتحار، يحقق فيها

الرائد.. تذكر.

- وائل.. اسمه وائل يا بيه.

- ممم والظابط دا عرف المعلومة دي منين؟ يلا هانت آخر سؤال علشان

تصحى.

شجّع وعد عُمَر بالرحيل عماد، فهو حتى تلك اللحظة كان على يقين أن هذا

الزائر سيقبض عليه، وسيختفي مدى الحياة، وقد يُعثر على رُفاته، مُلقى في

مقبرة جماعية، أسفل أحد مباني أمن الدولة، الذي سيكتشف داخله أن

صلاح نصر، لم ولن يموت.

- تقريباً يا باشا حاجة ليها دعوة بشاحن التليفون.. بيتهمز.. أو بيلّعق.. فعرف

إن حد لعب في الجهاز.

معتز شرباش

تذكر عُمر، بفضل ذاكرته، وجود شاحن هاتف موصّل بالفعل بالجهاز، عند قيامه بتوصيل الـ USB Memory التي كانت تحمل الفيروس، وتذكر اضطراره لفصله، وإعادته.

"ما هذا الحظ السيء؟!"

فكّر عُمر لثانيتين، طغى سكون ساحر خلالهما على المشهد، بعد انتهاء المؤذن من مناداة النيام، للقيام، ثم عدّل من جلسته، وقام فجأة، وتأكّد من وجود الصاعق في مكانه، مُعلّقًا في حزامه، وقال وهو يُعيد مُسدسه إلى جرابه تحت إبطه، والذي أعطاه مع اللون الأسود الذي طغى على ملابسه كلها طلةً ساحرة ومُرعبة:

- طبعًا معاك نمرّة المُجند دا.. تكلمه حالًا وتجيّب لي منه نمرّة الضابط..
وطبعًا مش هتجيّب سيرة إنك عاوزها عشان حد.. اتصرف.. بس لو جبت سيرتي.. هتنزل سوا من هنا مش هانزل لوحدي.

* * *

وقفت مريم خلف شباك عُرفتُها، تنظر إلى زجاج شقة عُمر الداكن، لا تعلم عنه شيئاً مُنذ عادت إلى شقتها، هو حتى لم يطلب منها رقم هاتفها، وهي، بالطبع لن تطلب رقمه، ولن تعرض إعطاءه رقمها، ما لم يطلبه.

لم تخرج إلى الشرفة، بسبب حرارة الصيف، وبسبب عدم رغبتها في الشعور وكأنها مُراقبة منه.

صريحة هي مع نفسها لأقصى درجة، أعجبها عُمر الشقيّ، ومن لن يعجبها هذا الشاب؟ ولكنها كانت تُعلم أين تقع حدود علاقتها به، لا يمكن أن تتطوّر تلك العلاقة إلى ما هو أبعد من الصداقة، هكذا أفضل. سرحت قليلاً تتذكر...

- ماشي.. نتكلم عني.. عاوز تعرف إيه؟
- قولي انتِ.. عاوزة تحكي إيه؟ ثم ابتسم وأضاف مُحذراً:
- بس خُدي بالك.. أنا مش بانسي.. ما فيش حرف هتقوليه هيتمسح.
- حاجة تخوّف دي؟
- أه طبعاً تخوّف.. لو عندك حاجة تخافي منها.. اعترفي.. عندك؟

معتز شرباش

تمهّدت، ودارت التمهيدة بابتسامة عذبة، وقالت، وهي تسيطر على بعض
الخصلات التي تمرّدت، وبادلت نسمة الصيف المداعبة، وتعيدها إلى مكانها:
- باخاف من الفراق.. بس. دي الحاجة الوحيدة اللي بتربيني.. وعشان كدا
مقرّرة ما ادخلش في أي علاقة تعرضني لإحساس الفقد دا مرة تانية بعد
بابا الله يرحمه.

موت بابا كسرني يا عمّر.. بعده دخلت في نوبة بارانويا.. وفضلت لفترة عندي
قناعة إنه لسّا عايش.. وبعدين بقيت مقتنعة إنه اتقتل.. لدرجة إنني شبه
حققت في حادثة موت...

غادرتها الذكرى، كعادتها، دون إنذار.

تساءلت وهي تجبر نفسها على التمدد على سريرها، وترك مراقبة زجاج
الساحر.

"هل ضايقتّه عندما وضعت حدًّا لعلاقتنا؟"

"لم أشعر بضيق انتابه.. إلا إذا كان بارعًا جدًّا في إخفاء مشاعره.. كما هو
بارع في... تقريبًا؛ كل شيء آخر"

"هكذا أفضل.. لا يمكنني أن أحبه.. الأحبة يرحلون.. سأكتفي بصداقته..
وليصبح ثمن بقائه؛ هو الحب الذي لن يكون بيننا.. سأضحّي بالحب
كهاميس.. سألقي به إلى نهر صداقتنا ليفيض ويبقى"

عُمر الشقي

"كيف يمكن لمن هو مثلي أن يحب؟"

"لا أعلم لماذا شعرت بغصّة عندما قالت مريم أنها لا ترغب في علاقة حُب مع أحدهم"

"هل أرادت توصيل رسالة لي مفادها أننا لا نصلح لبعضنا البعض؟"

"وهل تلومها؟"

"أنت خارج عن القانون.. مُجرد قبولها صداقتك يعتبر خطيئة في نظر الناس"

"ثم لماذا الضيق؟ أعجبتك؟.. نعم. ولهذا تقرّبت إليها.. ولكنك لا تصلح"

"أنت لا تنسى.. ستتذكر كل أخطائها.. وأتفه هفواتها.. وتحيل حياتها جحيماً"

"ثم أن من هو مثلك لا يمكنه التخلّي عن عمله.. وعملك يتطلب عدم وجود نقاط ضعف في حياتك"

"والهوى يضعف القلوب.. ومن ثم أصحابها"

"اقبل بصداقتها.. لأنها كما هي أكثر مما تستحق.. ولا تطمع في المزيد"

تردد صوت عُمر في رأسه، التي تخفيها خوذته، وهو يندفع بدراجته البخارية، بأقصى سرعة في شوارع القاهرة، الساحرة في هذا الوقت.

**

معتز شرباش

- يا وائل بيه وعزّة جلال الله ما قتلت القتيل دا ولا شُفته ولا دخلت شقته.

هَز نقيب مباحث قسم الأقصر رأسه موافقًا، وقال:

- ماشي.. هاصدّك يا سليمان، هو بصراحة ما فيش أي دليل على وجود

سرقة حصلت في شقة القتيل، دا المُرّيب في مسرح الجريمة، في حاجات يا ما

في الشقة كان ممكن تتسرق واتسابت.. زي ما يكون اللي دخل كان

مستعجل.. وما فيش دليل واحد على دخول قصري للشقة.. اللي دخل كان

معاه مفتاح.. أو القتيل فتح له.. وكمان ما فيش أي بصمة ليك، بس ارجع

واقول لك انت هجّام متمرس وفاهم.. ومش مستحيل تلفّق كل دا.. صعب..

لكن مش مستحيل.. وممكن يكون لما لقيت القتيل في الشقة استعجلت وما

دوّرتش كويس.

- يا بيه وحيّاة ولادي ما حصل.. أنا هاجيب مفتاح شقته منين؟ وكمان أنا

عمري ما شُفته الراجل دا ولا اعرفه عشان يفتح لي بيته، دا غير إن

سعادتك بتقول إن القتيل دا اتقتل قبل ما اروح اصرّف الحاجة بـ ٣ أيام.

أنا هادبح واحد يا بيه واخّلي حاجته عندي ٣ أيام؟ دا انا كدا باعلّق روجي

في المشنقة بأيدي.

يا بيه أنا الله لا يقدرّ يعني.. لو صاحب الشقة صحي وانا باقلّها.. مع إنها

عمرها ما حصلت.. عشان أنا أول حاجة باعملها بأمن ع السكّان.. بس

افترض حصلت.. ومسكنا في بعض.. هغّزه في جنبه الشمال.. بعيد عن

عُمر الشقي

كبده.. جرح يوجع ما يئديش.. واطلع اجري.. مش ادبجه.. أنا مش غشيم.
ولو حصل ودبحته.. هاحرق الحاجة.. يا بيه دا فيها مشنقة يا بيه مش هزار.
أغلق النقيب عينيه بإنهاك، وتمهد بضيق وسأل:

- طب تعالى نصدق.. ونفترض إن حد كمّنك عشان يلبّسها لك.. لازم الحد دا
كان يعرف إنك كنت رايح تسرق الشقة دي بالتحديد.. وفي اليوم دا
بالتحديد.. قام راح هو قبلها قتل القتيل وسرق حاجته وحطها في الشقة
اللي انت ناوي تسرقها.. عشان انت تسرقها وانت ما تعرفش إن صاحبها
مقتول.. وتروح تصرّفها عادي جدّا. دا التفسير الوحيد اللي يمشي مع
حكايته.. مش شايفها صعبة شوية يا سليمان؟

هزّ الهجام رأسه بأسى، ولم يُجب، فسأل النقيب:

- مين كان يعرف إنك رايح الشقة دي؟

- قُلت لسعادتك ما حدش. أنا مش تلميذ..

قاطعه وائل صارخًا، وهو يضرب على المكتب أمامه:

- عارف عارف.. أنا مش ابن امبارح.. أنا معلم.. أنا مش تلميذ.. أمال مشرّف

هنا ليه يا عم شارلوك؟ فوق بقى.

أجاب سليمان بخفوت، وقد فقد الكثير من كبره:

- وعزة جلال الله يا بيه ما حد يعرف.

هدأ وائل قليلاً وسأل:

- بتختار الشقق اللي بتسرقها ازاي؟

معتز شرباش

لم يُجِب سليمان، فأعاد النقيب سؤاله بشكل آخر:
- مش وقته تبقى حويط.. انطق.. أنا باحاول انقذك.
- واحدة بت بتخدم في البيوت يا وائل بيه.. مرافقها.. وبتقول لي ع الشقق
الفاضية في العمارات اللي بتروحها.. بس لو على رقبتى مش قايل هي مين..
أهلها يدبحوها لو شَمّوا خبر.. وهي ما تعرفش أنا باروح فين وربنا يا بيه. أنا
باسمع منها.. وراقب المكان كام يوم.. وبعدين باختار حسب مداخل الشقة
ومخارجها.

أفاق الرائد وائل من ذكرياته، على صوت حركة أمه خارج غرفته، حيث
قامت من نومها لتُصَلِّيَ الفجر، فتنهّد بضيق، ونظر إلى ساعته، ثم التقط
قلمه، وكتب سؤاله على الورقة المثبتة أمامه على الحائط. ثم عاد وجلس
يستنطق الحائط في صمت، ويأس.

كان يعلم أن في حالة صحّة نظريّته المجنونة، فالسبيل الوحيد، لحل
القضية القديمة، هو عبر حل القضية الأخرى.

"هتفضل القضية دي نُقطة سودا في حياتي"

عُمر الشقي

غطى عماد جسده بالكامل، برغم حرارة الصيف القاسية، لعل الغطاء يُشعره بالأمان، ويطرد تلك الرعدة، التي غادر الغريب، ولم تُغادره معه، كما يجب عليها أن تفعل.

تدافعت الأفكار في رأسه، كالثيران في شوارع مدينة بامبلونا الإسبانية، أثناء انطلاق مهرجان سان فيرمين، وشرع يتذكر لقاءه مع هذا الزائر الهادئ.

كل شيء حول هذا الزائر ينافي المنطق، كل أسئلته تُشير إلى أنه لا يعمل لصالح الجهة التي ادعى انتماءه إليها، ولكن كل شيء فيه يشير إلى العكس.

"ماذا كان اسم تلك الجهة على أيّة حال؟!!"

لا يتذكر عماد لصالح أيّة جهة قال الزائر أنه يعمل، ولا يتذكر إن كان قد قال من الأساس، ولا يتذكر من الزيارة، سوى بعض اللقطات المتفرقة، وكأنه كان يشاهد تصويرًا لمشهد، تُقطع عنه الإضاءة، وتعود، بتتابع سريع. فلا يتذكر ما يكفي لتكوين رأي وفكرة كافية عن الزيارة، ولكنه يتذكر ما يكفي لإرعابه لفترة ليست بالقصيرة.

"جبان"

تسارعت أنفاسه، واجتاحت جسده رعدة، بسبب أدرينالين الغضب، الذي اجتاح جسده، كان يعتبر نفسه على مشارف بدء مسيرة ثورية، تمنى لها أن

معتز شرباش

تليق بمناضل، ولكنه وبعد أول لقاء حقيقي له مع الوجه القبيح للسلطة،
اكتشف وجهه هو الحقيقي.

التقط الهاتف ليتصل بأسماء، حتى يحكي لها ما حدث، ويسألها النصيحة،
ولكنه تراجع، عندما سمع صوت تحذير الزائر له، يتردد داخل أروقة عقله،
كالتعويذة، ويشلُّ حركته.

"ما تمشيش في سكة وانت مش مُستعد تكملها للآخر"

"جبان"

* * *

صفحة دردشة مُشفّرة، على الإنترنت، بها ثلاثة مُستخدمين، بأسماء

مُستعارة:

الشقي:

- دا كل اللي قاله.. ومعايا رقم تليفون الضابط. وواضح إنه راجل ذكي.. ومش

هيسيب القصة دي في حالها. هنعمل فيه إيه دا؟

هولمز:

- هات عنوانه.. وانا هامخمش واقول لك.

الشقي:

- حالاً.. ومستي رسالتك.

هولمز:

- سؤال: ليه لما الضابط شك؛ ما حدش منع البرنامج؟

أوفسايد:

- يا ابني وهو أنا تلميذ؟ هاعمل فيروس يتقفش عادي كدا؟

هولمز:

- بس مش لدرجة إن حد يكون عارف إنه موجود وما يعرفش يجيبه.

وبعدين ما تعيش في الدور.

معتز شرباش

أوفسايد:

- بُص يا مُغفل.. واتعلم من البرنس الكبير.. يمكن تستفيد.. مع إني عارف
إنك ما فيش فايده فيك.. الفيروس بتاعي حامل.. يعني النظام ما يحسش
بيه.

هولمز:

- أنا عارف.. ومش الفيروس بتاعك بس اللي حامل.. انت فيك حاجات كتير
خاملة.. وما يتحسش بيها.. كأنك ما فيش.

أوفسايد:

- كدا؟! طب الحق قول لهايدي بتاعة الفيسبوك الوداع يا عم العنتيل.

الشقي:

- طب بالذمة دا منظر عصابة؟

هولمز:

- أنا مش قُلت لك مليون مرة ما تراقبش جهازي يا هيثم؟ ينفع كدا يا عُمَر؟

أوفسايد:

- هاهاهاهاهاها.. هاموت من الضحك.

الشقي:

- يا ابني مش قُلنا ما نستخدمش أسماء هنا؟ يا جدعان اكبروا.. أنا حاسس
إني باكلم أطفال.

عُمر الشقي

هولمز:

- ما نقولش أسماء ليه؟ مش المفروض عم "أوفسايد" دا مشفّر الصفحة دي كويس؟ ولا في دي كمان ما بيعرفش.

الشقي:

- خلاص يا هولمز.. وانت يا زفت أوفسايد.. اتلم.

أوفسايد:

- عشان خاطرك يا كبير.. المهم إن الفيروس بتاعي مش بينشط إلا في حالة الاستخدام الطبيعي للنظام.. يعني في حالة إجراء بحث على الجهاز، بمعنى إن أي بحث أو ترقيب لأي اتصال يقوم بيه الفيروس بتاعي هيرجع بنتيجة صفر، دا أكيد.

وعشان كدا.. برغم شك الظابط.. ما حدش لقي الفيروس.. لأن واضح إن الكشف كان عادي مش مكثف.. لو مكثف كان على الأقل هيمنع عمل البرنامج.

هولمز:

- مش يمكن لقوا الفيروس وسابوه عشان يجيبوك؟

أوفسايد:

معتز شرباش

- الفيروس مدفوع ذاتيًا.. مالوش أي اتصال بيّ بعد تحميله.. هو مضبوط بالرقم القومي لصاحبه.. وعارف هيعمل إيه بمجرد اتصال النهاية الطرفية بالسيرفر.

الشقي:

- يعني انت بتقول إن الفيروس دا كان لا يمكن منعه؟

أوفسايد:

- كان ممكن منعه طبعًا.. لو يعرفوا تحديدًا بيدوروا على إيه.. أو لو اتعاملوا مع التهديد بجد.. على الأقل كانوا فصلوا الجهاز دا عن الشبكة مؤقتًا.. بس واضح إن شك الضابط لم يرقَ لمستوى التهديد من أصله عندهم.. ودا لمصلحتنا.

الشقي:

- وقصة سي زفت اللي مش عاوز يدفع؟

هولمز:

- لازم نفرمه.

الشقي:

- في أي طريقة يا أوفسايد الراجل دا يعرف يوصل لك؟ الموضوع دخل في الجدد.. ما فيش هزار المرة دي.

أوفسايد:

عُمر الشقي

- عيب عليك يا كبير.. الراجل دا أصلاً لحد دالوقت ما يعرفش إن احنا عارفين هو مين.. ولا يمكن حد يعرف يجيبني.. أنا عارف كويس أنا باعمل إيه.. وما تعلقوش.. بافتراض حد وصل لي.. أنا هاعرف في لحظتها وهاختفي في ثانية.

الشقي:

- يبقى زي ما اتفقنا يا هولمز.. نفرمه.

أوفسايد:

- بس الناس دي مجرمين يا شقاوة.. ربنا يستر.

هولمز:

- انت هتصدق الأفلام اللي بيضحكوا بيها ع الناس؟ اللي هو يأجر قاتل عشان يقتل حد.. ولما يرفض.. يبعثوا له ألف واحد يقتله.. طب لو انت عندك كل الكومبارس دول.. أجرت من برّا ليه؟ ولا هو تبذير فلوس أوفر ع الفاضي؟

يا ابني الناس دي مجرمين آه.. بس فشلة.. يعني هما لو فالحين كانوا جابونا نعملهم شغلهم؟ طالما متأكد إن ما حدش هيعرف احنا مين هيتربعوا مننا.

الشقي:

- ها يا عم تسلل؟ متأكد؟

معتز شرباش

أوفسايد:

- عيب عليك.

هولمز:

- احنا الأول نسرق فلوسنا.. ونعرّفه في رسالة إن احنا.. وبعدها هافكر له في حاجة تعلّمه الأدب للأبد.

الشقي:

- أحبك وانت بتضرب بالمطرقة.. اكتب نص الرسالة.

هولمز:

- انت فتحت الرسايل بتاعتي أنا وهايدي يا أوفسايد!!

أوفسايد:

- سرّك في بير.. يا كبير.

الشقي غادر الغرفة

أغلق عُمر صفحة الدردشة، وهو يضحك، مُتخيلاً المعركة الدائرة داخلها الآن، ثم قام ووقف مواجهًا زجاج شقته، ينظر إلى شُرفة مريم لدقيقة كاملة.

عُمر الشقي

ثم عاد إلى مكتبه، وضغط زر تشغيل الأغاني، لينطلق صوت عايذة الأيوبي، بسحره الأسر.

لما قابلته مرة صُدفة.. حبيبي.. مش أي صُدفة..

وقفنا وعيونا بتتكلم.. وقلوبنا صراعها يعلا..

فتح أحد الأدراج، واخرج هاتفًا محمولًا، صغير الحجم، وفتحه، واتصل برقم أحد مطاعم الوجبات السريعة، وضغط رقم واحد للغة العربية، وقال بعد سماعه صوت الموظف الناعس في هذا الوقت من النهار، الذي لا يزال يولد في السماء:

- لا لا مش أول مرة.. ممكن أدي لك الرقم الثاني هتلاقيه متسجل عندك.

ثم أعطى الموظف رقم هاتف الرائد وائل، وانتظر. مرّت ثلاث ثواني، ثم قال موظف خدمة عملاء المطعم، بآلية، بيانات الرائد وائل، حتى يتأكد من صحّة البيانات، فأكّدها له عُمر، بعد أن حفظتها ذاكرته، ثم شكر الموظف وقال له أنه أعاد التفكير، وقرر أن يصوم حتى المغرب، وأغلق الخط، وهو لا يزال ينظرُ صوب شرفة مريم.

آه حبيبي.. مهما تباعدنا.. مصيرنا ف يوم نتلاقى..

العقل خاين.. والقلب صاين.. للعهد صاين.. آه آه..

* * *

صَرَ كُرسي الرائد، تحت وزنه المُعتدل، وغطّى على صوت صرير
أسنانه، وهو يُسلم على الزوج، الذي حضر بعد استدعائه بساعة واحدة،
وكأنه يتحدى الضابط، ولا يوجد ما يخشاه.

تحكم الضابط في أعصابه، وهو يطالع ملامح الزوج الهادئة، ووجهه
الحليق، وابتسامته الساخرة. التي ترسل رسالة مفادها، لن تستطيع معي
شيئاً.

طلب الزوج قهوة عندما سُئل عما يريد، ودار ببصره في المكتب المرتب،
وقال بهدوء مستفز:

- سعادتك محتاج هنا ستاير جديدة.. تسمح لي أبعث لك ستاير هدية
بالريموت؟ حاجة من اللي بتركب في مكاتب كبار رجال الأعمال والسياسة في
البلد.

لسّا مرّكب ستاير في مكتب نبيل مجاهد عضو مجلس الشعب قريب.. نوع
جديد لسّا نازل.. وهيبقى مكتبك تاني مكتب في مصر، إيه رأيك؟

"وصلت رسالتك.. أنت مسنود"

ابتسم وائل ابتسامة أشبه بابتسامات العرائس، ولم يُعقّب، حيث كان في
الحقيقة، يكتم غيظه، وبعد أن تمكن من السيطرة على غضبه، قال بهدوء:

عُمر الشقي

- نتكلم في الشغل بقى بدل ما اعطل سعادتك كثير.. واضح إنك راجل مهم وعندك شغل كثير مع ناس كبيرة في البلد. وانا ما يرضنيش نعطل شغل الباشاوات.

- اتفضل يا وائل بيه.. خُد وقتك.

فتح وائل ملفًا كان أمامه على المكتب، وسأل بجديّة:

- سعادتك سحبت مبلغ من حسابك في البنك من شهر تقريبًا.. بقيم...

- ٢٣ ألف جنيه. قالها الزوج، ثم أخرج من جيب قميصه إيصالًا، ناوله للرائد وقال:

- دا إيصال من شركة السياحة.. دي كانت رحلة عاملها مفاجأة لناهد.. بس للأسف ما لحقتش تعرفها.. وكلمتهم امبارح وبنتناوض هيخلصوا كام من المبلغ عشان يعملوا لي Refund.

"استعدّ جيّدًا"

- كأنك توقعت السؤال.

انتظر الزوج حتى وضع الساعي قهوته أمامه، ثم قال:

- بصراحة ليّ صديق بيشتغل في البنك.. ولما قال لي إن المباحث طلبت كشف حسابي.. حبيت أوقّر على سعادتك عناء التحقيق.

أغلق الرائد الملف الذي أمامه بضيق، لم يستطع إخفاءه، ونحاه جانبًا، بعد أن علم أن الزوج استعدّ جيّدًا لكل ما هو داخل الملف، فأصبح عديم الفائدة، ثم قال مُهاجمًا:

معتز شرباش

- قل لي بقى.. عملتها ازاي؟ ومين ساعدك؟

عقد الزوج حاجبيه، ومط شفتيه في عدم فهم، ولم يُجب.

- انت وانا عارفين إنك طلعت على رجلك عشان الأسانسير صوته عالي وجارك من النوع البصّاص وكان هينط معاك في الشقة أول ما يشعر بوصولك.

صمت لثوانٍ، حتى تأكد من وجود بوادر توتر على ملامح الزوج، وبدء تبخّر بريقه الزائف الذي أتى مُغلّفًا به، ثم أكمل:

- ودا ما لوش غير سبب منطقي واحد. وصمت.

المزيد من التوتر، والبريق اختفى.

- إن في حاجة جواّ الشقة انت كنت محتاج تتأكد منها الأول لوحداك.

اعتدل الضابط، وأسند مرفقيه على المكتب، وقال بحزم وغضب واضح، ولكن بصوت خافت، كمن يتعرض للتعذيب، ولكنه يرفض الصراخ حتى لا يستمتع مُعدِّبَه:

- انت قتلت مراتك.. بمساعدة حد.. والدليل موجود في الشقة.. وانا هالاقيه.. وانت عارف إني هالاقيه.. لأنك ما كنتش تتوقع اوصل لكل اللي وصلت له دا.. لكن أنا أذكي بكثير منك.. ومن اللي نَفَّذ الجريمة. ودا اللي مخليك متوتر.. ومخليني متطمن.

ثم قال بكل استخفاف:

- امشي يلا اطلع برّا مكتبي.. وسلامي لزباينك الكبار.

عُمر الشقي

كان يتعمّد الضغط على الزوج، بإعطائه معلومات صحيحة، توهمه باقترابه من حل اللغز، حتى يدفعه للقيام بأي خطأ، يكشف ثغرة تُمكن الضابط من المرور خلالها إلى الحل، وكان قد كلف مُخبراً بمراقبة الزوج، وإبلاغ الضابط بتحركاته، بالإضافة إلى مراقبة مكالماته.

كان يعلم أن هناك دليلاً ما داخل الشقة، ولكنه عصيٌّ على الإيجاد. فمعاينة المباحث والنيابة لم تكشف عن وجود أي شيء مُريب.

"كيف فعلها؟!!"

* * *

مذكرات

١٤

عندما ترى عدوك يقتل نفسه..

لا تقاطعه..

وكل البشر قتلة..

وأنا لن أقاطعهم..

بل، سأعينهم..

بالقانون..

قانون القتل يليق بهم.

* * *

٥٧

- بطّلي زَنّ بقي يا چينا. قُلت لك ما فيش طلوع البلكونة.. وبعدين بلكونة إيه في الحرّ دا؟ اهمدي.

شوَحَت چينا بيدها في الهواء، وهي تعود لتجلس إلى جوار مريم، على سرير الأخيرة، بعد أن وقفت لمدة طويلة تنظر صوب زجاج شقة عُمر الداكن، وقالت:

- صدقيني انتِ كدا هتضيّعي الواد من إيدينا. بغضب مُصطنع قالت.

- إيدين مين يا مجنونة؟ وبعدين هو يعني هيجي يزورنا في البلكونة؟

- مش يمكن عامل ثقيل يعني ولما يشوفك قُصاده ينخ؟

- ما انا كنت معاه يوم بحاله.. ما فكرش يطلب موبايلي حتى؟

مطّت چينا شفّتها، وقالت بحيرة:

- غريبة الحكاية دي فعلاً.. بقاله فوق الـ ٣ أيام غطسان.

- بس للأمانة هو قال لي إنه عنده مُشكلتين في الشغل مستعجلين لازم

يخلصهم، برّرت مريم بخفوت، وبدت وكأنها تُبرر لنفسها قبل چينا.

معتز شرباش

- برضه مش هتقولي لي بيشتغل إيه؟ ترجّت چينا صديقتها، التي هزّت رأسها بعناد، وقالت:

- أنا عمري ما اديت حد كلمة ورجعت فيها.. وانا وعدته مش هاقول.

- يبقى مُخابرات، ورفعت چينا كتفها في علامة على نفاذ اختياراتها الأخرى.

- أو جاسوس، قالت مريم، وهي تغمز باستمتاع.

* * *

- كان فيه فلوس قد إيه في المكتب؟
- مصري على عملات.. في حدود مليون جنيه.
- بالبساطة دي؟
- سأل الملياردير ثروت الناظر مُساعده بغضب شديد، جعل وجهه يبدو كوجه مسخ غير بشري، فأجاب الشاب مهدوء حذر:
- ومش كدا وبس يا حاج.. دا باعت رسالة كمان لسعادتك.
- رسالة؟ باعتها فين؟ بعد ما سرق المكتب وقف يرغي معاهم ويقول لهم رسالة؟ إيه التهريج دا؟
- لا يا حاج.. بعتهما مع الهاكرز اللي اتفق لنا معاه.. نُعمان.
- تنفّس ثروت بسرعة، وعلا صوت أنفاسه، حتى شعر مساعده أن مكتبه سوف يحترق، وقال أخيراً:
- مش كنتم واثقين إنه لا يمكن يعرف أنا مين؟ وانت نفسك مأكد عليّ إن سي زفت نُعمان دا أحسن واحد في مصر؟
- يا حاج ما هو المجال دا احنا لسّا جُداد فيه.. ما حدش بيتعلم ببلاش.

معتز شرباش

- بنتعلم بمليون جنيه.

خيّم صمت ثقيل لدقائق على المكتب الفاخر، الذي تفوح منه رائحة
البخور، وتُغطيه نباتات زينة، حتى قطع الملياردير الصمت قائلاً:

- الغبي دا لو اشتغل معايا كان كسب ملايين.. مش مليون بس. ثم صرخ:

- غبي. فانتفض مُساعده، ولم يُعقّب.

- قول لهم يعملوا لي لمون يا هادي.. وهات الرسالة دي اقراها.

"في مجالنا لا مجال لمخالفة الاتفاق. حصلت على أجري، لا مجال ليّ الذراع، في
مجالنا البقاء للأذكي.

أنت أخطأت، وستُعاقب.

لا يوجد في مجالنا استئناف للحكم، ولا طعن على نفاذه.

تم تحذيرك قبل بدء العمل، ووافقت، تقبّل خسارتك، وعقابك، واعلم أنك
تستحقّه.

عُمر الشقي

بعد ساعات من الآن، ستحضر أنت اجتماعاً، سرّياً للغاية، مع قوى معارضة للنظام، ستبحث أثناءه، عن بناء تحالفات، تعينك في انتخابات مجلس الشعب القادمة.

لقد قُمت بتجريد هذا الاجتماع من ميزة السرية، كعربون عقاب.

ما كان عليك أن تحارب أكثر من جهة في نفس الوقت.

ارتفع ضغط الرجل، وتشوّشت رؤيته، وشعر برأسه يدور.

"كيف علم هذا الشيطان بقاء سريّ قبله بساعات؟"

كانت الرسالة واضحة كالشمس، ويراها الملياردير واضحة، برغم تشوّش رؤيته.

* * *

نفخ عماد دُخان سيجارة محشوة، بإكسير السعادة، كما يسمّيه، وهو يسند بمرفقيه على سور سطح العمارة، التي يسكنها، وخلفه شقته المتواضعة، وأمامه القاهرة، بكل قُبجها، وعشوائياتها، وغبارها الخانق. قهرته القاهرة في أول مواجهة، ولا يقوى هو على المقاومة.

تلاعبت الأفكار بوعيه، فاستسلم، ولم يلاحظ حتى رنين هاتفه، الذي أظهر اسم رئيسه في العمل، كان اتصالاً طبيعياً ومتوقّعا، بعد تغيب الصحفي عن العمل لأيام، دون إذن، ولكن وعي عماد كان في مكان آخر.

"أم الدنيا"

يُسمّى أبناء مصر، بلدهم بأم الدنيا، ويسمّي أبناء محافظات مصر كلها، القاهرة بنفس الأسم.

هل هناك أم بهذه القسوة على أبنائها؟ كيف تقهر الأم أبنائها؟

ألا يعمل هذا الضابط المجرم لصالح "أم الدنيا"؟

أم أنه أيضاً مقهور؟

هل نلوم السوطَ عندما يضربنا به السواط؟

لا نلوم السوط لأنه لا يقوى على الرفض، ولا يعرفه، ولكن الضابط يستطيع الرفض.

هل يستطيع الرفض؟

عُمر الشقي

هل يستمتع بتعذيب الناس؟ ولو نفسيًا كما فعل معي؟ أم يتألم؟
أم تراه كان يتألم، حتى فقد الإحساس تدريجيًا، وأصبح مُجرد سوط؟
هَبَّت نسمة صيفية ساحرة، رطّبت الهواء حول المقهور، وكأن ضميرَ نما
للقاهرة فجأة، فشعرت بالذنب، وقررت أن تطيّب خاطر عماد، وتمهّون عليه
ناره.

سمع صوت خطوات خلفه، فلم يستدر، كان مُنْهك النفس حد الاستسلام.
لدرجة أنه حتى لم يتحرك، أو يجفل، ولا حتى بدّت عليه حتى ملاحظة يد
أسماء، التي علمت بما حدث، عندما وضعتها حوله، في دعم صامت، كان
يحتاجه بشدة، وإن لم يُبدِ حاجته.

- أنا مش هاقدر اكمل في السكة دي يا أسماء.. أنا جبان.
وبكى. فاحتضنته هي كأمه، ولم تُعقب.
فالصمت أحيانًا يكفي.

معتز شرباش

لا تسلك طريقاً، لم تستعد لآخره.

٦٠

كالظل، يندفع عُمر بملابسه السوداء، في شوارع القاهرة، ويشاهد من خلف زجاج خوذته الأسود، بداية استسلام الليل، لزحف النهار الوليد، في الأفق البعيد.

بلا هدف يقود، بأقصى سرعة، وكأنه يهرب من الموت، يزيد من سرعته، فيعلو صوت أفكاره مطاردًا إيَّاه، وكأنه يستحُّها، ويستفزُّها بجهاده إيَّاه.

كيف يهرب المرء من نفسه؟ من أفكاره؟

ولماذا حَرَّمَ الله كل وسائل تغييب العقل؟

أيعقل أن يتحول العقل لأداة تعذيب؟ ويُحرِّم على التغييب؟

كان عُمر يحاول الهرب من نفسه، من أفكاره، من شعور بالذنب، التصق به كالوحمة، ومن رغبة في التورُّط تطارده كالشهوة.

"لماذا رأيت ما رأيت؟"

"هل يمكن أن تكون الصدفة بهذه الدقة؟"

"لا يمكنني التورط"

"لا يمكنني التورط"

"لا يمكنني التورط"

"لا يمكنني التورط"

معتز شرباش

كان عُمر قد ذهب بعد اتفائه مع نادر إلى منزل الضابط، ليتخلص منه نهائياً، ويضع حدًا لتحقيق الضابط في عملية الاقتحام. فهو لا يملك رفاهية ترك ضابط ذكي، يمسك بطرف خيط، مُستقبل حُرية عُمر نفسه مُعلّق بأخره.

ونجحت الخطوة الأولى من المهمة، خطوة التوريط، والتشتيت، ومرّت كما خُطِّط لها، ولكن حدث ما لم يكن ممكناً لنادر توقعه، مهما كتب من سيناريوهات، وتوقع من مفاجآت.

انتهى عُمر من الضابط، كما خُطِّطت وأراد، ولكن يبدو أن الضابط، بشكل ما، لم ينتهِ منه.

عرض عقل عُمر ذكرى آخر حديث دار بينه وبين مريم، أمامه، وشرع يسأله...

"كيف لا يمكنك التورُط؟"

"كيف ستسامح نفسك وأنت لا تنسى؟"

"هل تعتقد أن الصدفة يمكن أن تكون بهذه الدقة؟ هذا قدر، هذه علامة"

تذكّر، إن صحَّ قول "تذكّر"، على من لا ينسى من الأساس؛

"...وفضلت لفترة عندي قناعة إنه لَسّا عايش.. وبعدين بقيت مقتنعة إنه اتقتل.. لدرجة إني شبه حققت في حادثة موته.. وفضلت فترة مقتنعة إنه اتقتل.

عُمر الشقي

شريك بابا في الشغل كان الوحيد المستفيد من موته.. بس كان برّاً القاهرة يومها، كان ييزن على بابا كتير يبيع له نصيبه في الشركة.. وبابا كان رافض.. والعقد يتفسخ تلقائياً بموت أحد أطرافه.

وبعدين في حاجة.. القضية كانت شبه محلولة أصلاً.. قضاء وقدر.. يعني ما فيش مجال للشك أصلاً في وقوع جريمة.. بس استفادة شريك بابا من موته كانت مريبة.. ودا اللي خلّاني فضلت فترة مقتنعة بوجود طرف ثالث ارتكب الجريمة.. واختفى. وبعدها أخذت أدوي.."

دوت تلك الكلمات في رأسه كأجراس الكنائس يوم الأحد، عندما لمح عُمر، على حائط الرائد، ورقة مكتوب عليها:

١. المُستفيد الأكبر عنده حجة غياب مؤكدة.

٢. القضية نازلة محلولة.

٣. طرف ثالث.

الجريمة الكاملة!!؟

هل يمكن أن يكون الفاعل في القضيتين هو قاتل مأجور، خفي كالشبح، يجيد التخطيط، لدرجة تنفيذه الجريمة الكاملة مرتين على الأقل، دون حتى

الاشتباه في وجوده؟

هتفضل القضية دي نُقطة سودا في حياتي

معتز شرباش

صرخ عقله يبرز التطابق المريب بين كلام مريم، وملاحظات الضابط، فوقف لدقيقة كاملة يطالع الحائط كله، ويدور ببصره على كل صورة، وورقة، وملاحظة.

كان في الحقيقة يحفظ كل شيء في ذاكرته، فهو يملك واحدة لا يحتاج معها لتصوير الحائط حتى يستدعيه، ويتذكره، وقام فقط بتصوير صور مسرح الجريمة، حتى يتمكن من طبعها لاحقًا.

استمر عُمر يهرب من نفسه، لساعة كاملة، في شوارع بدت له كالمناهة، التي لا نهاية لها، ولا منها مفر، وهو كان يدور في الحقيقة، داخل وعيه، هربًا من إصراره على فعل ما يعلم جيدًا أنه آخر شيء عليه أن يحاول فعله.

* * *

انتزعت يد حَشِنَة، يُغَطِّمها شعراً كثيفاً، نادر من نومه، فاستيقظ
دفعاً واحدة، ليجد ياقة منامته في قبضة رجل غليظ الملامح، تُغَطِّي ذقنه
لحية كثيفة قد اعتنى بها جيِّداً.

اتسعت عينا نادر على آخرهما، ليلاحظ أن هناك رجلاً آخرًا يجلس على
الطرف الآخر من السرير، وبعد نظرة واحدة إلى وجهه، علم أنه الملياردير
ثروت الناظر، الذي لا تقل ملامحه غلظة، ولا قبجًا، عن هذا الذي تعلّق
بياقة منامة نادر، وكأنها طوق نجاته من النار.

- هل ظننت أنك ستفعلت بفعلتك؟ هل حقًا ظننت أنني لن أتمكن من
التعرف عليك؟ يا لك من أحمق عبيط. قال ثروت بصوت، ولهجة ذكّرت
نادر، بالأفلام التي دارت أحداثها في سوق عكاظ، عندما كانت تحكم قبيلة
قريش مكة.

تعجّب نادر من هزل المشهد، ولكنه لم يتمكن من فعل أي شيء سواه، ثم
بدأ الخوف يزيح التعجب، ويحتل كيان المُخِطِّط العبقري، عندما وقف
ثروت، وأخرج من جيب سترته مسدسًا كبيرًا، أسود اللون، وصوّبه إلى رأس
نادر وقال:

- الموت لك يا من ظننت أنك انتصرت على ثروت، وأطلق النار.

معتز شرباش

انطلق صوت عصفور جميل، إثر خروج طليقة ملوَّنة من ماسورة المسدس، ثم نبت لها جناحان، طارت بهما في سقف الغرفة، ثم انطلق صوت العصفور مُجدِّداً، أكثر من مرة، وفي كل مرة كان يخرج من ماسورة المسدس عصفور ملون جميل ساحر اللون، ليُحلق مع من سبقوه في سقف الغرفة، حتى امتلأ السقف بهم.

فتح نادر عينيه، أخيراً، على صوت جرس باب شقته، الذي يصدر صوت زقزقة عصفور جميلة، ونظر حوله بحثاً عن ثروت، ومساعدته، ثم بحث عن العصافير فوق سريره، فأدرك أنه كان يحلم، فهدأ، حتى انتزعته صوت دقات قوية على باب شقته، تكاد تخلع الباب من قوتها.

"هذا الصوت حقيقي؟!!"

قام نادر مُسرِعاً، واتجه صوب باب شقته، وفتحها ليجد عُمر أمامه حاملاً خوذته بيده، والكثير من الغضب والضيق على ملامحه.

- أنا لو باصحي قتييل.. كان صحي بدري عن كدا يا نادر.

مدَّ نادر يده وأمسك كتف عُمر، ثم مرَّر كفه على ملامحه، فنفض عُمر يد نادر عنه، وقال بضيق:

- أيوة يا نادر أنا هنا بجد.. مش بتتخيل.. اصحى بقى أبوس رجلك وفوق..
عشان عندنا سُغلانة بنت كلب لازم اخلص منها قبل ما تخلص عليّ.

عُمر الشقي

كان دائماً ما يتخيل نادر أن هناك بشراً حوله، وكان يعلم أنهم مُجرد انعكاس لأفكاره، وكان يتحدث معهم، ويناقشهم، ويساعدهم، فأراد أن يتأكد من حقيقة وجود عُمر.

دخل عُمر الشقة، وتوجه صوب حائط الصالة الأيمن، وأزاح الكنبه أسفله، ثم نظر إلى نادر، وقال:

- عاوز ورق فاضي.. وقلمين أحمر وازرق.. واعمل لنا حاجة سخنة نشرها..
وفضّي دماغك يا نادر.. واستحضر في دماغك كل عباقرة حل جرايم القتل
اللي تعرفهم.. عاوزهم معانا هنا.. عشان عندنا ٣ جرايم قتل لازم نحلّهم
فوراً.

* * *

أعاد وائل سماعة هاتف مكتبه إلى مكانها، ورفع فنجان قهوته، وارتشف منه سريعاً، ثم أعاده مكانه، وهو يقول:

- ما فيش حاجة في الشقة ممكن تثير الشكّ.. شوية معدات من شغله.. وأدوات موجودة في كل بيت.. زي ما انت شايف أهه.. بقالي ساعة ع التليفون مع وكيل النيابة.. بنراجع جرد الشقة.. وكل الصور سوا.. وبنطرح كل البدائل وما فيش نظرية واحدة منطقية أو تنفع تتطبّق.

تمهّد النقيب ولم يُعقب. كان يعلم وائل، أن النقيب لا يستصيح نظريته، ويرى أنها مستحيلة، ولا يوجد دليل واحد على تعرض هذه السيّدة للقتل. قد يكون الزوج يتصرف بشكل مريب، ولكنه اعتاد على هذا من البشر. الناس يتوترون عندما يخضعون للتحقيق، هذا طبيعي، واحترم وائل وجهة نظر مساعده، خاصة وأنه لم يعترض على التدقيق في أمر الزوج، فهو

- النقيب- يعلم جيّداً الفرق بين وجهة النظر الخاصة، ومهام العمل.

فُتِح باب مكتب الرائد، بعد دقّة واحدة سريعة، فرفع الضابطان رأسيهما صوب الباب تلقائياً، ليجدا رجلاً أشيباً، فارع الطول، ومهيب الطلّة، يدلف إلى المكتب دون استئذان، حاملاً ابتسامة ودودة على وجهه، وسيفين متقاطعين ونسراً على كل كتف، فهبّا واقفين ليستقبلا هذا الغريب المُقترح.

عُمر الشقي

- السلام عليكم.. اللواء ماجد بندر من إدارة التفتيش.. كنت عاوز سيادة الرائد في كلمتين لو وقته يسمح.

كانت جملته تحمل أمراً مُبطنًا للنقيب أن يغادر المكتب، فسَلَّم على اللواء مُرحَّبًا، وغادر المكتب حاملاً قدرًا كبيرًا من الحيرة، والتوجُّس، والقلق.

- اتفضل يا افندم ارتاح. قال وائل مُتوجسًا.

جلس اللواء، وانتظر حتى التفَّ الرائد حول مكتبه، وجلس في مواجهته، ثم قال:

- هادخل في الموضوع على طول.. عشان دمك ما ينشفش أكثر من كدا. بُص يا سيادة الرائد.. وصل إيميل النهاردا الصبح.. على واحد من حسابات الوزارة.. فيه معلومة تخصك يا وائل. بلاغ على وجه الدقة.

عقد وائل حاجبيه، ولم يُعقب، فأكمل اللواء:

- في اتهام خطير ليك يا وائل في الرسالة.. وانا هنا عشان احقق في الموضوع بنفسي، باختصار؛ وصلت معلومة إن انت اللي قمت باقتحام القسم.. ونصبت على رامز بيه غالي، ومش كدا وبس.. لا كمان إنك صاحب حساب "حشرة" على facebook. وإن كل السيناريوهات اللي بتحاول تطرحها عن اختراق جهاز البحث.. وخلافه.. محاولة منك عشان تحوّل نظر الناس كلها عن الهدف الحقيقي من العملية.. اللي هو النصب، مجرد تضليل للوزارة عشان ما حدش يشك فيك.

معتز شرباش

قُل لي يا وائل.. أنا وصلني إنك من أول يوم بترفض تمامًا إن العملية دي كان هدفها مجرد النصب، الكلام دا صحيح؟

لَمْ يكن وعي الضابط قد استوعب بَعْد كل ما قيل، حتى يتمكن من ملمة شتات عقله، والتمكُّن من إجابة أي سؤال، فلم يجب، وإن أجابت جهته عرقًا غزيرًا، وارتعشت يداه، وكأنها تريد أن تفصح عن سر ما، ويمنعها شيء خفي.

- طب شوف يا سيادة الرائد.. أنا عرفت إنك ساكن مع والدتك.. طبعًا أنا رفضت تمامًا نروح نفتش الشقة من وراك، انت واحد مننا.. وما يرضيش حد نعمل كدا.

اللي هيجصل إن انا وانت دالوقت هنخرج نروح على شقتك.. نكمّل كلامنا في الطريق.

* * *

٦٣

استغرق عُمر أكثر من ساعتين، حتى تمكّن أخيرًا، من نسخ حائط الضابط، من ذاكرته، على حائط صالة نادر، الذي قام بطباعة الصور التي صوّرها عُمر، الذي ثبتها على الحائط بدوره، ليصبح نسخة طبق الأصل، من حائط غرفة الرائد، وفي أثناء انشغاله بالحائط، شرع بشرح ما حدث، وما ينتويه لنادر، حتى يساعده فيما أراد.

كان يعلم أنه يُخطئ بالتورط، وأنه يتخطى الخط الأحمر، الخاص بالاقتراب من الجهات السيادية، ولكنه كان يعلم أيضًا، أن حل لغز جريمة قتل مثل تلك التي أمامه، هو شيء لن يقاومه نادر لثانية واحدة، وأمام إغرائه، لن يلتفت لأي خطوط حمراء، ولن يلحظ تخطيه لها. فنادر هو مُخطّط، وروائي ذكي، يهوى ما يستفز ذكاءه.

- يعني انت عاوز تفهمني: إن في Serial Killer موجود في مصر من سنين، وبيعمل عمليات، من كتر عبقريتها، ما حدش اشتبه في وجوده من الأساس؟ وإن الضابط دا... سأل نادر بخفوت، ولم يكمل سؤاله، وكأنه يسأل نفسه، وهو يطالع الحائط أمامه، بانهار، كالطفل في محل ألعاب. لم يتعجب عُمر، لأن نادر يفعل هذا كثيرًا، ثم أضاف نادر دون أن ينظر إلى عُمر:
- وانت شاكك إن أبو صاحبتك اتقتل على إيد الراجل دا.

معتز شرباش

- هاحاول أعرف تفاصيل أكثر عن موت أبو صاحبتى.. بس المهم خَلينا في القضيتين دول.. انت شايف إيه؟ ثم نظر حوله، وأضاف:

- وأصحابك؟

صمت نادر لوقت طويل، وبقي مُعلِّقًا نظره على الحائط بانهار واضح، تركه عُمر وأعطاه مساحة التفكير، التي يعرف عُمر أن نادر يحتاجها، عندما يشرع في حل لُغز، أو وضع خطة، أو التنبؤ بسير عملية، وتوقع مفاجأتها. وفي تلك الأثناء كان عقل نادر يعمل بلا توقف، يلتهم المعلومات والتفاصيل، ويستمع لأسئلة أصدقائه الوهميين، الذين يراهم حوله الآن، ويبحث عن إجاباتها على الحائط، فمنذ الدقيقة الأولى بعد استيعابه لقصة عُمر، أعجبه اللُغز، وتحداه، واستحث عقله على تفسيره.

فبدأ يعمل بالترتيب، وطرح على نفسه سؤالًا، وسعى لإجابته:

"بافتراض صحّة نظرية الضابط.. كيف فعلها القاتل؟"

ثم بدأ بالقضية القديمة، قرأ كل الأوراق التي تَخُصها، وكل تفاصيلها، وملاحظات الضابط، ثم نطق أخيرًا بعد صمت دام لساعة، وقال بإقرار:

- قضية سليمان سهلة جدًا. بس ما فيهاش أي خيط للقاتل.. بس سهلة.. تتعمل يعني.

- إزاي؟ سأل عُمر بإنهاك، بسبب عدم حصوله على أي قسط من النوم.

- سليمان كان يراقب المكان.. وبيتأكد من مداخله ومخارجه.. يعني لو حد راقبه كويس كان هيقدر يتوقع الشقة اللي هيسرقها.. من الشقق الفاضية

عُمر الشقي

في المكان.. ومن تحركات سليمان. ولو تلاحظ القتل اتقتل قبل ما هو يسرق بـ ٣ أيام.. يعني حد راقبه.. وعرف مكان الشقة.. وقتل القتل.. وسرق حاجات تخصه عليها بصماته.. ولها طابع شخصي.. عشان يبقى سهل التعرف على صاحبها.. وحطها في الشقة اللي سليمان قرر يسرقها، والدليل على إن القتل ما كانش بهدف السرقة.. إن في حاجات اتسابت في الشقة.. اللي قتل كان رايح يلفق تهمة.. مش يسرق.

بس عبقرى القاتل دا.. أنا لازم اقعد معاه.. دماغ دهب.

لم يُعقَّب عُمر على مدح نادر للقاتل المزعوم، فهو يعلم جيّدًا أن نادر يحترم العقلية، بغض النظر عن شخصية صاحبها، وهذا القاتل إن وجد، فهو بدون شك عبقرى.

- طب وقضية الست يا نادر؟

صمت نادر مُجددًا، فعلم عُمر أنه سيغرق في أفكاره، وسيستغرق باقي نهاره، فقال:

- طب نادر.. أنا هادخل انام.. وصحّيني لو وصلت لحاجة.

دخل عُمر إلى غرفة نوم نادر، واستلقى على سرير الأخير، واستسلم لأفكاره، وصخبها المزعج.

"...بعدها أخذت أدوية اكتئاب.. وبقيت اكلم نفسي.. ووصلت معايا الأعراض

لأنى شكّيت في ماما نفسها.

معتز شرباش

كانت أسوأ فترة عدت عليّ في حياتي يا عُمر.. مش هابالغ لو قلت إن اللي حصل لي بعد وفاة بابا وبسببها.. كان أصعب وأقسى من الوفاة نفسها.
أنا معترفة إني ضعيفة قصاد الفراق.. بيكسرني.. ويفقدني كل قدرة على إني اكون طبيعية.. أو حتى ازعل واتقبّل الفراق بشكل طبيعي.
أنا بمُجرد.. ومش قصدي أضايقك بكلامي.. بس والله بمُجرد ما بافتكر الفترة دي باتعب.. وبحس إني روجي بتطلد.."

رأى عُمر مريم يومها أمامه تختنق، ويضيق صدرها، وتجاهد لتتحكم في مظهرها الخارجي، وأراد أن يساعدها، ولكنه عَجَز، وهذا الشعور بالعجز لم يختبره منذ وفاة والدته، وقبلها عند فُقدانه لوالده، وكُرهه لهذا الشعور، يدفعه دفعًا لمساعدتها الآن.

ولكن المُساعدة تؤلم أحيانًا.

فبعض الراحة لا يستحق الكثير من الألم.

"كيف تريد إعادة كل هذه الذكريات إليها؟ وهي التي أنعم الله عليها بنعمة النسيان؟ هل تحسدها على نعمة حُرمت أنت منها؟ فتريد حرمانها منها ولو مؤقتًا؟" هاجم نفسه.

"هي تخطت الماضي، ولكنها لم تنسه، لو نسيت ما كان ليؤلمها تذكره هكذا ألم." برّر.

عُمر الشقي

"ماذا ستسفيد هي إذا علمت أن والدها قد قُتل على يد قاتل مأجور، خفي كالشبح؟" سأل.

"ستستطيع تقديم شريكه إلى العدالة، ليحصل على العقاب الذي يستحقه." أجاب.

"ولكنها قالت أنه أحسن إليهم، وأعطاهم أكثر مما استحقوا." عارض.
"وهذا في حد ذاته دليل إدانة، هذا شعور بالذنب واضح كالشمس." دافع.
"وماذا لو علمت هي وعادت إليها ذكريات أسوأ أيامها، ولم يتمكن أي منكم من القبض عليه، أو حتى إثبات وجوده؟" استفسر.
"... صمت.

"أثبت وجود هذا القاتل بدليل لا يقبل الشك أولاً، حتى تعرض عليها حقيقة مؤكدة، وليست مجرد نظرية." قرّر.

ثم عاد له شعور حاول منذ أن غادر غرفة نوم الضابط أن يتجنبه، ولم يستطع، شعور كاسح بالذنب، تملك منه، حد الغضب.
فهو اعتاد أن يُبرر لنفسه، ما يفعل لنفسه، بأنه لا يؤدي أحداً. ولكنه اليوم شعر لأول مرة أنه يؤدي أحدهم، ويشاء القدر أن يرى عُمر بعينه، أن هذا الضابط صاحب ضمير حيّ، كيف لا؟ وهو الذي يحتفظ بملف قضية قديمة، تسببت في عقابه، مُثبِّتاً على حائط الغرفة التي ينام بها، ويتذكرها، ويسعى حتى في وقته الخاص، لحلّها، ولإنقاذ رجل اعترف أنه سارق محترف.

معتز شرباش

وأيضاً قد يكون هذا الرجل هو الوحيد القادر على القبض على شريك والد مريم، وعقابه العقاب الذي يستحقه، ولكن عُمر، بكل أنانية، لفق له تهمته؛ سيُبرأ منها، بعد وقت طويل من التحقيقات، والاستجابات المنهكة، ولكنها ستترك ندبة على ملفه. وقد تترك على روحه جرحاً لن يندمل، قد يكون السبب في تحوّل هذا الضابط المتفان إلى مُجرد ضابط يستغل منصبه لتحقيق مصالحه الشخصية، ولن يلومه وقتها عُمر، فهو الذي حاول من قبل التصدي لمُشْتبه به، وبسبب هذا أوقف عن العمل وتم نقله بعد تحقيق مُهين، وها هو نفس الموقف يتكرر مُجدداً، بسبب أنانية عُمر.

"ترى كم شخص أذيت من قبل، دون أن يشاء القدر أن ألمح حائطه، لأدرك حجم الضرر الذي تسببت به؟" تساءل عُمر، وشعوره بالذنب يؤلمه.

* * *

غرق وائل طوال الطريق بين القسم ومنزله، في أفكار لا ترحم،
وعرق غزير، برغم عمل مُكيّف سيارة اللواء الخاصة، بسبب غضب وتوتر
اجتاحا كل كيانه.

تلاطم وعيه بين أمواج من التساؤلات والشك والتفكير، وتكسّرت على
صخور الشك كل فكرة حاول تكوينها عما يحدث له.

لا يوجد فيما يحدث له شيء مفهوم بالكامل، وكأنه في منزل كثير الردهات،
قليل الإضاءة، ليلاً، يتخبّط بين نظريات، وأفكار، وتفاصيل تلك القضايا
التي قلبت حياته رأساً على عقب.

ولكن؛ هناك تفصيلاً واحدة ترقى إلى مرتبة الحقيقة، بين كل تلك
النظريات، التي يراها في عقله، هي أنه اقترب والدليل؛ هو ما يحدث له الآن.
ما يحدث هذا هو وجه التشابه الرابع، الذي يجمع قضية سليمان الهجّام،
والسيّدة ناهد؛ هو أنه كلما اشتبه في أحدهم وضغط عليه، يتم إيقافه
بشكل أو بآخر، وجرّه إلى خوض معارك وهمية، في شكل تحقيق داخلي،
سينتهي حتماً هذا المرة، على أقل تقدير، بتركه المباحث نهائياً.

هذا إن احتفظ بوظيفته من الأساس.

أفاق وائل من أفكاره، عندما وصل إلى باب شقّته، فطلب من اللواء بأدب

كسير:

معتز شرباش

- من فضل سعادتك اسمح لي أدخل أطمئن الحاجة الأول.
- اتفضل يا ابني اسبقني.. بس سامحني.. بلاش تغيب عن نظري، ثم أشار إلى معاونيه، أن يبقيا خارج الشقة، حتى يستدعيهما.
فتح وائل باب الشقة بمفتاحه، فاستقبلته طلة والدته، حاملةً ضيقًا ولوماً واضحين، فتعجّب، ثم لمح ميّ خطيبته تظهر من خلفها، بنظرة تحمل الكثير من خيبة الأمل، والانكسار.

"لماذا تنظران إلي بكل هذه الشفقة واللوم؟"

"هل علمت ميّ عبر والدها؟"

"هل أخبرت والدتي؟"

نالت منه حيرة مُنهكة، وكأن ما هو فيه لا يكفي لإنهاكه.
سمح لضيفه بالدخول، وقاده إلى مقعد وثير بابتسامة، توهم هو أنها ظهرت على ملامحه، ولكنها لم تصل إلى وجهه، ثم توجه صوب والدته وسلّم عليها، ثم نظر إلى خطيبته يسألها دون كلام عن سبب تواجدها هنا دون اتفاق.
فأجابت، وكأن سدّ الصمت انهار تحت ضغط سيل الكلام:

- بُص يا وائل.. أنا مش هاقدر اكمل أكثر من كدا.. أنا ما اعرفش عنك حاجة من ساعة ما اتصالحنا عشان مقصّر معايا. منعت دموعها، وأكملت بصوت مختنق:

- واضح إنك ما عندكش مكان ليّ في حياتك.. وشغلك بس هو الـ...

عُمر الشقي

قاطعها وائل بخفوت، وإنهاك، لا مثيل لهما، كمن نرف وعيه، إثر طعنة
الغدر الأخيرة، الكثير من التركيز، فلا يقوى على فعل أي شيء، ولا حتى
الكلام:

- مَي مش هينفع دالوقت الكلام دا.. أنا عندي مشكلة في الشغل.. ومش
هاقدر اع...
هاقدر اع...

- شُفتِ يا طنط؟!!! بالذمة مش قايلة لك هيقول كدا بالحرف؟ عشان تعرفي
إنه ما فيش فايده. احدثت مَي وهي تنظرُ إلى والدة الرائد، الذي أغلق
عينيه، هربًا مما يحدث له، لعلَّه كابوس سيفيق منه، عندما يفتحهما
مُجددًا.

شعر وائل بكتف مَي يحتك بكتفه، في طريقها للخروج من منزله، وحياته.
يالا قسوته وداع.

فتح الرائد عينيه، ونظر إلى والدته، من خلف ستار دموع تجمعت في
مُقلتيه، وقال بكل ما أوتي من تماسك، لم يكف ليظهر كما أراد، ولكنه أدَّى
الغرض:

- اسمعي يا حاجة.. في حد عمل فيّ بلاغ كيدي.. وسيادة اللواء محتاج يفتّش
الشقة.

اتسعت عيناها هلعًا، فاقترب منها، واحتضنها، وأكمل مُطمئنًا، بصوت من
يحتاج إلى من يُطمئنه:

معتز شرباش

- ششششش.. اهدي امال يا ست الكل.. دول خمس دقائق سُخفا.. وهيروحووا لحالهم.. اطمني كدا.. انتِ عندك شك في تربيتك ولا إيه؟
بگت دون صوت، وتماسكت من أجله، والألم يمزقها. قبّلت ولدها على جبهته، وقالت شيئاً ما، ضاع وسط محاولات منع بكائها، وخرجت الكلمات كالهيممة، فتوقفت قبل أن تتحول إلى نحيب، يزيد معاناة وحيدها، وتوجّهت صوب الضيف وسلّمت عليه، وجلست في أبعاد ركن من الصالة، بقهر وعجز.

أوماً الرائد إلى اللواء برأسه، الذي نادى بدوره على رجاله، وأطلقهم يفتشون في الشقة، عن دليل تأكيد التهمة التي جاءت بهم إلى هنا.
لَمْ يستغرق التفتيش سوى دقائق معدودة، حتى عاد الرجلان، كلُّ يحمل غنيمته. أحدهم يحمل جهاز الكمبيوتر الخاص بالرائد، حيث كانت توصي التعليمات بتحريره، ليخضع لفحص دقيق، والآخر يحمل كيساً بلاستيكيّاً أسوداً، يحتوي على ما يبدو أنه مبلغ كبير من المال، يتخطى على أقل تقدير، ما يكسبه الرائد في أكثر من سنة.

بكت مَي في مقعد سيارة الأجرة الخلفي، كما لم تبك من قبل.

ما أقسى أن تضطر إلى وداع من تُحب باختيارك، ما أقسى أن تضطر إلى أن تقسو على من تتمنى أن تحنو عليه، أن تضطر إلى إخفاء لهفتك على احتضان من تحب، خلف قناع قاسٍ من الإنكار.

بكت.

بكت حبيبها الذي وصلت معه إلى طريق مسدود، بحائط ضخم من الإهمال والتجاهل، كانت على أتم استعداد إلى أن تحفره بأظافرهما من أجله. ولكنها لا تستطيع وحدها أن تفعل.

بكت.

لم تعلم عن محنته شيئًا، ولكن هذا ذنبه هو، وهي معه من يتحمل ناره. تخلت عنه هي، دون علم ولا قصد، في أصعب لحظات حياته، وكل هذا، لأنه لم ينتبه إلى الإشارات.

لطالما نَهته هي إلى إهماله لها، واهتمامه المبالغ فيه بعمله، ولم ينتبه.

ظن أنها شكوى معتادة، فاعتادها.

معتز شرباش

أحياناً نصبر على مشكلة صغيرة، حد عدم الملاحظة، ولا نعلم أنها ستتحوّل،
في أقل أوقاتنا استعداداً للتعامل معها، إلى كارثة.

لا تستهين بقطرات الماء الضعيفة، التي تتسرب من السد، لأنها بداية
الانهيار.

والانهيار يحدث في لحظة.

* * *

تململ سي. أوجست دوبين، وقال بلكنته الفرنسية:

- صدقني يا نادغ.. من قتل هذه السيِّدة تمكَّن من إخفاء وسيلة خروجه من الشقة.. يجب التركيز على إيجاد وسيلة خروجه، ولكن مقتلها أمر مفروغ منه.

- على الأقل قال شيئًا صحيحًا في الجملة.. أنها قُتلت، سخر المُحقق هولمز منه، ثم دار على عقبه وسأل بثقته المعهودة، وملابسه الثيكتورية:

- للشقة مخرجان.. أحدهما مصوّر.. والآخر متصدِّئ.. كيف تمكن من الخروج؟ هل خرج من النافذة، ثم تعلق في الهواء وطلاها بالصدأ؟ ثم ضحك مُستهترًا، وخرجت ضحكته على شكل زفرة امتعاض.

تعكّرت تعابير وجه البلجيكي بوارو، وقال:

- تتحدث وكأنك تعرف الحل.

- لا أعرف الحل.. ولكنني أعرف أن أحدًا منكم لن يعرفه، عندي نظرية بالتأكيد.. ولكن تبقى تفصيلا واحدة صغيرة خفيّة.

نادر هذه مضيعة للوقت.. أين واطسون؟ ونظر إلى نادر.

- وكأني في حضانة للأطفال. اعترضت الأنسة ماربل.

ثم قال ثيرو ولفي، بلكنة نيويوركية واضحة:

معتز شرباش

- أنا لا يمكنني التفكير وأنا جوعان.. ألم يكفك انتزاعك لي من منزلي؟ وجري إلى هنا دون إذن؟ أين آرتشي؟ على الأقل دعه يعد لي وجبة تعينني على تحمّل سخافاتهم.

قال عُمر بإنهاك:

- نادر.

لم يُجب نادر، الذي كان لا يزال يرى أشهر مُحققي أدب الجريمة في العالم حوله، يتجادلون في تفاصيل القضية، التي أمامه. ولم يخترق صوت عُمر جداره العازل عن الواقع بعد.

- نادر. صرخ بها عُمر، فتبخّرت فورًا ظلال ضيوف خيال نادر، الذي انتفض والتفت إلى عُمر، وعيناه على أقصى اتساع لهما.

كانتا حمراوان كعيون الشياطين، بسبب قلة النوم، وكثرة التركيز.

- ركّز معايا.. وصلت لإيه؟

نظر نادر إلى حيث كان هولمز واقفًا، وكأنه يستحضره، ثم قال:

- ما فيش شك إن الموضوع دا جديد يا عُمر.. كثير كتبوا عن الغرفة المغلقة.. أحمد خالد توفيق اتكلد..

- ممكن يا نادر أبوس رجلك.. ما تحكي لي قصة حياة الغرفة المغلقة الأدبي؟

وصلت لأي نظرية؟ أي حاجة؟

أوماً نادر برأسه، وقال بحماس:

عُمر الشقي

- شوف يا عُمر.. فكرة تصويب مسدس عن بعد دي موجودة وحصلت في الحقيقة كتير.. وناهيك عن الأدب.

فكرة الفخ.. بمعنى تفتح ضلفة دولاب المسدس يضرب في وشك.. تفتح باب تقوم قنبلة تنفجر، دا وارد وبيحصل.

اللي خلاني أفترض حدوث دا في حالتنا.. إن بصمات البنت مش على الزناد.. وممكن يكون زوجها أخذ بصمتها بعد ما رجع من برّا.

والراجل عنده معدات شغل.. تسمح له يثبّت المسدس.. ويوجهه في اتجاه معين ويضرب لما حاجة تحصل.. يعني المنجلة دي مثلاً.

ثم قام والإثارة تملأه، وأشار على إحدى الصور التي تُبيّن بعض المعدات في شقة المهندس، في تلك الغرفة التي كان يعتبرها الأخير ورشة، ثم أكمل نادر بحماس علا مُعدّله:

- بس في مشكلتين:

إن الست اتضربت بالنار وهي واقفة قصاد باب الأوضة.. وباب الأوضة في عكس اتجاه السلاح.. يعني السلاح موجه في جنب اتجاه الباب.. فاهم؟! مش زي المعتاد في الحالات دي إنه يبقى مواجه للضحية.

يعني كان فين الفخ؟ يعني هي مثلاً شدّت أو حرّكت حبل برجلها؟ كانت الشرطة هتلاقي أثار تثبيته في الحيط، وهيثير اشتباههم.

ولو ما حصلش وحد لاحظته، تظهر المشكلة الثانية؛ وهي ازاي عرف إن راسها هتكون في الحتة دي تحديداً، وفي لحظة انطلاق الرصاصة؟

معتز شرباش

ماهي لو خبطت خيط.. وارد توطي.. وارد تبقى خارجة بظهرها لأي سبب..
وارد تبقى مزنوقة وماسكة بطنها فتعدي الرصاصة من فوق راسها.
دي الحتة اللي مش قادرين نوصل لها، وأشار حوله إلى الصالة الفارغة، ثم
قال بضيق مَن لا يتقبَّل الخسارة، وشعر بتفوق منافسه عليه:

- إزاي ثبَّت الست لثانية كاملة على الأقل.. عشان يضرها بالنار بالظبط في
المكان اللي يتفهم على إنه انتحار؟ عملها ازاي دي؟

ممکن لو اتكلمت مع الراجل دا أعرف أوقَّعه، ثم نظر إلى عُمر، ووضَّح:
- يعني ترمي السؤال.. وتلاحظ تأثيره على اللي قصادك.. لعبة حظ.. بس
غالبًا بتنفع مع اللي عندهم حاجة يخافوا منها، لأنك كل ما بتقرب من اللي
بيخافوا منه.. بيبان عليهم، ثم سرح لثوانٍ وبصره يدور في الفراغ، وكأنه
ينصت لأحدهم، ثم نظر إلى عُمر وسأل فجأة، وكأنه يُمرر له سؤالًا تلقَّاه
لتوّه:

- تعرف تجيبه هنا؟!!

* * *

٦٧

فتحت والدة الرائد باب عُرفته، ونظرت إلى ابنها، الذي كان يجلس على مكتبه. رفع عينيه إليها، بتساؤل صامت، فابتسمت، ودارت الألم الذي يعتصر روحها، ويخنقها، قدر إمكانها، وقالت:
- لو جالك نفس تاكل يا حبيبي أنا مستنياك.

أجاب بصوت مُنك:

- اتغدي انتِ يا حاجة.. انتِ تلاقيكِ ما أكلتيش حاجة من الصبح، أنا شربت قهوة كثير.. نفسي مسدودة.

هزّت رأسها، ولم تُجِب، وأغلقت الباب خلفها، ثم فتحت السدّ لدموعها لتُغرق وجهها، فتماسكها أمامه يستنفد كل جهد تستطيعه، هي أم، ولا تستطيع أن ترى وحيدها في هكذا ألم، ولا تستطيع مساعدته. أصابها عجزها عن مساعدته في مقتل.

كانت تعلم مقدار القهر الذي يتعرض له ابنها، لأنه شريف، فالفساد عندما يُقبض عليه، لا يشعر بالقهر والظلم، لأنه في قرارة نفسه، يعلم أنه يستحق ما يلقاه، عكس ابنها.

وداخل العُرفة، رفع وائل رأسه إلى سقف عُرفته، وكأنه يستجدي السماء لتساعده. مُنك، ومُجهد. يشعر بركان غضبه، أسفل طبقة الجليد التي تُغطي وجهه.

معتز شرباش

دارت عيناه في سقف الغرفة، وكأنه يبحث عن شيء ما، ثم نزل برأسه، وأخذ يطالع الحائط أمامه، دون تركيز، وغاب وعيه، وتذكر لقطات من اليوم؛ هذا اليوم الذي يعتبره أسوأ يوم مرَّ عليه في حياته بأسرها، بعد اليوم الذي دفن فيه والده، تحت الأرض، وتركه وحيداً هناك، وعاد إلى منزله، وهو - والده- الذي لم يتركه في حياته أبداً وحيداً.

"...كلامك دا خطير جداً يا وائل.. انت فاهم انت بتقول إيه؟ قال اللواء داخل مكتبه، لوائل الذي جاء معه، حتى يخضع للسؤال، كما سماه اللواء، ولكنه تحقيق، واستجواب، كما يعلم الجميع.

- يا افندم أنا طول السكة من القسم للبيت.. ومن البيت لمكتب سعادتك هنا بافكر.. صدقني يا سيادة اللواء ما فيش تفسير غير اللي باقوله لسعادتك. ثم رفع يده، مؤكداً:

- وانا عارف طبعاً خطورة التفسير دا.. بس والله يا ماجد بيه لو فكّرت معايا بهدوء هتوصل لنفس النتيجة.

- كلامك دا معناه إننا عندنا في الوزارة واحد بيشتغل قاتل بعد الظهر يا وائل.. ومش كدا وبس.. دا كمان بقاله سنين.

تنهد الضابط بضيق، فهو يعلم أن ما يطرحه عصيٌّ على التقبُّل، وخاصة من قبَل رجل أفنى عمره في خدمة الوزارة، ويعتبر رجالها أشرف من أنجبت مصر.

عُمر الشقي

ولكن في النهاية، حيث يوجد بشر، يوجد فساد. هذه هي طبيعة الدنيا، وحقيقتها، وقاعدتها الوحيدة، التي لا استثناء لها.

- يا ماجد بيه دي تاني مرة تحصل.. كل ما اقرب من الحد دا اتحوّل للتحقيق.. واتوقف عن العمل.. دا غير إن دا بيفسر قنابل الغاز بتاعة الوزارة اللي اتضربت في القسم.. ما فيش تفسير منطقي غير إن كل دا مرتبط ببعضه.

- بَص يا وائل.. أنا شخصياً مش مصدق قصة إنك اللي عملت عملية القسم دي.. الحكاية كلها مش داخله دماغى.. طريقة تقديم البلاغ.. وموضوع حساب الصرصار دا.. في حاجة ملخبطة في الموضوع ومش مفهومة.

بس هارجع واقول لك.. فيه تفسير.. وفيه دليل.. التفسير إنك كنت شريك حد.. وخَلَفْت اتفاقك معاه فقرر يبيعك، وارد، والدليل الفلوس.. مين يا وائل هيدفع فوق الـ ١٠٠ ألف جنية عشان يلبسك قضية؟

على الناحية الثانية.. انت ما عندكش دليل واحد على نظيرتك.. ولا واحد. كلها نظريات مرتبطة بصُدف.. مش بدليل حتى شبه مُقنع، ثم نظر في بعض الأوراق أمامه، وقال دون أن يرفع رأسه عنها:

- قضية الهجّام فيها حاجة غريبة.. ومعاك برضه قضية الست دي غريبة.. بس دا مش معناه إنهم مرتبطين، حدسك كظابط أنا ممكن افهمه كزميل.. لكن دا مش دليل يا وائل.

قال وائل بضيق:

معتز شرباش

- طب ومش غريب إن في القضيتين كل ما اشتبه في وجود طرف تالت تحصل حاجة تبعدي عن التحقيق؟ ما فيش حاجة اسمها صدفة في شغلنا يا ماجد بيه."

مقهور هو، ولا يعلم كيف يتصرّف. إنه شيء سيء أن تُصاب في مسيرتك الوظيفية، وتُحرم من تطبيق العدالة مرة، بسبب ذكاء الخصم، أو تفوّقه. ولكن أن يتكرر نفس الشيء مُجددًا، ومعه تُصاب في نزاهتك، فهو شيء آخر تمامًا. شعور بالقهر، والعجز، والغضب، لا يمكن احتمالها.

يشعر وكأنه دُفِن حيًّا، في قبر ضيق، لا يستطيع الحركة بداخله. تنفّس بعُمق، لعلّ ضيقه يتبخّر، ولو مؤقتًا، لكن دون جدوى.

في تلك اللحظة شعر وكأنه ارتطم بالقاع، بسُرعة قطار مجنون.

تذكر، لسبب ما، أنه كان قد قرأ يومًا، في مكان ما، جُملة تقول:

"تحقيق الشيء مرهون ببذلك كُل جهد في سبيله.

فإذا أردت شيئًا بشدة، وتعلم أنك بذلت كل جهد تستطيعه في سبيل تحقيقه، فهو قد تحقق لك بالفعل، وستساعدك كل الدنيا، وتُسخّر لتحقيقه لك. ولكن موعد مثوله بين يديك، سيكون في أكثر اللحظات يأسًا.

فإذا يئست ضاع ما أردته."

رفع رأسه ببطء ونظر إلى الحائط أمامه، تذكر حنثه بوعده لسليمان، وعدم قدرته على إقناع أحد بنظريته في قضية القسم، ورأى أمامه جثة السيّدة،

عُمر الشقي

بدمائها التي تسببت في زيادة معدل تنفسه، تعاييره بعجزه عن القبض على قاتلها.

رأى اليأس يطارده، كظل في صحراء لا تغيب شمسها.

"فإذا يئست ضاع ما أردته"

"فإذا يئست ضاع ما أردته"

"فإذا يئست ضاع ما أردته" كَرَّرَ لنفسه.

"فإذا يئست ضاع كل شيء"

خطيبته، عمله، شرفه ونزاهته. ماذا تبقي له؟

هو لا يملك رفاهية اليأس.

"الآن أنا في أكثر اللحظات يأسًا"

"لقد اصطدمت بالقاع لتوي"

"يارب" ونظر إلى السقف برجاء.

عاد ببصره إلى المكتب، فوقعت عيناه مباشرة على مُفكرته، التي لا تفارقه،

أمامه بالضبط، ولم يلمحها من قبل بسبب غرقه في أفكاره. بدت وكأن

أحدهم وضعها هنا بالتحديد ليراها، أو أشار كيان غير مرئي لوعيه عليها

فراها، وكأنها تناديه. فمد يده وأمسكها، وقلَّب صفحاتها دون هُدَى، كيأس

يبحث عن سبيل للنجاة، وفقد الأمل في إيجادها، ولكنه لم يعترف بعد.

مرّت أمامه الصفحات، وكأنها تتهرَّب منه خجلاً، لعجزها عن مساعدته.

معتز شرباش

توقفت الصفحات فجأة، من تلقاء نفسها، وكأن للمفكرة عقل، وإرادة،
ليجد أمامه صفحة "الاقتحام". فدار بعينه، دون تركيز فيما كتب. حتى
توقفت عيناه عند آخر ملاحظة كتبها في الصفحة، والتي بدت وكأنها تتحدث
إليه، وليست مجرد كلمات تُقرأ.

وتذكر فجأة لماذا كتب تلك الجملة يومها.

عماد المنسي.. حشرة؟!!!! صدفة؟!!!!

* * *

جلس عُمر في الناحية المقابلة لمريم، في كافيهِ يطل مباشرة على شريان الحياة لمصر، النيل. هدوء ساحر، ونسمة لا تغادر جوار النيل في الصيف، يشتاق لها سُكان الأحياء البعيدة عنه، فيأتوه من كل صوب، حتى يلمس سحره أرواحهم، لينسوا كآبة رؤية الخرسانة في كل اتجاه، والغبار على كل حائط، والحزن على كل وجه، مؤقتًا.

ابتسم عُمر عندما نظر إلى وجه مريم، للمرة الثانية في تلك الليلة. كانت أول مرة، عندما خرجت من باب عمارتها، بعد أن وافقت على مقابلته، بعد أن أرسل إليها طلبه عبر رسالة على حسابها على facebook.

كانت تلك أول مرة يراها فيها، وقد وضعت بعض من الزينة على وجهها، لمسة خفيفة من سحر أدوات الزينة، كانت كافية، لتجعل من تلك الفاتنة، آية في الجمال.

- ما لك؟ بتبص لي كدا ليه؟ وضحكت.

- انتِ عارفة.

- لا ما اعرفش. قالت هي، وكذبتُها حمرة الخجل، فابتسم هو، ثم سأل حتى يعفيها من الخجل:

معتز شرباش

- حلوا المكان؟

نظرت حولها سريعاً، وقالت:

- جدًّا.. وعجبك؟

نظر إليها لثانية كانت كافية لجعله يبتسم، ثم قال:

- جدًّا. وضحك، فضحكت. ثم سألت:

- بتضحك ليه تاني؟

- انتِ عارفة.

- يوه بقى. فضحك، وضحكت.

تماسكا لثوانٍ، حتى طلب كل منهما مشروبه، ثم سألت مريم، والضحكة ما زالت تملأ روحها:

- بطل بقى.. قولي عملت إيه؟! واتسعت عيناها بإثارة واضحة.

تنهد عُمر، وقال، قد غابت عنه ابتسامته دون قصد منه:

- خلاص.. عملت الصبح.. وكله تمام. شُفتِ؟ مش قُلت لك ما تقلقيش؟

- بجد؟! طب والمعلومة اللي قُلت عليها.. طلعت اتسربت ازاي؟

- انتِ جاية مكان زي دا تتكلمي في الشغل؟

عُمر الشقي

تعكّرت ملامحها، وقالت بضيق وهي تسند بظهرها على الكرسي، وكأنها
تبتعد عنه، وتنظرُ صوب النيل:

- أنا غلطانة.. خلاص مش عاوزة اعرف.

تأمل في ملامحها الغاضبة لثانية، أدرك خلالها، أنه لا يريد لتلك الجميلة أن
تغضب مرة ثانية أبدًا. كان يعلم أنها تدّعي الغضب، وتضغط عليه ليخبرها،
لأن قصته مثيرة، وبرغم ذلك، ضايقه غضبها المصطنع، تعجّب من شعوره،
وكيف أنه سيخضع للابتزاز بكل قناعة، ورضى، بل واستمتع أيضًا.

ابتسم مُجددًا، فنظرت إليه وقالت:

- يا سلام؟ يعني مش هامّك؟

- لا هاممني.

- طب وساكت ليه؟

- مش ساكت.

- لا ساكت.

- باتكلم هنا. وأشار إلى رأسه.

- وبتقول إيه هناك؟ وأشارت إلى رأسه.

معتز شرباش

- عاوزة تعرفي باقي قصة الشغل؟ ولا تعرفي باقول إيه هناك؟ وأشار إلى رأسه مُجددًا.

فقال بثقة، ودون تفكير، أو تأخير:

- الاتنين.

- لا.

- آه.

- حاضر.

- شاطر. وضحكت بخجل.

قطع كلامهما وصول ما طلباه، وتبادلا أثناء وضع الشاب طلباتهما، نظرة، لم يرها، أو ينظرها، أيّ منهم من، أو على ملامح أحد، من قبل.

* * *

فرك عماد قطعة حشيش صغيرة، فوق طبق من البطاطس المهروسة، وقلّبه سريعًا، ثم وضعه على الأرض إلى جوار الكنبه، فهجمت كلبته الصغيرة صوفي على الطبق تلتهمه، بعد أن رفضته منه قبل ثوانٍ، بسبب خلّوه من الحشيش، وهي تعلم أنه يملك مخزونًا منه، بسبب حاسة الشم لديهما.

"تلك الكلبة تصلح للعمل في مكافحة المخدرات.. أو التهامها"

ثلاث دقائق على باب الشقة، جعلت صوفي تتوقف عن الأكل، وكأنها تعلم أنها تأكل "ممنوعات"، وعماد يجفل. ثم ثلاث دقائق أخرى، جعلت صوفي تكمل أكلها، وكأن تلك هي إشارة التوقف والحركة بالنسبة لها، وجعلت عماد يتحرك صوب الباب ليفتحه.

بمجرد أن فتح عماد الباب، اقتحم وائل صالة المنزل، وأمسك بذراع عماد، ولواه بعنف، مما دفع الأخير للتأوه بشدة، وبصوت عالٍ، وانتفضت صوفي فزعة، وجرت صوب آخر الصالة، ورفعت أذنيها، وذيلها، وأخذت تنظر إلى هذا الغريب، الذي انتزع "كلبشات ميري" من حزامه، وطوّق ذراعي الصحفي خلف ظهره، ثم أجلسه بعنف على كرسي خشبي، عكس اتجاه الجلوس الطبيعي، وجلس في مواجهته وقال:

معتز شرباش

- ماشاء الله.. ومخدرات كمان؟ وأشار وائل صوب الحشيش الذي كان عماد يستعد لتغيب عقله به، قبل أن يأتي الغريب، فسأل لُعاب صوفي، ولحست لعابها، وهي تنظر صوب طبقها الذي يقبع هناك إلى جوار قدم الغريب، بحسرة.

- في إيه؟ إيه دا؟ حاول فَكِّ ذراعيه، فألماه، فتوقف، وقال:

- وبعدين بقى في القرف دا؟ يا باشا أنا مش جاوبتك على كل اللي سألتته؟ عاوز مني إيه تاني؟

أخرج وائل مسدس مساعده النقيب شريف، الذي أعاره سلاحه، بعد إيقافه عن العمل وخضوعه للتحقيق، من جرابه، ووضع أمامه إلى جوار الحشيش، في إشارة واضحة، وشرع في لف سيجارة حشيش، بمهارة محترف، وقال ببطء مُستفز:

- لا يا حلو.. اللي جالك قبل كدا كان من طرف الوزير عشان مقالة تافهة عدّيت فيها حدودك.. أنا هنا بشكل غير رسمي أصلاً. شكلك ما سمعتش الأخبار.

تنفّس عماد بضيق، وقال:

- هو مش سعادتك اللي كنت هنا من كام يوم؟ وبعدين لزومها إيه الكلبش...

عُمر الشقي

توقف وائل عن العمل الذي كان يقوم به، ونظر صوب عماد وضيّق عينيه،
وسأل:

- من كام يوم؟ هنا؟ مش فاهم.. لا لا تاني كدا؟ حد كان هنا من الداخلية؟
- أيوة يا باشا.. بس جه الفجر متأخر عن كدا بشوية.. وبرضه دخل دخلة إبراهيم الأبيض بتاعة سعادتك دي، أنا مش فاهم في إيه!!
- تسارعت دقات قلب وائل بشدة، ها هي نظيرته تقرب من الإثبات. أحدهم زار الصحفي منذ أيام، ويعمل لدى الوزارة، بالضبط كما توقع وائل.
- من الأول كدا.. وواحدة واحدة تحكي لي كل حاجة.

* * *

تابع عُمر بنظره مركبًا صغيرًا، يسبح بسلاسة فوق صفحة النيل،
وسرح في هذا الصيَّاد، الذي يراه عُمر كَمَن يملك العالم كله بين يديه.
فالنيل كله ملك له، ويحتضنه الهدوء، من كل اتجاه، والظلام، سوى من
الأضواء التي تتكسّر على أطراف النيل، لتجعل رحلته، وكأنها رحلة داخل
حلم.

أنهت مريم مكالمتها، ووضعت هاتفها على المائدة، فانطلق رنين هاتف عُمر،
فالتقط هاتفه، وقال وهو يضحك:

- هي قفلت معاك وكلمتني ولا إيه؟ فضحكت.

- ألو.

- صحيح يا كبير اللي نادر بيقوله دا؟

- آه يا هيثم.

- يا كبير انت كدا بتلمّس مع الكبار.. هنعمل شغل الحكومة كمان؟ وليه يا
كبير؟ عشان بنت؟ قال هيثم بحدّة.

- انت ياد يوم ما هتفوق.. هتفوق عليّ أنا؟

عُمر الشقي

- احنا متفقين من الأول ما حدش يدخل في شغلنا.. ولا لينا دعوة بالحكومة.. شغلة القسم دي وافقنا عليها عشان فيها قرشين عنب.. بس كدا احند..

- باقول لك إيه يا هيثم.. أنا فاهم كل دا.. بس أنا برضه مش هاعمل حاجة غير لما نتفق عليها.. زي ما بنعمل على طول، بلاش أقورة.
- ماشي يا كبير.. عدّاك العيب. سلام.

ترك عُمر هاتفه أمامه، ونظر إلى مريم، التي قالت:

- ممكن اقول لك حاجة وما تزعلش مني؟

- أنا عارف هتقولي إيه.. ومش زعلان، انتِ عندك حق، ولاح الضيق على ملامحه، بسبب شعوره بالذنب منذ أن كان في غرفة وائل لوضع الأموال، وتلفيق تهمة له تعطلّه عن مطاردته.

- أنا عارفة إنك كنت داخل الموضوع دا بنية إنك ما تأذيش حد يا عُمر.. بس الأذية جُزء من الطريق دا.. مش هتعرف تمشيه من غير ما تكون شبه اللي بيمشوه. بابا الله يرحمه كان دايمًا بيقول لي.. ما تمشيش طريق وانتِ مش مستعدة توصلي لآخره.. لأن كل طريق هتمشيه هتوصل لآخره.. يمكن انت النهاردا مش متخيل نفسك ممكن توصل لآخر الطريق دا.. وتبقى واحد مجرم ما عندكش ضمير.. بس الطريق اللي بتمشيه رجلك بتعلّم فيه..

معتز شرباش

والطريق كمان بيعلم فيك.. مع الوقت الطريق هيغيرك.. وهتكون واحد تاني على ما توصل لآخره.

كان عُمر قد حكى لمريم ما حدث، ولكنه ترك الجزء الخاص بجدار الضابط، لم يحكه، كما قرر، ولكنه قال لها إنه لفق تهمة للضابط، حتى لا يترك له مجال تتبع نظرية، توصل لها الضابط بسبب ذكائه، وسوء حظ عُمر.

أكملت مريم:

- أنا عارفة إن أنا اتفقت معاك ما احكمش عليك مهما حصل.. بس والله مش قادرة، في الأول قصتك كانت قصة واحد شقي.. بيناكف مع الدنيا.. ويتحداها.. بس كدا بدأت تتحول لقصة واحد مؤذي ما عندوش ضمير. الضابط دا مالوش ذنب غير إنه شاطر في شُغله، بُص أنا فاهمة إنك مش هتسيبه.. وهتطلع منه.. بس انت ما تعرفش حجم الضرر اللي اتسببت فيه.. وصدقني أكيد كان فيه طريقة تانية.

تهنّد عُمر بضيق، ولم يُجب، فأكملت هي:

- عشان خاطري ما تزعلش.. أنا اللي مشجعتني اقول لك كدا.. إني شايفة ضميرك مش سايبك في حالك.. في منك أمل يعني.. مش hopeless case لسا، بس عموماً اقفل الموضوع دا بقى.. عشان مش عاوزه اضايقك..

عُمر الشقي

وبعدين الخنقة اللي انت فيها دي مش لايقة على المكان دا.. اعمل اللي
يريحك.. وانا زي ما وعدتك؛ مش هاحكم عليك.

ابتسم عُمر، برغم الضيق الذي مازال يتملّكه، وتعجّب من قُدرة مريم على
جعله يرغب في فعل ما ترغب هي أن يفعله، دون ضغط منها يستفز عناده،
فقرر دون تفكير أن يفعل ما يجب عليه فعله.

بادلته الابتسامة، وقالت:

- فُك بقى.

- أنا مش عارف أنا عملت إيه أستاهل عليه مكافأة من ربنا.. بس اللي
اعرفه؛ إن معرفتك هي المكافأة.

* * *

تناول وائل السيجارة المحشوة من عماد، الذي شرع "يلف" أخرى،
ولكن وائل استوقفه قائلاً:

- لا لا ما تلفش لنفسك.. أنا ما ليش تُقل عليه.. نفسين بس وهاديها لك.

- ظابط مباحث ومش بيحشش؟

- أي خدمة يا عم.. باورريك اللي عُمرك ما شُفته. قال وائل وسحب نفساً
طويلاً وهو يشعل السيجارة.

قال عماد وهو يلقي بظهره إلى الخلف، ليرتمي على الكنبه، ويرفع قدميه
على الطاولة أمامه:

- أنا اللي اعرفه إن ظباط المباحث موّلعينها يا باشا.

أعاد وائل السيجارة لعماد، وسأل:

- انت اتعرفت شخصياً على كام ظابط مباحث يا عماد؟

- ولا واحد.

فضحك الرائد، وقال:

- يعني نُص معلوماتك عننا جايها من السيماء.. والنُص الثاني من

الfacebook. وطبعاً مقتنع إن كل ظباط المباحث مقضيينها مخدرات

ونسوان.. وتلطيش وكهربا في خلق الله.. صحافة تكسف وتعرِ والله.

فضحك عماد، مع الرائد وقال:

عُمر الشقي

- تصدق والله عندك حق. وارتفع صوت ضحكاتهما، ثم خفت تدريجيًا.
كان وائل قد سمع من عماد حكايته عن زيارة عُمر، ثم صارحه عماد بأنه صاحب حساب حشرة، تحت تهديد السلاح، وهو في أوهن حالاته النفسية، وأضعفها، فتعاطف معه وائل، لأن حالته هو النفسية كانت لا تختلف كثيرًا عن حالة عماد النفسية، بعد كل ما تعرّض له، وحكى له هو الآخر عما حدث معه منذ بدء تحقيقه في قضية الاقتحام، ثم مقتل الزوجة.
انتهى بينهما الحوار، إلى تبادل الخيبات، بدلًا من تبادل التهديد، والاعترافات.

- وانت هتعمل إيه يا وائل بيه دالوقت؟ سأل عماد.

هز وائل رأسه بأسى وقال:

- انت رأيك إيه بعد ما حكيت لك كل حاجة؟

قفزت صوفي، وجلست وسط الرجلين، في وضع جنيني مطمئن، فداعب عماد فروتها، ثم سحب نفسًا طويلًا من السيجارة، ونفخه في سقف غرفته، وقال:

- بُص يا باشا.. مع احترامي لنظيرتك.. بس الواد اللي كان هنا مش قاتل.

نظر وائل إلى عماد بعينين نصف مغمضتين، وقال:

- ودا برضه من خبرتك في أفلام السيما؟

زفر عماد زفرة خفيفة، وتبسّم بعدها، ثم أجاب:

معتز شرباش

- لا يا وائل بيه.. القصة إن الواحد له نظرة برضه. تؤ تؤ.. الواد دا مش قاتل مأجور.. لا يمكن. أنا بصراحة حسيته كان بيضحك وبيداري وشه وهو بيكلمني.. تحسه كان بيستمع كدا.. بس مش بالأذية.. حسيته كان مستمتع بالإثارة.. وبسيطته على الموقف، دا غير إنه ما غلطش فيّ بكلمة.. ولا لمسني. وفوق كل دا بقى.. ولا جاب سيرة القضية بتاعة الست اللي أنا كتبت عنها.. هو كان مهتم بس بحكاية جهاز البحث.

- ما هو أكيد كل دا مرتبط ببعضه يا عماد.. مش ممكن كل دا يكون صدفة.

- لا مش لازم يكون مرتبط.. اسمع مني، خدوا الحكمة من أفواه المساطيل زي ما بيقولوا.

ضحك وائل وسأل:

- هما مين؟

ارتفع صوت ضحكهما، ثم نظر عماد إلى وائل وسأل:

- بس انت يا باشا إيه اللي جابك هنا؟ وعرفت منين إن أنا ليّ علاقة بحساب حشرة دا؟

- عشان يا غشيم يوم ما نزل موضوعك على حساب حشرة.. نزل في نفس اليوم تقريرك عن قضية انتحار الست في جرنالك باسمك. ثم رفع يده اليسرى وعدّ على أصابعه بوعي شبه غائب:

- رقم واحد انت الصحفي اللي غطى قصة القسم..

عُمر الشقي

اتنين انت الصحفي الي غطى قصة الست.. وفي نفس اليوم جه واحد أخذ معلومات من المجند عندي عن قضية القسم.. دا كله ما ينفعش يكون صدفة، زي ما باقول لك؛ في شغلنا ما فيش صدفة.

- بس انت دخلت دخلة واحد عارف ومتأكد مش واحد ربط موقفين ببعض. ظابط مباحث برضه وقاري.

- لا طبعًا أنا اتأكدت قبل ما آجي.

- ازاي؟ سأل عماد مُتعجبًا.

- نزلت صورتك من موقع الجُرنال.. وروحت القسم وسألت عسكري الخدمة عندي.. اتعرف عليك وقال إن انت جيت دردشت معاه واديت له سجائر، حتى بالأمانة كان اسمك أحمد يومها. وضحك.

فضحك عماد، وقال:

- يابن الذين يا وائل بيه.

تعكرت ملامح وائل فجأة، كمن تذكر موعدًا مهمًا مُتأخرًا:

- بس وبعدين؟ أنا عاوز اجيب الواد دا، الواد دا هو دليل براءتي، ما تفتكر كدا أي حاجة توصلناله.. فكّر.. اعمل حاجة عليها القيمة.

صمت عماد لدقيقة كاملة، بدا خلالها وكأنه غاب عن الوعي، ثم قال بحماس مفاجئ:

- هو قال إنه حاطط عينه عليّ.. وعلى كل حاجة باكتبها أو باعملها.. ولو فكّرت اعمل حاجة كدا ولا كدا هييجيني.. بس ساعتها أنا كنت فاكره أمن

معتز شرباش

دولة زي ما قُلت لك.. بس افكرت دالوقت.. تفتكر ممكن اكتب حاجة

تستفزه تخليه بيعي هنا تاني؟

اتسعت عينا وائل، وملاها الحماس، وسأل مُستفسراً:

- حاجة زي إيه؟

- يعني.. تسريبة.. حاجة ليها دعوة بحكايته زي ما حصل أول مرة، بس

بشرط.. تعسكر معايا هنا.. عشان له جه وانا لوحدي.. هيزعني جامد.

سرح وائل لدقيقتين، قلبّ خلالها فكرة عماد في رأسه، ثم قال:

- فكرة كويسة.. بس هنسرب إيه؟

خيّم الصمت عليهما لثوانٍ، ثم قال عماد فجأة، بصوتٍ عالٍ، فانتفضت

صوفي، من غفوتها التي اعتادت أن تغفوها بعد كل وجبة "محشوة":

- لقيتها يا باشا.. أقسم بالله أنا برنس، إيه رأيك؟

- ما تقول يا ابني الأول لقيت إيه عشان اقول رأيي.

- هو انا ما قُلتكش؟

- يخرب بيت دماغك.. لأ.

- أحيه.. دا انا نسيت كنت هاقول لك إيه. صدقني كانت فكرة عنب.

اعتدل وائل، والتقط سلاح شريف من على الطاولة، وصوّبه إلى رأس عماد

وقال بغضب:

- وغلاوة دماغك لاضربك بالنار لو ما افكرت، دا مستقبلي يا مسطول..

فوق.

عُمر الشقي

- أيوة أيوة افتكرت.. تصدق برضه السلاح بينفع.. هيبه كدا.

- يخرب بيتك قول قبل ما تنسى.

- اقول إيه؟

سحب وائل إبرة المسدس، فمال عماد بعيدًا عن السلاح، وقال:

- آه آه.. خلاص خلاص افتكرت.. أنا اسرّب على حساب حشرة قصة إيقافك

عن العمل والتحقيق.. واقول إن الداخلية لقيت دليل في شقتك يدل على

شخصية اللي زرع الفلوس ولفق لك القضية.. واقول إني عارف الدليل..

بس مش هانشره حفاظًا على سير التحقيق.. كدا هو هيرجع هنا تاني عشان

يعرف الدليل ويغطي نفسه.

ضيّق الضابط عينيه لثوانٍ، فكّر خلالها، ثم قال:

- يا ابن اللعيبة.

* * *

فتح وائل باب منزله، وبحث بعينه عن والدته، التي يعلم أنها غيّرت موعد نومها المعتاد اليوم، وتنتظره بسبب قلقها عليه، والسبب أن شحن هاتفه فرغ منذ ساعات.

سمع صوتها تتحدث مع أحدهم قادمًا من المطبخ، فتعجّب، من عساه زارها في هذا الوقت؟ أغلق باب الشقة خلفه، فانقطع صوت الحديث الدائر في المطبخ، عندما وصل إلى متحدثيه صوت وصوله.

ظهرت رأس والدته من باب المطبخ، ونظرت له مبتسمة بإشفاق، ثم عادت رأسها واختفت داخله، ثم ظهر بعدها آخر شخص كان يتوقعه وائل مُندفعًا صوبه دون إبطاء.

اندفعت مَي صوب حبيبها، وصوت بكائها يرتفع تدريجيًا. وقبل أن يفهم الضابط، ما يحدث، أو يستفهم عنه، كانت مَي قد ارتمت في حضنه، وضمتته إليها بقوة.

لَم يتوقع الاصطدام، وكادت قدماه أن تخونه، ويسقط، ولكنه تمالك نفسه، واحتضنها.

عُمر الشقي

بَكَتْ هي، وسالت دموعه دون قصد منه، انهارت مَي، وهي تحاول أن تتكلم،
ولكن بكاءها حرمها من تكوين جملة مفهومة، فمسح وائل على شعرها،
وقال بصوت مختنق:

- ششششش.. ما تقوليش حاجة يا حبيبتي. وضمَّها بقوة، فانهارت أكثر، فبكي
أكثر.

لمح من خلف غشاوة دموعه، والدته على باب المطبخ، تبكي وتبتسم.
فابتسم، وبكى.

استمر بكاءهم لدقائق، انهارت خلالها كل قدرة لدى كل منهم على التماسك.
ثم تبعها راحة غريبة ملأت أرواحهم، وكأن البكاء أخرج كل طاقة سلبية لدى
كل منهم.

قالت مَي، بعدما هدأ بكاؤها قليلاً، برغم عدم انتهائه:

- والله يا حبيبي ما كنت اعرف.. أنا آسفة سامحني.. والله ما كنت اعرف
اللي حصل لك. أنا ما اعرفش ازاي عم...

- شششششش.. أنا اللي آسف يا مَي.. سامحيني.. أنا قصرت في حقك.

- لا يا وائل...

- بطَّلي عياط بقى يا بت.. شكلي بقى وحش.. في ظابط مباحث بيعيط؟

معتز شرباش

نظرت له، واحتضنت وجهه بين راحتها وقالت:

- انت مش ظابط مباحث.. انت حبيبي.

- عمك قال لها لازم تفسخ خطوبتها معاك لحد ما تخلص القضية دي
عشان سُمعته.. قامت سابت له البيت وجأت على هنا.. يرضيك كدا يا ابني؟
قالت أمه.

فضحك وقال وصوته ما زال تخنقه الدموع:

- آه يا حاجة يرضيني. ثم نظر إلى عيني حبيبته، وقال:

- باحبك يا بنت المجنونة.

ضحكت وضمته مُجددًا، فأكمل:

- برغم إن ابوك يا مَيّ فيه كل العبر.. بس عرف يرِّي.

* * *

٧٣

...وبالطبع لن أنفي أن هذا الحساب، هو ملك ضابط شرطة، لأن هذه المعلومة بها قدر كبير من السخافة، يجعلها عصية حتى على النفي.
أما الخبر الذي أنا بصدد الإعلان عنه، هو أن البحقاتننش...

انتفض عماد عندما فتح أحدهم باب شقته من الخارج، وأغلقه خلفه، ودلف إلى الصالة مصوبًا مُسدسه إلى الصحفي، مما تسبب في كتابته لحروف لم يقصدها.

نظر عماد، وصوفي كلاهما صوب القادم، الذي أخفى وجهه، خلف قناعه، كما فعل من قبل. ثم قال عماد:

- هو انت معاك Password الكالون؟ ولا أنا اللي محتاج اشيل الباب دا طالما مالوش لازمة؟ ولا إيه؟ وبعدي... قطع كلامه ونظر صوب جهازه المحمول، ثم نظر إلى عُمر، الذي ما زال صامتًا، وقال:

- وبعدين انت عرفت مين؟ أنا لَسَّا ما نزلتِش الموضوع أصلاً.

- موضوع إيه؟!

أدرك عماد أنه قال أكثر مما يجب.

معتز شرباش

"أنا لازم اخف حشيش وانا باشتغل بعد كدا!!!" قال عماد لنفسه.

- موضوع إيه؟! كَرَّرَ عُمَرُ.

صمت عماد لثوانٍ، ثم قال عندما أدرك أن لا مفر من الكلام:

- عشان خاطري شيل المسدس دا عشان اعرف افهمك. وانا صدقني مش هاعمل أي حاجة تستدعي تدخله.

نقل عُمَرُ نظره بين عماد، وطاولته، وصوفي، فقال عماد:

- ولا صوفي هتعمل حاجة.

فابتسم عُمَرُ، رَغْمًا عنه، وقال وهو يُعيد مُسدسه إلى جرابه:

- طب بلاش لماضة وفهمني موضوع إيه.

ثم انتزع صاعقًا كهربائيًا، في حجم راحة اليد، وضغط على زر تشغيله، ليطلق شزرًا أزرقًا، ومعه صوت مُرعب، جعل صوفي تقفز من مكانها، وتتحفز، وتنظرُ صوب الصاعق بغضب.

فقال عماد الذي لم يكن أفضل حالًا من صوفي:

- بصراحة يا باشا احنا كنا عاوزينك تيجي.

- عاوزيني؟! هو في حد معاك هنا؟! قالها عُمَرُ، وألصق ظهره إلى باب الشقة، وتحفّز.

عُمر الشقي

أدرك عماد مدى جثامة خطئه، وتمنّى لو يستطيع أن يستعيد جملته الأخيرة.

- انطق.. في حد معاك هنا؟!

- لا صدقني حضرتك ما فيش.. أنا لوحدي.

- أُمال مين اللي عاوزينك تيجي دول؟!

رفع عماد يديه ليطمئن عُمر، وقال بحذر:

- ممكن تهذا بس؟! وانا هاحكي لك كل حاجة.. وزي ما تيجي بقى.

* * *

قالت مَيّ بضيق، وهي تفتح باب سيارة وائل:

- والله ما كنت ناوية ارجع النهاردا.. هارجع عشان خاطرک بس.

- الفجر قَرَب يطلع.. ما يصحّش كدا أصلاً. يلا اطلعي.. أنا هاستنى تظمني

إنك في أوضتك.. وبعدين هامشي. لو سيادة اللواء قال لك اقلعي الدبلة..

ارميه من المنور.. بلاش من البلكونة عشان مايبوظش سقف العربية.

ضربته في كتفه، وضحكت، ثم غادرت السيارة، بعد أن نظرت إليه نظرة

طويلة، قالت الكثير، وبادلها هو بمثلها.

أبقى نظره مُعلّقاً عليهما، حتى غابت عن نظره، ثم أراح رأسه إلى الخلف،

وأخذ في استعادة أحداث هذا اليوم.

لقد ارتطم بالقاع بالفعل، ولكن يبدو وأن المقولة التي قرأها، لا يتذكّر أين،

كانت صحيحة.

فعندما تكون في القاع، لا يوجد سوى اتجاه واحد أمامك، إلى الأعلى، ولكن

حذار أن تيأس، فتبقى.

رَنّ هاتفه، فابتسم والتقطه، ولكن ابتسامته غابت، عندما وجد أن الرسائل

هو عماد، مطالبًا إيّاه بالحضور إلى منزله فورًا، فنظر إلى الأعلى، وكأنه

يستحث مَيّ، على إطلاق سراحه، فجاءه الفرج، واستقبل رسالتها؛

"سيادة اللواء مخلصني.. مصلحة. ما قابلتوش. رُوّح نام يا حبيبي"

عُمر الشقي

فوضع الهاتف إلى جواره، وتحرك في اتجاه منزل الصحفي.

فتح عماد باب شقته، فدفق وائل، ومعه صوت أذان الفجر، يملأ سماء

القاهرة الناعسة، هي وأهلها، ويذكّرهم بأن الصلاة خير من النوم.

توجس وائل عندما لاحظ توتر عماد، الذي قال:

- عندي ليك خبر حلو.. وخبر وحش.

- خير؟!

- تسمع أنني فيهم؟

- الحلو.

- أنا وصلت للراجل إيّاه.

اتسعت عينا وائل، ووضع يده بحماس وإثارة على كتف عماد، وسأل:

- بتتكلم بجد؟! لحقت؟!!

أوماً عماد برأسه، ولكن التوتر أعاد وائل إلى توجسه، فقال:

- والخبر الوحش؟

لم يُجب عماد، ولكن أجابت فوهة مسدس باردة، التصقت بمؤخرة رأس

وائل، وسمع صوت سحب إبرته، وبعده صوت حامل السلاح يقول:

- إنه موجود هنا.

انتهى عماد من تقييد ذراعي وائل، في بعضهما، خلف ظهر الأخير، وأجلسه على الكرسي، عكس اتجاهه، كما فعل معه هو قبل قليل، ثم قيّد قدميه، إلى رجلي الكرسي الخلفيتين، فأصبح مشلول الحركة تمامًا، ثم قام بتفتيشه جيّدًا، وتأكد من عدم حمله لأي شيء، بعد سحب هاتفه، ومحفظته، ومفاتيحه منه، كل هذا تم في دقائق، تحت إشراف، وبتوجيه من، عُمر.

نظر وائل بغضب صوب المُقنّع، ثم إلى عماد، بنظرة لوم واضحة، فرفع الأخير كتفيه، ورمقه بنظرة "كنت هاعمل إيه يعني؟!!". ثم جلس في آخر الصالة، وكأنه يتجنب معركة على وشك الحدوث.

بدأ عُمر الكلام، وقال بهدوء واثق:

- سمعت إنك عاوز تقابلني.

- لو راجل شيل الوش دا خليني اشوفك.

تنهّد عُمر بضيق مُصطنع، وأعاد مُسدسه إلى جرابه، وهو يقول:

- تمام.. أسيبك أنا بقى تكملّ طولة لسان براحتك.

ثم توجه صوب باب الشقة، فقال وائل بحدّة وغضب:

- استنى هنا.. رايح فين؟!

- انت هتصاحبني؟

عُمر الشقي

- يعني انت جايبي هنا عشان تربطني وتمشي؟!
نظر عُمر إلى الضابط لثوانٍ، ثم اعتدل وأسند ظهره إلى باب الشقة، وعقد
ساعديه أمام صدره، وقال:

- لا أنا جايبك عشان نتكلم.. بس مش هاتكلم بالشكل دا، طولة اللسان
وفتحة الصدر دول تعملهم هناك في القسم.. انت هنا تتكلم كويس.. لو
عاوز تتكلم.

لَمْ يُجِب وائل، وعلا صوت أنفاسه، وبدأ عليه أنه يحاول التحكم في غضبه،
فقال عُمر:

- على فكرة أنا فهمت من عماد القصة كلها قبل ما تشرّفنا.. أنا ما قتلتش
حد.. ولا قاتل مأجور.. بس أنا جايبك هنا عشان الموضوع دا، من الآخر
كدا.. مُستعد تساعدني أساعدك تقبض عليه؟ ولا امشي؟

- أمال انت مين؟! وعاوز تساعدني ليه؟! زي ما انت فهمت القصة.. أنا كمان
لازم افهم.

صمت عُمر لثوانٍ ليرتب حكايته، انطلق خلالها صوت إقامة صلاة الفجر،
فانتظر الأخير حتى أقام المؤذن الصلاة، ثم قال وهو يجلس في أبعد نقطة
عن وائل:

- أنا عندي شرط واحد بس لو هاساعدك.. لازم توافق عليه قبل ما نتكلم.
وانتظر رد فعل من الضابط، لم يأت، فأكمل:

معتز شرباش

- طيب عشان التفاوض يبقى ماشي صح.. هاعرض اللي جاي أقدمه.. وفي المقابل انت هتلتزم بالشرط اللي عندي.

لا جواب من الضابط، الذي كان يتفحص عُمر بكل تركيز، وتحفُّز:

- أنا هاساعدك تطلع براءة من التهم اللي بيتحقق معاك فيها.. وهاساعدك نكشف حقيقة وجودة قاتل مأجور بجد.. ولا دي كلها صُدَف.. ولو فيه قاتل فعلاً هاساعدك تقبض عليه.. وفي المقابل تلتزم بإنك مالكش دعوة بيّ.

- نسيت معلومة مهمة جدًّا.. انت مين؟! وعاوز تساعدني ليه؟!

أوما عُمر برأسه، وقال:

- حَقِّك.. ودا هياخدنا للشرط بتاعي، أنا اللي عمل عملية القسم.. وانا اللي لَفَّق لك الفلوس.. وانا اللي هاطلَّعك منها.

تسارعت أنفاس وائل، وتوتر جسده، بشكل ملحوظ، فقال عُمر:

- اهدا يا حضرة الضابط.. واسمعي للآخر. بالنسبة لسؤالك الثاني..

هاساعدك ليه، الموضوع غريب شوية.. بس هو في حاجة بتحصل بقالها

أيام.. بتحاول تجمعني أنا وانت وعماد وحد رابع.. هو السبب في إني

أساعدك، تقدر تقول كدا قدر.. نصيب.. علامة، بس باختصار أنا في حد

اعرفه اتعرض حد من عيلته لحادثة مريبة.. فيها كل أوجه التشابه اللي

موجودة في القضيتين اللي انت معلِّقهم على حيلة أوضتك.

انعقد حاجبا وائل، وسأل مستغربًا:

- وانت عرف... آه انت كنت في أوضتي.

عُمر الشقي

- بالظبط.. تخيّل لما اشوف في أوضتك كلام يفكرني بقضية لسّا سامعها قبلها بيومين. دي مش صدفة.. دا قدر.. دي علامة.

"تحقيق الشيء مرهون ببذلك كُل جهد في سبيله.

فإذا أردت شيئًا بشدة، وتعلم أنك بذلت كل جهد تستطيعه في سبيل تحقيقه، فهو قد تحقق لك بالفعل، وستساعدك كل الدنيا، وتُسخر لتحقيقه لك. ولكن موعد مثوله بين يديك، سيكون في أكثر اللحظات يأسًا. فإذا يَأست ضاع ما أردته." تذكّر وائل ولم يُجب، ولكن ملامحه أعلنت اقتناعه.

- شرطي الوحيد.. هو إنك تطلّعي من موضوع القسم دا.. وانا هاسلمك اللي فعلاً أمر بتنفيذه.

- يعني إيه أمر بتنفيذه؟! مش بتقول انت اللي عملته.

- أنا اللي نقّدت.. بس ثروت الناظر اللي طلبه.. دي شغلانة كنت باعملها له. هسلمك الدليل اللي يثبت تورطه.. وكمان هاسلمك سبب العملية.. والشخص المستفيد، بس أنا هاختفي.

- ليه؟!!!

- خلف اتفاقه معايا.. دا كان كدا كدا هيحصل، الخطة كانت أزرع الفلوس في بيتك.. وبعدين ابعت لك دليل تورطه.. ودليل إن هو اللي ورطك.. واختفي. ولا كنت هتعرف عني حاجة، بس اللي شُفته في أوضتك خلاني موجود هنا النهاردا. أنا فعلاً جيت أساعدك من غير مكسب واحد ليّ.

معتز شرباش

ها؟! قلت إيه؟! أساعدك واختفي؟!

- مش هيحصل.

- ما تبقاش غبي وتضيع حاجة قد كدا، وفتح ذراعيه على امتدادهما، ثم أكمل:

- عشان حاجة قد كدا. ثم أشار إلى عُقلة إصبعة، وأضاف:

- ودي كمان مش هتقدر تثبتها، أنا في الحقيقة ماليش وجود.

تكلّم وائل أخيراً، وقال:

- انت بتحاول تبيع لي حاجة مش معاك من الأساس.. برغم ثقتي بنسبة

١٠٠٪ في إنه موجود.. بس برضه وارد يكون ما فيش قاتل.. ونظريتي تكون

غلط.. انت بتقايض حاجة حقيقية.. بنظرية لسّا قيد الإثبات.

واضح إنك حسيت إني قريب منك.. فاستغلّيت قصة هوسى بالقضايا اللي

شُفتها في أوضتي.. عشان تقنعني إني ابطّل ادورّ عليك.. وبعدين لما مش

هنوصل لحاجة أصلاً.. تبقى انت أخذت مني وعد بدون مقابل.

براقو.. فكرة عبقرية.. بس لا.

ابتسم عُمر، بسبب صحّة منطق وائل، وبراعته، وقال:

- عندك حق، خلاص.. احنا نتفق.. لو طلع فيه قاتل.. وفعلاً ساعدتك

تقبض عليه.. تحترم شرطي.

أظنّ دا دليل كفاية إني مش باستغلّ هوسك ولا حاجة.. وإني فعلاً جاي

أساعدك بس. ولا إيه؟!

عُمر الشقي

أنا باراهن بحُرِّيَّتي على صحَّة نظرية سعادتك.

دا غير إني زي ما قُلت لك.. انت لا يمكن كنت حتى هتشك في وجودي.. لولا

إني شُفت الحيفة عندك.

فكّر وائل لثوانٍ، ثم سأل بتشكك:

- ليه بتراهن طيب؟! إيه اللي مخليك واثق كدا إني صح؟!!!

- زي ما قُلت لك.. أنا باحترم العلامات جدًّا. واللي حصل معاك دا علامة.

تبادلا النظرات لثوانٍ، حتى قطع وائل الصمت، وأوماً برأسه في اتجاه عُمر

قائلًا:

- اكشف وشك.

صمت ثقيل، ثم قال عُمر:

- ادِّي لي كلمتك.

- ماشي.

- وعد؟

- وعد.

* * *

استيقظ المهندس عادل، على صوت جرس الباب، داخل غرفة نومه المؤقتة، التي تقع في الشقة التي يتخذها مقرًا لعمله الخاص، والتي خصصها لنفسه، حتى ينتهي التحقيق، ويتمكن من العودة مُجددًا لشقته. ترنح في مشيته، متعجبًا من إصرار الزائر على إيقاظه، فاليوم إجازة، وأراد أن ينام حتى يشبع، ولكن كان للطارق، رأي آخر.

فتح الباب، ووعيه نصف نائم، ليطالعه وجه الرائد وائل المرهق، لا يعلم المهندس أن وائل لم يحظ بأي قدر من النوم الليلة السابقة، ولكنه لاحظ إرهاقه، والهالات السوداء التي تكوّنت تحت عينيه، وذقنه التي نبتت كالشوك.

كان عُمر قد أخبر وائل بنظرية نادر، وطلب منه تدير لقاء بينهما، ولكن وائل أكد على استحالة حدوثه، فاتفقا على أن يقوم وائل باستجوابه، حيث أن السبيل الوحيد للوصول إلى القاتل، إن وجد، هو عبر الضغط على الزوج، وطرح الأسئلة عليه في شكل حقائق، ومتابعة رد فعله، حتى تصيب أحد نظرياتهم، ثقته في نفسه، في مقتلها، فينهار.

- أنا حبيبت أكون أول واحد يبيلغك الخبر السعيد، قال وائل وهو يدلّف بوقاحة إلى الشقة، ثم استدار، وواجه عادل، وقال باستهزاء:
- لا اقفل الباب.. أنا جيت لوحدي.

عُمر الشقي

- اتفضل يا وائل بيه. قال عادل ساخرًا من دخول وائل قبل السماح له بذلك.

سار وائل خطوات قليلة، ودار ببصره في المكان، مكتب صغير في مواجهة الباب، يبدو وأنه يخص مسؤول الاستقبال، تعلوه لوحة كبيرة عليها اسم الشركة، ومكتوب أسفلها جُمل ترويجية، مثل "يمكنك التحكم في حركة ستائرِكَ عن طريق الهاتف"، "لا يجب عليك القلق من ضياع الريموت، يمكننا تثبيت زر التحكم في أي مكان؛ في مسند كرسي المكتب، أو في المكتب نفسه، أو أي مكان تختاره" "يمكنك ضبط الستائر لتفتح وتغلق أوتوماتيكيًا في مواعيد محددة مسبقًا". وإلى اليسار كنبه سوداء مغطاة بجلد لامع، أمامها طاولة زجاجية سوداء عصرية الطراز، وثلاثة أبواب مُغلقة، وباب واحد مفتوح، يظهر خلفه، مرتبة على الأرض، يبدو وأن المهندس قام لتوّه من عليها.

جلس الرائد، وأراح ظهره، ووضع قدمًا على الأخرى، ثم أشار إلى عادل أن يجلس، وقال:

- اتفضل يا باشمهندس.

تنهَّد عادل بضيق، وقال وهو يجلس مُصطنعًا ابتسامة سخيفة:

- يا ترى إيه سبب الزيارة الجميلة دي؟

- ما فيش تشرب إيه الأول؟ بدمتك انت جيت لي المكتب مرة.. وعملت معاك

كدا؟

معتز شرباش

- ما هو بصراحة دا مش وقت زيارة.. الولد أجازة النهاردا.
- أحسن برضه. بُص يا باشمهندس.. أنا جاي اقول لك إني أخيراً عرفت انت عملتها ازاي.
- توتر المهندس، وغضب، ثم تمالك نفسه وقال:
- عملت إيه؟!!
- تجاهل وائل سؤاله متعمداً، وأكمل:
- طبعاً عاوز تعرف عرفت ازاي.. هاقول لك.
- الحقايق يا باشمهندس.. الحقايق لما بتثبتت.. الصورة بتوضح، في حالتنا دي الحقايق كانت... رفع يده وبدأ العد على أصابعه:
- واحد.. المدام اتقتلت.
- اتنين.. المدام كانت لوحدها في الشقة.. أي نظرية بتقول غير كدا.. مكتوب لها الفشل، ودا اللي سيادتك مع اللي ساعدك.. لعبتوا عليه.. إنكم تودونا في سكة غير السكة الصح.. عبقري الراجل دا بالمناسبة.
- بلغ توتر المهندس مداه، تملل في جلسته، وكأن كهرباء ص مسّته، وحاول احتمالها، عرقه ظهر كنقاط لامعة على جبهته، برغم برودة الشقة التي تكفل بها جهاز تكييف خافت الصوت.
- أدرك وائل أنه أصاب عصباً خطيراً، عندما لمح علامات التوتر على الرجل.
- "إذا.. هناك طرف ثالث بالفعل"
- أكمل كأنه لم يلحظ شيئاً:

عُمر الشقي

- رقم اثنين تنقلنا لرقم ثلاثة دُغري.. ثلاثة.. انت كنت عارف إنها هتقتل..
ومش لوحدك.

أربعه..

قاطعته المهندس، وانتفض واقفًا فجأة كالمطاط، وقال:

- انت جاي تهزّر؟! عندك دليل على أي حاج..

صرخ وائل فجأة، بصوت هزّ روح الزوج نفسها، وجعلها ترتعد:

- لما تتكلم مع ظابط مباحث تتكلم بأدب.. ولو ناقص أدب اعلمك.

ثم هدأ صوته، وعادت ابتسامته الهازئة تملأ وجهه، وأكمل، وكأنه لا يرى

رعدة الخوف والتوتر التي ما زالت تسري في جسد الزوج أمامه:

- أربعة.. بصمة صباع المدام مش على الزناد.. دي برضه حقيقة.

المزيد من التوتر.

- خمسة.. طب ازاي لوحدها؟! وازاي اتقتلت؟! أقول لك أنا:

الفكرة بسيطة.. وأدوات تنفيذها كلها عندك في "الورشة". ورفع يديه

بعلامات التنصيص.

- المسدس اثبتت.. واتوجه. ها؟! قرّبت؟ وابتسم أكثر ابتسامة واثقة تمكّن

من استدعائها، وكسا توتره بطبقة من الجليد، حتى لا يظهر على ملامحه.

فهو في الحقيقة يُجرب، يصطاد، لا يعلم أي طعم سيتسبب في استدراج

الفريسة.

المزيد من التوتر، والعرق.

معتز شرباش

"اقتربت"

ولكن لا إجابة.

"الآن"

يتبادلا النظرات، كل منهما يقيّم قوّة الخصم. كل ثانية تمرّ في هذا الصمت، يستعيد خلالها الرجل هدوءه، ويظهر ضعف الرائد.

شبح ابتسامة يلوح في أفق ملامح الزوج.

"كشف الخدعة"

مزيد من الهدوء يظهر على ملامح الزوج، وكأنّ توتّره، يتسرّب عبر هواء الغرفة، غير مرئي، ليسكن ملامح الضابط.

"سأخسر كل شيء.. لا بد من الهجوم"

"تحقيق الشيء مرهون ببذلك كلّ جهد في سبيله.

فإذا أردت شيئًا بشدة، وتعلم أنك بذلت كل جهد تستطيعه في سبيل تحقيقه، فهو قد تحقق لك بالفعل، وستساعدك كل الدنيا، وتُسخّر لتحقيقه لك. ولكن موعد مثوله بين يديك، سيكون في أكثر اللحظات يأسًا.

فإذا يئست ضاع ما أردته."

رفع الرائد رأسه إلى السقف، وكأنه نبي يستجدي الوحي.

لاحظ الزوج توتّر الرائد، فأراح ظهره، ووضع قدمًا فوق الأخرى، ثم مدّ يده، والتقط ريموت كنترول، من على مكتب الاستقبال، وقال ساخرًا وهو يوجّهه

صوب الحائط:

عُمر الشقي

- طب افرّجك على شُغلي.. اللي كنت هاعملها في مكتبك وسعادتك رفضت.. على ما تفتكر رقم ستة بقى.

ضغط على زر الريموت، فانزاحت الستارة التي كانت تغطي الحائط المواجه لباب الشقة بآلية، كاشفةً عن شباك عريض، وسامحةً لضوء الشمس الباهر بملء الغرفة، بالدفع والنور المُحبب، عندما يجتمع مع برودة التكييف.

"ريموت"

"يعني كان فين الفخ؟ يعني هي مثلاً شدت حبل برجلها؟ كانت الشرطة هتلاقي آثار تثبيته في الحيط. وهيثير اشتباههم." هكذا قال هشام. ففكر الرائد.

- بالريموت.

رمى وائل بالطعم، دون تفكير. كان يائساً، ولا يملك رفاهية استعادة الزوج لهدوئه، وتحكّمه بأعصابه.

- نعم؟! استفسر الزوج غير فاهم.

- بالريموت يا باشمهندس.. ماكنة زي اللي في الستارة.. تدوس زرار.. يتحرك ترس يدوس ع الزناد. ها.. كدا قرّبت صح؟! وابتسم.

بداية انهيار تظهر جليّة على ملامح الزوج، الذي تسمّر، حتى بدا للضابط وكأنه لا يتنفس. فأكمل مُستغلاً اللحظة:

- ستة.. الشقة لسا متشمّعة. وملأت الابتسامة وجه الضابط، وأكمل بثقة عندما انهارت كل ثقة كانت بدأت تتجمع على ملامح الرجل:

معتز شرباش

- عارف دا معناه إيه؟! معناه إن الدليل لسَّا هناك.. ودالوقت بعد ما عرفت أنا بادوّر على إيه.. والفضل في دا طبعًا لسعادتك دالوقت.. ما بقاش فاضل غير مشوار للشقة.

تسارعت أنفاس الزوج، وملاً صوت تنفسه صمت الغرفة، وبدأ مع صوت التكييف الهامس، وكأن طرفين يخوضان حوارًا، أحد أطرافه في أوج غضبه، والآخر في قمة هدوئه.

تمامًا كما هو الحال في الحوار الذي توقف بين الضابط، والزوج.

بعد دقيقة كاملة من الصمت، تحدث الزوج أخيرًا، وقال بتوتر بالغ، وبدأ وكأنه يحاول الانتهاء من هذا اللقاء بأي شكل:

- يعني سعادتك جاي هنا بس عشان تبألغني إنك رايح الشقة عندي تدوّر على ريموت عليه بصمات مراتي؟ ولا محتاج مفتاح الشقة؟ أنا مش فاهم انت عاوز مني إيه؟

شوف سيادتك محتاج إيه عشان أنا عندي مشاوير عاوز اعملها.

"ريموت"

دارت الأفكار كالإعصار، في رأس الضابط.

"نعم.. أصابت كلمة ريموت عصب الفزع والتوتر عند الزوج، ولكن ما زالت

الأحجية مفتقدةً لآخر قطعة، حتى تكتمل.

أين هو الريموت؟

في الشقة بالتأكيد.

عُمر الشقي

وكيف دفع الزوج زوجته للضغط عليه؟

يمكن أن يكون قد أوصله بأي شيء أو ريموت آخرًا. هذا عمله، أي مهندس ميكانيكي مجتهد قادر على فعلها.

إذن يبقى السؤال الأهم. السؤال الذي طرحه هشام من قبل "

"إزاي ثبتت الست لثانية كاملة.. عشان يضربها بالنار بالظبط في المكان اللي

يتفهم على إنه انتحار؟ عملها ازاي دي؟"

* * *

تصفح نادر حساب facebook الخاص به، كما اعتاد أن يفعل، كلما علق عقله عند خطوة من خطوات خطة يرسمها، أو فصل يكتبه في إحدى رواياته التي لن ترى النور، أو لُغزٍ يحاول حلّه، بحثًا عن أي "فيديو كوميدي"، يشتت عقله بعيدًا عمّا يفكر فيه.

"إزاي ثبتت الست لثانية كاملة.. عشان يضرها بالنار بالظبط في المكان اللي يتفهم على إنه انتحار؟ عملها ازاي دي؟"

بقي هذا السؤال يتردد في خلفية عقله، كالصدى، واستمر هو في تجاهله. وأقنع نفسه أن يهتم بما يطالع أمامه على شاشة الكمبيوتر.

أحد الفيديوهات الكوميدية، التي يقوم بتصويرها هواة، ولكنها تؤدي الغرض، عن شاب يقوم بإيذاء أشخاص بشكل مُستفز، دون أدنى سبب، سوى أن يحصل على عدد كافٍ من المشاهدات، تؤمّن له دخلًا يكفيه، فلا يعمل، ولا يفيد الدنيا في شيء، بل يؤذيها عبر إقناع عدد أكبر من المغفلين بتقليده.

"إزاي ثبتت الست لثانية كاملة.. عشان يضرها بالنار بالظبط في المكان اللي يتفهم على إنه انتحار؟ عملها ازاي دي؟"

عُمر الشقي

في زمن الإنترنت، أصبح الخجل نادرًا، كالصدق. أصبح هناك من هو على استعداد ليفعل أي شيء، أي شيء، في سبيل حصوله على نشوة إعجاب المتابعين، ومضاعفة عددهم. وأصبح الاختلاف، والتميز، شيئًا واحدًا، وهما بعيدان كل البعد عن التشابه، وأصبح الاختلاف حتى في الانحطاط، مطلوبًا، وأصبح عدد المتابعين يعطي نوعًا من القداسة الزائفة لصاحب الحساب المُتخَم، ومصداقية مدعومة بعدد لا بأس به من المؤمنين بكل ما يصدر عن صاحب هذا الحساب، دون النظر إلى أن كل مؤهلات هذا الشخص أنه تافه، ولا حياء عنده.

"إزاي ثبت الست لثانية كاملة.. عشان يضرها بالنار بالظبط في المكان اللي يتفهم على إنه انتحار؟ عملها ازاي دي؟"

مرّ أمامه أحد المواضيع المثيرة للجدل، تلك المواضيع التي يبتكرها عقل المسؤول عن صفحة ما، بهدف زيادة المتابعين، ويُغلفها بغلاف منطقي، قدر إمكانه، فقط لإقناع المتابعين أنه موضوع حقيقي، ومشكلة تحتاج إلى عقولهم الفذة، لتُحل.

تلك المواضيع التي تتحدث عن فتاة، وعلاقتها بخطيبتها، وعن تجاوزات قاموا بها قبل موعدها، والحقيقة أن التجاوز الحقيقي، هو السماح لهؤلاء بالوصول إلى عقول أطفالنا.

معتز شرباش

ولكن في عصر الحرية، كل تجاوز مسموح به، سوى تجاوزك في حق تلك الحرية المزعومة.

"إزاي ثبتت الست لثانية كاملة.. عشان يضرها بالنار بالضبط في المكان اللي يتفهم على إنه انتحار؟ عملها ازاي دي؟"

أحد المنشورات التي تستفز المتابعين، الذين يظنون في أنفسهم قدرًا من الذكاء، حيث تعرض الصفحة سؤالًا، يضمن لها آلاف التعليقات، كان السؤال:

"ما هو الشيء الوحيد، الذي تسعد المرأة، عندما يُقلل منها؟"

أجاب نادر بتلقائية، وبصوت هامس:

"الميزان"

ولكنه لم يُعلق، على المنشور.

"إزاي ثبتت الست لثانية كاملة.. عشان يضرها بالنار بالضبط في المكان اللي يتفهم على إنه انتحار؟ عملها ازاي دي؟"

فجأة، اتسعت عيناه على آخرهما، وهب يبحث عن هاتفه.

* * *

٧٨

مَرَّت الثواني، والزوج ينظرُ إلى وائل، وعرقه يفضح توتُّره، ووائل
مازال تائمًا بين أفكاره، بحثًا عن آخر قطعة في الأحجية، تلك التي يعلم وائل
أنه اقترب منها كثيرًا، يكاد يشعر بوجودها على حافة إدراكه. "فكّر"
جاهد الضابط ليمنع ما يدور داخل عقله، من التأثير على ابتسامته
المُستفزة، التي تركها، لتوهم الزوج أنه يعلم، ولكنه فقط يتسلى بتعذيبه.
ومن ملامح الزوج، يبدو أن خطته ناجحة حتى الآن، ولكنه مُسكِّن مؤقت لن
يدوم تأثيره. "فكّر"

ضحجج أفكار يعلو في رأسه، يسمعها كلها، بأصوات مختلفة، تتكرر في
إصرار.

"إزاي ثبتت الست لثانية كاملة.. عشان يضرها بالنار بالضبط في المكان اللي
يتفهم على إنه انتحار؟ عملها ازاي دي؟"

"ضغط على زر الريموت، فانزاحت الستارة التي كانت تغطي الحائط المواجه
لباب الشقة بآلية"

"الريموت"

"لا يجب عليك القلق من ضياع الريموت، يمكننا تثبيت زر التحكم في أي
مكان؛ في مسند كرسي المكتب، أو في المكتب نفسه، أو أي مكان تختاره"

معتز شرباش

وصلت في تلك اللحظة رسالة إلى هاتف وائل، فأخرجه من جيبه ليجد كلمة واحدة فقط على شاشته:

- الميزان. انطلقت منه الكلمة منه بخفوت، لتتحول أفكاره المشوشة، فجأة، إلى صورة كاملة الواضوح.

تسمّر الزوج، وكأن كلمة وائل كانت تعويذة، تحوّل من يسمعها إلى صنم. مما حمّس وائل، وجعله يلتفت لفكرته، ويدرسها، بصوت عالٍ:

- الميزان هو المكان الوحيد اللي الشخص بيقف فوقه بشكل مستقيم وثابت. أعجبتة الفكرة، فاستمر:

- وهو اللي بيستخدم في الغالب أول ما بنصحى من النوم. وكمان مساحته صغيرة.. يعني هتقدر تتنبأ بالظبط راس الشخص فين.. لو عارف طوله.. ومكان الميزان.

وأخيراً؛ تقدر تثبّت فيه ريموت صغير بزرار واحد.. ودا شُغلك. وأشار إلى الحائط حيث اللوحة الترويجية، ثم أكمل:

- وكل اللي عملته لما رجعت من برّا.. إنك نقلت مكان المنجلة اللي مثبتة المسدس.. والميزان.. وحطيت بصمات المدام على السلاح. ودا ما ياخدش غير دقيقة واحدة.

صمت الزوج ولم يُجب لدقيقة كاملة، فقال وائل ليقضي عليه:

- تفتكر يا باشمهندس لو وصلت الشقة وقلبت الميزان.. هالاقى ريموت صغير

عُمر الشقي

متثبت تحته.. يتداس عليه لما حد يطلع فوقه؟ أو يمكن جواً الميزان. ها؟

قربت؟! ثم ابتسم، وقال:

- ولا نقول وصلت؟!!

لم تُبدِ ملامح الزوج سوى الانكسار، وهو يقول:

- انت ما كنتش عارف حاجة.. صح؟! انت جيت تصطاد.. وتجرب معايا

نظريات.. صح؟!!

رفع وائل كفيه وشفق، وهو يقول:

- طب ما انت ذكي أهه.. أُمال وقعت ازاي بالسهولة دي؟! أقول لك أنا

ازاي؟! عشان خايف.. اللي عنده حاجة يخاف منها.. سهل يُقع.

ضاق الزوج ذرعاً، وقال بضيق، وغضب:

- عاوز إيه دالوقت؟!!

- تحكي لي كل حاجة.. عاوز اللي ساعدك.. واللي نقّذ العملية.

- أنا اللي نقّذت العملية.

سأل وائل بخيبة:

- يعني إيه؟!!

- يعني زي ما انت قُلْت.. ناهد كانت لوحدها.. والتثبيت والتركيب..

والريموت.. كل دا أنا اللي عملته، ما حدش اشترك في التنفيذ غيري.

- يعني كل دا كان صدفة؟! وما فيش شبح؟!!

* * *

القاهرة في الصيف صباحًا، في أيام العمل، لا تُطاق، بزحامها الذي يأكل أعمارنا، وتراها الذي يغطّي كل شيء، حتى أرواح من عاشوا فيها لفترة. مما يصيب سُكّانها بانعدام القُدرة على احتمال بعضهم البعض، وتنخفض فيها الحدود الدُنيا للأخلاق، إلى ما تحت الفظاظة، حتى أصبحت سمات سُكّان العاصمة، هي العصبية، والفظاظة، وطول اللسان، البلطجة. ولكن وائل لم ينتبه لكل هذا، وهو يقود سيارته، غارقًا في أفكاره، والتي استحوذت على كل وعيه، فلم يلحظ هذا السائق الذي سبّه، بسبب أن آخرًا سبقه، ولا الآخر الذي أوقف سيارة نقل الركاب خاصته، ليكتمل عدد ركبها، في منتصف الطريق بالظبط، وكأنه مصاب بوسواس قهري، يجبره على هذا المكان.

اتصل وائل بعماد، وقال ما إن سمع صوت الصحفي الناعس، ولم ينتبه إلى أنه أيقظه من نومه:

- فاكر هشام، قال لك توصل له ازاي؟

- آه.. اكتب أي جملة على صفحتي ع facebook، فيها كلمة "مريم". قال عماد وهو يكره كل ثانية يقضيها مُستيقظًا، ويُريد العودة إلى النوم.

- طب يلا فورًا.. ولما يكلمك.. حدد معاه ميعاد وبلّغني. وأغلق الخط.

عُمر الشقي

جلس عماد على السرير، وعيناه تآبى أن تُفتح، كحلزون ذي صدفتين،
يخشى التهامه، ويحتمي بصدفه.
- كان مال أهلي أنا بالقسم.. وبالظابط.. والمجنون.. ما لي أنا. قال بضيق،
وشعر بصوفي تقفز فوق السرير إلى جواره، والتصقت به، كأنها تواسيه.
فتح حسابه على facebook، وفكر ماذا يكتب، قال بخفوت:
- جملة فيها كلمة... ثم شرعت أصابعه تكمل الجملة. كتب كلمة واحدة.
"مريم". فهو لا يقوى على التفكير في أي شيء آخر. ثم ترك الهاتف إلى
جواره، وأكمل نومه.

* * *

على ارتفاع ستة عشر طابق، خلف زجاج يعزل ضوءاً، وحر،
ورائحة غبار العاصمة، ولكن لا يخفي المشهد الرائع، لنهر النيل، والكباري
التي تعبر فوقه، والمراكب الصغيرة، التي تسعى لرزق يسعى إليها بأمر من
السماء، يجلس عُمر، مُستمتعاً بهدوء ساحر، وموسيقى لا يعلم من أَلَّفها،
ولكنه أحبّه، وبمشهد رائع، تمنى أن يبقى أمامه للأبد، وأخيراً وليس آخراً،
يستمتع بصُحبة تلك الطفلة الفاتنة، التي كان يتابع انبهارها بالمشهد،
مأخوذاً بكل هذا القدر من الفرح الذي ينطلق من ملامحها، ويملاً المكان
حولها، وكأن لها هالة من فرح، يسعد كل من يسعده الحظ ويقترّب منها.

نظرت إليه، وسألت:

- يعني بالذمة ينفع تبقى هنا.. وما تتفرّجش على المشهد دا؟
- زهقان منه.. جيت هنا كثير. كذّب؛ فتلك كانت أول مرة له أيضاً، يزور فيها
هذا المكان. ولكنه كان يُفضل النظر إليها، على النظر إلى أي شيء آخر.
- وبالذمة دي حاجة يتزهق منها؟ حرام عليك. ثم عادت لتتنظر إلى الخارج
بانهار كامل، وكأنه يتجدد.

عُمر الشقي

جاءه تنبيهه، من برنامج كان هيثم قد صنعه له، بناءً على طلبه، يبلغه بأن حساب عماد على facebook، نشر جملة بها كلمة "مريم". ففتح الحساب، ليجد كلمة واحدة "مريم". فضحك رغباً عنه، وهو ينظر إلى الهاتف.

لم يلحظ أن مريم، لاحظت ضحكته، وعقدت حاجبيها، ثم أشاحت برأسها بعيداً، ولكنه لاحظ ضيقاً نال منها، عندما استأذنها أن يقوم بالاتصال بأحدهم، ويعود فوراً.

خرج إلى ردهة المطعم، وأخرج هاتفاً صغيراً و بطارية من جيبه، هاتف غير الذي استقبل التنبيه، ثم وضع البطارية في الهاتف، وضغط زر التشغيل، ثم قام بالاتصال بعماد:

- ألو.

- يا جدعان حرام عليكم عاوز أنام. بحدّة، قال عماد.

- انت بتهذي يا ابني؟ مش انت اللي بعّتي اكلمك؟!

- وائل عاوزك. بغضب.

- إمتي؟!

- قال لي بالليل. كذب.

- ماشي.. على ١٠ كدا عندك في البيت.. سلام.

معتز شرباش

عاد عُمر، بعد أن فصل بطارية الهاتف وأعادَه إلى جيبه. رمقته مريم بنظرة، حاولت أن تداري خلفها ضيقًا برز كالشمس في السماء.

ابتسم وقال:

- دا عماد.. الصحفي اللي حكيت لك عنه.

رفعت كتفها وأنزلتها بعدم اهتمام، وقالت:

- وانا ما لي؟ بتقول لي ليه؟

تجاهل عُمر سؤالها، وأضاف:

- كنت قايل له لو عاوزني.. يكتب على حسابه جملة فيها اسمك.. المجنن..

- اشمعنى اسمي؟!

- مريم.. وهو مسيحي.. فالموضوع مش هيبقى غريب يعني. بس الفقري

عشان عاوزني.. كتب Post من كلمة واحدة.

ثم ناولها الهاتف لترى منشور عماد، الذي كان مُجرد اسمها، فضحكت

رغمًا عنها، فقال عُمر:

- عرفتِ بقي أنا كنت باضحك على إيه؟!

راوغت نظرته، التي شعرت وأنها تخترقها، وكذبت قائلة:

- عادي يعني يا عُمر.. براحتك.

عُمر الشقي

- ما انا عارف عارف. ثم ابتسم، ونظر صوب النيل، فأبقت نظرها عليه لثوانٍ، وابتسمت، عاد بعدها ينظرُ إليها، فحاولت إخفاء ابتسامتها، ونظرت هي صوب النيل، فابتسم هو، ثم قال:

- على فكرة احنا بقالنا بيعي نص ساعة بنتفرج على النيل.. وما طلبناش حاجة. مش هنفطر بقي؟

- يلا.

- تفطري إيه؟! وأشار إلى قائمة الطعام، أمامها.

- مش انت جيت هنا قبل كدا؟! هات لي على ذوقك.

- لا.. أنا أول مرة آجي هنا.

- انت نسيت؟! مش لسا قايل لي إنك زهقان من المنظر عشان جيت هنا كثير؟

فابتسم، وقال:

- يا ريتني بانسى.. بس للأسف ما بانساش.

- أُمال؟!!

فابتسم ولم يُجب.

* * *

استيقظ عماد على صوت دقّات على باب شقته، وقام مترنحًا، وفتح الباب، مرتديًا فقط "شورت" قصيرًا، ليجد أسماء صديقه أمامه، يكسو ملامحها الغضب. أغلق عينيه، وفتحهما مُجددًا، وكأنه يتأكد من كفائهما. دفعته أسماء، ودخلت إلى الشقة، ونظرت حولها بتأفف لم يلحظه هو.

أغلق الباب خلفها، وارتمى على الكنبه، وسأل بصوت مبحوح:

- معاك حاجة تتاكل؟

- دا انت اللي عاوز تتاكل علقه والله. ثم صرخت فيه بحدة، جعلته يجفل:

- انت فين يا زفت بقالك يومين؟ ولا بترد ولا بتتصل ولا كتبت كلمة في

المقالة اللي طلبتها منك.. قُلت اسيبك يومين عشان مخضوض من زيارة

الظابط.. بس كدا ما ينفعش.. يا ابني الناس دي بتخاف مننا مش احند..

ضيق عينيه، وأشار لها بكفّه أن تصمّت:

- ششش.. اهدي بس.. أنا مطبّق ونايم الصبح.. هي الساعة كام؟

كان قد لاحظ غياب الشمس عندما فتح لها الباب، قالت:

- ٨ ونص. ممكن افهم ما لك؟! هتفضل مرعوب كدا من واحد جالك مخبي

وشه.. يعني هو اللي خايف منك يا عماد مش العكس.

عُمر الشقي

- يابنتي اتكلمي بس وطيّ صوتك.. أنا مش اطرش.. وما طلّعش ظابط. معاك
أكل؟! وأشار إلى الكيس الذي ما زالت واقفة وتحمله.

تنهدت بضيق، ثم قالت:

- أيوة جبت أكل عشان عارفة إنك أكيد متنيل نايم وما أكلتش. ثم وضعت
الأكل أمامه، وسألت وهي ترفع شعرها الأسود متوسط الطول عن رقبتها،
وتربطه أعلى رأسها، برباط مطايطي كان حول معصمها:

- ممكن افهم بقى إيه حكاية ما طلّعش ظابط دي؟

فتح الكيس، وبدأ في إخراج محتوياته، ووضعها على الطاولة، فقفزت صوفي
إلى جواره، عندما وصلتها رائحة الكباب، وهي تلحس لعابها.

- دي حكاية طويلة مش هاعرف احكيها لك.. بس اطمّني.. ما تقلقيش.. طلع
كويس.

- ومش هتعرف تحكيها لي ليه؟ قالت وهي تطعم صوفي قطعة من الكفتة.

- موضوع كبير.. ومش هيفيدك في حاجة.. وبعدين مش بتاعي.. وانا ما
باكشفش سر حد.

- ولما هو مش بتاعك.. ما لك وما له؟!

- يووووه.. مش هتفصلي صح؟! وبدأ يأكل بنهم.

- لأ.

- أنا وسيط بس يا سمسسم.. مجرد وسيط. اهبطي بقى وخلينا ناكل.

معتز شرباش

وبعد ساعة كان عماد وأسماء في الخارج، أمام شقته، يدخان سيجارة محشوة سويًا، ويستمتعان بمشاهدة مشهد كئيب، لأسطح تغطيها، أطباق استقبال القنوات الفضائية. وأمام كل منهم كوبًا من الشاي، مملوءًا نصفه. نفخت أسماء دخانًا احتفظت به لثوانٍ، داخل رثتها، حتى يسبب أقصى متعة ممكنة لعقلها، وأقصى ضرر ممكن لصحتها. ثم قالت وهي تناول عماد السيجارة:

- البلد دي عمرها ما هتنضف يا عماد.. الناس دي كلها بتسهر تتفرج على قنواتهم.. وتتلقن تتكلم في إيه وما تتكلمش في إيه.
احنا بنفرم نفسنا في الشارع.. على أمل في التغيير.. بس كل واحد فينا لما بيوقف قصاد نفسه في لحظة صدق بيكون عارف من جواه إن ما فيش فائدة.

الداخلية هتفضل مجرمة.. والنظام هيفضل يتورث.. والشعب هيفضل ساكت.. واحنا هنفضل نشتغل ع الفاضي.

ثم رفعت رأسها قليلًا، بشموخ واضح، دون قصد، وأكملت:
- ودي يا صديقي.. أقصى درجات النبل والتضحية، إنك تضحى براحتك.. وسلامك النفسي.. في سبيل قضية مؤمن بيها.. وانت من جواك عارف إنك خسرتها خسرانها.

نظر عماد إليها لثوانٍ، ثم قال:

- الحشيش دا انت جايباه من واحد ثورجي ولا إيه؟!!!

عُمر الشقي

ضحكا معاً، ثم قال عماد:

- دماغك سافرت في سكة آخرتها المعتقل.. انزلي يا بنتي هنا.. مش ناقصة طيران.

- وهو في حد بقى عارف يطيء...

سمعا وقع أقدام خلفهما، فدارا، ليجدا وائل أمامهما، الذي اقترب وسلّم على أسماء، بقبضة واثقة، ونظر إلى عماد متسائلاً، فقدّمهما:

- أسماء.. صديقة.. وائل بيه.. صديق. اتفضل يا وائل بيه.. في الصالة وأنا جاي لك حالاً. ولّا تحب تقعد هنا اجيب لك كُرسى؟

- لا لا خليك.. خدوا راحتكم.. أنا هاقعد جوا. قال وائل جملته، ودخل إلى الشقة.

نظر عماد إلى صديقه، ليجدها تنظرُ إليه نظرة قاسية، وقالت بصوت خافت، يملؤه الغضب:

- وائل بيه دا ظابط يا عماد؟! انت بقيت بتصاحب مجرمين وقتلة!!؟

- مجرمين مين بس يا بنت المجنونة؟! وضحك. ولكنها لم تُجاره، وأبقت نظرتها الغاضبة عليه، حتى تبخّرت ضحكته، ثم قالت:

- آه وسيط.. وطلع كويس.. ومش هاقدر اكمل معاك.. ووائل بيه صديق..

كدا بانتي، وصلت يا عماد بيه. قالت ثم توجّهت صوب السلم، فأمسك يدها، فسحبها منه بقوة، كمن مسّه تيار كهربائي، فقال وهو يقطع عليها

الطريق بجسده:

معتز شرباش

- هي إيه اللي وصلت؟! ما لك يا أسماء؟! في إيه؟!!!
- في إن سعادتك بقيت مُخبر.
- مُخبر؟!
- زيارة من ظابط.. هِدِّدك.. خُفت.. وفجأة بقي كويس.. وبقي صديق..
وبيزورك في البيت.
يا ترى التقرير بتاعي اتسَلَّم ولا الباشا جاي يستلمه?!!!
آخر واحد كنت اتخيّل إن...
تحرك عماد من أمامها، فاتحًا لها الطريق الذي كان قد قطعه، ورفع كَفَّهُ
أمامها مقاطعًا إيَّها قائلاً:
- خلاص خلاص.. ما تعكّيش أكثر من كدا.. امشي.. امشي يا أسماء ربنا
يسامحك.. بس أنا مش مسامحك.
انتِ خلاص السكة اللي انتِ فيها دي كلت دماغك.. وما بقيتيش تشوفي غير
الوَحش بس.
امشي بقي عشان عندي تقرير عاوز اقدِّمه للباشا.
وعاد إلى شقَّته.

* * *

٨٢

- لا هي مش قصة اللي بيتكلم بيتحبس.. والله هي مش ماشية كدا. بس فيه ناس طبعًا بتتحبس.. ماهو ما ينفعش كل حاجة تتقال. وانت كدولة لو هتسيب كل اللي عاوز يتكلم يقول اللي هو عاوزه هتبقى فوضى. قال وائل، ثم نظر حوله، في السطح، ثم إلى السماء الغارقة في ظلمتها، وبالكاد لاحظ نجمة، أو اثنتين.

- يا باشا سامحني.. الدولة اللي تخاف من مجرد كلام.. تبقى دولة ضعيفة قوي.

ابتسم وائل، ثم قال مُستخفًا بمنطق عماد:

- اوعى تستهين بقوة الكلام يا عماد. الكلام هو أقوى سلاح اتخلق على وجه الأرض. مثلاً النبي محمد بتاعنا.. كانت مُعجزته القرآن، كلام. كلام بنى أمة كاملة عايشة آلاف السنين.

وعشان خاطري يا عماد بلاش الشعارات اللي بتسمعوها على سلّم النقابة.. وبتقروها على صفحات الfacebook.. لأنها زي ما انا قُلت كدا بالظبط؛ شعارات.

أطاح عماد بيده في الهواء، وقال:

معتز شرباش

- انت ظابط مباحث.. طبيعي تقول كذا.

- أهي دي تاني غلطة بتغلطوها يا شباب يا ثوري يا مؤمن بالتغيير..
التصنيف؛ كل من هو داخلية.. مجرم. كل ما هو نظام.. فاسد. كل ما هو..
وهكذا.

دا كلام لا يُمكن يؤدي إلى شيء غير المزيد من الانقسام.

- مش فاهم. ما هو السيئة بتعم. وناول عماد الرائد السيجارة التي كان
يحشوها.

تناول وائل السيجارة، وأشعلها، ثم قال:

- افهمك.. تعالي نفترض جدلاً إن فيه جواً الداخلية ظباط بتؤمن بقضية
الثورة والتغيير، وطبعاً الكائنات دي موجودة، بس باقول لك نفترض عشان
ما ندخلش في جدل عقيم عن حقيقة وجودها.

- تمام.

نفخ وائل دُخان سيجارته، ثم ناولها لعماد:

- الظابط دا شايف وزارة فيها عيوب محتاجة تتصلح.. والناحية الثانية
شايف شباب بيقول على كل من ينتمي للوزارة مجرم وفاسد وقتل قُتلة..
عملاً بمبدأ السيئة بتعم.

عُمر الشقي

انت لو مكانه هتختار تُقف في صف مين؟!

لَمْ يُجِب عماد، ولكن وجهه أجاب، بأنه فهم مقصد الرائد، الذي أكمل:

- ما فيش شك إن فيه مشاكل وعيوب وكوارث.. بس ما فيش حاجة بتتغير في يوم وليلة.. اللي يقول يا كله يبقى تمام حالاً يا مش لالعاب.. دا واحد مش عاوز يلعب.. دا واحد عاوز يبوظ اللعب.

أنا لما باسمع كلام الشباب الث..

قاطع كلامه صوت عُمر، قادمًا من خلفهما، والمعروف لدى الجالسين بهشام، مُتَشَحًا بالكامل باللون الأسود، ومرتديًا قفازًا رفيعًا كعادته:

- خُد با لك يا عماد.. الباشا عاوز يجنِّدك وتبقى مُخبر.

ضحكا، ثم قال عماد:

- أنا عارف.. أنا باجاريه لحد ما يتسطل بس يا إتش.

- إتش؟! تعجَّب عُمر، ثم استدرك:

- آه إتش. ونظر إلى وائل، وقال:

- غلبان قوي عماد دا.

- يا عيني مصدِّق إنك اسمك هشام.

معتز شرباش

فابتسم عُمر، عندما أدرك وائل مقصده، دون توضيح، ونظر كلاهما إلى عماد، الذي كست ملامحه علامات خيبة الأمل:

- أنا يعني غلطان إني طيب وقلبي أبيض؟! وبعدين ما لكم بتبصّوا لي زي ما اكون أخوكم الصغير كدا ليه؟!!

ضحكا مُجددًا، ثم عرض عماد السيجارة على عُمر، فرفض، وسأل:

- ها يا باشا.. طمني.

ابتسم وائل، ثم قال بفخر:

- طلع فيه قاتل بجد يا هشام.. أنا كنت صح.

* * *

٨٣

- أنا كنت متأكد.. أنا بأسأل عن التفاصيل. ورفع عُمر كتفيه باستهتار.
فقال وائل، بصوت كسته خيبة الأمل، حيث كان ينتظر دهشة، وسعادة،
على أقل تقدير من هشام:
- إيه اللي كان مأكد لك كدا؟!
- ما انا قُلت لك يا وائل بيه.. العلامات اللي جاية من فوق ما بتغلطش.
وأشار صوب السماء.
أوماً وائل، ثم قال:
- هو مش قاتل قوي. تقدر تقول.. عقل مُدبر. مش عارف يتسمّى إيه
بصراحة.
- ما توضّح طيب. وانت يا عمدة.. ما فيش حاجة تتشرب. قال عُمر.
- بيرة؟!
- اقعد يا عماد.. اقعد أنا أسف. فغادر الأخير، دون كلام في اتجاه شقّته، ثم
نظر عُمر إلى وائل وقال:
- ها يا باشا.. وضّح.

معتز شرباش

- بعد ما انهيار الباشا واعترف.. سألته كان في حد معاك؟ قال لأ. المهم باختصار أقنعتة إني اقدر اعتبره ساعدنا في التحقيقات.. لو سلّمنا القاتل. اعترف. طلعت القصة إيه بقي؟!!

فيه كذا منتدى على الإنترنت.. بتدخل عليهم تكتب بطريقة مُعينَة المُهمَة في شكل إعلان.. والشبح دا بيشوفهم.. ويبعت لك بعدها يقول لك إنه قبل يساعدك.. وممكن ما يردش عليك أصلاً.

بس هو مش بينقذ الجريمة؛ هو بس بيخطط لك الجريمة، يعني بيقول لك ازاى تقتل الشخص دا.. وتفلت من العقاب، انت اللي تنفذ أو تجيب حد ينفذ، هو بس مستشار.. بيبيع لك خطة ع الورق.

باختصار؛ ما فيش طريقة للقبض على البني آدم دا، واضح إنه فعلاً بينتمي لجهاز أمني.. أو كان.. طريقته ما فيهاش ثغرات، دا غير إن شرط عادل كان إنه هينكر أي تفصيلا لها علاقة بالراجل دا في تحقيق رسمي.. عشان قال لي إنه هيقتله ويقتل كل اللي يعرفهم.. هو قال لي أنا بس، يعني مش هاقدر اعمل قضية رسمية عنه.. وحتى لو عملت ما فيش خيط ابدأ منه.

بس على الأقل اتأكدت إنه مش خيال.

لم يتحدث أو يُعقّب أحداً منهم لثوانٍ، وتركهما وائل قليلاً ليستوعبا ما قيل. تحرك شيء ما، خلف كراكيب ملأت الجهة الخلفية من شقة عماد، حيث ظلام دامس، فأجفل الجميع، وعادت لهم الحياة من جديد، فقال عُمر:

عُمر الشقي

- يا ابن الصايعة.. وهو صاحب فكرة الميزان؟!
- صحيح.. جبتها ازاي فكرة الميزان دي؟!
- مش قُلت لك عندي أذكي محلل جرائم في مصر؟! حلّها طبعًا.. بس أخذت منه شوية وقت.. ومراجعة للمحاضر وصور مسرح الجريمة كذا مرة.
- دا حتى عرف قضية سليمان الهجام اتعملت ازاي.
- حل القضية من الورق بس؟! وبعدين استنى استنى.. جاب الورق منين؟!
- ما بلاش نتكلم في الماضي يا وائل بيه.
- هز وائل رأسه علامة على عدم الرضا، فسأل عُمر مُغيّرًا الموضوع:
- طب وهنوصل للشبح دا ازاي؟!
- مش معايا غير اسم الكام موقع.. بس صدقني أنا بافكر فيها من ساعة ما سبت عادل.. ما لهاش حل.
- هو بياخد بياناتك.. ويدرس حالتك.. ولو شك فيك مش بيظهر، والفلوس طبعًا بياخدها كاش.. بس أصلًا مش هنوصل للمرحلة دي.. دا مش غبي.
- وأخرج ورقة بيضاء من جيبه، وناولها لعُمر، الذي قال:
- هنشوف.. طب وعملت إيه في الزوج؟!
- كلّمت وكيل النيابة طبعًا.. والمباحث.. جُم استلموه مني.

معتز شرباش

- تمام.. كدا يبقى مش فاضل غير حاجة واحدة بس. وأخرج USB Memory من جيبه، ورفعته أمام وجه وائل:

- دليل براءة سعادتك.

مدّ وائل يده، ولكن عُمر استعادها، وقال:

- لسّا عند وعدك.. ها؟!!

- طب أفهم الأول.

- القصة باختصار؛ ثروت الناظر طلب فيروس يمسح صحيفة الحالة الجنائية لشخص ما.. عندك هنا بيانات الشخص دا، وعندك برضه فيديوهين.. واحد لعملية الاقتحام.. متسجل بكاميرا كانت متعلقة في شنطة اللي نَقَد الاقتحام بتاع القسم. وأشار إلى نفسه. ثم أكمل:

- والثاني لعملية زرع الفلوس في أوضة سعادتك.. متصور بنفس الكاميرا.. ونفس الشخص، كدا يبقى فاضل ربط كل دا بثروت شخصيًّا. بُص يا سيدي؛ ثروت شخصيًّا مش بيستخدم مواقع التواصل.. وصعب نربط جهازه هو الشخصي بأي شيء.. ولكن المساعد الشخصي بتاعه.. هادي علم بيستخدم كل شيء.. صورة حلوة اتبعت له عليها فيروس صغير.. قبلها.. دخلنا جهازه الشخصي، سعادتك هتلاقي مراسلات بين هادي علم وبين الشخص اللي عمل العمليتين.. بالاتفاق والمقابل وخلافه.. وهتلاقي صور من

عُمر الشقي

الفيديوهين عنده على جهازه، طبعًا هو شخصيًا ما يعرفش عنهم حاجة.
بس هياأدوا الغرض.

تساءل وائل:

- وليه مش هالاقى الفيديوهات؟! ليه صور بس؟!

- تحميل فيديو كامل على جهاز من بعيد بياخد وقت.. وممكن المستخدم
يلاحظ، الصور سهلة وسريعة.. وبعدين الهدف من وجودها.. كأن المنفذ
بعتمها بس كإثبات إنه عمل العملية وتمت. ووجودها على جهازه بيثبت عليه
التهمة تمامًا.

- طب وليه هنلبسها للغلبان دا مش المتهم الحقيقي؟!

- غلبان مين بس يا باشا.. فَشْر.. دا زبالة، هو اللي متفق معانا على كل
حاجة أصلًا.

- طب وثروت؟!

- الفكرة إن هادي لما هيلبسها.. وهو عارف إن أنا اللي ملبسها له.. وهو
برضه عارف إن ثروت هو السبب عشان ما رضيش يحاسبني.. هيبقى
قصاده إنه يلبسها هو.. أو يسلمك ثروت.. وانت وشطارتك بقى يا حضرة
الرائد.

لاحت علامات الضيق على وجه الرائد، فابتسم عُمر، وقال:

- قول قول.. ما لك؟!

معتز شرباش

- حاسس إني باعمل حاجة غلط.. أنا عارف إني اديت لك كلمة.. بس انت اللي نفّدت العمليتين.

- محسسني إني باليسهم لحد بريء.

- انت بتسلّمه بس عشان نصب عليك في فلوسك.

- وانت تفرق معاك باسلّمه ليه؟

- وانت مش شايف فرق؟! طبيعي.. ما انت...

- نصّاب؟! آه.. ما عنديش أي مُشكلة.. بس الصفقات دي بتتعدد من يوم ما الدنيا قالت يا أنظمة وأجهزة أمنية.. ولا عاوز تفهمني إن الأجهزة الأمنية مش بتعدد صفقات مع تجار مخدرات.. وقتّالين قُتلة.. وكمان إرهابيين؟! لمنع ضرر أكبر؟! بلاش مثالية.. ما حدش فيها نضيف.

- اتكلم عن نفسك.

ارتفع صوتهما، واشتعل الحوار.

- عمومًا احنا فيها.. اعمل زي كل الأغبياء اللي التاريخ ييرفّص من الضحك عليهم، وقام وتوجه صوب السلم.

- أغبياء؟! وقام وائل منتفضًا، فدار عُمر وواجهه، وقال:

- طبعًا أغبياء.. اللي يكون هدفه ١ و ٢ و ٣.. و ١٠. ويجيله من ١ لحد ٨ على طبق من ذهب.. ويرفضهم عشان مش كل اللي هو عاوزه يبقى غبي.

عُمر الشقي

اللي أنا باسليمهولك دا كنز.. سيادتك هتقبض على مجرم.. وكمان هتبقى بطل. ومش عاجبك؟! وزعلان عشان باقول لك يا غبي؟! طب مش زعلان إنك فعلاً غبي؟!

وبعدين دا كان اتفاقنا.. هتلتزم.. أهلاً وسهلاً.. مش عاجبك.. أنا هامشي.. وحظ سعيد في إثبات براءتك.

- من تهمة انت اللي ملفقها لي يا مجرم، وتوجه صوبه بسرعة.

- ما انت لو مش غبي ما كنتش عرف...

ظهر عماد في اللحظة الحاسمة، واعترض طريق وائل، ومنعه من الوصول إلى عُمر، الذي كان واقفاً هناك بلا حركة. وقال عماد:

- صلوا ع النبي كدا يا رجاله.. أظن أول مرة تسمعوها من واحد مسيحي.

لم يضحك أحد، ولكنهم على الأقل توقفوا عن التشاحن، فقال عماد:

- يعني ادخل اعمل كوبايتين شاي.. أرجع الايكم ماسكين في بعض؟

- كوبايتين؟ سأل عُمر مُغيّراً الموضوع، ونازعاً فتيل المعركة.

رفع عماد زجاجة بيرة إلى أعلى، فهزَّ عُمر رأسه، ثم نظر إلى وائل، الذي أعطى لهما ظهره، وتوجّه صوب السور، وأسند عليه مرفقيه، وأخذ ينظر إلى لا شيء تحديداً، ويفرغ شحنة غضبه في الهواء.

بعد دقائق، أسند عماد مرفقيه على السور إلى جوار الضابط، وترك زجاجة

معتز شرباش

البيرة إلى جواره، وشرع يلف سيجارة، فنظر إليه الأخير، ثم نظر خلفه بحثًا عن هشام، فلم يجده. وكبرياؤه منعه أن يسأل عنه، أو عن دليل براءته. فعاد ينظر أمامه، صامتًا.

هكذا خرج هشام من حياته، كما دخلها، مُتسللاً.

وكان وداعًا صامتًا، يليق بالأعداء.

لاحظ وائل حركة من عماد، فنظر إليه، فوجده يمد له يده بالـ USB، فلم يتحرك ليأخذها، فقال عماد:

- ما علش يا وائل بيه بس انت لسا من شوية كنت بتكلمني في إن التغيير مش بيتم خبط لزق.. وكل حاجة بتتعمل واحدة واحدة، سامحني هو عنده حق.. انت آه ما أخذتش كل حاجة.. بس من غيره مش هتاخذ حاجة خالص. هزّ وائل رأسه، ثم قال بخفوت، وبصوت مكسور:

- أنا مش متضايق عشان كدا يا عماد.. أنا متضايق عشان فشلت، هو اللي كسب.. تفوق عليّ.. ودا غايظني.

- بس انت مش في مُقارنة معاه من الأساس.

- أنا مش باقارن نفسي بيه.. أنا زعلان إني أخفقت.. زعلان إني احتاجت مساعدة من حد أنا باعتبره... وقطع جملته، وصمت.

- ومين يا باشا بينجح على طول؟! مين مش بيحتاج حد من وقت للتاني يساعده؟! حتى لو كان بيعتبره...!!؟

عُمر الشقي

زي ما بتقول.. يعني في شُغلكم ما عندكمش مُخبرين بيبيعوا برشام؟! في شُغلي ما فيش ناس بتصرف على الجرنال بحملات دعاية ما لهاش لازمة غير إننا نلّمّهم وقت ما يحتاجوا؟! دا حتى في شغل النصّابين.. أهه هشام جالك بنفسه وحت إيده في إيدك.

صدقني يا باشا.. في الدنيا هنا.. مش هينفع تفضل نضيف بس.. ولا وسخ بس.. ولا هتفضل ماشي مستقيم على طول الخط.

الخط الوحيد المستقيم في الدنيا.. اللي لازق في الحيط.. عاوز تمشي مستقيم بس.. امشي جنب الحيط يا باشا، بس اللي زينا اختاروا ينزلوا الساحة.. والساحة ما فيهاش سكة طوالي.. لازم تغزل.

- إيه الكلام الكبير دا يا ابني؟!

فرقع عماد سيجارة كان يُدخنها أمام وجهه وائل، علامة على أن الفضل يعود إليها.

* * *

ومعنا لقطات حيّة من المؤتمر الصحفي الذي عقده رجل الأعمال ثروت الناظر، بعد القبض على مساعده، ومُدير مكتبه.

"وهذا تلفيق واضح كوضوح الشمس.. وهو ليس بجديد على نظام احترف البطش بالمُعاضين.. وزرع الأدلة.. وتضليل العامة.. وتشويه سُمعة كل من يقول كلمة حق في وجهه"

أغلق عماد صوت التلفزيون، وتناول سيجارة من أسماء، التي اعتذرت له منذ أيام، على ما بدر منها في حقه، بعد أن تأكدت من انتمائه، الذي لا شك فيه للقضية، بعد كتابته مقالة من العيار الثقيل قبل أيام، على خلفية القبض على مُساعد أحد كبار معارضي النظام.

عُمر الشقي

مقال في جريدة "الضمير" بعنوان:

"لماذا كان يجب إقصاء ثروت الناظر الآن؟!"

بقلم: عماد المنسي.

ماذا تعتقد سيكون رد فعل أي مُشجع لنادي الزمالك، إذا علم بعدم قدرة محمد أبو تريكة على المشاركة في مباراة فريقه القادمة ضد الزمالك؟ وماذا تعتقد سيكون رده، إذا ما عرضت عليه، وسيلة تمكّنه من منع اللاعب من المشاركة؟ تستعد كل أجهزة الدولة حالياً، وكل قوى المعارضة، إلى معركة، يعتقد البعض، أنها ستكون فارقة، في مستقبل كل أطرافها. رجل الأعمال ثروت الناظر، يُمثل لقوى المعارضة، صانع الأُل...!

ابتسم وائل عندما تلقى هاتفه رسالة من مَيّ، وتوقف عن قراءة المقال، وشرع في كتابة الرد، ليرسله إليها، ولكنه تراجع، وقرر الاتصال بها.

* *

معتز شرباش

- يا ندلة أنا ما بقيتش باشوفك. قالت جينا صديقة مريم، عبر الهاتف.
- وضعت مريم هاتفها المحمول أمامها، وضغطت على زر تشغيل السماعة الخارجية، وأكملت وضع زينتها، وهي تقول:
- مش انتِ اللي كنتِ بتشجعيني في الأول.. وقلتِ هاطيرِ مننا المز؟! أهو أنا اللي طرت يا لمضة.
- أفهم من كدا إن في حاجة؟! بدمتك لسا ما قالهاش؟! سألت جينا بخُبث، تستنطق مريم.
- يوه كام مرة هاقول لك أنا وعُمر صحاب بس يا چي؟ اهمدي بقي.
- انتوا الاتنين مجانيين على فكرة.. بقالكم أكثر من شهر تقريبًا كل يوم بتتقابلوا.. وصحاب بس؟ يا مجانيين.
- مجانيين بس مبسوطين.. الحب بيقلب بكره يا چي. سيبيني بقي عشان هاتأخر كدا.
- دارت مريم، لتجد والدتها واقفة أمام باب عُرفتها، حيث لم تلحظها في المرآة. تسمّرت الفتاة في مكانها لثانيتين.
- "سمعتني"

عُمر الشقي

اقتربت الأم من وحيدتها، وابتسمت، فلان تخشُّب وجه مريم قليلاً، ولكن بقيت الدماء تآبى العودة إليه. احتضنت الأم ابنتها بقوة، وقالت:

- تبقي حمارة لو فاكرة إن أمك لحد دالوقت مش ملاحظة إن في حد في حياتك. دا انا أمك يا مريم.

تلعثت مريم وقالت كلمات من نوع:

- ما فيش.. دا بس.. يعني أصلاً.. هافهمك بس... احند...

قاطعتها الأم قائلة:

- أنا واثقة في اختيارك يا مريم.. وواثقة في اللي انت تشوفيه في مصلحتك. يلا مش هاعطلك.

وغادرت الغرفة، وبعدها غادرت دموع مريم مُقلتيها، وأفسدت زينتها.

معتز شرباش

- "الجريمة للجميع".. الرواية هيبقى اسمها كدا. قال نادر، لعُمر عبر الهاتف.
- يعني انت مش متصل تاخذ رأي بقى.. ينفع تكتب رواية عن الشبح دا ولا لا.. دا انت مختار الاسم كمان.
- تجاهل نادر ملاحظة عُمر، وقال:
- كان نفسي اقعد معاه.. كان إيه؟! ما زال نفسي.
- ماعلش بقى يا دوور.. عمرك سمعت عن حد بيقعد مع شبح؟ وبعدين هو انت ناقص جنان يا ابني؟! بس اكتب اكتب.. كويس عشان تلاقي حاجة تتشغل فيها بدل القعدة دي.
- المهم نتقل ع الشغل شوية.. عشان الرواية دي هتاخذ وقت.
- تفتكر هنخلص الفلوس اللي معانا قريب؟ هيثم أصلاً بيفكر يبطل بعد ما عرف إن نصيبه معدّي النص أرنب.. المهم.. يلا سلام عشان خارج.

* * *

تناول وائل كوب الشاي الذي تدلت منه تلك الورقة الصفراء التي
عُلِّقت في خيط تمنى أن يتعلق في الأشد منه رقبة هذا الذي يبحث عنه، من
عماد، ووضعه على السور أمامه، ونفخ دُخان سيجارته إلى الأعلى، فتلاشى
بفعل نسمة بطيئة، بالكاد تُلطف حرارة الجو.

أشعل عماد إحدى سجائره المحشوة، مُطلقًا سحابة من الدخان، ثقيل
الرائحة، فقال وائل وهو يبتسم:

- انت بتفوق إمتي يا عماد؟

- لما تبقى فيه حاجة تستدعي.

فضحك وائل، فقال عماد مؤكَّدًا:

- باتكلم بجد.. أفوق ليه؟

- بُص حواليك كدا.. هو في حد فايق؟ عشان افوق له؟ وأشار صوب
القاهرة.

القاهرة التي تعلَّم فيها، أن يُقهر، دون خجل، وأن يقهر، دون شعور بالذنب.

معتز شرباش

تعلّم فيها أن قلمه هو مصدر دخله، وليس سلاحًا، كما قرأ على صفحات
الfacebook، قبل أن يُقهر.

تعلّم فيها أن للحقيقة وجوه عديدة، كلها تكذب.

فاختار أن يكذب الكذبة الأعلى، التي تؤمّن له مخزونًا يكفي من المخدر،
الذي يُعينه على تحمّل مرارة قهره.

- مسيرهم يفوقوا. أجاب وائل.

- تؤ.. ما حدش هيفوق.. ما حدش عاوز يفوق أصلًا. يعني عندك أسماء
صاحبتي.. لما قلت لها الحقيقة خوّنتني وعاملتني على إني مُخبر.. ولما كدبت
عليها في مقالتي عن المناضل ثروت.. وموضوعين على حساب "حشرة"..
رجعت اعتذرت وعرفت إني منهم.

أنا عارف إنك ظابط شريف.. بس لو قلت كدا قُصّادها أبقى باطبل للنظام.
وانا عارف إن ثروت دا ارتكب الجريمة اللي هشام لفقها له.. بس لو قلت
لها كدا.. أبقى مُخبر. واديني باقابلك من وراها وكأني مُخبر بجد.. وباعمل
حاجة غلط.

كان قالها لي مرة كمال حجاب.. الناس بتحب اللي يكذب عليهم. وطلع عنده
حق.

عُمر الشقي

الناس بيحبُّوا اللي يقول لهم "أنا هاقول لكم الحقيقة" ويكرهوه لو نفَّذ كلامه.

- عندك حق يا عماد.

- إمتي بقى نشوف مصر فيها انتخابات بتخلص بنسبة ٦٠% ٤٠%؟ والناس بتحاسب الرئيس؟ والصحافة بتقول الحقيقة؟

و الذ...

- يا ابني قول الحمد لله.. الشعب دا ما ينفعش يتقسم نُصَّين.. هياكلوا بعض، اسألني أنا، شوف في أي مركز ولا مدينة صغيرة.. لازم تبقى في عيلة كبيرة هي اللي مسيطرة.. لو في منطقة عيلتين قوتهم قريبة من بعض.. الحرب بينهم مش بتخلص. واللي بيدفع التمن الناس اللي مش مع حد. وأخرتها بياخدوا صف عيلة منهم.. مش لهدف غير إن الحرب تخلص.. لدرجة إنهم بيشجعوا القضاء على العيلة الثانية.. وهما في الحقيقة بيشجعوا انتهاء الحرب.

تحرك شيء ما خلفهما على السطح، فالتفت عماد، ونظر وائل خلفه دون أن يلتفت، ليجدا أن صوفي هي من استيقظت، وخرجت من باب الشقة التي نسي عماد أن يغلقه خلفه، فابتسما. وقال وائل:

- افكرتها هشام.. كان بيظهر فجأة كدا.

معتز شرباش

- تصدق وحشني فعلاً.. ما سمعتش عنه حاجة؟!!

هَزَّ الرائد رأسه بأسى، فقال عماد:

- كان نفسي نبقى صحاب.

- صحاب مين بقى؟! ما هي بانة.. هو لعبها صح.. لعب عليّ لعبة

هاساعدك.. وهنعمل.. عشان يقنعني أمشي قصة ثروت زي ما هو رسمها.

وانا كنت في وضع ما يسمح غير بأني أوافق.. وأخذ مصلحته ومشي.

اسمع مني يا عماد.. اللي زي دا لو سلّم عليك يبقى عاوز منك حاجة.

ونظر أمامه إلى الفراغ، ولم يُصرِّح بأن ضيقه من هشام، جزء كبير منه،

بسبب أنه بالفعل افتقده، وأنه كان يتمنى أن يقابل هذا الشاب في ظروف

غير تلك اللي قابله فيها.

* * *

٨٦

تنعكس أشعة الشمس، وتتكسر، على سطح النيل، إلى آلاف القطع اللامعة الصغيرة، ويلهو سطح النهر مُداعبًا إيَّها، وكأنه يستمتع بدفئها، فيعكسه ليستمتع به كل متابع لجمال المشهد، وخاصة من على ارتفاع شاهق، مثل عُمر.

طائر أبيض جميل، يُحلق في الهواء، فوق النيل، وكأنه يطمئن عليه، ويتابع زحفه الهادئ صوب الشمال، تابعه عُمر بنظره، وشعر بالغيرة منه، وتمنَّى لو يستطيع رؤية هذا الجمال، بعيون هذا الطائر، في تلك اللحظة بالتحديد.

كان المشهد جميلاً وساحراً إلى أقصى درجة، لا ينقصه سوى وجود مريم معه.

ابتسم عندما شعر أنه يفتقدها، لم يعتد على مثل هذا الشعور بالافتقاد. ذاكرته مكَّنته من استرجاع كل ذكرى عاشها، وقتما يشاء.

كان دائماً يفتقد النسيان، ولكنه أصبح، كعادته، يتذكرها طول الوقت، ويرغب في المزيد، حتى يرغب في تكرار المواقف التي عاشها معها، كما هي، دون ملل.

غَيَّرته هي، ولكن ليس كما يفعل الزَمَن؛ ببطء. بل تغيَّر في الثانية التي وقعت عليها عيناه.

معتز شرباش

هو فقط لم يعترف لنفسه بهذا وقتها، وما زال يتجاهله.

جاءت، شعر باقترابها، فالتفت في اتجاه الباب، ليجدها على بُعد خطوات منه، ابتسمت، وقالت:

- كنت عاوزة أخضك.. عرفت منين اني جيت؟

- شُفت انعكاسك في القزاز. كذّب.

كانا قد اتفقا، ضمنياً، أول مرة تحدثا، على أن يبقىا أصدقاءً، لأن كل منهما لا يرغب بالمرور بتجربة الفقد مرة أخرى، وكان كل منهما يحترم هذا القرار جداً. ولا يسمح لنفسه بأن يتخطاه، برغم رغبته، فكان عُمر يتجنب أي كلام قد يبدو وأنه يحمل في طياته، أي مشاعر تجاهها، وإن وجدت، وكانت هي تفعل مثله.

- وشك منور كدا ومبسوط.. ما لك؟ وابتسمت وهي تجلس.

- انتِ قلتِ أهه.. مبسوط.

- عشان؟

- ما فيش حاجة تضايق. وابتسم، ثم سأل:

- ممم انتِ مش حاطة أي Makeup.. اشمعني؟!

- إيه؟ مش حلوة؟

- انتِ كدا أحلى أصلاً.. وما اعتقدش انتِ ينفع تكوني مش حلوة.. حتى لو

حاولت.. أنا بس باسأل عن سبب التغيير.

عُمر الشقي

تَهَدَّت وحثت له ما حدث قبل نزولها من المنزل، عندما سمعتها والدتها،
وأدركت أنها لن تخرُج للقاء جينا، وأنها كانت تكذب عليها. فصمت لدقيقة،
ثم قال:

- طب ما تحكي لها.. وأجي اقبالها كمان عشان ما تقلقش عليكِ.
- يا عُمر هتقول إن فيه بيننا حاجة.. ومش هاقدر ألومها. ما انت فاهم
الناس بتفكر ازاى.

- عارف.. بس ممكن تفهم وترتاح وترتاحي.. مش عاوزك متضايقه.
نظرت صوب النيل لثوانٍ، وقالت وكأنها تحدث انعكاسها على الزجاج:
- وانا مش عاوزة اتضايق.. ولا عاوزة ازعلها.. ومش عاوزة اخسرك.. ومش
عاوزه احس تاني إني ضعيفة.

- وليه بتقولي ضعيفة؟ إيه اللي خلاك تحسبي إنك ضعيفة يا M؟ هكذا
اعتاد أن يناديها. "إم"

كست وجهها حمرة الخجل، ولم تُجِب، ففهم مقصدها، وأجاب بعد تفكير،
حتى لا يتخطى الخط الأحمر، الذي وضعاه، دون اتفقا، بينهما، خوفاً على
علاقتهما:

- يا M ما فيش ضعف ولا حاجة.. خليكِ واثقة في نفسك.. انتِ مش بتعملي
حاجة غلط عشان تبرريها.. بس ماما من حقها تطمئن عليكِ. دا عادي،
وانتِ لو حكيتِ لها كل حاجة هتثق فيكِ.

تعكّرت ملامحها، وقالت:

معتز شرباش

- هي قالت لي كدا من غير حتى ما احكي لها.. عينها بتقول إنها مقتنعة إننا بنحب بعض.. ما حدش هيفهم اللي بيننا يا عُمر، الناس دايمًا بتحكم غلط، ليه لازم نحب ونتجرح ونخسر الناس القريين مننا؟ ليه لازم نضعف ونتكسر؟

- انتِ ليه دايمًا بتربطي الحب بالضعف والكسرة.. الحب ضعف بس مش بيكسر.. الحب هو الضعف الوحيد اللي بيقوي.

الحُب اكتمال يا M؛ الحب بيكون نقطة الضعف وسبب القوة في نفس الوقت، لو ما بقاش نقطة ضعفنا يبقى احنا مش بنحب كفاية.. ولو مش سبب قوتنا يبقى مش بنتحب كفاية.

ثم أشار إلى النادل، الذي لمح له قادمًا صوبهما، كي يعود أدراجه، وينتظر لدقائق حتى يستدعيه، حتى لا يقطع حديثه، وأكمل:

- عارفة أنا دايمًا باتصور الحُب ازاي؟!

كانت عيناها تلمع، مثل لمعان انعكاس آلاف الشموس على صفحة النيل، وهي تنصتُ له، فهي لم ترَ فيه هذا الجانب من قبل، كان دائمًا الشاب الخطير، الشقيّ، المستهتر. ولكنه الآن يكشف عن وجه آخر، هادئ، وساحر، وفيلسوف.

"ترى هل كان هناك هذا الشاب مُختبئًا ينتظر من يستدعيه؟! أم أنا من زرعته بداخله، وها هو يتفتح أمامي، كوردة ترى الشمس لأول مرة؟!"

أكمل:

عُمر الشقي

- زي لما يكون فيه مكعبات متركّبة بشكل حلو.. وبعدين يبجي حد يفكّها..
ويعيد تركيبها تاني فتبقى في مُنتهى الجمال، دا اللي بيحصل لما حد بيحبنا
بجد.

بنكون نفسنا برضه.. بس بترتيب مختلف، وبنشوف نفسنا بعيون اللي
بيحبنا.. فنبقى أحلى كثير.

اتسعت ابتسامتها، مما لفت نظره إلى أنه بدأ يتخطى الخط الأحمر،
فصمت، ولكنه لم يستطع منع الابتسامة، حاول، حتى لا يُتهم بأنه يقصد ما
قصده بالفعل، ولم يستطع، وكأن روحه تعكس ابتسامتها.

هل تستطيع المرأة الامتناع عن عكس صورة من تراه؟!

"كيف يمكنني رؤية كل هذا السحر ولا أبتسم؟"

غيّرت هي الموضوع، حتى لا يتوها في اللحظة، وينسيا نفسيهما:

- شايفة كدا ما فيش شغل بقالك فترة.

أشار للنادل، بأن يأتي، وأجابها:

- أجازة.. بنستمع شوية وهنرجع.

انتظر حتى طلبت ما أرادت، ثم أشار للنادل، بأصبعين قائلاً:

- اتنين.

- أنا عاوزاك تبطل الشغل دا يا عُمر.

نظر إليها بصمت، ثم تنهّد، وفتح فمه ليتعترض، ولكنها استدركت:

معتز شرباش

- بُص يا عُمَر.. أنا مش باقول لك بطلّ.. أنا باقول لك أنا عاوزة كدا.
وصدّقي مش هتضايق لو رفضت. ومش باربط صداقتنا بتنفيذك لكلامي.
فيه فرق لما اقول لك بطلّ عشان احبّك.. وبين لما اقول لك بطلّ عشان
باحبك.

في الأولى أنا باربط حُبي بتصرّفك.. والحب ما ينفعش يكون مشروط.. وفي
التانية بيبقى رغبة في إنك تكون أحسن مش أكثر، عشان باحبك.
ثم استدركت، وقالت بخجل:
- باحبك كصاحب يعني.

* * *

عاد وائل إلى منزله، بعد يوم طويل، قضاه في التنقل بين المحلات، مع خطيبته، لتسأل عن، وتجرب، المئات من قطع الملابس، حتى تشتري في النهاية، قطعة أو اثنان.

"كيف كان أبأؤنا يخوضون تلك التجربة، في شوارع وسط البلد، صيفًا، قبل ظهور المولات المكيفة؟!"

دخل عُرفة نومه، وخلع قميصه بأسرع وقت ممكن، وشرع في خلع باقي ملابسه، ولكنه تسمّر فجأة، عندما لاحظ وجود ورقة مطوية، على وسادته. نظر خلفه صوب باب غرفته، هل هي أمه من وضعتها؟ ولكنها قابلها في طريقه إلى العُرفة، ولم تذكر له شيئًا، ربما كتبت له شيئًا، خشيت أن تنساه، ثم نسيته بالفعل.

مدّ يده والتقط الورقة، وفضّها، وقرأ بصوت خافت:

"الساعة ١٠ في المكان دا..."

دار ببصره في العُرفة لثانيتين، ثم ابتسم رغمًا عنه.

وصل وائل إلى حيث وجَّهته الورقة، قبل موعده بدقيقتين، مُجرد تقاطع مُزدحم، في منطقة مصر الجديدة، يستحيل إيجاد مكان فيه للانتظار بالسيارة.

صف السيارة، كصف ثالث، سامحًا للسيارات خلفه بالمرور، ولكنه قبل أن يبدأ البحث عن صاحب الموعد، وقفت إلى جواره دراجة بخارية، ورفع سائقها، عُمر، زجاج خوذته، ومال نحو وائل، وقال:

- قدامك ٤ دقائق تلاقي مكان تركن.. وتعالى هنا مستنيك. ثم تحرك وأوقف درَّاجته بين سيَّارتين، وأبطلها، ونزل من عليها، ودار على عقبه ونظر صوب وائل، الذي ابتسم له، وهز رأسه مُحييًّا إيَّاه، فردَّ التحية بمثلها.

بعد دقائق أقبل وائل على عُمر، حيث كان، وسأل:

- مش هتبطّل شغل السيما دا؟ ما تتصل بيّ زي باقي الخلق ما بتعمل.

- وانا برضه زي باقي الخلق يا وائل بيه؟

- مش هتقول لي اسمك إيه بقى؟! وجاييني هنا ليه؟!

- هشام طبعًا. وضحكا، وهزَّ وائل رأسه في غير اقتناع، ثم نظر عُمر إلى

ساعته، وقال:

عُمر الشقي

- دقيقة ولا اتنين كمان وهتعرف.

توجَّس وائل، ونظر حوله في قلق، وسأل:

- هاعرف إيه؟!

نظر عُمر صوب الطريق خلفه، ثم عاد ينظر إلى وائل وقال:

- من غير ما يبان عليك حاجة بس.. شايف الراجل المليان شوية.. أبو شعر

أبيض خفيف دا؟!

حرَّك وائل عينيه صوب الرصيف، ولمح الشخص المقصود، وقال دون أن

يرفع عنه عينيه، وسأل:

- ما له؟!

- أقدِّم لك يا وائل بيه. ثم صمت لثانيتين، حتى نال الفضول من وائل،

وبلغت الإثارة أقصاها، وظهرت على عينيه، التي صرخت تستنطق عُمر، وهز

الرائد رأسه وكأنه يسأل: "هو؟!"

فأوما عُمر برأسه، وقال:

- الشبح.

نظر وائل إلى الرجل؛ مجرد رجل كبير السن، ممتلئ الجسد، حليق الوجه، ذي شعر أبيض خفيف مُسَرَّحًا بعناية إلى الخلف، ويرتدي قميصًا فاتح اللون، وبنطالًا مصنوعًا من الكتان. يسير ببطء، ولا ينظر إلى أحد، وكأنه وحده في الدنيا.

سأل الرائد:

- أنا مش فاهم.. ازاي؟!!

- لي صديق هاكر عبقرى.. نفس الشخص اللي لبس ثروت الصور.. عمل بحث دقيق على كل المواقع اللي اديتها لي.. ورفعنا طلب على موقع منهم بإعلان عشان نستدرجه.. باختصار؛ هو عمل حصر لكل الأجهزة اللي فتحت الإعلان.. وقارنها بكل الأجهزة اللي فتحت كل المواقع الستة.. طلوعوا فوق المية بشوية.. بدأ يبحث الـ ١٠٠ جهاز.. اللي يطلع بتاع طفل.. من الصفحات اللي بيفتحها.. واللي يطلع بتاع ست.. المهم فضل كدا لمدة أسبوعين متواصلين لحد ما وصل إنه بقى واثق إنه جهاز من ٣.. واحد فيهم طلع فيه انترنت كافي.. راقبته يومين.. وقارن الحركة على المواقع بالكافية لحد ما تأكدت إن هو دا.

تابع وائل بنظره الرجل يدخل إلى باب عمارة عتيقة، فسأل:

- وساكن هنا؟!!

عُمر الشقي

- لا.. ما اعرفش عنه أي معلومة.. ولا حتى اسمه. هو عنده مكتب هنا، أو شقة.. ما اعرفش، بس هو مأجر هنا في الدور الثاني، من غير عقد.. لأن صاحب عقد الإيجار الأصلي ميت.. وصاحب العمارة مأجر كذا شقة غير قانوني.

- طب وانت يعن..

- عيب عليك يا وائل بيه.. أنا متأكد.

- طب والمفروض اعمل إيه دالوقت أنا؟! دا ما فيش أي شيء معاك نقدر نستغله ونقبض عليه بيه.

- لا دي بتاعتك انت بقي.. أنا اللي عليّ عملته.

- أنا هاطلع له.

اعتدل عُمر، وقال وهو يضع خوذته فوق رأسه:

- أي أوامر مني سعادتك؟! أظن أنا كدا ردّيت لك الواجب وزيادة.

أمسك وائل خوذة عُمر، وقال بحزم:

- استنى هنا رايح فين؟! انت طالع معايا.

- لا يا باشا.. انسى. مش هيجصل.

* * *

- فتح الرجل العجوز باب شقته، والاستغراب يكسو ملامحه، ونظر
إلى الشابين اللذين يقفان أمام عتبة بابه بتساؤل واضح، فقال وائل:
- مساء الخير يا أستاذ.. ممكن ناخذ من وقتك دقيقة؟
- بخصوص؟! قال بصوت هادئ، ومشروخ، وعميق.
- بخصوص شغل حضرتك.
- اللي هو؟! بتوجس.
ابتسم وائل، ومال قليلاً فظهر للرجل سلاحه الميري، مُعلقاً في حزامه، وقال:
- هنفضل واقفين ع السلم كدا؟!
نقل الرجل بصره بين السلاح، وحامله، وعُمر، ثم تحرك جانباً، وقال:
- اتفضل يا افندم.. أنا بس من حقي أفهم.
دخل الشابان، ودارا ببصرهما في الصالة الواسعة، بسقفها العالي، وأثاثها
القديم، وشعرا وكأنها داخل موقع تصوير لمسلسل قديم، قال وائل وهو
يجلس ويضع قدمًا على الأخرى باستفزاز:
- معقول سعادتك مش فاهم؟
لم يُجب الرجل، ولم يتحرك من أمام باب الشقة، ولكنه أغلقه، فقال وائل:
- عندنا فزورة.. والعصفورة قالت لي إن انت ذكي كفاية إنك تحلها.
لا رد. فأكمل:

عُمر الشقي

- كنت بتشوف أَلغاز المفتش كرومبو؟ أهي حاجة زي كدا. ست لوحدها في البيت.. ما حدش دخل ولا خرج عليها من الصبح.. لقيناها مضروبة بالنار في راسها رصاصه قاتلة، سهلة طبعًا؛ انتحرت.. صح؟!

لا رد، ولا ردة فعل من أي نوع.

"هذا الرجل وكأنه خُلِق من فولاذ" فكَرَّ عُمر.

أكمل الرائد:

- لا هي ما انتحرتش.. ماتت مقتولة.. الفوزرة بقي؛ حصلت ازاي؟!

هنا فقط تحرك الرجل، وتوجه صوب الكرسي المواجه لوائل، وجلس مُثَبَّتًا نظره على الرائد، وقال:

- ريموت كنترول صغير بيشتغل بالبلوتوث مش الأشعة.. عشان ما يكونش مهم توجيهه ناحية عدسة.. يتثبّت في الميزان.. تطلع المدام وتُقف مفرودة عشان الميزان يقرأ صح.. يتحرك موتور صغير يشد الزناد.. الموجه مسبقًا على مكان راسها بالضبط حسب طولها.

بُهِت الرائد، ومعه عُمر، ولم يستطع أي منهم الحديث لدقيقة كاملة، وعينا العجوز مُثَبَّنَة على وائل، بتحدٍ لَمْ يختبره الرائد من قبل.

بعد دقيقتين على الأقل من الصمت، والذي ملأه صوت زحمة السيارات في الأسفل، قال العجوز:

- أنا كدا كسبت.. صح؟!

قال الرائد:

معتز شرباش

- انت فاهم انت بتقول إيه؟!

- احنا بنلعب.. دا اللي أنا فاهمه. وانا كسبت. دالوقت أنا اللي عليّ الدور اسأل.

لا رد. فأكمل الرجل:

- جببتي ازاي؟!

هنا تحدث عُمر:

- من غير دخول في تفاصيل؛ الموضوع احتاج هاكر عبقري.. وإعلان فخ عشان تفتحه بس وما تردش عليه.. وواحد فاضي يراقب كذا مشتبه فيهم.. ويبيجي ٣ أسابيع.

هَزَّ الرجل رأسه مُتفهماً، ثم نظر صوب الرائد، وقال:

- أي خدمات تانية يا حضرة الظابط؟!

لا رد من وائل، الذي ما زال مأخوذاً بما تحقق له أخيراً، ولا يعلم كيف يتصرف، فهو لم يستعد لهذا اللقاء.

نظر عُمر إلى رفيقه، يستحثه صامتاً على أخذ زمام المبادرة، بعد إعلان الرجل غير المباشر عن نفسه، حتى قال الرجل:

- سيادتك جاي من غير قوة.. ولا إذن نيابة.. ومعاك واحد صاحبك، ثم أشار إلى عُمر، وقال:

- دا مش منظر ظابط. يبقى مش معاك دليل واحد على أي شيء.

السؤال بقى؛ عاوز إيه؟!

عُمر الشقي

- عاوز رقبته على حبل المشنقة.

"تحدّث أخيراً"

- ليه بس؟! أنا عملت إيه عشان كل دا؟

- انت لسا مُعترف.

- ما حصلش.. انت اتهمياً لك بس إني اعترفت، واحتدت نظرة التحدي في

عينيه.

- ليه؟! سأل وائل.

ابتسم الرجل لأول مرة، وقال:

- هنكمل لعب؟! سؤال بسؤال؟! ماشي، أقول لك ليه؛ أكل عيشي.

أنا زي زي أي مُحامي سعادتك بتنده له باسمه وقبله أستاذ لما بيعي لك

مكتبك، برغم إنك عارف إنه بيتلاعب بالأدلة.. وبيرشى الأمين عشان يبذل

الحرز.. ويخرج المجرم براءة. أنا بقى باضمن براءة المجرم قبل الجريمة مش

بعدها.. فرقت؟!

طب انت عارف إن المحامي دا بيخالف القانون.. وانا لأ؟! ما تستغربش.. دي

حقيقة، أنا مش باعمل حاجة في الحقيقة.. أنا مُجرد مُستشار.. القانون

بتاعكم ما عندوش عقوبة للي زيي.

- شيطان يعني.. بتغوي البشر.. وتقول هما اللي بيغلطوا مش أنا، قال عُمر.

- وهو الشيطان يبقى غلط لما يقول كدا؟! البشر هما اللي بيعصوا.. مش

هو اللي بيعصّهم.

معتز شرباش

- وعشان كدا هيدخل النار. زي مانت هت... قال وائل.

قاطعته الرجل:

- لا.. الشيطان هيدخل النار عشان خالف أمر خالقه.. مش عشان بيغوي البشر، والدليل في شكل سؤال؛ لو ما كانش ركع.. وما أغواش البشر.. كان هيدخل الجنة؟!

- انت بتحرّض على القتل.

- غير صحيح.. أنا الشخص بييجي لي مقرر جاهز.. نفسه هي اللي وسوست له.. عشان هو بني آدم.. قاتل بطبعه وغريزته، أنا بس مستشار متخصص في فتح ثغرة قانونية يعديّ منها.

- انت مريض.

- لا. أنا ما هو أسوأ.. أنا بشر.

"ليتك هنا يا نادر" فكّر عُمر.

- انت بتكره البشر قوي كدا ليه؟

- البشر والقانون.. أعدائي، وكسا الاشمنزاز ملامحه.

- أقول لك أنا فزورة بقي يا حضرة الظابط؛ لما زوج يرفض يطلق مراته ويغتصبها يوميًا.. ويستغل نفوذه عشان يخوّف أهلها.. ويجبرها على الانتحار.. مش يبقى قاتل؟ لما يطلّع عليها إشاعة بعد موتها ويدنس ذكراها.. مش يبقى قاتل؟ لما أهلها نفسهم يصدقوا لمجرد إنه قوي وصاحب نفوذ..

عُمر الشقي

مش يبقوا قتلة؟ لما الناس تتناقل سيرتها الي هو شوها بينهم ويثبّتوها..

مش يبقوا قتلة؟

أهم كل دول بقى؛ القانون الي سيادتك بتخدمه.. مش بيجرّم منهم ولا

واحد، زي ما هو مش بيجرّمني كدا.

قانون أعرج.. وضعه بشر.. عشان يفلت من العقاب كل الي ذكي كفاية إنه

يفهمه.

سؤالي لسيادتك؛ انت بتخدم القانون؟ ولا العدالة؟

- انت عشت قصّة حُب فاشلة.. وبتطلعها على كل الناس؟! بتحمّل البشر

كلها نتيجة فشلك في حماية الي بتحبها؟!

لاحت علامات الغضب على ملامح الرجل لأول مرة، ولكنه تمالك نفسه،

وقال:

- ما جاوبتش على سؤالي.. وبلاش سداجة وتقول القانون والعدالة واحد..

لأنك عارف إن دا مش حقيقي.

- لو بتخدم القانون.. أنا قانوناً ما ارتكبتش ولا جريمة.. وما فيش دليل واحد

على وجودي من الأساس.

لو بتخدم العدالة.. يبقى تستقيل فوراً.. لأنك في الوظيفة الغلط، لأن ما

فيش حاجة اسمها عدالة في عالم يحكمه البشر.

العدالة دي زي الديموقراطية والإنسانية كدا.. مجرمين بيضحكوا بهم على

مُغفلين. العدالة والإنسانية والديموقراطية والمساواة والعدل الاجتماعي كلها

معتز شرباش

شعارات.. آلات جبارة اتعملت عشان تخدم الأشرار.. وزيت التشحيم بتاعها هو دم البشر.

ابتسم عُمر، فنظر له وائل شذراً، ثم نظر إلى الرجل، وقال:

- وانت بقى اللي بتحقق العدالة في الدنيا.

- واضح إنك ما بتسمعش.. أنا بشر.. ما ليش في العدل دا.. ما اعرفوش.. أنا

كل اللي باعمله إني باساعد البشر يظهرُوا على حقيقتهم.. وباكشف ثغرات

القانون.. بفضح أعدائي يعني.

- ومستفيد إيه؟!

- باشوف الناس بتتعذب.. أعدائي.

- بتعذبهم بقتلهم؟!

- لا اللي اتقتل مش بيتعذب.. اللي بيتعذب فعلاً اللي ارتكب الجريمة.. وأهل

المقتول. ثم أشار إلى الأعلى بسببته، وكأنه تذكر شيئاً لتوه، وقال:

- في جملة تقريباً سمعتها في فيلم.. بتقول: أنا لم أخدع أحداً في حياتي أو

أسرق.. وتوقف ليتذكر، فقال عُمر:

- أنا لم أخدع أحداً في حياتي.. ولم أكذب ولم أسرق أو أقتل.. فلماذا حياتي

سيئة إلى هذا الحد؟ - لقد أجبت بنفسك عن سؤالك.

دا الكاتب ليونيد خلينوفسكي.

- ممم مُثقف صاحبك يا حضرة الظابط.

عُمر الشقي

- مش فكرة ثقافة.. أنا بس ذاكرتي قوية شوية.
- وما لك بتقولها كدا كأنها لعنة؟!
- لأن هي كدا بالفعل.. ممكن بقى أعرف أهل المقتول ذنهم إيه؟! قال عُمر
مُشمئزاً.

- في اللحظة اللي هتفهم البشر على حقيقتهم.. هتدرك إن كُلهم مُذنبين..
حتى اللي ما ارتكبش جريمة.. دي طبيعته.. هتظهر عاجلاً أم آجلاً.. زي قصة
العقرب والضفدع كدا، ما فيش بشر أبرياء.. لازم وسطهم تكذب وتسرق
وتقتل.. زي ما الكاتب دا قال، وأشار إلى عُمر.

- لو ما فيش أبرياء ما كانش ربنا خلق الجنة.

زفر الرجل زفرة استهزاء وقال:

- ربنا بتاعك نفسه مش بريء.

لَمْ يُجِبْ وائل، ولكن غضبه بدا واضحاً، فأكمل الرجل:

- أثبت لك؟! مش في الشرع اللي بيعمل فعل.. أو بدعة.. بيتحاسب عليها هو
وبيفضل يتحاسب على كل من اتبعوه؟! حتى لو هو نفسه تاب عنها؟! طب
ما احنا لو طَبَّقنا نفس القاعدة على ربنا هنجاسبه على خلقه للشر، وكل
أفعال الأشرار.

هنا قال عُمر:

- انت بتهذي حرفياً.. أولاً ما ينفعش نطبق قاعدة بشرية على الخالق.. ولكن
نفترض جدلاً إنه ينفع.. بما إنك بتحسبها بالمنطق.. اللي بيبدع بدعة

معتز شرباش

بيتحاسب لأنه ضلل الناس وفهمهم إن دا الصح.. مع إنه غلط.. وأدّى بهم لطريق الضلال، ولكن ربنا لما خلق الخير والشر.. قال للناس الصح فين والغلط فين، انت اللي بتختار تروح يمين ولا شمال.

- ولما هو قادر يمنع الغلط.. ساكت ليه؟

- عشان هيحاسبك.. هيجازيك خير لو انت اخترته.. وشر لو انت اخترته. نظرتك؛ زي نظرة كثير من الأغبياء اللي بيصبوا على الصورة بعين واحدة. وفاكرين إن اللي اتظلم في الدنيا ومات وما أخذش حقه.. إن حقه ضاع. لكن اللي خلقنا عادل.. وكل اللي ما أخذش حقه في الأرض بسبب ظلم البشر.. هياخذ حقه فوق.. لدرجة إن اللي أخذ حقه في الأرض هيقول يا ريتني اتظلمت.

دا أنا عندي يقين بيه؛ دي حاجة اللي زيّك ما يعرفهاش.. اسمها الإيمان بالله.

نظر وائل إلى عُمر بإعجاب، وقال العجوز:

- طب بما إن القاعدة قلبت على حصة دين.. اتفضلوا يا بهوات شرفّتونا. طول ما انت مش مقتنع إن البشر مجرمين.. مش هاقدر اقنعك إن خلقهم كان غلط. وما فيش مجنون بيشف نفسه مجنون الحقيقة.

- بالظبط كدا.. لما بتترنق بتمشي، قال عُمر.

لم يجب الرجل، فقال وائل:

- انت فاكر إني هاسيبك؟!



- لا طبعًا.. أنا واثق في غبائك. ماعلش يا حضرة الظابط.. بس انت فعلاً مضطر تسيبني.. لأنك لو قبضت عليّ هتبقى بتضيع وقت. لأن ما فيش أي دليل على وجود التهمة اللي انت بتتهمني بيها.. ولا أي دليل ضدي. وحتى لو الزوج اللي انت مسكته اعترف.. هو ما يعرفش أنا مين. ودا دليل تاني على إن القانون اللي انت بتخدمه أعرج.

انت في بلد شعها بيؤمن إن العيلة اللي ما فيهاش صايح حقها ضايح، وعاوز تطبق القانون؟! يا راجل كَبَّرْ مُخَك.

لم يُمهّل الرجل أيًا منهم وقتًا ليُجيب، فقام، وقال:

- بس أنا عشان واثق إنك مش هتسبني.. وهتضيع وقتك ووقتي.. هاعرض عليك عرض لا يمكن ترفضه.

ضيقَ الرائد عينيه، وسأل صامتًا عن العرض، فقال الرجل:

- مقابل كلمة منك إنك ما سُفتنيش.. أنا هاديلك وحالًا.. ملّف فيه كل الجرائم اللي خططت لها.. وكل بياناتها.. وبيانات مُرتكبيها الحقيقيين.

- بالبساطة دي؟!!

ضحك عُمر ضحكة خافتة، وهز رأسه، فنظر وائل صوبه، ثم نظر إلى العجوز الذي قال:

- هاسيب صاحبك اللي يجاوبك.. ومستني كلمتك.

نظر وائل إلى عُمر، الذي قال:



- انت لَسَّا ما فهمتش؟ هو مش فارقة معاه الناس اللي خطط لهم.. كلهم بالنسبة له يستحقُّوا القتل.. بالظبط زي الشيطان اللي هيتبرأ من أتباعه. نظر وائل إلى الرجل، فأوماً مؤكداً على كلام عُمر، وقال ساخرًا:
- أنا برضه يهمني العدل بتاعكم يتحقق، ها يا حضرة الظابط.. قلت إيه؟!
لم يُفكر وائل، وقال:
- موافق..

بس أنا اضمن منين إنك هتسلمهم كلهم؟!
- لو سمعت أي حاجة من اللي قلناها النهاردا ما تسألش السؤال دا، قال الرجل وقام مُتوجِّهاً صوب غرفة مكتب، فقام وائل يتبعه، فهو لا يريد للرجل أن يغيب عن نظره، نظر الرجل إليه، ثم أكمل طريقه ولم يُعقب.
دخل غرفة المكتب، وتوجه إلى خزانة حديدية وفتحها، وأخرج منها رزمة أوراق ثقيلة، ناولها إلى وائل. الذي سأل:
- هما كام جريمة؟!

- ٤٧.. أنا كنت ناوي ابطل عند الـ ٥٠.. وابدأ اشوف طريقة أنشر بيها قصيتي. وأخرج ظرفاً من الخزانة، مكتوباً عليه؛ "مذكرات"، ورفعها أمام وجهيهما،
وأكمل:

- بس طالما انت لقيتني النهاردا.. يبقى جه وقتها.
قال عُمر، وهو ينظرُ إلى الظرف:

عُمر الشقي

- أعرّف روائي ممكن يدفع نُص عمره ويقرا مُذكراتك دي، دا حتى اختار اسم الرواية اللي هيكتبها عنك. "**الجريمة للجميع**".

مَدَّ الرجل يده بها إلى عُمر، وقال:

- عجبني الاسم.. بس أمانة عليك توصلها له.

ثم نظر خلفه، وقال:

- وخذ دي كمان.. وأشار إلى آلة كاتبة عتيقة.. دي اللي كتبت عليها كل حرف في كل ورقة بين إيديكم.

كان وائل يقلب الأوراق بحثًا عن قضية بعينها، حتى وجدها؛ قضية سليمان الهجّام.

نظر إلى الملف الذي يحمل اسم "**عملية تليفق الهجّام**"، وتجمّعت الدموع في

مُقلتيه، وكأنه يلتقي صديقًا قديمًا عائدًا من الغربية. ولكنه أجفل عندما

سمع صوت عُمر يقول مدعورًا:

- إيه دا؟! احنا ما اتفقناش على كدا.

فدار مواجهًا الرجل، ليجده حاملًا مسدسًا، ومصوبًا إيّاه صوبهما، فمَدَّ يده

تلقائيًا صوب سلاحه، فحدّره الرجل:

- بلاش تعمل حاجة تندم عليها.. انت اديتني كلمة.. وانا مش طالب منك غير

إنك تنقّدها، دا مُجرد ضمان إنك هتلتزم بكلامك.. خدوا كل حاجة

واتفضلوا يلا.

انتهى عُمر من تثبيت الآلة الكاتبة، على درّاجته البخارية، ثم بدأ في البحث بين ملفّات الجرائم، التي وضعها وائل على إحدى السيارات الواقفة.

- ممكن بس اعرف انت بتدوّر على إيه؟!

أجاب عُمر وهو لا يزال يبحث:

- في قضية أنا شاكك إن الشيطان دا له يد فيها.. وهي كانت السبب اللي خلّاني أساعدك من الأساس نوصل له.

هزّ وائل رأسه، ولم يُعقّب، حتى انتهى عُمر من البحث، ثم نظر إلى وائل وابتسم وهزّ رأسه:

- إيه؟! لقيتها؟

ضحك عُمر، وقال:

- لا.

- وإيه اللي بيضحك؟!

- إن لولا كلام معين سمعته عن القضية دي.. اللي طلع كله مُجرد صدفة..

ما كنتش فكرت أساعدك.. ولا اتعرف عليك.. ولا كنا هنوصل للشيطان دا.

مش قلت لك يا باشا؟ علامة، وأشار إلى السماء.

أوماً وائل وقال:

عُمر الشقي

- ونعِم بالله.

شبك عُمر ذراعيه أمام صدره، وأسند ظهره إلى السيارة، وقال لوائل:
- بس أنا استغربت بصراحة لما وافقت على طول تاخذ القضايا وتسيبه.
انت طبعًا عارف إنه بعد ساعة بالكثير مش هيكون له وجود.. هيختفي.
صح؟!

- عارف طبعًا.. أنا مش غبي، بس أنا فيه واحد مرة قال لي.. لما تكون عاوز
من ١ ل ١٠ ويتعرض عليك من ١ ل ما ترفضش. وانا بصراحة اقتنعت
بكلامه.

دا غير إن الشيطان دا هيُقع هيُقع.. أنا بس ضمننت انتصار. زي ما الراجل
قال لي مرة.

فابتسم عُمر، وقال:

- كلامه زي الفل بصراحة.

- فعلاً.. أثّر فيّ واتعلمت منه.

- وانت كمان أثّرت فيه واتعلّم منك.

تبادلنا نظرة عرفان، وشكر، كالأصدقاء. ثم قال وائل:

- ما ينفعش تسيب صاحبك دا ينشر سيرة الشيطان دا ويعمل منه بطل.

- لا بطل إيه؟! ما تقلقش يا باشا.. هيطلع شيطان كما يستحق.

صمنا لثانيتين، ثم انتصب عُمر، وقال:

- أسيبك أنا بقى يا وائل بيه، ومد يده إلى الضابط، وأكمل:

معتز شرباش

- خُد بالك من نفسك.
- مش هارجع تاني مرة البيت ألاقي ورقة على سريري؟
- مين عارف؟ وابتسم.
- وانا لو احتاجتك؟
- صمت عُمر لثوانٍ، ثم قال:
- انده لي من الحساب الشخصي بتاعك ع facebook.
- مريم برضه؟!
- قال عُمر وهو يركب درّاجته، ويضع الخوذة:
- لا لا.. ارتجل.. وانا هاعرف إن الكلام ليّ.
- خُد بالك من نفسك يا... اللي مش هشام، الطريق اللي انت فيه دا خطر.
- ما تخافش عليّ يا باشا.. عُمر الشقي.
- ثم أغلق خوذته، وقاد بعيدًا.

* * *

خبر في جريدة "الضمير":

"انتحار رجل خمسيني في شقته بالمنيل"

قرأ وائل تفاصيل الخبر، ثم أغلق الجريدة، واتصل بمعاونه وطلب منه التواصل مع فريق البحث المسؤول عن تلك القضية، والحصول منهم على صورة المنتحر.

لا يعلم لماذا شعر، أنه هو الرجل الذي قابله منذ أيام، ربما لأن استسلامه له، بدون إنكار أو مقاومة، أرسل رسالة مُبَطَّنة مفادها، أنه أنهى عمله، أو انتقامه، وحن وقت اعتزاله.

شكَّ وائل في إمكانية حدوث ما حدث، إن صحَّت توقعاته، ولكنه لم يحاول منع الرجل، فالعدالة تتحقق، عاجلاً أو آجلاً.

رَنَّ هاتفه، فأجاب بلهفة واضحة:

- ألو.

- ناجي رجب معاك يا وائل بيه.

- صباح الفل يا ناجي بيه.. تعبت معاليك معايا.. وصلت لحاجة سعادتك؟!

- أيوة سيادتك.. سليمان معاك أهه.

- ألو، قال سليمان الهجّام بصوته الأَجَش، عبر الهاتف.

فقال وائل:

معتز شرباش

- إزنيك يا سليمان؟! عارفيني؟!
- أيوة يا بيه.. سعادة الباشا هنا قال لي إن سعادتك عاوز تكلمني وطبعًا فاطر اسمك.
- مش هاطول عشان ما نعطلش ناجي بيه.. أنا وصلت لحل قضيتك يا سليمان.. ووصيت بنفسي ظابط مباحث شاطر في الأقصر اسمه عصام ناجي.. هيتابع القضية.. عشان يوصل لاعتراف يخرجك من جريمة القتل.
- ياه يا وائل بيه.. والنبي صحيح يا بيه؟! مش عارف اقول لك إيه.
- شعر وائل باختناق صوت الرجل، وكأنه على وشك البكاء، فقال:
- قول الحمد لله.. انت اتحبست الكام سنة اللي كنت هتتجسسهم في السرقة.. المؤبد هيتشال بإذن الله.. ربنا ما بيظلمش حد.
- انت ما تعرفش كام واحد مصيره.. وحياته اتغيرت.. عشان اللي بيحصل دا يحصل يا سليمان، ربنا كبير قوي، افتح معاه صفحة جديدة يا سليمان.
- ونعم بالله يا بيه، ونعم بالله.

* * *

**لا يُمكن اختصار الحياة كُلها في كلمة واحدة، إلا
إذا كانت اسم من عشق.**

فتحت والدة مريم باب الشقة، لتجد شابًا وسيماً، يرتدي "جينز" أزرقًا، "وتي شيرت" أبيضًا، وابتسامة ساحرة، فهزّت رأسها، بتساؤل، فقال:
- مساء الخير يا ماما.. أنا اسمي عُمر.. كنت جاي عاوز حضرتي..

ظهرت مريم، بملابس البيت، خلف والدتها، ومُهتت عندما وجدت عُمر صديقها، على باب شقّتها، واتسعت عيناها على آخرهما، واقتربت، فابتسم ونظر إليها، فنظرت السيّدة خلفها إلى وحيدتها، ثم أفسحت الطريق عندما فهمت أنه صديق مريم الخفي، وأشارت له بالدخول.

استأذنت السيّدة من عُمر، وذهبت إلى المطبخ لإعداد الشاي، فجلست مريم أمامه، غير مُصدقة، وقالت:

- انت بتعمل إيه هنا يا بن المجنونة؟!

فضحك، وقال:

- بصراحة كنت باتفرج على فيلم من شوية.. وحصلت حاجة حببت اقولها لك.

- نعم؟ وما اتصلتش بيّ ليه؟!

عُمر الشقي

- لا لا ما ينفعش في التليفون.

نظرت صوب المطبخ، وقالت:

- طب قول يا مجنون.

- أنا لما باتفرج على فيلم وبتكون فيه لقطة مؤثرة؛ رومانسية.. أو بطولة.. أو تضحية.. دموعي بتنزل وساعات بابكي فعلاً.

ما تستغريش استني هتفهمي.

أنا لما باكون باشوف فيلم مع حد.. ويحصل كدا.. باتكسف وبامسك نفسي.. وامنع دموعي.

النهاردا وانا باشوف الفيلم حسيت إن لو انتِ موجودة معايا مش هاداري دموعي، هاشاركك اللحظة زي ما هي، ساعتها حسيت قد إيه انتِ مميّزة عندي، فحبيت تعرفي غلاوتك.

انتِ الوحيدة يا مريم اللي عرفتني زي ما انا.. من غير أي أقنعة ولا تعديل ولا تذويق.. وقبلتني زي ما انا. دا بقى كان آخر سر عني ما تعرفهوش. واديكِ عرفتيه.

ملأت الدموع مُقلتي مريم، وهي تسمعه، ولم تلاحظ هي، ولا عُمر أن والدتها، تراقبهم من على بعد خطوات.

معتز شرباش

- حاجة أخيرة؛ من النهاردا أنا هاتغيرّ عشانك.. هبقى الحد اللي انتِ نفسك
أكونه.. مش عشان انتِ عاوزة دا.. لكن عشان انتِ تستاهلي دا.

أه.. حاجة كمان؛ من النهاردا انتِ بتاعتي.. لوحدتي.

هربت دموعها من عينها، ولكنها لم تكثرث، وقالت بعناد:

- يا سلام.. ليه يعني؟ اشتريتني؟

- آه اشتريتك.

رفعت حاجبها، وسألت:

- والله؟! واشتريتني بكام بقى إن شاء الله؟!

- بيّ، وابتسم.

* * *

"اليوم أتممت عليكم لعنتي"

كتبها الرجل، ثم ترك الورقة في مكانها على الآلة الكاتبة، منتصباً أمامه كشاهد قبر.

ثم أمسك بمسدسه، الذي كان إلى جوار آله الكاتبة، ورفع مصوباً إياه إلى رأسه، الذي رفعه بشموخ مُشمئز، وكأنه يتعالى على شبح الموت، ويقول له لا تتوقع خضوعاً، ولا خوفاً.

فالخوف بالفعل لا يعرف طريقاً إلى قلب هذا الرجل، وهو من اعتاد أن يفرض الخوف والموت على أعدائه البشر.

يُقال أنه عند الموت، يمر أماننا شريط حياتنا كاملاً، ولكنه لم ير شريط حياته، ولكن تجسدت حياته أمامه في صورتها، تلك الفاتنة التي كان اسمها حياة، وكان أهلها علموا أنها ستكون حياته، والتي انتهت بموتها حياته.

ابتسم لها، وتجمعت داخل مُقلتيه قطرات دموع، لم يذرف مثلها منذ أن ماتت هي.

معتز شرباش

**لم يبكِ خوفاً من الموت، ولكن بكى لأنه الوداع الأخير؛ فالملائكة
والشياطين، لا يجتمعون سوى على الأرض.**

**ثم أغمض عينيه، وضغط الزناد، لتتلطخ آخر أوراقه، بدمائه، وكأنه أراد أن
يوقّع سيرته، بتوقيع يليق بها.**

لتنهى قصة الرجل الذي أحب فتاة، وكره بعد موتها كل شيء.

توقف نادر عن الكتابة، أخيراً، على الآلة الكاتبة المزعجة، فخيّم السكون
على غرفة نومه، بعد أن استمر قرابة الساعتين يكتب بشكل متواصل نهاية
روايته الأولى؛ "الجريمة للجميع".

ضم قبضتيه ونفخ فيهما، حتى يدفئهما، ويحميهما من برودة ديسمبر
القاسية، ثم وقف، وانتزع آخر الأوراق من الآلة، ووضعها في مكانها فوق
كومة كبيرة من الأوراق، التي تحكي قصة الرجل الذي لم يسمح له الحظ
بمقابلته، ولكنه سمح له بكتابة قصّته، وابتسم.

* * *

تمت بحمد الله

للتواصل مع الكاتب

Email: msharabash@icloud.com

Facebook: facebook.com/msharabash


Facebook Page: facebook.com/moatazsharabash

Instagram: instagram.com/msharabash

Twitter: [@MoatazSharabash](https://twitter.com/MoatazSharabash)

#رواية_عمر_الشقي





W r i t e r
M o a t a z
S h a r a b a s h



عُمر الشقي

"اليوم أتممت عليكم لعنتي"

كتبها الرجل، ثم ترك الورقة في مكانها على آلة الكتابة،
منتصباً أمامه كشاهد قبر.

ثم أمسك بمسدسه، الذي كان إلى جوار آله الكتابة، ورفع
مضروباً إياه إلى رأسه، الذي رفعه بشموخ مُشمئز، وكأنه
يتعالى على شبح الموت، ويقول له لا تتوقع خضوعاً، ولا خوفاً.

لم يبك خوفاً من الموت، ولكنه بكى لأنه الوداع الأخير؛
فالملائكة والشياطين، لا يجتمعون سوى على الأرض.

ثم أغمض عينيه، وضغط الزناد، لتتلطخ آخر أوراقه، بدمائه،
وكانه أراد أن يوقع سيرته، بتوقيع يليق بها.

معتز شرباش

روائي مصري، تخرج من كلية التجارة جامعة عين شمس،
صدرت له رواية "حُسن سير" 2016، وقصص وخواطر "ابتسمي"
2017.



تصميم الغلاف : أحمد الصباغ

ISBN 978-977-6642-10-2



9 789776 642102

لوغاريتم

للنشر و التوزيع
Logarithm
Publishing & Distribution

